

مدرسه حقوق

ایکینجی قسم




حکمت حقوق

منیف یاشا حضرتلریناب تقریر سامیلرنااس مکتب حقوق
شاهانه شاکر، اتندن ثابت افندی قلیله ضبط و تحریر
ایدلمشدر

اخطار مخصوص

ن مقامنده اولان عباردر شو () اشارتدر دروننه انمشدر.



معارف نظارت جلیله سنک رخصتیه طبع اولنمشدر

استانبول

لیان) — اداره شرکت مرتبیه یجو عالی جاده سنده نومرو ۳۴

۱۳۰۲

بسم الله الرحمن الرحيم

مقدمه

حکمت حقوقك تعريفی و موضوعی و مآخذ و منبى و تاريخی
و غایت و فائده سی حقنده در .

۱ — (حکمت حقوق Philosophie du droit)

حقوقك اساسندن یعنی مبنی علیہی اولان مسائلدن بحث ایدر
بر علمدر .

معلومدر که هر شیئک بر حال ظاهری و برده حال باطنی اولدیغی
کبی علم حقوقك دخی حال ظاهر و باطنی واردر . بونک حال ظاهری
قوانین ایله قوانین قوتنده اولان عرف و عادات و تعامل و حال
باطنی اشبو قوانینک علل و اسبابی بیان ایدن حکمت حقوقدر .
معلومدر که قانون فلان شی شویله اوله جقدر و بر کسنه شو
حرکتده بولنورسه مجازات اوله جقدر و فلان خصم بولم
اولق لازمدر کبی بر طاقم احکامی امر و بیان ایدر ؛
اول شی او یله اوله جقدر و اول کسنه مجازات اوله جقدر .

خصوص اويله اولمق لازمدر بورالردن بحث ايتمز . اشته بورالردن يغنى احكام قانونيه نك علل واسبابندن حكمت حقوق بحث ايدر . الحاصل حكمت حقوق بالجملة احكام قانونيه نك علل واسبابنى متضمن برعلم جليل الشاندر .

حكمت يالكز علم حقوقه مخصوص دكادر ؛ سائر علملك دخی حكمتی واردر : علم حساب ، علم جغرافيا ، علم تاريخ و علوم سائر دن هر برينك علل واسبابنى بيان ايتك علوم مذكوره يه مخصوص اولان علوم حكيميه عاندر ؛ مثلا فلان محله بر دكر موجود اولديغنى علم جغرافيا كوسترر ايسده او دكر نصل ونيچون وجوده كلك اولديغندن حكمت جغرافيا بحث ايدر ؛ كذلك حرب و صلح و بردولتك ظهور و انقراضى كى وقايع سالفه يه وقوف علم تاريخه متوقف ايسده بونلك علل واسباب وقوعه اطلاع حكمت تاريخه متوققدر .

§ ۲ — (حكمت حقوقه تعبير ديكرله حقوق طبيعیه Droit naturel دخی دنيلوركه طبيعت و خلقت انسانيه موجود اولان حقوق ديمكدر .) حكمت حقوقه حقوق طبيعیه دنيلسنك سببى بو حقوقك قنى زمان و مكانده اولور ايسه اولسون انسان ايله برابر وجوده كلى يغنى انسانك ذاتنده موجود اولسى و مدت حياتنده كندوسندن منفك اولماسيدر . حقيقه بو حقوق انساندن منفك اولمز حتى بعض حكما انسانك وفاتندن صكره بيله باقيدر ديمشلردر مثلا بر كسنه نك وصايا و اوقافنه تعلق

و اصلاحنده انلرك اساس اتخاذايدلسى لازمدر . (اشته حكمت حقوق) و تعبير ديكرله حكمت حقوقك مأخذ و منبعى (انلردر) و بونلر يعنى او قواعد حقانيت ايسه عموما نوع انسانك يعنى عقول سليه اصحابنك مشترك و عموما اعتقاد ايدوب متفق عليه اولدقلرى شيلردر .

حکمت حقوقك تاريخى

§ ۵ — (حكمت حقوقه تا حكماى يونانيه زمانلرنده باشلاندى . حكماى يونانيه ابتدا ماديات ايله صكرده مغويات ايله مشغول اولديلر . اشته موجوداتك حكمتى تفحص اولنديغى صرده امور مغويه دن عد اولئان بو علم دخى تدوين اولندى . حتى حكماى مشار اليهمك مشاهيرندن افلاطون و ارسوطو افكار قوميه وعدليه و سياسيه نك فطرت انسانيه ده موجود اولديغى و بو افكارك فطرت انسانيه ايله مناسبتى يعنى انسانك ماوضع لهنه مطابقتى بولنديغى و بو افكار خلقت انسانيه ده كى مقاصد دن برى ايدوكى ادراك و بيان بيور مشلردر .) واقعا قوانينى على العميا كيف ما اتفق يابئش و خود سرانه بر صورتده ظهوره كلش احكام و حر كات دن اولق اوزره تلقى ايدنلر وار ايسه ده حقيقت حال بو مر كزده اوليوب بونلرك از چوق فطرت انسانيه ايله و مناسبتى انسانك مقصود بهى ايله مطابقتى واردر .

﴿اشته یونانیلر بومناسبت ومطابقتی بالادراک حکمت حقوقی تدوین ایتشلر ومؤخرا اسکی رومالولر دخی بونی برخیلی توسیع ایتشلر ایسه ده انقلابات معلومه مناسبتیه اوروپایی ظلام جهالت استیلا ایتدیکی زمانلر بوعلم دخی پرده استتار التده احتجاب ایتمشیدی . نهاییه الامر بوعلم اوچیوز سنه دنبرو اوروپاده یونکله اشتغال ایدن علمایه عرض کلچهره ایدرک زیاده سیله توسع وحقی حقوق طبعیه نك امور هیئت اجتماعیه ده استعمالی تقرر ایتشدر .﴾ حکمت حقوقک استعمالی بیلمیان زمانلرده دخی قانون یاپیلور ایسه ده یاپیلان قانونلرک موافق اصول وقواعد حقانیت اولوب اولمدینی بیلمیز وانلردن مقصود اولان مطالب حسنه حصوله کمر ایدی . مقدملری کیف مایشاء وضع اولنمش اولان قوانینله شمدی حکمت حقوقه تطبیقا وضع اولنان قوانین مقایسه اولنور ایسه بینلرنده فرق عظیم اولدینی وبومناسبتله بوعلمک منافع کلیه سی بولندینی میدان چیقار .

حکمت حقوقک غایت وفائده سی

§ ۶ — ﴿حکمت حقوقک غایتی﴾ یعنی بونک تدرس وتحصیلندن حاصل اوله حق فائده ﴿اولا حقوق موجوده نك﴾ یعنی بین الناس موضوع ومرعی الاجرا

اولان قوانین وقواعد حقوقك) اساس معقولهیه موافق اولوب اولدیغی تدقیق ایدوب اكلامق وثنائاً یكى قانون وضعنده مابه التطبيق اولق) یعنی اكا تطبيق اولتق) در .

(حکمت حقوق مطلقاً حکمتك بر نوعی وبر جزؤ وفرعیدر ؛ حکمت هرشیئك علت وغایتی اكلامق ایچون اولدینی کی حکمت حقوق دخی قوانین موجوده نك مبنی علیهی اكلامق وبونلری اصول ثابتهیه توفیق ایله اصلاح ایتك ایچوندر .

علم حکمت عقل انسانینك مساعد اولدینی مرتبه اشیا وحادثاتك عال واسباب وحقایقنی یلدریر ؛ عقل انسانی هرشیئك موجب ومقصودینی یلك ایستر ؛ مثلاً کیمه اولیور ، کوندوز اولیور ، بخارده والقتریقده برخاصه وار ؛ بونلری هرکس کورر ؛ لکن عوام ناس کورمکله اکتفا ایدر ؛ اما حکیم اولان ادم اسبابی ارار ؛ قر نیچون کوچلیور وشمس نیچون طلوع ایدیور ؟ دیر ؛ حاصلی ورای پردهیی کوره مزسده دلائل واماراتله یلك ایستر ؛ عقل انسانی مساعد اولدینی مرتبه هرشیئك اسبابی وغایتی اكلامق ایستر ومتغیر اولان علامدن قواعد ثابته ارار ؛ مثلاً بو عالمده قاریشق شیلر کوریورز ؛ طوررکن هوا قرارییور ؛ حالبوکه بوتغیرلر برقاعده ثابتهیه مستنددر ؛ انك ایچون حکما دیورکه : بودنیاده کوریلان انتظامسزلقرك كافه سی برانتظام ایچوندرکه دنیانك بقاسنه

وقوانین موجوده سنك محافظه سنه بادیدر . خواص بویله متغیر
اولان علایمه قواعد ثابتی و کذا کاه حرب و کاه صلح و قوعی
کبی اختلافات حوادثه وحدت اصولی و موجوداتك علت غائی سنی
Dernière cause و حق تعالی ایله صنوف مخلوقات بیننده کی
مناسباتی ارار و بوتلری ارایوب بولمق ایسه علم حکمته متوققدر .
برادم آج اولنجه يمك ارزو ایتدیکی کبی عقول سلیمه اصحابی دخی
بوشیلری بیلکی ایستر و بنا برین علم حکمتله توغل ایدر ؛ طعام
حوایج جسمانیه دن اولدینی مثللو بوشیلر دخی حوایج روحانیه دندر .
اشته حکمت حقوقده بویله حوایج روحانیه دن اولوب انسانلر
بیننده جاری و بقا و سلامت هیئت اجتماعیه ایچون موضوع اولان
قوانین موجوده نك علل و اسبابی ارئه و اساس معقوله و مطلوبیه
موافق و مستند اولوب اولدیغنی میدانله اخراج ایدر و قوانینك
مجددا وضعنده مابه التطبيق اوله حق قواعدی بیان ایلر .
علم حکمتك بر جزئی اولان حکمت حقوق انسانك مقصدینی
حاصل و ارزوی مشروعی قضا و تسکین ایدر . فطرت انسانیده
بر خاصه و اردر که انسان بر شئك سبب و حکمتی پیلور ایسه
نمون اولور ؛ بیلز و یا اکلایه من ایسه متأثر و محزون اولور :
مثلا بر قانون کوردیکنده « نیچون بویله در ؟ » دیهرك سببی تفتیش
و تحری ایدر ؛ بونی او کرمك ایسه بیوک برفائده در . حکمت
حقوقك تسکین ایتدیکی ارزوی انسانی ایسه امور عدلیه
و حقانیتك اصل و اس اساسی اولان قواعد کلیه مطاع اولمقدر ؛

حالبوکه حکمت حقوقك فائده می یالکز بوندن عبارت اولیوب سائر فوائد کثیره سی دخی واردر . شاید حکمت حقوقك فائده سی بوندن عبارت اولق لازم کلسه بیله بو مزیت کافی ویووک برشرفدر . زیرا حوایج جسمانیه مزى قضا ایتمکده نقدر فائده مز اولورایسه احتیاجات مغنویه مزى دفعده دخی اولقدر فائده مز اولور . اشته بوفائده حکمت حقوقك نظریات جهتنجه فائده سیدر . بونك عملیات جهتنجه یعنی انسانك رفاه وسعادت حالى تأمین ایچونده فائده سی واردر .

هر غلم ابتدای امرده نظری کبی کورینورایسه ده لدی التدقیق فائده عملیه سی دخی اولدینی اکلاشیلور ؛ حکمت حقوق دخی بویله در ؛ قوانین موجوده کوزدن کچیریلور ومیران حکمت حقوقه اوریلور ایسه اساس متینه ومعقولهیه موافق ومستند اولوب اولدینی اکلاشیلور وخصوصا قانونده مبهم بر یرکوریلور . یلوبده بالاجتهاد تفسیر اولنورایسه حکمت حقوقك فائده عملیه سی اولدینی معلوم اولور . بناء علیه بونك فوائدی نظریاته منحصر دکلدر . هر علم واز جمله حکمت طبعیه ، کیمیا ، هیئت ، حساب وقنون سائر ابتدا نظریاتله باشلار ؛ براز تعمیق ایدیلنجه عملیاته دائر فائده لر کوریلور : مثلا ابتدا کهرباده القریق خاصه سی ومقنا طیسده قوه جاذبه اولدینی کشف ایدلدى ؛ مؤخرا بو کشف سایه سنده برادم دنیانك براوجندن دیگر اوجینه آن واحده ایصال پیام ایدلك طریقى یعنی مخبرات تلغرافیه یی ودیگر برادم

دخی پوصله یی وانکین دکرلرده سفاینه رهنمای استقامت اولان
 بر آتی میدانه کتوردی . کذلک بخارده اولان قوه انبساطیه نک
 کشفی واپورلر ، شمدفرلر ، ماکنه لرك وجوده کلسنه سبب اولدی .
 حکمت حقوق دخی اول امرده کرچه نظریدر ؛ لکن
 صکره بونک واسطه سیله اعلا قانونلر ، کوزل نظاملر یاپیلور
 وبوندنده دولت و ملکجه ثروتلر و معموریتلر حصوله کلور ؛ چونکه
 بر قومک سعادت و سلامتی قوانینه مربوطدر ؛ قوانینی منتظم اولورسه
 قومده غنی و معتبر اولور ؛ بناء علیه حکمت حقوق عملیانه دخی
 فائده سی منکر دکدر . از جمله یان یانه اولان ایکی مملکتدن و یا
 ایکی قصبه دن بری معمورو ابادن و دیگری فقیر و پریشان کورلسی
 جهلانک ظن و تخمینی کی تصادفی برشی اولیوب مطلقا قانونلر
 ینک ایو وفا اولمسندن در ؛ افرادک احوالیده بوکایاس اولنور .
 الحاصل حکمت حقوق حقوق و قوانینک « اصول اولیه »
 لرینی بیان وارانیه ایدر ؛ حقوق موضوعه تدرسنک نه اسبابه مبنی
 اولدیغنی وانک جهت وحدت و علتی ، اسبابی کوسترر ؛ بونی
 بیلیانلر تحلیل و تفسیر قوانین ایده منزلر . حکمت حقوق اولسه
 قانونلرک هپسی کیف ماتفق یابلس احکامدن و خودسرانه
 حرکاتدن عبارت کورینور . برواضع قانون کلوب بر قانون وضع
 ایتسه دیگر بری دهاکلوب اول قانونی خودسرانه بر صورتله
 تبدیل ایدیورمک جائز اولور ظن اولنور . بر ادم قوانین
 موجوده نک اسباب و حکمنی و علل و غایاتی اکلامرسه حکمت

حقوقه مراجعتله مبنی علیہنی اکلاہیہ بیلور . بر قانونک مزیتنی
تقدیر ایچون انسانک احتیاجاتنه نظر ایتلیدر ؛ اگر احتیاجات
بشریہ موافق ایسه طوغری اولدیغنه حکم ایتلیدر . بواحتیاجات
احتیاجات مشروعه ایسه حکمت حقوق ایله بیلور . حکمت
حقوق اولسه حقوقک اصل واساسی بیلنه مزو بوکا متعلق شیلرده
ادراک اولنه مر .

اقوام مختلفه بینده برچوق قانونلر واردر ؛ اکثریا بونلر
یکدیگره مغایر اولوب جهت وحدتلی یوقدر واحتمالکه بر
طاقیده حقانیت اوزره مبنی دکلدر ؛ حکمت حقوقدن بی خبر اولان
کمنه بونلری کورنجه شاشارقالور : مثلاً هنده بشقه ، چنده بشقه ،
اوروپاده بشقه اولدیغنی کورنجه بنده بردرلو یاپسهم اولور ظن
ایدر . فقط حکمت حقوق بر میزاندرکه بوقوانینی و بونلرک حاوی
اولدیغنی احکامی حدء تدقیقندن کچیرر ، هانکیسی ایو وهانکیسی
فنا اولدیغنی میدانہ حیقارر ، بونلرک بینده کی جهت وحدتی بولور .
مثلاً طبقات الارض علیہده بویله دکلیدر ؟ بوعله واقف اولمیانک
انه برقاچ پارچه معدن ویرلسه نه اولدقیرنی بیلوب قیتلیرنی
تقدیر ایدہ مز ؛ لکن بوعله مطلع اولان ذات کوردیکی کی
درحال اکلار و تفریق و تقدیر ایدر . خلاصه حکمت حقوق
بر رازو و بر مقیاسدرکه قوانین موجوده تک صحت وعدم صحتی
و مکملیت نسیهلری انکله توزین و تقدیر اولنور .

حکمت حقوقک فائده سی هم مغویدر ، هم عدلیدر ،

هم سیاسیدر . مغویدر ؛ چونکه انسانک ارزوی مشروعی تسکین ایدر . عدلیدر ؛ چونکه اجرای عدالتیه برار و امور عدلیه نك یولنده جریاننه مدار اولور . سیاسیدر ؛ چونکه مملکت تشکیلنده و سیاسته متعلق امورده تأثیر کلیسی اولور و مملکتک شان و شهرتنه و معموریتنه حسن تأثیری اولور .

بو علمک تدرسی قاب انسانیده موجود اولوبده نوم حالنده بولنان عدالت حسیاتی اویندیرر و عدالت نه ایدوکی انسانه بیلدیرر و اکا محبت ایتدیرر (اما بو علمدن غافل اولنلر ، ظلم ندر و عدالت ندر بیلانلر عدالتی سومک نصل اولدیغنی و ظلمدن نفرت ایتک نه یولده اوله جغنی بيله مزلر ؛ عدالتی بیلان هر فدا . کارلغی درعهده ایدرک عدالتی اجرا ایدر .) ؛ بو علم حسیات مذکوریه بی اویندیردقن صکره عدالت و حقانیت قاعده لرینک اجرا و محافظه اولنسی ارزوسنی کتورر ؛ بو ارزوده شریف و محیب برارزودر .

اشته حسیات مغویه عدلیه هر بر حکم Sugement (عقلا برقرار ویرمکدن عبارتدر) ده و باخصوص حقوقه متعلق حکم . لرده عقل ایچون اک صادق برره بردر . اشته هر بر انسان و باخصوص حکام و واضع قانونلر بو حسیاتدن استفاده ایتک لازمدر ؛ یعنی اولاً عموماً هر فرد ایچون لازمدر ؛ چونکه هر تقدیر قانون وضع و تطبیق ایتیه جک ایسه ده مادامکه هیئت اجتماعیه ایچنده یشایور هر فرد حکمت حقوقی بیلدیکی حالده

قلبی منور اولورده خیر و شری اکلا یوب بیلور ؛ بناء علیه هر فرد بتون حکمرانی بو حسیات اوزرینه بنا و بو حسیاتدن استفاده ایتلیدر .

حکمت حقوق قوانین موضوعه ایله قوانین موضوعه یه متعلق اولان محاکم و آوو قاتلر کی شیلرده کی حکمرمزی یعنی افکارمزی تنویر ایدر و بونلرده نقصانمز و ارایسه اکمال ایلر . واقعا قانونله مشغول اولنلر تطبیق و اجرا ایتدکری قانونلرک سبب و حکمتلرینی بیلیرک انلرده بعض مرتبه مهارت کسب ایدرلر ؛ لکن بو مقوله ادملرک معرفت و مهارتی قوه حافظه سایه سنده اوله بیلور ؛ یوقسه او کی ادملر بیلدکری شیر ی علل و اسبابی ایله بیلزلر ؛ قوه حافظه لری بریرده قصور ایدرسه اوراده شاشار قالورلر : مثلا فلان قانون شویله دیمش و بویله یامش و تشدید و تخفیف ایتش اما بواش حقنه برشی سوئلماش ! شمدی نه یاملی ؟ دیرلر ؛ اشته علم سایه سنده بیلوبده قوه حافظه ایله بیلدکری ایچون بویله شاشوب قالورلر ؛ لکن کنه و حقیقتیله بیلنلر بو کی یرلرده اصلا زحمت چکمزلر ؛ او مقوله ادملر متشاعر کیدر : عادی برشاعر از برلدیکی قصیده نک بر مصراعنی فراموش ایدرسه ارتقانی بولوب او قویه مز لکن حقیقه شاعر اولان بر ذات بر قصیده نک برایکی یتتی اونوتسه شاعرک یعنی ناظمک مقصد و مرانی تمامیه بیلور ادم اولدیغدن یا شاعرک سوبلدیکی بولور و یا خود اکا یقین صورتده ایجاد ایدر . اشته

قانونده بومجثده شعر کیدر : برجاهلک مجرد قانون مجموعہ سنہ بقارق حکم ایتسیلہ بر حکمتشناسک اسباب موجبہ وعلل کوسترہ رک حکم ایتسی ینتدہ شاعر و متشاعر ینلرنده کی فرق قدر فرق واردر ؛ مثلاً جاهل اولان کیسه امور جزائیہده اسباب مشدده و مخففہ یی کوزلجہ تعین ایدہ میوب لاعلی التحقیق بر حکم ویرر ؛ فقط عالم اولان ذات انک اسبابی تدقیق ایدرک حقیقتیلہ حکم ایدر ؛ قانونده نقصان ویا مبهم بریر کوررسہ انک حکمتی ملاحظہ ایدرک کنیدیسی واضع قانون کی اکمال و تفسیر ایلر ؛ نقصان املا ایلہ یازلمش مکتوبی جاهل کاتب کوررسہ انی حرفیا یعنی یا کلش ما کلش او قور ؛ اما برعالم الہ کچرسہ نقصانلرنی اکلا یوب اکمال ایدر : عالم حاکم ایلہ جاهل حاکمده بویله در .

قوانین موجودہ نک و بو قوانینہ توفیقاً ویریلہ جک حکملرک اسباب وعللی و حکم و حقایقی بیلہ جک قدر حکمت حقوقده توسیع معلومات ایتماش و یا خود بیلدیکی بر مسئلہده مطالعات عمومیہ ارتقا ایدہ مامش اولان ادم قانونشناس jurisconsulte و حاکم اطلاقہ شایان اولہ مز ؛ بر آدم قانونشناس عنوانہ حقیقہ لایق اولمق ایچون قوانینی حکم وعللیلہ بیلک لازمدر . خلاصہ حکمت حقوق لب و قوانین قشردر ؛ قوانینک لبه واقف اولان ذواته بزده ارباب الالباب و تعیر دیکرله اولی الالباب دیرلرکه حقیقتی کوروب بیلنر دیمکدر . حکمت حقوق قوانینی تفسیرده دخی - تاریخ حقوق کی -

برمنع فیض و برکندر . تفسیر قانونده برقاچ شیئه نظر اولنور :
مثلا قانونك تاریخنه دخی مراجعت اولنور یعنی قانونك عملیات
اعدادیه سنه ونوقت ونه مقصده مبنی وضع اولندیغنه باقیلهرق
تفسیر ایدیلور واسکی حالنه باقیلور . مع هذا حکمت حقوقه دخی
مراجعت اولنور ؛ چونکه قوانینك وضعندن مقصد هیئت
اجتماعیه نك منافعی اولدیغندن تفسیر اولنه حق قانون دخی او
مقصده موافق اولهرق وضع اولنمش فرض ایدیلرک حکمت
حقوقه مراجعت اولنور . واقعا برشی قانونده بولنه من ایسه
اکا مشابه دیگر برشی بولنهرق قیاس طریقیله حکم ایتمکه
ممکندر ؛ لکن ارباب الالباب بو طریقه سالک اولمز ؛ انلر قانونك
وضعندن مقصد وانك علت و حکمتی نه ایسه آتی بولورلر ؛ قیاس ایله
حکم ایتک ارباب قشرك ایشیدر .

قوانین موضوعه تقدیر مکمل اولور ایسه آتی اولسون ینه بعض
نقصانلری اولور ومبهم یرلری بولنور ؛ بعضا واضع قانونك
خاطرینه کلامش وسکوت ایتمش اولدیغی یرلرده بولنور . حالبوکه
حکام حضورلرینه عرض اولسان دعوالرک هپسینی حل وفصل
ایتمکه مجبور اولوب قانون ناقص یا مبهم ویا ساکتدر دیو فصل
منازعات واحقاق حقندن امتناع واستکاف ایده من . شمدی نه
یایمیلیدر ؟ هم ناقص آلات ویرلش وهمده مکمل ایش یابلسی
طلب اولنمشدر ! اشته بویله یرلرده حاکم حکمت حقوقه مراجعت
ایدر ؛ حکمت حقوقدن غافل دکاسه اساسه موافق برشی بولهرق

دعوای فصل ایدر . لکن اشبو سکوت حالی امور جزائیّه ده
 وقوعبولورسه واضع قانون مقتضاسندن سکوت ایتدیکی شی حقنده
 مجازات اولنمنی قصد ایتدیکی حاکم اکلایهرق مظنون علیہک
 برائتنه حکم ویرر . اما هیچ برحاکم صراحت قانونیه مخالف
 اولهرق برشی حکم ایده من : مثلاً قانونده بویله دینلش ایسهده
 بن انک حکمتی بیلورم قانون یاگلش سویلشدر انک طوغریسی
 شویله اوله جقدر دیمک اقتدارینی حائر دکلدر ؛ حکامه بوقدر
 مساعده ویرلماشدر . زرده قانون سویلرسه حاکم سکوت
 ایتلیدر وزرده قانون سکوت ایدرسه حاکم سویلیدر . حاکم
 قانونده ابهام اولنجه ایضاح ایتلی وقانون سکوت ایدنجه عقل
 ووجداننه مراجعتله حکم ایتلیدر . اولوقت حاکملرک حکمت
 حقوقه اولان وقوف ومعلوماتلریله حاصل ایتدکری ملکه
 ومهارت وقریحه بوکی حالرده اتخاذ ایده جکری قرارلرک منی
 علمی اولور .

بو حقیقت اربابی نظرنده اولقدر واضحدر که علم حقوق
 اربابندن بعضیلری حکمت حقوقی حقوق موضوعه نک لوازمندن
 عد ایتشلر یعنی « بر قانون وقایعه تطبیق ایدیه من مکر که تطبیق
 ایده جک ذات حکمت حقوق بیله » دیشلردر ؛ یعنی حکمت
 حقوق بیلنمیجه حقوق موضوعه اجرا اولنه من .
 بویانادن اکلاشیلور که حکمت حقوق قانونلرک تفسیر
 وتطبیقنده هر حالده لازم وفوائد کلیه بی مستلزمدر .

حکمت حقوق قوانین موضوعه نك تفسير و تطبيقده تقدیر عظیم ومهم فائده ابراز ایدرسه یکیدن قانون وضع ایدیله جکی وقت دخی اولقدر اهمیت فوق العاده بی حائر در . قوانین لایتغیر دکدر ؛ بر مقتضای بشریت ومدنیت یا عتیقلری اصلاح وتبديل ویاخود یکیدن وضع اولنور ؛ چونکه زمان واحوال ناس دائما بر حالده طور میوب تبدل ایدر وبونلر تبدل ایتدکجه بونلره مستند اولان احکام دخی تبدل وتغیر ایدر ؛ یتغیر الاحکام بتغیر الازمان قاعده فقهیة سی معلومدر ؛ حتی مجله ده ازمانك تغیر یله احکامك تغیری انکار اولنه ماز دینلشددر ؛ الحاصل انسان بر حالده طور میوب طریق مدنیتده دائما ترقی ایتدکجه وجمعیتك احوال وحوایج ومنافی تبدل ایلدکجه قوانینك دخی لزوم تبدیلی طبعی وغیر منکر در ؛ بویله اولسه نوع بشر ترقی ایتیمور دیمك لازم کلور که ظاهر البطالاندر . اشته بونك ایچون اکثریا قوانین موجوده تعدیل ویا بونلره بعض قواعد ومواد جدیده علاوه ایدمك استیلور وبعضاده قوانین موجوده نك کافه سی یاخود بر قسمی کلیا الغا اولنورده یرینه بشقه سی وضع اولنور وارالقده ده یکیدن ظهور ایدن خصوصات حقنده ینه یکیدن قانون وضع ایتمك لازم کلور . بوتعدیل وعلاوه ووضعلری یاپارکن حکمت حقوق قواعد عالیہ سنه مراجعت واستناده احتیاج اولدینی درکاردر .

ازمنه قدیمده وضع اولنان قانونلر واضعلرینك افکار مخصوص . صهلرینه توفیق اولنه رق یابلدینی ایچون بونلرک بعضیسی حکمت

حقوقه موافق ایسهده اغلبی واضعی ایستدیکی کبی یامشدر .
 مؤخرًا ممالک متمدنهده یاپیلانلرک هپسی حکمت حقوقه واقف
 ذوات معرفتیه یاپیشدر ؛ مثلاً پروسیاده بیوک « فره دریق »
 وفرانسهده برنجی ناپولیونک و اوستر دولتنک قوانینی کبی ازمنه
 اخیرده وضع ایدلش برطاقم قانونلر واردرکه هپ افکار وقواعد
 حکمیه مستنددر . مع هذا بونلرک علی حالها قابوده تعدیل
 وتبديل اولناملرینی ملاحظه وارزو ایتک عادتًا انسانلری ترقی
 ایتیمور و حال وقوفده بولیمور ادعاسنده بولنمقدّر و مادامکه انسانلر
 طریق ترقیده ایلرولیمور قانونلرده تعدیل وتبديل اولنمیدر ،
 مادامکه قانونلرک تعدیل وتبديل اولنمسی ضروریدر حکمت
 حقوقه احتیاجده ضروریدر .

حقوق موضوعه نك كافة اقسامی حکمت حقوقه مربوط
 ومحتاج ایسهده بونلردن ایکی قسمی یعنی حقوق جزائیه ایله
 حقوق سیاسیه سائرلرندن دهها زیاده محتاجدر :

حکمت حقوق جزادن مقصد نه ایدوکی ، جزانك حد
 اعتدالی ، جرمك اهمیت درجه سنی واکا مقابل وضع اولنه جق
 جزایی ترتیب وتعیین ایدر وقانون جزانك زمانزده باشلا یوبده
 هنوز رسیده حد ختام وکمال اولیان اصلاحاته تشویق ایلر ؛
 واقعا عصر مزده جزا قانونلری حکمت حقوقه تطبیقا اصلاح
 ایدلمکده ایسهده انسانلر هنوز درجه کماله واصل اولمقلری
 جهته جزا قانونلری دخی درجه مطلوبده مکمل دکلدر . مع

هذا بر قوجه قارينك يغورتمی یدی دیمسی اوزرینه بر اچ
 اغاسنك قارتنی یاردیران یعنی اولا دلیلی مظنون علیهدن ارادینگی
 ثانیاً ثبوت جرمندن مقدم مجازات ایتدیکی وثالثاً جرمه غیر
 متناسب جزا ترتیب ایلدیکی جهتله دخی یولسز حرکت ایدن بر
 والینك عصرنده جاری اولان احکام جزائیّه زمانزده له الحمد
 جاری اوله مز .

حکمت حقوقك حقوق سیاسیّه اوزرینه اولان تأثیری
 حقوق جزائیّه اوزرینه اولان تأثیرندن دها از دکلدر ؛ حقوق
 سیاسیّه قواعد حقانیتك دولت وتعییر آخرله هیئت اجتماعیه
 تشکیل وتنظیمده تطبیقندن بشقه برشی اولدیغندن یعنی هیئت
 اجتماعیه تنظیمه دائر اولدیغندن غایت مهم وحکمت حقوقه مبنی
 اولسی لازمدر . حتی حکمت حقوق اولیجه هیئت اجتماعیهده
 اوله مز واولسه دخی هیئت اجتماعیهدن مطلوب اولان فائده تمامیه
 حاصل اوله مز .

خلاصه حقوقك هیچ بر قسمی یوقدرکه حکمت حقوقه
 احتیاجدن وارسته اولسون ! بناء علیه حکمت حقوقك ییلنسی
 اهم والزم اولدینگی انکار اولنه مز . زمانزده لزومی ایسه سائر
 زمانلردن زیادهدر ؛ زیرا قوانین عدلیه نك اصلاحیه اشتغال
 ایدیلیور وهردرلو ترقیات ایچون یکی طریقار وتدبیرلر تحریر
 اولنیور . استقبال وآتمزك تأمین واصلاحی حکمت حقوقك

حکام و سائر لازم کنلر طرفدن کرکی ییلنوب موجیله حرکت اولمسنه متوققدر .

۷ — (حکمت حقوق ایکی قسم اولوب برینه قسم عمومی و دیگرینه قسم خصوصی دنیلورکه بروجه آتی برر بایده موضوع بحث اوله جقدر .)

باب اول

حکمت حقوقك قسم اولندن بعض مباحث بیاننده در .

بحث اول

حقوق لفظنك وجدان ولسانجه اولان معناسی حقنده بعض تحقیقات .

۸ — حکمت حقوق ترکیب و تعیرینك جزء اخیری اولان «حقوق» لفظنك وجدان ولسانجه معناسی صحیحی ندر؟ (حقوق حَقْک جمعیدر؛ شیوة لسانمز اقتضاسنجه دائماً جمع اوله رق مستعملدر؛ فرانسزلر ایسه بو مقامده مفرد اوله رق دروا (Droit حق) دیرلر.) حق دن مقصد ندر؟ حق دنیلان شی طبعیمیدر؟ یو خسه وضعیمیدر؟ (حق دنیلان شی حقنده وجدانمزی استنطاق ایدرایسهك

اکلارزکه حق لفظنک دلالت ایتدیکی معنی معقولات قیلندن اولان افکار دندر. یعنی عقله ملایم و مطابق اولان و عقل ایله ادراک اولنان افکار *Idées rationnelles* دندر؛ صکره دن تجربه ایله تحصیل اولنان افکار دن دکدر؛ معلومدرکه هر شی ایکی طریقه ادراک اولنور: بری عقل و دیگر تجربه طریقیدر؛ (حق فکری طبیعی اوله رق انسانک وجدان و قلبه تجلی ایدر؛ حق فکری حد ذاتنده طبیعی و انسان ایله برابر طوغار ایسه ده حین ولادتنده پک جزئی بر حالده اولوب صکره تعلم ایله کماله ایرر؛ دیگر بعض شیلر کی تحصیل و تجربه ایله حاصل اولمز.) تجربه و تعلم و بشقه سندن تلقی طریقیله یعنی وجدانی استنتاج طریقنک غیر صورتله بونی اوکرنمکی ایستیان کمنسه ناتمام اولوب حقیقتی صکرکی کی اوکرنماشدر؛ مثلاً بر کیمسه حریتیزی سلب ویا مالیزی غصب ویا بزی ضرب و جرح ایدرسه حاصل اولان فئالق و مضرتی تجربه دن صکره می اکلارز؟ خیر! بونلرک فئالغی تجربه حجت اولمقسزین اکلارز؛ حق فکریده بویله در. وانی اکلامق ایچون تجربه یه و محصیله لزوم کورمیه رک کندی وجدانمزده مطالعه و تدقیق ایله اکلارز.

۹ — (تجربه طریقیله معلوم اولیان اشبو افکارک باشلوجه لری درتدر: برنجیسی حقیقت و تعیر دیگرله صدق فکری *Idée du vrai* ایکنجیسی خیر فکری *Idée du bien* اوچنجیسی حسن فکری *Idée du beau* و دردنجیسی حق فکری *Idée du juste* ایدر؛

بونلرك ضدی كذب وشر و قبح و باطلدر ؛ بوفكرلر یعنی صدق و كذب، خیر و شر، حسن و قبح، حق و باطل فکری هر بر عقیده بالقوه موجوددر . یعنی خلقتده عقول بشریه ده بالقوه موجود اولوب صکره تحصیل ایله میدانہ چیقار ؛ فقط بر مانعک حیلولتیه میدانہ چیقمامق ممکندر ؛ نته کم نطق دخی انسانده بالقوه موجود ایسه ده تعلیم اولنمدینی مدته . مکتوم و مخفی قالور .

﴿ بوفكرلر انسانك صفت عقلیه سنی تشكیل ایدر ؛ بونلراولمسه انسانیتك مزیتی وسائر حیواناته وجه رجحانی قالماز . بوفكرلر حیاتك وافكار انسانیه نك عناصر اولاسندندر ؛ بوفكرلر هر انسانك وجدانی حالنه ، استعداد طبعیسنه ، ادراكنه ، تحصیلنه کوره تنویر ایدر وانسانی اداره ایلر وكافه حرکات وسكناتده یول کوسترر وسعادت حال وسلامت حصوله کتورر ؛ بوفكرلر اولمز ایسه انسان ظلمت وجهالت ایچنده قالور .

﴿ بوفكرلر عقل وادراك اصول اوزره اولان سعيله توسع ایدر ؛ هر كسده ازچوق موجود اولان افكار مذكوره مساعی فكریه ایله توسیع ایدلر ووقتیله تربیه اولنمز ایسه مکتوم قالور . نته کم بر صبی یالکزر اوله رق ترك ایدیلورسه هیچ بر لسانله تکلم ایدمه چکی بالتجربه معلومدر ؛ حتی محارستان اورمانلر نده تخمینا اون بش یاشلرنده بر چوچق بولشاردرکه هیچ بر لسانله تکلم ایدمه دیکی مثللو دائماً حیواناتله دوشوب قالقدینی جهتله انلر کبی صیحه ایدردی . الحاصل بوفكرلر دخی افراد بشرک

سعی و غیرتی و بولندقلری محلك استعدادی نسبتده توسع ایدر . ﴿ ۱۰ 》 — اشبو افکار اربعه اصول حیاتیه مزنددر یعنی حیات بولنره متوقفدر ؛ خصوصاً حق و خیر فکرلری دیگر ایکیسندن یعنی حقیقت و حسن فکرلرندن زیاده لازمدر . حق یالکز حیاتده و حیات ایچون بولنور . حیات و حیاتك متعلق اولدیغی مواده نسبتله حق فکری وجدان Consciencec ده اوچ صورتله ظهور ایدر : اولاً هر شخص حق و یاخود ناحق اولان شیئی بئلك و تقدیر ایتك ایچون کندوسنده برقوت Faculté اولدیغی ادراك و تسلیم ایدر . بو قوت مستقل برشی اولیوب عقلك برسی مخصوصیدر . ثانیاً قوانین و تأسیسات موجوده نك طوغری یا کری و مکمل و یا غیر مکمل اولوب اولدیغی محاکمه Juger ایدر برشیئه حکم ویرر . ثالثاً بویله ادراك و حکم ایتدکدن صکره ارتق بو حکمندن آیرماز . ﴿ ۱۱ 》 — اشته بو وجهله ادراك و محاکمه ایتدکدن و حکم ویردکدن صکره دیگر ادملر کلوبده ادله ایله اثبات و کندوسنی اقعاع ایتمکسزین بو حکمك یا کلسدر بوندن رجوع ایت و حق اولانی بودر بوکا اعتقاد ایت دیسهلر حتی بو بایده تهدید بیلله ایلسهلر اول شخص بولنرك سوزلرینه باقماز و ویردیکی حکمدن رجوع ایتمز .

﴿ ۱۱ 》 — افکار اربعه مذکوره بربرندن آیری شیلر دکلدر وینلرنده پك چوق ارتباط و مناسبت واردر ؛ فقط تعلق ایتدکبری اشیانك احوال مختلفه سنه کوره تبدل ایدر و بعضا

يكدیكرینه منقلب اولور . ﴿ مثلا حقیقت غیب اولوب خیر میدانہ چیقار یعنی حقیقت خیر اولمش اولور : شویله که اراده بر حقیقتی کشف ایدرسه حقمرده خیر اولور وبالعکس حقمرده خیر اولان برشی دخی حقیقت اولور ؛ از جمله ارضك کروی اولسی بر حقیقتدرکه بو حقیقت کشف اولندقدہ بر چوق فوائد انتاج ایدوب خیر اولور ومثلا حکمت حقوق تدرسنك خیر اولدینی اکلایلوورسه بوده بر حقیقت اولور . الحاصل بو فکر لر انسانك وتعلق ایتدکری اشیانك احوال مختلفه سنه کوره یکدیگره تحول واتقلاب ایدر .

۱۲ ﴿ — ﴿ بو تحقیقات وتفصیلاته کوره حقوق (یاخود مفردی اولان حق) بوجه اتی تعریف اولنور : حقوق (یاخود حق) افعالک طبیعت ماده ایله توافقی کوستر بر ماده (یاخود قاعده) در . ﴿ یعنی انسانك مزاجنه وما خلق لهنه ومقصدلرینه موافق اولان شیلری کوستر ؛ مثلا بر خط مستقیم ایکی نقطه اره سنده الك قصه طریق اولدینی کی حقوق دخی افعال ایله طبیعت ماده بینده الك کسدرمه طریقدر ؛ یعنی — بر فعلی حقانیت موافق اولق ایچون — طوغریدن طوغری به مقصده ایصال ایدن برواسطه در ؛ الحاصل حقوق فعل ایله حقانیت بینده بر خط مستقیمدر . بزی مقصدمزه ایصال ایدن تدبیر شبهه سنز « حق » در .

۱۳ ﴿ — ﴿ حقوق کوز لجه بیلک ایچون اول باول طبیعت

انسانیه بی بیلک لازمدر. چونکه انسانه ملایم اولان احوالی بیلک ایچون انک طبیعتی ، مزاج و مشواری ، ما خلق لهنی و مقصدلرینی تدقیق ایدوب بیلک لازمدر : مثلاً برخانهده ساکن اولنلرک مزاجلری ، طبیعتلری ، درجه استعدادلری ، شکل و قامتلری ونه ییوب ایچدکلری بیلنجدکه اول خانه بی اداره ایتک نصل مشکل اولور ایسه طبیعت انسانیه ایله مقاصد بشریه بیلنجدکه انسان حقنده برشی یایمق او یله مشکلدرد . (اشته بو مناسبتله طبیعت انسانیه دن دخی بحث ایتک صرهرسی کلمشدر .)

بحث ثانی

طبیعت انسانیه

§ ۱۴ — حقوقک منبئی طبیعت انسانیه اولوب تعلیم و تربیه ایله ظهورده کلهجکی بیان اولغشیدی ؛ اشته او (طبیعت انسانیه La nature de l'homme ندر ؟ » انسان کافه مخلوقاتک ممتاز واشرفیدر ! « دنیلیور ؛ مابه الامتیازندر ؟) شمعی آنی بیللم :

طبیعت انسانیه بی بیلک ایچون انسانی حیوانات سائر ایله مقایسه ایتک لازم کلور : انسان اوچ وجهله یعنی اول جسم و ثانی روح و ثالثا عقل جهتیه حیوانات سائر دن ممتازدر .

§ ۱۵ — (وجه اول یعنی جسم جهتیه اولان امتیاز شویله در : انسان ترکیب جسمانیجه یعنی شکل و شمائلجه حیوانات سائر مه مرجحدر ؛ انسانک اعضاسی غایت موزون و متناسب

خلق اولمشدر ؛ قرآن عظیم الشانده « لقد خلقنا الانسان في احسن تقويم » بیورمشدر.) بوایت کریمه ده اشارت بیورمیشدی وجهله انسانك شكل خارجیسی حیوانات سائرهدن دها کوزلدر . بو شكل خارجینك موزون ومتناسب اولمسندن بشقه اوله رق (انسانك حواس وقواسیده - هیئت مجموعه سی اعتباریله - دها متناسبدر .) انسان دها ایولمس ایدوب یاپیشور ، دها اعلا کورر ، دها کوزل ایشیدر . واقعا حیوانلر بیننده شكل خارجی وحواس وقوی جهتجه کلی فرق وتفاوت وارددر وبعضیلری بر ویا متعدد جهتدن امتیاز کسب ایده بیلور وبرصفتله من وجه ممتاز اوله بیلور ؛ فقط هیچ بریسی تامایله انسان درجه سننده اصول وعناصر ترکیبیه مالک دکدر ؛ حیوانلرده اولان حواس وقوی من حیث المجموع دها مکمل اوله رق انسانده موجوددر . حیوانات غایت متنوع اولوب هر بر نوعك کندینه مخصوص ومستقل وبعضا دیگر نوعلرایله مشترک خواصی وارددر وبعضا بالنسبه یکدیگره تقدم وتفوق ایده بیلور فقط هیچ بریسی کرک ترکیب جسمانی وکرک ترکیب روحانیجه انسانه مساوی اوله مز .

(الحاصل انسان ترکیب جسمانی وروحانیسنده بالجمله حیواناتك مالک اولدقلری تناسب وحواس وقوايه مالکدر یعنی سائر حیواناتده متفرقا موجود اولان خواص انسانده مجتمعاً موجوددر.)

سائر حیواناتده دخی بر درجهیه قدر تناسب وموزونیت وار ايسه ده انسانده کی مکمل دکدر : واجب تعالی حیوانلره

برطاقم اشکالی وقوی ویرمش و بواشکال وقوی حیوانات بیننده تقسیم اولنخله هر برینه بر مقدار شی اصابت ایشدر. اشته حیوا. ناک صنف مختلفه سنه متفرقا تقسیم اولنان هر درلو کمالات بونوع شریف انسانده اجتماع ایش و طبقاتده کوریلان اصولک کافه سی معتدل درجه ده و متحدانسانده طوپلانمشدر : انسانده کلا موجود اولان شیر حیوانلرده قسما موجوددر ؛ کرک حواس وقواجه انسانده کی مکملیت و کرک شکل شمائله انده کی تناسب و موزونیت هر برینه متفوقدر. لیس فی الامکان ابداع ماکان منطوقه قبحه نسخه کبرای انسانیه و بدیعه حیرت افزای بشریه عالم امکانک نقطه منتهاسیدر. عالم کون و فسادده بوندن دها احسن ، دها ابداع برشی تصور اولنه مز ؛ بومطالعات یالکر افکارشاعرا. نهدن عبارت اولیوب حقیقه بویله در. انسان فرضا انسانیتدن مجرد ایدرک انسانلک خارجندن نظر ایتسه بو حقیقتی بویله کورر وتسلیم ایدر ؛ اشته بومطالعاته بناء بعض حکما پک ایلری کتمشدر، حتی انسانک ترکیب جسمانیجه دخی حیوان اولیوب بلکه حیوانک مافوقنده بر صنف مخصوص اولدیغنی ادعا ایشدردر. واقعا بونده غرض شائبه سی کوریلور ؛ بونلر هپ انسانک روایتلریدر ؛ دیگر طرفدن یغنی حیوانات جانبندن بری چیقوبده بونلره مدافعه ایلره بیلور ؛ فقط حقیقت مسئله بوندن پکده بعید دکلدرد ؛ انسانه بوقدر امتیازی ویرمکدن مقصود الهی کافه حیوانات

انسانک تحت حکمنده اولمسیدر ؛ حتی قرآن عظیم الشانده
 « وخلقنا لکم مافی الارض جمیعا » بیورلمشدر .

(انسان حواس وقواسنک مکملیتی جهتله کافئه مخلوقاتک
 اشرفیدر .) نظر عبرتله باقیلورسه انسانک نه درجه مکمل
 اولدینی کوریلور ؛ از جمله قوه حافظه سی نقدر غریبدر ؛ او قدر
 کوچک برشی الک بیوک و مکمل دفترلردن زیاده اموری محیط
 ودها اکمادر ؛ باخصوص انسانک ذهنده بی نهایت اشکال
 و صورت مرسومدر ؛ انسان برکزه کوردیکی شیئی محافظه ایدوب
 یکر می سنه صکره بردها کوردیکنده قوه حافظه سنده کنه در حال
 تطبیق ایده بیلور .

(اشته بواحوال انسانی سائر حیواناتدن ممتاز ایدر ؛
 انسان بالجمله حیواناتک خلاصه ، نتیجه سی کیدر ؛ عموم حیوانات
 برکک جزئیدر ؛ حیواناتک صنوف مختلفه سنده متفرقا موجود
 اولان هر درلور کمالات کندوسنده مجتمعدر ؛ انسانه عالم اصغر
 دینسی اشته بوسیه منی در ؛ اوت حیوانات انسانده موجود
 اولان نورک برشله سیدر ؛ اما بونورک مجموعی انسانده ظهور
 ایتمشدر .) الحاصل انسان حواس وقواسنه نظرا بالجمله
 مخلوقاتک خلاصه و نتیجه سیدر ؛ برعالم اصغر در که کائناتده موجود
 اولان هر برشی کندیسنه انعکاس ایتمش ویا مصغر اوله رق
 کندوسنده موجوددر ؛ انسان عالمک مصغریدر ؛ حیوانلرایسه
 انسانده بولنان اشبو نور الهینک شعاعلری مثابه سندهدر ؛

بونورك هيئت مجموعہ سی انساندہ ظہور وتجمع ایتش و صکرہ اورادن کائناتہ منتشر اولمشدر ؛ بووجهله انسانک اعضا وجوارح وقواجه حیوانادن امتیازی واصل مرتبہ ثبوت اولور .

۱۶۲ — ﴿وجه ثانی یعنی روح جہتیلہ اولان تفوق شویله در : قوای روحانیہ جہتیلہ دخی انسان ممتازدر کافہ اشیایی حقیقی وجہله ادراک ایتک استعدادی انساندہ بالقوہ موجوددر .﴾ اوت ! انسان قوای روحانیہ سیلہ صنوف موجوداتی وکافہ اشیایی حقیقی وجہله ادراک ایتک استعدادینہ مالکدر ؛ واقعا کینک سنی ، کینک قدرتی مساعد اولدینی جہتلہ افراد انسانینک هپی بردن موجودات و اشیایی علی حقیقتہا ادراک مقتدر اولہ من ایسده او استعداد هر فردده واردر ؛ هر فرد سعی نسبتندہ بوکا نائل اولور وترقی ایدر ؛ عادتا برترلاکیدر ؛ هرشیئی انباتہ مستعددر ؛ لکن لوازمی موجود اولمق شرطدر .

﴿ حیوانات ترکیب جسمانیلرنجه ترکیب انسانینک برجزئی اولدینی کی قوہ روحانیہ جه دخی بویله اولوب انسان کل و حیوانات جزؤدر . ﴾ یعنی حیوانات شکل خارجی و اعضا و جوارح جہتیلہ انسانک جزئی اولدینی کی قوای روحانیہ جهده انسانک دونندہ وانک جزئیدر ؛ حیوانات سائرہ اشیانک یالکز برر جهت و برر فردینی محدود اولہ رق ادراک ایدہ یلورلر ؛ قدر تعلیم و تربیہ اولنسلر هیچ بروقتده اشیانک جهات عمومیہ سنی اکلامق درجہ عالیہ سنہ ارتقا ایدہ مزلر ؛ خصوصا کائناتک نہ نظام

اوزرینہ حرکت ایتدیکنی ونصل قواعدہ تابع اولدیغنی و بذاتہم کندولرینک بیندہ کی انتظامی ادراکدن عاجزدرلر : مثلاً کونشک صورت حرکتی وارضک قوۂ جاذبہ سنی وسائر بوکی شیلری اکلا یوب میدانہ کتورہ مزلر ؛ واقعا محسوساتی ادراک ایتلری وبرشیئی دیکرندن فرق وتمیز ایتلری وطبیعتلرینہ مغایر اولان شیلری اکلاملری منکر دکلدر ؛ فرضاً هوانک صغوق یا صیحا ق اولسنی ، برشیئک یموشاق یا سرت ایدوکنی ، اوکنہ قونیلان شیئک اکله صالح اولوب اولدیغنی و دوستی ایله دشمنی هر حیوان فرق ایدر ؛ بوندن بشقہ اشیای محسوسہ دن ۔ یک سادہ اولان ۔ مغیاتی (یعنی کوزہ کورنمایان شیلری) ده استتاج ایدہ بیلور ؛ نته کیم بریسنک ائندہ دکنک کورسہ الم طویہ جغنی وقوغہ کورسہ ایچندہ صو اولدیغنی و وقت معیندہ سانس قیزی آچدقدہ یم ویرہ جکنی حس ایدر ؛ فقط بونلرک وراسندہ نہ قاعدہ واصل جریان ایتدیکنی اکلا یه مزلر ، هانکی قانونہ تابع اولدیغنی ادراک ایدہ مزلر ؛ ازجمله بر جسمک دیکرینہ نسبتله بیوک یا کوچک ، اغر یا خفیف اولدیغنی بیلور ایسہ ده اصول هندسیہ سنی اکلا یه مزلر ؛ بر جسمک مرکز ثقلتی ونرہ سندن طوتیلورسہ قولای قالقه جغنی واغراق ندن نشأت ایتدیکنی فرق ایدہ مزلر .

﴿ خلاصہ حیوانات قواعد کلیہ ی بیلر ؛ ازلیت وابدیت واطلاق وعدم تناهی یه متعلق فکرلر انلرہ کلیا مجهول ومستوردر .

انسان ایسه بالعکس کافه وقوعات وعلائی وقواعد وقوانینی وازلیت وابدیت فکرلرینی وامثالی فکرلری فهم وادراکه مقتدردر وبونلری برر قاعدهیه ارجاع ایلر؛ روح انسانیده اولان بو اقتدار کندیسنه مخصوص برقوة عالیه نك وجودینه دلالت ایدر. ﴿اشته بوسییدن انسانك قوای روحانیه سی حیوانلرده موجود اولان قوای روحانیه دن ممتاز وانك فوقنده اولور؛ بوده انسانك دها بیوڪ مقاصد ایچون خلق ایدلدیکنه دلالت ایدر: مثلاً عسکرلرك بعضیلرینه دیکرلرندن فضله اوله رق آت ویرلمسی بونلرك پیاده عسکرلرجه اولان مقصددن بشقه مقصدلر ایچون دخی احضار وتهیه ایدلدیکنه دلالت ایدر؛ اشته انسانك بوقدر صفات امتیازیه ایله ترجیح ایدلمسی حیوانات سائره نك متمصلری خلافتده وهر حالده انلرك فوقنده برطاقم مقاصد عظیمیه سیوق اولندیغنی کوسترر.

﴿۱۷ — وجه ثالث یعنی عقل جهتیه اولان تفوق وامتیاز شویله در: انسان یالکز روحجه اولان تفوق جهتیه حیواناتدن ممتاز اولیوب عقل جهتیه دخی ممتازدر وبوعقل برضیانك شعاعی کبی انسانده ودیعه الهیه در؛ جناب حقك بصری، سمعی، علمی بزم قلبزه منعکس اولمش دیمکدر؛ اشته انسان بوقوة عالیه یعنی عقل واسطه سیله اولا کندی وجودینی وهویتنی ادراک ایدر وثانیاً ازلیت وابدیت وناتناهی واطلاق فکرلرینه انتساب ایلر وبو مناسبته برنشئه آخری حقنده دخی کسب امنیت ایدر.﴾

یعنی انسان کلمات جسمانیه و روحانیه ده حیوان ایله مشترک اولدقدن بشقه انسانده برشی دها واردر که سائر حیواناتده یوقدر ؛ بوده عقلدر . روح ایله عقل بحثی غایت مغلق بر مسئله اولدیغندن حکمادن بعضارینه کوره روح ایله عقل برشیدن عبارت اولوب حیواناتک جمله سنده بولنور فقط انسانده دها مکمل اوله رق موجوددر یعنی روح مکمل اولورسه عقل اولور و بو عقل بتون انسانلرده بولنور سده بعضی سنده دها قوتلی اولور . لکن علمای حقوقه کوره روح ایله عقل برشیدن عبارت اولیوب ایری ایزی شیلدر و روح حیواناته عام و عقل ایسه انسانه مخصوصدر ؛ اگر ایکسی برشیدن عبارت اوله رق یالکزر روح اولسه کندی کندینی ادراکدن عاجز اولور ، کندینه تأثیری اولمز و کندیسنک نه ایدوکی ملاحظه ایدمز ؛ بناء علیه بونک فوقده هم روحی و همده جسمی ادراک ایدن بر قوت اولق لازم کلور ؛ اشته اول قوت عقلدر . بعضا انسان نفسندن مجرد ایدر و سائر شیلری محاکمه ایتدیکی کی کندی نفسنی دخی اویله جه محاکمه ایدر ، تحسین یا تقبیح ، تشویق یا ترهیب ایلر ؛ اشته بولنری یانديران عقلدر .

عقل حواس و قوانک آمر و مدبریدر ؛ بونلرک حرکتلرندن ممنون یا مکدر اولور ؛ انسان نصل یوریلورسنه عقلده بعضا یوریلور و بعضا شایرر قالور ؛ انسانک برشیدن متأثر اولوب مکدر و یا ممنون اولسنک سبینی عقل ادراک ایدر . بو عقل بزه

نرەدن کلور ؟ اثرک مؤثر ایله متناسب اولمسی قاعده سینه نظرا
 بو عقل بر ضیانک شعاعی کی نظام و متناسب اصولنک خالق
 اولان باری تعالادن بزه منعکس اولور ؛ خلاصه عقل جناب
 حقک انسانه برا حسانی وبرودیعه سیدر ؛ علم ، سمع ، بصر و سائر
 صفات ثبوتیه الهیه بزه منعکس اولدینی کی عقل دخی بزه منعکس
 اولمشدر ؛ انسان یوقوه عالیه شریفه واسطه سیله کندی وجود
 وهویتنی ادراک ، بعده بونکله ازلیت وابدیت افکارینه انتساب ایلر ؛
 وبونلرک نتیجه سی اوله رق نشئه اخری وبقای روح حقنده برانیت
 کسب ایدر . انسانک بوصفات و امتیازاتی ایوجه ملاحظه اولنورسه
 طبیعت انسانیه نک نه اولدینی بر درجه یه قدر اکلا شیلور . طبیعت
 انسانیه نک دها ایو اکلا شلمسی ایچون برارده نفس ناطقه دن
 بحث ایتمک لازم کلشدر :

بحث ثالث نفس ناطقه

۱۸ — ﴿ نفس ناطقه بن Moi لفظی ایله تعریف
 ایتدیکنر مسمانک مدلولیدر . ﴾ انسانده بر نفس ناطقه واردرکه
 « بن » لفظنک مدلولیدر ؛ هرکس نفس ناطقه یه مالک و « بن »
 دیوب طورر ایکن بولفظک مدلولندن انسانلرک قسم اعظمی
 غافلدر ؛ بن کلدن ، بن کتدن ، بن اوتوردن ، بن قالقدم دینلجه
 « سن کیسک » دیو سؤال اولنسه جوابی بیلوب ویرمکه خواص

مقتدر اوله بیلور ایسده عوام قاذر اوله مز ؛ نفس ناطقه نك
ماهیتی ندر ؟ خواصی ندر ؟ مفردمی یوقسه مرکبدر ؟ واحدی
یوقسه متعدد میدر ؟ وجود انسانینك هر طرفنده موجود اولان
نفس ناطقه نك مرکزی نره ددر ؟

بن لفظنك مستحسی انسانك اعضای وجودندن بری دکلدر ؛
چونكه انسانك اولماتك شرطیه اعضای وجودندن هر هانکیستی
قطع ایتسه لرینه بن لفظی استعمال صحیح اولور ؛ دیمککه نفس
ناطقه برقوناغك پنجره سنده اوتوران ادم کی اطرافنی سیر و تماش
ایدر و کوروب حس ایتدکلرینی محاکمه ایلر ؛ حاصلی « بن »
دیدیمکز شی انسانده صوڪ نفسه قدر باقی اولوب منفك اولمز .

§ ۱۹ — ﴿ بن نفس ناطقه که بن ایله تعبیر ایدرز واحد

وبسیط اولوب متعدد و مرکب دکلدر فقط بونده باشلوجه اوچ
قوت واردر : برنجیسی ادراك و یا خود تعقل قوتی La faculté
de penser et de connaitre درکه خارجه و داخله کی شیلری
کوروب واکلار ؛ ایکنجیسی حس قوتی La faculté de sentir
درکه کوردیکی واکلادیفی شیلر کندیسنه ایومی یوقسه فنا می
کلیور و انلردن متلذمی یوقسه متفرمی اولیور اشته بورالرینی
اکلار و صرف کندیسنه عائددر ؛ اوچنجیسی اراده قوتی
La faculté de vouloir درکه کوروب حس ایتدیکی شیئی
یا پوب یا پامق قوتی اولوب کندی پد اقتدارنده در ؛ اشبو قوای

ثلثه دن هر بری نفس ناطقه نك لوازمندن اولان برخاصه دركه
بونسر نفس ناطقه اوله مز .

﴿ نفس ناطقه ادراك قوتی واسطه سیله کندوسنك موجود
اولدیغنی واشیانك یکدیگر لرلیله وکندیسیله اولان مناسباتی فرق
وتمیز ایدر وحالنه وتریه سنه کوره اشایی - حقیقت نسبیسه سی
وجهله - ادراك ایلر ؛ حس قوتیله دخی ادراك ایتدیکی اشیانك
کندوسنه اولان نسبتی وانلرله کندی وجودی بیننده بروحدت
اولدیغنی فرق ایدر و صکره کندی وجودینی اراده یه تسلیم ایلر .
اراده دخی بر قوه محرکه وبر قوه فاعله ومؤثره دركه هرشی اوزرینه
تأثیری واردر . ﴾ هر دولته قوه قانونیه ، قوه عدلیه وقوه اجرائیه
نامرلیله اوچ قوت اولدیغنی کبی نفس ناطقه نكده بووجهله اوچ
قوتی واردر ؛ اراده قوه اجرائیه مثابه سننده در ؛ اکر قوه
اجرائیه اولسه یعنی احکام اعلامات تنفیذ و اجرا اولنسه قانونلر ،
محکمهلر ، حاکملر هپ عبث اوله جنفی کبی اراده قوتی دخی اولسه
ادراکلر ، حسلر ، محاکمه وجدانیلر بتون عبث اولور ایدی ،
اراده نك اهمیتی واردر ، محکمهلر ده مکافات ومجازات الحاق اراده
اوزرینه اولور ، یوقسه ادراك وحس ایچون اولمز .

﴿ نفس ناطقه نك اشیا ایله اولان مناسباتی تشکیل ایچون
انك بو اوچ قوتی همه حال لازمه در ؛ زیرا نفس ناطقه ده یالکز
ادراك اولیدی یالکز اشایی کلامقله قالوردی ، انلردن برشی حس
ایتمز ایدی . ﴾ مثلاً قارشوده اولان برشیئك بیوك و یا کوچك

اولدینگی یاخیر و یاشر ایدوکنی کورر و فقط اندن برشی حس
ایتمز، متأثر و مکدر و یا ممنون اولمز ایدی. ﴿ اما حس منضم
اولنجه اشیا ایله کندی ییننده بر رابطه موجود اولدینگی کورر
واکا کوره محاکمه ایدر و خیر ایسه ممنون اولور و شر ایسه مکدر
اولور. ﴿ بعده اراده کلوب بر قوه محرکه کبی اشیا اوزرینه
اجرای تأثیر ایدر. ﴿

﴿ حد ذاتنده واحد و متحد اولان نفس ناطقه نك اشبو
اوج قوتی انك اوج دالی مثابه سنده وانك لوازمندن ایسه لرده
بونلر بر بردن منبعث و متولد دکلدر و ترقی و تدنجه یکدیگرینه
تابع دکلدر ؛ بونلردن هر برینك مخصوص مقصد و وظیفه لری
واردر. بناء علیه هر بری کندی مقاصد و وظایفنه و مقاصدینه
کوره چالیشور: شویله که ادراك دائماً حقیقه میل ایدر یعنی
حقیقی و حق فکر لرینی اکلار و بر کره حقیقی او کر ندکدنصکره
ارتق رجوع ایتمز. حس دائماً کندینه خوش و لطیف اولان
شیلره میل ایدر؛ خوش کلیانلری رد ایلر؛ حقیقه مطابق اولوب
اولمدقلرینه اصلاً عطف نظر و التفات ایتمز؛ اراده نفس
ناطقه نك ادراك و حس ایتدیکی شیلرک کندینه خیرلو اولنلرینه
میل ایدر. ﴿ اشبو قوای ثلثه بر طاقم وقوعات تولید ایدر که
قوه حافظه مرسم اولور؛ دیمکه قوه حافظه بونلرک دفتر.
خانه سی مثابه سنده در.

§ ۲۰ — ﴿ بو قوای ثلثه دن هر بری بشقه بشقه شیلر اولدیغندن و هر برینک وظایف و مقاصدی آری بولندیغندن بونلر دائماً متفق اوله میوب بعض حالاتده بونلرند اختلاف و منازعه واقع اولسی طبعیدر . اشته بغض خصوصاً تنده انسانده کوریلان تردد و تذبلر بو اوچ قوتک اختلاف ایتملرینک نتایجیدر . مثلاً اکلنجه خوشنه کیده جکندن حس اکا میل ایدر ، لکن ادراک انک حقیقتی فنا اولدیغنی اکلار و حس ایله اختلاف و منازعه ایلر ؛ و اراده انسانی زور ایله برایشه سوق ایدر ، لکن کندوسنه غیر ملایم کلسی حس ایله حس اکا مخالفت ایدر ؛ الحاصل ممکندرکه تعقل یعنی ادراک بعضاً تربیه جه ایلری کتمش یعنی حقایق اشیا یی اکلامقده ماهر بولنمش اوله و بالعکس حس کیرو قالمش بولنه ؛ اشته او حالده حس ادراکک افکار حقیقیه سنه اطاعت ایتک استمز وانک ارأه ایتدپکی یوله کتیوب کندی هواسنه کتمکه قالدیشور . حالبوکه بو قوتلرک منافع و فوائد خصوصاً صیهیه تابع اولاملری و جمله سی بدنک منفعت عمومیه سنی کوزتملری مناسب و لازمدر .

§ ۲۱ — ﴿ بو اوچ قوتک حرکتلری اوچ درجهیه منقسمدر . بو درجات ثلثه اک زیاده ادراک و تعقلده کوریلور ایسه ده دیگر ایکی قوتده دخی واردر . بو درجات ثلثه دن برنجیسی تأثر La sensibilité و ایکنجیسی ملاحظه La réflexion و اوچنجیسی عقل La raison در : ﴿

§ ۲۲ — ﴿ تأثر کرک خارجدن و کرک داخلدن خصوصی

اولان شيلرده اشبو قوه ثلثه نك حال سفلى يه ميل ايتسيدر. اكر
 ازاده حسك حرڪات خصوصيه سنه تابع اولور ايسه انسان
 حظوظات نفسانيه وشهوات حيوانيّه سنه اويهرق يولتى شاشرمش
 اولور. وچوق وقت سورمكسزىن كنديسنه ضعف وقتور مستولى
 اولور واولكى حظوظاتى دخی غيب ايدر. ﴿بو تاثر دائما مطرد
 اوليوب مقتضای حاله كوره تغيرايدر و اراده يي دائما راحتسز ايلر.﴾
 اراده نك حسه مخالفت وانى ميل وتوجه ايتديكى شيلردن منع
 ايتك ايتسمى حسه فئالق ايچون اوليوب بلكه انى خوشلانديكى
 شيلردن تماديا متلد. ومحظوظ ايتك فكرينه مستند درر. ﴿بناء
 عليه انسان رغبات خصوصيه باقيه رق انلرى اداره ايتلى ونفس
 ناطقه نك جهت وحدتى ومنفعت عموميه سنى التزم ايليدر.﴾
 فرضا اوچ ذاتدن عبارت اولان بر دولت وكلاسندن هر برى
 منافع عموميه دولتى كوزتميو بده كندى منافعه بقاجق اولسه
 مملكت خراب اوله جنى وكذلك بر عربيه قوشيلان اوچ حيواندن
 هر برى بشقه طرفه كيدرسه عربيه سمت مقصوده واصل اولمقدن
 ماعدا يارى يولده خراب اولوب قاله جنى كى بو اوچ قوتده
 نفس ناطقه نك منفعتى كوزتمزلر وهر برى بشقه طرفه ميل ايدر
 ايسه بدن خراب اولور.

﴿حقيقه كرك حس وكر ك اراده حسن صورتله تربيه اولزلر
 وهيت مجموعته نك يعنى نفس ناطقه نك سعادت وسلامتته سوق
 ايدلزلر ايسه وجودك حرڪات وسكناتنه وبوجهله نفس ناطقه نك

حکومتته خلل کلور وارتق انسان نفسنک حاکمی اوله میوب
 حظوظات وشهواتنک اسیری اولور . ﴿ بوده درجات متفاوته
 اوزره در ، اگر بوحال زیاده اولورسه انسانی بهیمیت درجه سنه
 سوق ایدر ، نوقت زمام اداره حسک انه ویریلورسه حیوانیت
 درجه سنه قدر تنزیل ایلر . لکن بهیمیت و حیوانیت درجه سی
 انسان ایچون بر حال عارضیدر ؛ بوحالده دخی انسان ایله حیوان
 بیننده ینه بریوک فرق واردر . حیواناتده ادراک قوتی اولیوب
 انلر حسه تابعدر ؛ بناء علیه بر حیوانی صالیویرسک ایستدیکی
 شیئی یاپار ، ایولکنی اصلا دوشنر ، جانی صیقینجه تکمه ایله اورر ؛
 واقعا ایچلرندن بعضاری بر درجه یه قدر تعلیم و تربیه قبول ایدر ،
 مثلا آو کوپکی صاحبنک خوشنه کتمه جکنی حس ایدرک طوتدینی
 آوی یمز ایسه ده کندولرنده ادراک قوتی اولمیدیغدن بهایم ایله
 بهیمیت درجه سنه تنزل ایدن انسانلر بیننده دخی فرق عظیم واردر .
 از جمله بهیمیت درجه سنه تنزل ایدن انسان - جنت حالی مستثنا اولمق
 اوزره - ینه طریق صلاحه میل ایدر ، فلاکتلرینی کوردکجه
 پشیمان اولور و اصلاح نفسه رغبت ایدر . بویله بهیمیت درجه سنه
 تنزل ایدن انسانلردن اصلاح نفس ایدنلر واردر . اشته بووجهاله
 انسان حیوانات سائرده دن ایریلور و بهیمیت حال عارضیسی دخی
 اوکی انسانلردن مندفع اولور .

۲۳ ﴿ ملاحظه شول وظیفه درکه روح انسانی انک
 واسطه سیله وقیاس و تخمین طریققریله معلومات استحصالنه

چالیشور؛ فقط بونکه الدینی معلومات دائماً حقیقه مقرون و موافق اوله مز، صحیح و یا باطل اولسی ممکندر. ﴿کړک کنديسنک وکړک ديکرلرينک تدقيق وتجربه لريله جرح اولنغه قابلدر. بو معلومات هيچ بر وقت افکار عموميه وياخود قواعد کليه صفتي حائر اوله مز؛ واقعا ملاحظه هر درلو اصول حکميه نك اساسيدر، انسان بو ملاحظه مناسبته حرکت وسکنا. تنده نه يابه جغني ونوقت حزم واحتياطه رعايت ايدوب ونوقت شدت کوسترمک لازم کله جکني اکلار وايجاب حاله کوره حرکت ايدر.

﴿خلاصه ملاحظه اول شيدرکه انک محړک ياخود نتیجه سي منافع ذاتيه مزده مبني اولور يعني ضمننده منافع ذاتيه مز وارايسه اني ترويج ايدرز، يوقسه نه انسانيتک منفعتي ونده اقرارا واحبا وهيئت اجتماعيه نك منافعه باقلمز؛ ديمک اولورکه ملاحظه ده خيري مجرد خير اولديني وحقى مجرد حق بولنديني وحسن حسن وصدق صدق اولديني ايچون ايستير بلکه خير وحقده وحسن وصدقده بزه فائده اولديني ايچون ايسترز. ﴿اوت انسان ملاحظه نقطه سنده دائماً منفعت ذاتيه بي نظر دفته آلور، حق فکر لرنده منفعت بيغرضانه ارامز، هر شيه منفعت شخصيه سي نقطه نظرندن بقار وهر شئي فائده خصوصيه جهتندن سنجيده ميزان ايلر. ملاحظه قواعد علم اخلاق Les systèmes de morale وتعير ديکرله منافع حقيقه مز قواعدينک ضديدر؛ چونکه

قواعد مذکورہ یہ نظراً حق حق اولدینی ایچون سویلور و باطلدن
باطل اولدینی ایچون نفرت ایدیلور و انسان منافع ذاتیہ سنی او
قدر تفکر ایتمز .

۲۴ — ﴿ عقل قوای مختلفہ نیک مدیر و اگر انلری

زیر ادارہ سنہ الورسہ منافع حقیقیہ لرینہ و سعادت و سلامت لری
حاصل اولہ حق جہتہ سوق ایدر و انلری ماسوادن تجرید ایلہ
واجب الوجودہ انتساب ایتدیرر . عقل درجہ عادیہ سنندہ ایکن
اشیانک یالکز ظاہرینی مثلاً شونک بیاض و بونک سیاه اولدینی
ادراک ایدر ، فقط درجہ اعلائیہ واصل اولورسہ اشیانک حقایق
و اسباب و منابعی اذعان ایلر و اشیادہ کی انتظامی و اشیا بینندہ کی
روابطی اکلار . ﴿ مثلاً صولرک آقسی و دومانک یوقاریہ
چیقمسکی و یوقاری طوغری آتیلان طاشک یرہ دوشمسی ہانکی
نظامہ مستند اولدینی اکلار ؛ چونکہ کائناتہ موجود اولان
اشیانک کافہ سی یکدیگریلہ متناسب و مرتبط اولوب جملہ سی الحق
برخالق تعالی طرفندن و بر مقصدہ مبنی یرادلشدر ؛ اجزای
کائنات ارہ سندہ کی بو نظام و ہم اہنکاک اثرینی حکماً ہر شیدہ
کورر ؛ مثلاً بر حکومت منتظمہ نیک امور عدلیہ و عسکریہ و ضبطیہ
و بلدیہ مأموریتلری و مؤسسات سائرہ سی کی شیرینہ باقیلہ حق
اولسہ بونلردن ہر بری عموم اہالینک منافع عمومیہ و ہر فردک
منافع خصوصیہ سنک حصولیلہ جملہ نیک سعادت و رفاه حال ایچندہ
یشامسی مقصدیلہ یا پلش اولدینی اکلاشیلہ جنی کی عقل دخی

اجزای کائناتدن هر هانکیسنه نظر ایتسه بر نظام عمومی به خدمت ایتمکده اولدیغی اکلار .

﴿ مع مافیه عقل انسانی علم الهی و حکمت الهیه ایله قیاس قبول ایتمز . عقل انسانی حکمت الهیهنك شعاعندن بر ذره مثابه - سنده در . خلاصه عقل انسانی ضعیفدر ، پك چوق سهو و خطا و فسادی قابلدر . لکن حسن صورتله تربیه اولنور و ممکن مرتبه توسع و طریق صوابه تمسك ایتدیریلورسه کائناتك قواعد و نظامی و مقصدینی بزه ممکن مرتبه بیلدیردکن مابعدا بونلرك خالق اولان واجب الوجودك صفات الهیهسنه واسع بشریتدیکی قدر ادر اکه بزه دلالت ایدر . ﴾

بحث رابع

انسانك مقصود بهی و حیاتنك احتیاجاتی و خیر

و مقصدلری

۲۵ — ﴿ انسانك مقصود بهی La destination de

l'homme دیمك جناب حقك انسانی خلق بیورمقله قصد ایتمز

اولدیغی شیدر ؛ انسانك حیاتنك احتیاجاتی Le système

des besoins de sa vie یشامسی ایچون نه لازم ایسه انلردر ؛

انسانك حیاتنك خیرلری Les biens de sa vie انسانك حیاتی

انساننده کندی . طبیعتنه موافق اوله رق حصوله کلان حالاتدر ؛

انسانك حياتك مقصدلری Les buts de sa vie ديمك انسانك دنياه كلكدن كندوسنك مقصدلری ديمكدر. اشته بومجده صره سيله بونلردن بحث اولنه جقدر :

۲۶ — ﴿كافة مخلوقاتك ذاتلرندة كندولريني انقلابات متواليه سوق ايدر برنوع حيات اولديغدن بونلرك هر برينك كندی طبيعته موافق بر مقصود بهی واردر ديمك اولور.﴾
 اوت هر بر مخلوقده اويله بر حيات واردر؛ حتی بلکه جماداته بيله و باخصوص حيوانات و نباتاتده بولنور؛ مثلاً بر تخم زرع اولنور، یرده فلیزلنور، بر ساق پیدا ايدر، دالالنور، بوداقلنور، میوه ویرر، نهایت برضعفه دوجار اولوب چورر کيدر؛ حیواناتده بویله در، از جمله انسان رحم مادر دن لحده قدر بر انقلاب دائمیده بولنور، قرآن عظیم الشانده بیورلدينی وجهله رحم مادرده برچوق تحولاته دوجار اولدقن صکره طوغار، یواش یواش نشو و نما بولور، بیور نهایت اختیار اولور، وفات ايدر. الحاصل موجوداتدن هر برينك كندی طبيعته موافق بر مقصود بهی واردر.

۲۷ — ﴿كافة مخلوقاتك مدت حياتلرندة طبيعترلينه موافق اولان بوانقلابات انلرك مقصود بهلری اولمغله بومقصده وصول ایچون حس ایده جککری احتیاجاتی دفع ايدر لر ایسه انلر حقنده خیر اولور؛ فقط کندیلرينك سوء تدبیرلری ویا خارجدن بر تعرض وقوعیله طبيعترلينك مقتضاسی اولان

بو حرکتدن کیرو قالورلر ایسه انلر حقنده شر عد اولنور . ﴿
یعنی بر مخلوقك حیاتی ائناسنده کندی طبیعتیه موافق اوله رق
حصوله کلان حالات انك خیریدر و طبیعتیه موافق اولیانلر انك
حقنده شر در ؛ الحاصل هر حال و حرکتکه طبیعتیه موافقدر
خیردر و بونك عکسیده شر در . مثلاً رحم مادرده بر چوجق
بر مقتضای خلقت نه حالده بولنق لازم ایسه اوراده او حالده
بولنسی اول چوجق حقنده خیردر و مغایر بر حالده بولنورسه
شر در ؛ كذلك بر آدمك حال صحتده و تام العقل و حریت شخصیه .
سنه متصرف اولسی و کورر و یورر و طعام ایدر بولنسی حقنده
خیردر ، چونکه مقتضای طبیعت انسانیه بویله اولسیدر ؛ لکن
بونلرک عکسی شر در ، چونکه مقتضای طبیعت انسانیهك خلاف
و مغایریدر .

﴿بوا حکام کافه حیواناته شاملدر ؛ مادامکه انسان کافه مخلوقاتك
اشرفیدر و مادامکه حیوانات سائرده متفرقا و منفردا بولنر
حواس و قوی انسانده مجتعا موجوددر کافه مخلوقاتدن هر برینك
بر مقصود بهی اولدینی کی انلرک اشرفی اولان انسانکده انلرک
فوقنده بر مقصدی اولق لازمدر . ﴿ بوندن بشقه انسان ذی عقل
اولق حیثیتیه حیوانات سائردهن بالتفوق کسب امتیاز ایتدیکنه
و عقل ایسه حکمت ربانیهك شعاعی مثابه سنده بولندیغنه و انسان
عقل جهتیهده واجب الوجوده منسوب اولدیغنه و عقلک توسعی
غیر محدود و عمومی ایدوکنه بناء ﴿ انسانده غیر محدود بر ترقی

و توسع قوتی واردر یعنی حواس و قوا سنک غیر منتهای بر صورتده
 ترقی ایتسی استعدادی و او در ؛ اشته مادامکه انسانک حواس
 و قوایی غیر محدود بر در جده توسعه قابلدر احتیاجاتیده —
 حیوانات سائر نك احتیاجات محدود سنک خلافت اوله رق —
 غیر محدوددر . ﴿ بو بر نتیجه طبیعه در ، چونکه طبیعتی محدود
 اولان شیئک احتیاجاتیده محدود و طبیعتی غیر محدود اولان شیئک
 احتیاجاتیده غیر محدود اولق طبیعی ضروریدر . ﴾ اشته بو
 احتیاجاتک دفعی کند یسجه خیردر . ﴿ یعنی حسن حالی مؤدی
 اولور ؛ مثلاً بر ادم تقدیر علوم و فنون او کرمک استعدادینه
 مالک اولور سه انلری تحصیل ایچون او قدر وسائل و اسبابه
 محتاج اولور . ﴾ احتیاجات انسانیه نامتهای اولدینی کبی خیرات
 انسانیه نامتهایدیر و بر کیسه احتیاجاتی تقدیر دفع ایده یلور سه
 او قدر خیره نائل و او قدر انسانیت سرینه مظهر اولمش
 اولور . ﴾

۲۸ § — ﴿ حکمت اصطلاحجه احتیاجدن مقصد مقصود
 اصلی بر حصوله کتورمک حقنده کی احتیاجدر ؛ خیر ایسه
 حقیقه محتاج اولد یغمز شیئی یعنی طبیعت و فطرت عالیهمزه موافق
 اولان بر احتیاج صحیحمزى دفع ایدن شیدر ؛ یوقسه صوری
 یعنی غیر صحیح اولان رغبات خصوصیه یی وهوی وهوس کبی
 احتیاجات غیر معقولهی دفع ایدن شیلر خیر دکلدر . الحاصل
 انسانک طبیعت عالیهمزه عائد اولان شیلر احتیاجات صحیح و حقیقه

اولوب بونلری دفع و تسکین ایدن شیر خیردر و طبیعت سفلیه سینه عائد اولان شیر احتیاجات غیر صحیحه اولوب بونلری دفع و تسکین ایدن شیر خیر دکل و بلکه شر در.

۲۹ — (کافه موجودات ایچون برر مقصد و خیر

اولوب بریسی ایچون خیر اولان دیکری ایچون شر اوله یلور . انسان — انتظام عالمه نظرا — هر بر نوع ایچون بر مقصد و بر خیر اولدیغنی تصدیق ایتدیکی کبی کندوسی ایچون دخی اولیه بر مقصد و بر خیر مخصوص اولدیغنی تصدیق ایله کندی حواس و قواسنك توسعنه و حواس ذاتیه سندن اولان ترقیاتك حسن حصوله سعی اتملی و رغبات سفلیه سنی دائما رغبات عالییه یعنی خلقتمزه موافق اولان ارزولره تابع قیلیدر . اشته انسانك تربیه حقیقیه سی بو توسع متناسبدن عبارتدر .

انسان عقلی سایه سنده بو کائناتك نظامنی و اجزاسنك یکدیگریله ارتباطنی و مخلوقاتك واجب الوجوده اولان مناسباتنی ممکن مرتبه بیلک اقتدارینی حائر اولدیغنی کبی مادامکه انسان کافه مخلوقاتك اشرفیدر و حیوانات سائرده متفرقا و منفردا بولنان خواص و قوی انسانده محتما موجوددر و حواس و قواسیده غیر محدود بر توسع و ترقیه قابلدن کندوسنك بر خیر و بر مقصود بهی اولدیغنی اکلایوب تصدیق ایتلیدر ؛ انسان بشقه لرینك مقصود بهنی اکلایوبده کندینککنی اکلاماق البته اوله مز ؛ یعنی انسان کندیسی ایچون خیر اولان شیرلی و مالانهایه ترقیاته استعدادی اولدیغنی و بوکا

واصل اولمغه احتیاجی بولندیغنی بیلیدر . اشته انسانک مقصود بهی بو استعدادی قوه دن فعله اخراج و بعده محافظه ایتمکدر . انسان کندینک مقصدینی بیلوب اکا واصل اولمغه غیرت ایتلی و کندینک خاصه استعدادی اولان ترقینک حصوله سعی ایتلیدر . محی الدین عربینک سطور کائناته دقت ایت ، چونکه انلر طبقات عالیهدن سکا خطاب اولنمش مکتوبلردر مآئنده اولان شو تأمل سطور الکائنات فانها * من الملاء الاعلی الیک رسائل یتی بو حکمتی مصدقدر .

§ ۳۰ — ﴿ اشته انسانک مقصد بهی خالق طرقدن کندوسنه ویریلان قوایی ممکن مرتبه توسیع و اصلاحه سعی ایتک و خلقتنه موافق و مناسب اولیان رغبات سفلیه و صوریه سنی ترک ایدوب حواس و قواسنی خلقتنه موافق اولان رغبات حقیقه و عالییه تابع قیلقدر . ﴾ انسانده ایکی درلو ارزو اوله بیلور بریسی معقول و مناسب ارزولردر ، دیکریده مضر اولان ارزولردر ؛ بو مضر اولان ارزولری ترک ایتلیدر .

§ ۳۱ — ﴿ افکار اربعه معلومه که حقیقت ، خیر ، حسن و حق فکرلیدر بونلری اقتدار بشری درجه سنده اکلامغه و بونلرک احکامنه رعایت ایتکه سعی ایتلیز . انسان بونلرله الفت ایتدیکی زمان بونلری سور ؛ چونکه بر حقیقتی بیلان اکا محبت ایده مز . بر انسانک بوفکرلری طائمی و التزام ایتسی مطلوب الهیدر . انسانک حواس و قواسنک توسمی مطلوب الهی اولدیغندن

انسانك اصل كمالی و تربیه حقیقیه سی بو توسیع متناسب ایله حواس و قواسنی اصلاح و اكمال ایتمكدن عبارتدر . برادمك عاقل و كامل اولسی بو فكرلری بیلوب موجیله عامل اولسیله اولور . انسانك قوای جسمانیه سی نصل توسع و ترقی ایدرسه قوای روحانیه سیده اویله جه قابل اصلاح و ترقیدر . ﴿ مثلا بر حال یوك طاشیغه الیشیماندن زیاده یوك قالدیرر ، كذلك اعمالك بعضیلری اللریله رنكلری بیله فرق ایدرلر ؛ چونكه قوتلری اویولده ترقی ایتشدر . ﴾ حتی قوای جسمانیه نك توسع و ترقیسی محدود اولدینی حالده عقل جناب حقك شعاعی مثابه سنده اولمغله قوای روحانیه نك توسعی نامحدوددر . ﴿ بوراده کی حدسزلكدن مقصد انسانك شو درجهیه قدر واروب اندن صكره ترقی ایتمز دیه جك برحد اولما . مسیدر ؛ اوت برادم تقدیر سعی ایدرسه اولقدر كامل اولور ؛ مع مافیه جناب حقك قوت و قدرت نامتاهیه سنه نسبتله محدود وعادتا كآن لم یكن حكمنده در .

﴿ ۳۲ — حیات انسانیه نك مختلف خیر و مقصدلری

ایکی نوعدر : نوع اول خیرات شخصییه Les biens personnels
 ou subjectifs و نوع ثانی خیرات غیر شخصییه Les bien objectifs
 در : خیرات شخصییه شخص انسانی بی ترکیب ایدن حواس و قوائك تربیه و توسیعی و درجات کماله ایصالیدر ؛ خیرات غیر شخصییه انسانك واجب الوجود و موجودات سائر و ابنای جنسی ایله اولان مناسباتنه دائر تربیه و کمالیدر . ﴾

(خیرات شخصیه اوج درلودر : برنجیسی بالذات حیاتک و متعلقانتک) مثلاً ال وایق کبی قوای جسمانیه و ادراک و اراده کبی قوای روحانیه نک (سلامت و سعادت حالی استحصال و محافظه دن عبارتدر ؛ ایکنجیسی عقلدن نشأت ایمش اولان) یعنی عقله متعلق اولان (مساوات و حریت کبی صفتلر Les qualités ی توسیعدر ؛ او چنجیسی سعی و عمل Le travail ی توسع ایدن صفتلری توسیعدر .) بوتوسیعلر بزم شخصمزه برصفت ممدوحه و بر قیمت مطلقه ویرر ؛ اشته انک ایچون بزه عالم و کامل و سائر دیرلر ؛ سعی و عمل ایله مستفید اولدقدن صکره عملیات وادمان واسطه سیله حواس و قوانک برصورت متناسبهده توسعی و بو مناسبته سعی و عمل بزجه عادت حکمنه کیرمسی دخی ایروجه برفاندهدر ؛ مثلاً چالیشوب بر مسئله حل ایدر ایسه ک بومسئله نک حل اولنمسی ذاتا برفانده اولدینی کبی فائده مز یالکز او مسئله نک حلندن عبارت اولیوب بلکه او یله مسئله لری حل ایده ایده قوت و اقتدار مز ارته جغندن دیکر مسئله لرک حلنه دخی مدار اولور که قوه مطلقه دنیلان اشته بودر ؛ بو وجهله حواس و قوانک توسعی نسبتنده حقیقت ادراک اولنور ؛ حیاتک ماده جسمانیه سی جسد و متعلقاتی اولدینی کبی ماده روحانیه سی دخی بوندن عبارتدر ؛ بوقوت خارجهده کورنمز ایسهده موجودات حقیقه قیلندندر ؛ عالم ایله جاهل البته معلوم اولور ؛ هل یستوی الذین یعلمون والذین لا یعلمون .

§ ۳۳ — ﴿ خیرات غیر شخصیه ده باشلوجه ۷ قسمه ایریلور :
 ۱ اصول دین ، ۲ علی العموم علوم و فنون ، ۳ علی العموم صنایع
 (صنایع نفیسه ده داخلدر) ، ۴ تربیه عمومی ، ۵ تجارت شخصیه
 و مالیه (اشراك و اجتماع عمومی کبی شیرده داخلدر) ، ۶ علم
 اخلاقه متعلق اولان شیر ، ۷ علم حقوقه متعلق اولان
 شیردر . ﴾

§ ۳۴ — ﴿ هر نقدر خیرات بو وجهله ایکی نوعه تفریق
 اولنمش ایسه ده حیاتك بو ایکی نوع مقاصد مختلفه سنك شامل
 اولدیغی اقسامك كافه سی بر نقطه ده یعنی بر مقصد عالیده مجتمع
 اولور ، بو مقصوده « انسانیت مقصدی » یعنی « انسانیت » در .
 بو مقاصد و خیراته هم خیرات الهیه و همده خیرات انسانیه دینه
 بیلور ؛ چونکه بو ایکی نوع خیرات و مقاصدك من قبل الرحمن
 احسان بیورلمق جهتیله الهی و انسانده تجلی و ظهور ایتلری
 حیثیتیه انسانی اولدقلرنده شبهه یوقدر . ﴾ بو مقاصد و خیراتك
 الوهیه عائد اولان جهتلری فوق مایتصور اكل و تبدل و تغیردن
 منزله اولوب انلرده تبدل و اصلاح تصور و ملاحظه اولنه من
 ایسه ده انسانه عائد اولان جهتلری توسع و اصلاحه قابلدیر ؛
 بنابرین انسان بونلرك توسیع و اصلاحنه نقدر سعی ایدرسه بونلره
 منسویتی اوقدر توسع و تزايد ایدر .

§ ۳۵ — ﴿ بو مقدماتدن شو نتیجه مهمه استنتاج اولنور که
 بو ایکی نوع مقاصد و خیرات كرك افرادك و كرك هیئت اجتماعیه ك

سعادت حال و انتظامی ایچون لازم اولدیغندن بونلرک جمله سنک ممکن مرتبه حصوله چالیشلیدر و بونلرک جمله سی درجه مساوی اولدقلرندن هیچ برینی دیکرلرینک مافوقده ویا مادوننده عد ایتاملیدر . ﴿ واقعا بونلرک یینده بالنسبه برشرافت و مقبولیت اوله بیلور ، لکن حقیقته جمله سی شریفدر ؛ حتی اصول دینه متعلق اولان علوم علوم سائرهدن شریف وانلره فائق ایسهده یالکر علوم دینیه نک تحصیلیه اکتفا ایدوبده دیکرلرینی اهام ایتلیدر دینه مز ؛ بونلرک مجموعی خیرات وانسان ایچون لازم اولدیغندن جمله سنی تحصیل ایتلیدر ؛ فخر عالم اقدمز حضرتلرندن العلم علما علم الابدان و علم الادیان حدیث شریفی روایت اولنهرق علم ابدانک علم ادبیه تقدیم بیورلدینی بیان اولنیور ، چونکه حال محتده اولیان بروجود علوم دینیه و اخروییه تحصیل ایله اوقدر اشتغال ایده مز . الحاصل نته کم برماکنه ویا سائر آلتک کوزلجه ایلمسی هریرینک دوزکون و پراهنک اولسنه متوقف اولوب برکوچک چویسی اکسک اولسه طوره جنی کبی انسانیت محتده مندرج اولان مقصدلرک هپی لازمدر و برجتهی نقصان اولورسه انسانیتک اوجهتی نقصان اولمش اولور . واقعا بوقدر مقاصد و خیراتک کافه سنی استحصاله انسانک اقتداری و حتی عمری کفایت ایتیه جکی جهتله جمله سنی تحصیل ممکن اولدینی ناقابل انکار ایسهده ممکن مرتبه سعی و غیرت ایتک هم لازم و همده مقتضای انسانیتدر ، حتی حکمائک مالایدرک کله لایترک کله

قاعدۀ كليہ سي بوم بخندہ پك جاريدير؛ بوقاعدہ يہ توفيقا مجموعي ادراك واستحصال اولنہ ميان مقاصد وخيرات مذكورہ يي بستون ترك ايتيويده اقتدار انسانيلہ عمر بشرك كافي اولديني مرتبہدہ جملہ سني محصيلہ سعي ايتليدير.

۳۶ — مقدا (۷ ده) بيان اولنديني وجهلہ حكمت حقوق قسم عمومي وقسم خصوصي ديوي ايكي قسمہ منقسم اولوب بونلرك برر بابده بيان اولنسي لازم كلور ايديسده سنہ تدريسيہ من قسم عمومينك كاملا تدريسنہ كافي اولمديغندن قسم عمومي يہ دائر شمدي يہ قدر بيان اولنان درت بحث ايلہ اكتفا اولنہ رق همان قسم ثاني يہ چلمسي مناسب كورلمشدر؛ فقط قسم خصوصي يہ چكمكسزين قسم عمومينك مندرجاتندن برطاقمي — معلومات اجماليہ اولمق اوزرہ — بروجه اتی خلاصہ ذكر وایراد اولنہ . جقدر .

۳۷ — حكمت حقوقك قسم عمومي سي ۹ فصلہ تقسيم

اولنور :

۳۸ — فصل اول حكمت حقوقك تاريخندن بحث ايدر.

يعني بوعلمك نوقت وزرہ لرده ونه صورتلہ وكيملر واسطہ سيلہ توسع وترقي ايلديكني وبالخصوص احيای علوم وقنون وصنایع La restoration des lettres, des sciences et des arts دن (يعني حضرت فاتحك استانبولي فتحي زمانی اولان ۱۴۵۳ تاريخي ايلہ ۱۶ نجی عصرك نصف اخیری ارہ سندنہ کی مدتدن عبارت

اولوب علوم و فنون و صنایعك بتكرار احیائی زمانی اولمق حیثیتله دور تجدد و دور احیا La renaissance نامنی الان دورك ابتداسندن) صکره کی صورت ترقیسنی و زمانزده نقدر اهمیتتی اولدیغنی و صفت کاشفه (La caractère) سی نه ایدوکنی کوستور.

۳۹ — فصل ثانی بو علمده کی مذاهب Les doctrines (مسالك و طرق) مختلفه دن و بونلردن هر برينك له و علیهنده سويلنان شيلردن و بونلرك اك مهملرينك و باخصوص عصر مزده اك زياده تأثيری كوريلان واك زياده معتبر و معتمد عليه اولان مذهبك تحقيق و تدقيقتدن بحث ايدر.

بو فصلده موضوع بحث اولان مذاهبدن بری ده قومونیزم Le communisme و سوسیالیزم Le socialisme مذهبایدركه بزده اشتراکیون مذهبی دیو تعبیر اولتمقده در. بو مذهب اربابی انسانلرك بر طاقمی حالت یسر و سعادتده و دیگر طاقمیده فقر و ضرورت ایچنده یشادقلرینی کوروب بو بایده مساوات حصولنی ارزو ایدرلر؛ بو مذهبك بطلانی ظاهر ایکن بر چوق علما بوکا ذاهب اولمش و بالطبع فقرا طاقمیده طرفدار کورنمشدر؛ اشته حکمت حقوق بو مذهبك اسباب و کیفیت ظهورندن و بونك بطلانندن و قابل اجرا اولمديغندن بحث ايدر.

ولی نعمت بیتممز پادشاه تبعه پرور افندمن حضر تلرینك سایه هماویه خلافتیناهیلرنده بزده هر فرد بر مسکن و مأوايه مالك

و حالانہ کورہ بر طریق کسبہ سالک اولدیغندن ممالک شاهانہیہ بو
کبی مذاہب باطلہ فرصتیاب دخول اوله مز . اما اوروپاده
و خصوصاً انکلتزده بویله دکلدز ، اواسط ناس پکده یوق کیدر ،
بر طاقم ادملز واردرکه هر برینک کونده بیکلرجه التون ایرادی
و ملیونلرله دونم اراضیسی اولوب عالی سرائلرده و ذاتلرینه
مخصوص واپورلرده فریح و فخور ذوق و صفا ایله تدویر صحایف
ایام و لیالی ایدر ؛ و بویله بر صاحب ثروت و قدرته مقابل اوته
طرفده بیکلرجه بیچارکان کوریلورکه بیه جک اتمکی و حتی یتاجق
یری اولدیغیچون بر مقتضای اقلیم ضیای شمس و حرارت لازمه دن
همان محروم اولان او ککیش جاده لرده کیمه لی کوندزلی سفیل
و سرگردان طولاشور طوررده آجلقدن و صغوقدن تلف
اوله جفی و حتی کندوسنی نهره اته جفی وقت بیله حالی سؤال
ایده جک بر مرد حیتشعاره تصادف ایده مز ؛ چونکه
بویله یرلرده هر کس کندی ایشیله (ولوکه ذوق و صفادن
عبارت اولسون) مشغول اولدیغندن فقرايه باقز ، کآن
طوفانده قالمش کبی ایشنه قوشار ، او صروده بریسی کیفی سؤال
ایده جک و حتی سلام و یره جک اولسه جانی صیقار . اشته اشتراکیون
طرفکیرانی اصل بوکبی حالاتی نظر مطالعهیه الهرق «هپ انسانلر
قرنداش یعنی حضرت ادم و حوا اولادی اولدیغی حالده بر ادمک
ملیونلره مالک اولمسی و اوته طرفده ملیونلرله ادملرک بر قارش
طویراغه و حتی بر لقمه اتمکه حسرتکش اشتیاق بولمسنی کبی مناسبتسر

مساواتسزقلرك بنی ادم بینده حکم سورمی محضا انسانلرك نقصان وقصورلرندن اولدیغندن بومساواتسزلی قالدیروبده هیز بر حالده یشایلم « دیرلر. واقعا مصیبت پك بیوك مصیبتدر ؛ لکن اشتراکیونك بولدقلری چاره طوغری دکل در ؛ بوکا بشقه بر چاره بولمیدر، علم ثروت علمای بونك اهمیتتی اکلامشالر و بویابده کتابلر یازمشالر و حکومتلرده بوکا چاره ارامشلردر، لکن هنوز بر چاره مفید و صحیح بولنه مامشدر ؛ هله اشتراکیونك بولدقلری چاره بو مصیبتیه چاره دکل در، چونکه هر کس کندوسی ایچون چالیشور، اگر ثمره سعی وغیرتی ایله یالکز کندوسی مستفید اولیوبده بوکا بشقه لریده مشارك اولمق لازم کلسه کسنه چالیشمز، او حالده بر طاقم خلقك ثمره سعی عامه از وقت ایچنده استهلاک ایدرك هپسی فقیر اولور، شمدی ایسه بر مقدار زنکین واردر ؛ دیمك اولور که اشتراکیونك چاره سی مصیبتی تخفیف بیله ایتیوب بالعکس تزید ایدر. الحاصل بر ادمی چالشدیروب زنکین ایتمك ایستیلور ایسه اول آدمك ثمره سعی وغیرتی کندوسنه و اولاد و عیالیه دیلدیکی ادملره منحصر و مخصوص اوله جغنه دائر کندوسنه تأمینات لازمه ویرلمیدر ؛ یوقسه عموم خلقك قزاندینی عمومه مخصوص بر محله جمع ایدیلوبده اورادن هر کسه سویا تقسیم اولنسی کی تداییر باطلهیه مراجعت اولمق لازم کلسه خالق بطلت و عطالت طریقلرینه تمسك ایدر و جهانده خراب اولور.

خلاصہ کلام بومذہب باطل قواعدینک تطبیق واجراسی فقر وفاقہ بی تعمیدن بشقہ برشی انتاج ایتمز .

§ ۴۰ — فصل ثالث حقوقک علی العموم حکمتہ متعلق اولان اساسلرندن (مثلاً حقوق لفظنک وجدانجہ ولسانجہ مغالرندن) وعلی العموم انسانک طبیعتندن وماخلق لهندن واحتیاجنک اصولندن وحياتنک خیر مقصدلرندن) بحث ایدر . بزم قسم عمومیدن اوله رق (باب اولده) بیان ایتدی کمز شیرک کافه سی اشبو فصل ثالث محتویاتندن برنبذه دیمکدر .

§ ۴۱ — فصل رابع حقوق قواعدینی تعیین وتخصیص ایدر یعنی حقوقک بعض قواعد مهمه سنی تعیین وبو قاعده لرندن شوتیجملر چیقار دیو انلرک نتایج مهمه سنی مثلاً حیات انسانیه نک بقاسی وانتظام وسعادتق یعنی برنظام وسعادت حال بولنسی حقوق اوزرینه مبتی اولدیغی استنتاج وتیین ایدر وعلم حقوق ایله علم اخلاق بیننده کی حدود وفرقندن وبونلر بیننده اولان مناسباتدن وحقوقک عدالت الهیه اولدیغندن بحث ایلر .

§ ۴۲ — فصل خامس حقوق وعاداتک وقانونلرک خواصندن وعلی العموم مأخذلرندن وحقوق فنک موضوعندن وحقوق نه مقوله اشخاصه تعلق ایتدیکنندن وحقوقک مأخذ ومقصدلری اعتباریله انواعندن بحث ایدر ؛ برده حقوق بویله ایکی به تقسیم اولنوبده برینه حقوق فطریه Des droits primitifs ودیگرینه حقوق مستنبطه یاخود مستنجه Des droits dérivés دینلدیکنندن

و حقوق فطریه طوغریدن طوغری به خلقت انسانیه ده موجود
اولان حقوقدن و حقوق مستنجه دخی حقوق فطریه دن استنتاج
اولان حقوقدن عبارت ایدو کندن ونه مقوله احوالده حقوق
ساقط یعنی بزم مرور زمانه مشابه و معادل اوله رق اوروپاده
مرعی اولوبده پرسقریسیون La prescription دنیلان شی
نوقت حاصل اوله جغندن و بعض احوالده اشخاص متعدده نك
حقاری بر نقطه دن اجتماع ایتدیکی تقدیرده مثلاً برقلعه محصورده
موجود ذخائر محصورینه کفایت ایتمینجه نه یولده حرکت اولنق
لازم کله جکندن بحث ایدر . كذلك متعدد ادملرك حقوقی بینده
اختلاف و تضاد وقوعنده نه یا یلق لازم کله جکندن دخی بوفصلده
بحث اولنور . بویکی اختلاف و تضاد حقوقك وقوعی واردر :
از جمله فرانسه اختلال کیرنده واقع اولمشدر شویله که اثنای مقاتله ده
مجرور اولان عاصیاری و اختلال خیلاری تجری و در دسته مأمور
و مجبور اولان حکومت محلیه یاره لرینی باقدیروب صار دیر مق
ایچون مراجعت ایدنلرك اخبار اولنمسنی اطبا و جراحینه امر
ایدرك استیفا سی کندویه ویرلش اولان احقوقك بوصورتله
استیفا سنه قیام ایتدی ، حالبوکه مجروحلر دخی عاصی اولمقله
برابر یاره لرینه باقدیر مقدمه حقلی اولدقلری جای اشتباه دکلدر ؛
اشته شو ایکی حق بیننده بویله براختلاف و تضاد وقوعه کلدی .
§ ۴۳ — فصل سادس حقوقك سقوط وزوالندن
یعنی نه مقوله حالاتده ارتق حقوق قالمیه جغندن بحث ایدر . كرك

حق و كرك وظيفه اوچ وجهله ساقط و زائل اولور: اولاً صاحبلىنىك زواليله زائل اولور: مثلاً حق صاحبى وفات ايدر سه ارتق اول حق زائل اولور، مكر كه وارثنه انتقال ايدە؛ ثانياً صاحبنىك متغير اولان صفاتندن برينىك ضياعى ايله زائل اولور، مثلاً بر مأمور ويا عسكرىك مأموريت و عسكرلىك حسييله موقعنه مخصوص اوله رق حائز اولدىنى حق مأموريت و عسكرلىك زواليله زائل اولور، كذلك سنه فرضاسن صغره وياسن كبره مخصوص اولال حقه دار صاحبنىك اول سنده بولنامسييله بر طرف اولور؛ ثالثاً علاقه دار اولنلرك مدخلى اولميه رق موضوع بحث اولان يعنى حق كندوسنه تعقل ايتمش بولنان شينىك زواليله ساقط اولور، مثلاً بر ترلايى صو باصوبده ذكر التنده قالنجه ترلا زائل اولدىنى كى صاحبىكده انده اولان حقى زائل اولور. اشته بوكى سقوط وزوالك تفصيلاتندن بو فصلده بحث اولنور.

§ ٤٤ — فصل سابع حقوق عاديه ايله حقوق جزائيه بيننده اولان فرقندن و جزائىك انواعىندن واسبابىندن و مقصود بهندن و حكم اولنه حق جزائىك اجراسىندن بحث ايدر. يالكر جزائىك حكم ايتىك كافى اوليوب انك اجراسى دىنى امور عدليه نك متمماتىندن در و بلكه اك مهمميدر، انك ايچون نصل اجرا اولنديغنه دقت ايتلميدر، باخصوص اجرا مأمورلى قانونه اشنا اولميدر، چونكه بر شخص مجرم و محكوم اولمقله حقوق انسانيه دن كاملاً محروم اولمز، محكمه جه تقدر جزا حكم اولنمش ايسه اول

قدر اجرا اولمیدر، زیاده اجرا اولنورسه انک فاعلریده مستحق جزا اولورده بر محکمه حضورنده انلرکده مجازاتلرینه حکم اولنسی لازم کلور، بو مأمورلر عادتاً جامه شوی کیدر، محکوملری صنف صنف ایرملی و هر صنفه کنیدی جرمی درجه‌سنه کوره مجازات ایتلی واندن زیاده اوله‌رق حقوقه تجاوز ایتاملیدر. جزانک اجرایی اثناسنده محکومک حیاته، صحتته، ناموسنه ومانه ذره قدر خلل کتورمک جائز اوله‌ماز. اشته بو فصلک مندرجاتی بو کبی مسائلدن دخی بحث ایدر.

§ ۵۵ — فصل ثامن مطلقاً علم حقوق ایله حیات انسانیه بیننده شدت ارتباط و مناسبت اولدیغندن بحث ایدر. حقوق ایله حیات بیننده اولقدر شدت ارتباط واردرکه بری تقدیر قوی اولورسه دیکریده اولقدر قوی اولور. بر مملکتده حقوق تقدیر طائش ایسه او مملکتده حیاتک و لوازم حیاتک قوتی او درجه زیاده اولور وسعادت حال اولقدر ترقی ایلر. حتی بر مؤلف بو معنایی افاده ایچون «حقوق حیاتدر» دیمشدر؛ فی الواقع طوغریدر، نروده حیات وار ایسه اوراده حقوق و نروده حقوق وار ایسه اوراده حیات واردر؛ واقعا حقوق ایله حیات ماهیه و جنسا مختلفدر، اما بر برلرینه شدت اتباطلری اولدیغنی ایچون بویله دنیلشدر؛ چونکه بر مملکتده حقوق قواعدی معلوم و مرعی اولسه او مملکتده کسسه جانندن و عرضندن و مانندن امین اوله‌مز؛ بر مملکتکه اوراده قانون یوقدر، محکمه یوقدر،

اجرا یوقدر اورادہ کی انسانلر مال و جان و عرضلرندن امین اولہ مزلر ، اورادہ الحکم لمن غلب قضیہ سی جاری اولور : مثلاً فقیر اولان بر شخص زحمت چکەرک قزانمنی تفکر ایتزده بر زنکینک مالی چالوب چارمنی ملاحظہ ایدر . حیات ایله حقوق اولقدر مرتبطدرکہ بر جنین رحم مادرده تگون ایتکہ باشلدینی وقتدن اعتباراً حقوق صاحبی اولغہ باشلار ، حتی سقوطنہ سبب اولان کمسنہ یہ مجازات و دیت ترتب ایدر ؛ اشته بو جنین تولد ایدوبده بیودکجه درجه درجه حقوقی دخی بیور و وفات ایدنجہ یہ قدر دوام ایلر و وفاتیلہ حیاتی زائل اولدینی کی حقو . قیدہ زائل اولور . اشته بو فصل بو کی شیلردن دخی بحث ایلر .

۴۶ — فصل تاسع مطلقاً حقوقک موضوع و مأخذی اعتباریلہ و اعتبارات سائرہ ایله اقسامندن بحث ایدرکہ بر نبذہ سی مدخل علم حقوقده دخی بیان اولنمشیدی .

باب ثانی

حکمت حقوقک قسم خصوصیسنه دائر بعض مسائل بیاننده اولوب ۱۱ فصلہ تقسیم اولنمشدر . (حکمت حقوقک قسم ثانیسی بزجه قسم اولندن انفع اولقلہ برابر اندن اوسع اولوب اعتبارات عدیده ایله ابواب و فصولہ تقسیم اولنہ کلکده در ؛ هانری اهرنس Henri Ahrens نام المان مؤلف حکمت حقو .

قنك قسم خصوصیسنی ۳ کتابه تقسیم ایتدیکی مثللو کتاب اولی
 ۲ نوعه ونوع اولی ۳ قسمه وقسم اولی ۴ فصله وقسم ثانی یی بر
 مقدمه ایله ۳ باب و باب اولیده ۴ فصله وقسم ثانی یی ۲ باب و باب
 اولی ۳ و باب ثانی یی ۲ فصله ونوع ثانی یی ۲ قسمه و بو قسملری
 اوچر فصله تقسیم و کتاب ثانی یی ۳ نوعه ونوع اولی ۲ فصله
 ونوع ثانی یی ۲ قسمه وقسم اولی ۲ وقسم ثانی یی ۴ فصله ونوع
 ثالثی ۲ قسمه وقسم اولی ۳ وقسم ثانی یی ۴ فصله تفریق ایتمش
 و کتاب ثالثی دخی ۲ فصله آیرمشدیر؛ اشته قسم خصوصی دخی
 بویله بر بحر بی پایان ایکن بونك دخی بعض مسائلی ایله اکتفا و لنسی
 مجرد بر سنه نك ایام تحصیلیه سنده و همد هفتده بر ساعت مدت
 ظرفنده قسم عمومینك باب اولده کچن ابحات اربعه سیله معاند ریس
 اولنقمده بولندیغندن ایلرو کلمشدیر .)

فصل اول

انسان هر درلو حقوقك مقصد و غایتی اولدیغنه دائر در
 § ۴۷ — ﴿ انسان هر درلو حقوقك مقصد و غایتیدر :
 هیئت اجتماعیه تشکیللری و قوانین اساسیه ایله بونلره متفرع
 قوانین و نظاماتك وضعلری و محاکم و عسکر تنظیمی کی قدر
 تأسیسات و مؤسسات اجتماعیه وار ایسه هپسندن مقصد انساندر
 یعنی بونلرك كافه سی انسانه متعلق اولوب انسان ایچون یاپلشدیر

یوقسه بشقه بر مقصد ایچون دکلدر. ﴿ بوراده انساندن مقصد بر فرد ویا بر جماعت ویا بر صنف اولیوب عموماً نوع انساندر. چشم امعان ایله نظر اولنورسه کوریلورکه صانع حکیم مطلق حضر تلرینک انسانه بو عقلی و قوای جسمانیه و حواس روحانیه یی احسان بیورمسنندن مقصد الهی انسانک خیره نائل و ترقیات مغنویه مظهر و واصل اولمیدر؛ مادامکه بو حقیقتی کوریورز کافه قوانین و تشبثاتمز بو مقصدک حصوله خادم اولمیدر؛ بو تدابیرک علت غائیسی عموماً نوع انساندر؛ ماسوا یعنی خالق تعالی حضر تلرنندن ماعدا کافه اشیا انسانک منفعتنه مخصوص وانک ترقیسنه الات و ادوات مثابه سنده در؛ قرآن عظیمده وجعلنا لکم مافی الارض جمیعاییورلمسی افاده مزه دلیل قویدر.

§ ۴۸ — ﴿ اصل اکلاشلی مهم اولان وکافه تشبثات وحرکاتمزده بزه رهبر و معین اولمسی لازم کلان حقیقت بودر. بو حقیقت اوللری معلوم اولمدینی کبی رعایت اولنمز ایدی؛ ۱۸ نجی عصرک اواخرندن برو اکلاشلغه باشلدی، یعنی حکما وادبا و علما بونی اکلایهرق بونکله مشغول اولمغه باشلدی و حکو. متلرده اجراسنه تشبث ایتدی. اشته اول وقتدن بری ارقه سی بر اغلیهرق کتدکجه توسع ایتمش و شمیدی اوروپاده وسائر ممالک متمدنده بر مسلك عمومی حالنه کیرمشدر؛ بو مسلك اقتضا. سنجه زمانمزده یاپیلان هر درلو اصلاحات و مؤسسات مدنیه و سیاسییه نك غایتی قوانینک طبیعت انسانیه یه موافق اولمسی

۲۰۷ از مدرسه حقوق و ۴ از کانون حقوق

مقصودندن عبارتدر ، تعبير ديكرله كافه تدابير وتشبثاتك غايي قوانينك خلقت انسانيه موافق اولسي مقصودندن عبارتدر .)
 بو ايسه يك واضحدر تعريفه حاجت يوقدر : مثلا بر ثوب كيم ايچون ياييله حق ايسه انك حاله كوره اولق وصيحا يرد
 كيه جك ايسه سرين طويجي وصغوق يرد كيه جك ايسه صيحا
 طويجي اولق لازم اولديني كي بر قانون ياييله جني وقت دخی
 انك طبيعت و خلقت انسانيه موافق اولسي نظر اعتباره
 آئمليدر ، يوقسه فلان قومدن دها زنكن اولق وفلان يري
 استيلا ايتك وفلان محل اهاليسني تحت قهرده طومتق مثللو
 مغاير انسانيت حالله باقلامليدر ، مكركه مقاصد انسانيه نك
 حصولي بو حالله تشبثدن بشقه صورتله حاصل اوليه . (اشته
 بو وجهله قانون يامق حكمت حقوق ايله اوله ييلور .)

§ ۴۹ —) آف الذكر اصلاحات مدنيه نك برنجيسي
 معارف عموميه و تربيه عموميه L'instruction publique در .
 چونكه هر فرد كنديسي ايچون مدت حياتنده رفاه وسعادت
 حاله مدار اوله حق شيلري اوكرنمليدر ، اطلب العلم من المهد
 الى اللحد يعني بشكدن مزاره قدر علم تحصيل ايت بيورلشدر .
 تربيه عموميه ايسه برهيئت اجتماعيه ي تركيب ايدن افرادك
 كافه سني ممكن مرتبه او قودوب يازدير مق و حقوق و وظائفلريني
 ومدت حياتلرنده كنديلرينه لازم اولان معلومات نافعهي تعليم
 ايتك وجناب حقك انلره احسان بيورديني حواس وقواي

و افكار لرینی توسیع ایتدکدر . تربیه عئومیه نك حصوله هر کس
نصل سعه مجبور ایسه انلرك آمر و مدیری اولان حکومته
افرادك بوبایده کی سعهنی اویله جه حمایه ایتلیدر . بو حقیقت
جلیله یی اك اول شریعت غرای اسلامیة نشر بیورمش و بوبایده
يك چوق آثار وارد اولمشدر ؛ حتی فخر کائنات افندمن حضر تلی
العلم فریضة علی کل مسلم و مسئله بیوره رق تحصیل علم کرک ارکک
و کرک قادین هر مسلم اوزرینه فرض یعنی عادتاً بوزج اولدیغنی
تفهیم بیورمشلردر .

(شریعت اسلامیة نك وضع ایتدیکی بو حقیقتی هر فرد
اکلایه مدیغندن و اکلایانده لایقیله اجرایه مقتدر اولدیغندن
بونك اجرا سنه ابتدا المانیا دولتی عصر حاضرده باشلدی و سائر
دولتلر و از جمله فرانسه بوبایده المانیایه تبعیت ایتدی .) شویله که
اولا المانیاده و صکره فرانسه و بلجیقا و امریکا کی یرلرده مجبوریت
تعلیم L'instruction obligatoire اصولی وضع و قبول و بونك
وسائطی تهیه و اکمال ایدلشد .) المانیا و اکا تبعیت ایدن
یرلرده تربیه اولیه عموم ایچون مجبوری و حجانا اولوب مصارفی
اغنیایه تحمیل ایدلشد . تربیه اولیه اوچ شیدن عبارتدر : اول
هرکس کندی لسانی اوقیوب یازمق ثانیاً علم حالی اوکر نمک
ثالثاً علم اخلاق ایله بعض مقدمات علومی تحصیل ایتدکدر .)
تعلیم و تربیه نك مجبوری اولسنك سبب و حکمتی شودر که :
چو جقلر بیویوب جمعیه داخل اوله جقلرندن انلری تعلیم و تربیه

ایتمک جمعیتہ حاضر لمقدر ، البتہ جمعیت اجتماعیہ افرادی تقدر
 معلوماتی و تربیہ لی اولور ایسہ رفاه وسعادت حالری و یکدیگریلہ
 حسن الفت و امتزاجری اونسیبتده اعلا اولور ؛ برملکتده
 تعلیم و تربیہ نک تعمیم انتشارینک جرائمک از وقوعبولسندہ
 دخی دخل کلیسی واردر ، زیرا تربیہ لی اولان برذات جرمک
 فناغنی تقدیر ایدر و اندن کرک ماده و کرک معنا ضرر کورہ جکی
 و هرکسک نظرندہ مردود و مقهور اوله جغنی و نہایہ الامر جزا
 کوروب ناموس و اعتباری رخنہ دار اوله جغنی بیایوب اندن
 اجتناب ایدر ؛ بوندن بشقہ اہالیسی معلوماتی | برملکتده حقوق
 دعوالری دخی اکیسلور ؛ چونکہ هرکس حق و باطلی دہا ایو
 تفریق ایدر و محاکمہ و مرافعہ صنف ایدہ جکلری اوقاتی مدنیت
 و معموریتہ صرف ایلرلر . اہالی بی تعلیم و تربیہ ایتہرک محکمہ لرتشکیل
 و جانیلرہ مجازات ترتیب ایلک حفظ صحت قواعدینہ اہمیت
 و یرمیرک یالکز خستہ لرہ مداوات کیدر ؛ اگر هرکس فن حفظ
 صحت قواعدینہ رعایت ایتسہ خستہ لق تکثر ایتمز و بنا برین تداوی
 و دواہ او قدرده حاجت قالرز . تعلیم و تربیہ نک مجبوری اولسندہ
 ایکی محذور تصور اولنہ بیاور : بریسی خلقک حریتی سلب
 ایدرک تعلمہ اجبار ایتمک و دیگری دخی اطفال فقرانک تعلیمی
 مصرفنی اغنیایہ تحمیل ایلکیدر ؛ لکن حقیقت حال تصور اولنور
 ایسنہ بو محذورلرک و اہی ایدوکی کوریلور ، چونکہ هرقدر
 خلقک حریتی سلب ایدیلور ایسہ دہہ بونک ضمنبدہ ہیئت

اجتماعیه نك سلامت و سعادت حالى حصوله كلدیكندن بویله بر مقصد مهمه وصول ایچون اوقدر جق سلب حریتده باس یوقدر ؛ اغنیادن النان اچه دخی بستیون هبایه گتیوب ینه انلرك منفعتی ایچون صرف اولنیور، بومنفعت ایسه معلوماتلی و تربیه لی بر جمعیت ایچنده یشامه لریدر .

§ ۵۰ — (سالف الذکر اصلاحات مدنیه نك ایکنجیسی

انسانلرك اتحادیدر . هر انسان حرکات و سکناتنده یالکر کندی نفسنی دوشنیوب عمومك منفعتی دوشنلیدر یعنی عموم نوع انسانی شخص واحد عد ایتلیدر ؛ انسانلر یكوجود وهم آهنگ اوللی و هر انسانك كرك واسطه و كرك غایت اوله رق حرکات و سکناتی اتحاد خدمت ایتلیدر .) اشته عموم انسانلر بر شخص حکمنده و هر فردده انك بر عضوی مثابه سنده در ؛ مثلاً بر عضوه دیکن باتسه اعضای سائرده وجع و ضرر کلدیکی کبی بر فردده ضرر کلسه عمومه ضرر کلش حکمنده اولور ؛ شیخ سعدینك بنی ادم اعضای یکدیکنرند * که در افرینش زیك کوهرند بیت مشهوری بوکا اشارتدر ؛ بر آج یاخسته ادم کور بجه بزده مرحمت حاصل اولمسی و اکا آج ایسه اتمك و خسته ایسه علاج و یرمکه شتاب اولنمسی بر میل طبعیدر که افاده مزى تأیید ایدر .

§ ۵۱ — (اشته هب تشبائتمزك، تداییرمزك اصلاحات

مدنیه نك غایتی یعنی هر بر حرکت دالینك صاپی انساندر ، هر بر خیر خصوصینك مرجع و غایتیده خیر انسانی اولمایدر ؛ بناء علیه

امور سیاسیه یاپیله حق هر درلو تدایرک مقصدی انسان اولدینی
 کی تربیه متعلق هر درلو علوم و معارفک دخی اساسی انسانیت
 اولمیدر . ﴿ مثلاً و قتیله امریقاده زحمتلی ایشلرده زنجی استخدام
 اولنیور و بوکاسب مجوز اوله رق هوا سیجاق اولدینی جهته او
 ایشلره بیاضلر تحمیل ایده منر دنیلور ایدیسه ده محصولات ارضیه
 و معمولات صناعیه بی کثرتله ودها آز مصرفله وجوده کتوره جکر
 دیو برطاقم انسانلری جبرا استخدام ایتک مغایر انسانیت بر معامله
 اولدینی اکلاشیلیور نجبه اتفاق دولی یعنی قانون بواصولی منع
 ایتدی . کذلک فابریقهلرده اهون اجرته چو حق استخدام ایدلمکده
 و چو جقارک عقللری ایرمامکده اولدیغدن فقیر و جاهلار چو جقارینی
 فابریقهلره ویرمکده لرایسه ده قانون مداخله ایندرک چو جقارک
 مکتبه دوامه مجبور اولدقلری زمانلرده و حاللرینه مناسب اولیان
 ایشلرده و تحمللرندن زیاده استخدام اولنلرینی منع ایدر . برانکلز
 بر جراحه کیدوب بر ایاغنی کسمسنی تکلیف و جراحده صاغلام
 اولدیغنی کورنجبه کسمکدن امتناع ایدر و انکلز «ایاق بنم دکلای اذن
 ویردم کس» دیو اصرار ایدنجبه جراح «ایاق سنک ایه ال ده
 بنمدر انسانیت مغایر بر حرکتده بولنه منر» دیو جواب ویرر ،
 نهایت انکلز روولوری چیقاروب ایاغنه صیقوب جرح ایدنجبه
 جراح «شمدی قطعی لازم کلسکله موافق انسانیت در» دیهرک قطع
 ایدر . خلاصه کلام هر فرد موافق انسانیت حرکاته چالیشه جنی
 کی حکومتلرده فطرت انسانیه ده بالقوه موجود اولان هر درلو

حواس وقوانك ظهوره كلوب توسع ايتسنة واسبابنك حصوله
 سع ايتلى وحتى دائما بوكانظارت ايليدر يعنى حكومتلك باشاوجه
 وظيفه سى بو اولمايدر و انسان حقوقك غايتى اولمى حقنده بيان
 اولنان وطبيعت انسانيه مقتضاسى بولنان بو اصول كرك حقوق
 عموميه وكرك حقوق خصوصيه ده على العموم قوملرده وحكومتلر.
 ده برر رهنما اولوب بر پوصله حكمنده در ؛ هانكى حكومت بو
 پوصله موجبنجه حركت ايدرسه منزل مقصودينه واصل اولور،
 بوكواعدك مبنى علييدر 'كرك قواعد فن ثروتنجه وكرك امور
 سياسيه جه هر قوم بر شخص انسانى حكمنده اولغله بر شخص حقنده
 روا كورليان ماده بر قوم حقنده دنى روا كوريله مز .

فصل ثانى

على العموم انسانك حقوقه دائر در.

۵۲ —) انسانك مستقل وهر درلو مقاولات انسانيه
 واجتماعيه نك مافوقنده بعض حقوق و اردر كه طبيعت انسانيه ده
 موجود در .) يعنى عموم انسانلرك من حيث الخلقه بعض حقلى
 واردر ، هر انسان مجرد انسان اولدينى جهتله بوكحقه مالك
 ومتصرف در ، بوكحقوق انسانله وجوده كلور وكندوسيله برابر

دوام ایدر و محو و زائل اولور . هرشیدن مستقل و هر درلو مقاولات بشریه نك مافوقنده بولنان ﴿ بوحقوقك موجودیتی متقدمین عندنده دخی معلوم و مسلم ایدی . حتی یونان شعراسندن فاجعه نویس مشهور سوفول Sophocle (قبل المیلاد ۴۹۸-۴۰۵) بوحق نه بوسکوندن ونه ده دوندن اعتباراً دکلدر ، من الازل (یعنی انسانك خلقتندن برو) موجوددر ، نوقت وجوده کلدیکنی کیسه بیلز دیمشیدی . مع مافیه اسکی زمانده معرفت تامه ایله و حقیقتی وجهله اکلا شلامش و از جمله نه وقت وجوده کلدیکی و قابل ترقی اولدینی معلوم اولمامش ایدی . ﴿ حالبوکه انسان ایله وجوده کلدیکنی و قابل ترقی اولدینی بز نیلورز ، بوحقوق انسانك قوه عقلیه سنده مرکوز اولان برقوه الهیه نك نتیجه سیدر ، معلومدرکه عقل نور الهینك برشعا عیدر .

§ ۵۳ — ﴿ بوحقوق اوروپاده اسکیدن برو معلوم اولمش وازمنه اخیرده دهاجه اکلا شله رق بالتدریج توسع ایتمش ایسه ده اهل ظهوره کلسی و قوانینه مأخذ اولمغه باشلامسی بوندن یوزسنه اول اولمشدر . واک ابتدا بوحقوقی طانیه رق موقع اجراده طوتان ۱۶۸۹ ده انکلترده نشر اولنان حقوق فرمانی Bill of rights اولمشدر ؛ انکلیز قومنك حقوق و حریتی اعلان ایدن اشبو فرمان بوحقوق انکلترده اکابر واعیان ییتنده شایع اولمسی اوزرینه صادر اولمش و بوفرمانده حقوق انسانیه بر درجه یه قدر تصدیق ایداشدر . صکره حقوق طبیعیه احوالی ممالک محتمه

امریقاده دها زیاده صراحتله توسیع اولمشدر ، شویله که ۴ تموز ۱۷۷۶ ده حکومتات متحده امریقانک قونعده صورتنده تشکل ایدن جمعیتنه مأمور اولنلر یابدقلمری حقوقنامدهده شویله دیمشدر :

«بوبر حقیقت واضحهدرکه انسانلر مساوی طوغارلر وخالق تعالی طرفندن کندیلرینه ممتنع الفراغ و ممتنع النزاع بر طاقم حقوق ویریلورکه حیات وحریت وهرکس سعادت حالنی ارایه بیلک حقلمری بونلردندر واک باشلوجهلریدر وبوحقوقی محافظه ایتک ایچون حکومتلر تأسس ایتمشدرکه بوحکومتلرک حقوقی اداره ایتدکلمری اهاالینک رضا وتسلیمتندن ایلروکلور (یعنی اهاالینک حقوقی حقوق طبعیهیه و حکومتک حقوقی دخی اهاالینک موافقتنه مستنددر) .» بوحقیقتلر برمدت صکره دها اچیق صورتده فرانسه اختلالنده میدانله چیقمش وحتی فرانسه نك ۱۷۹۱ و ۱۷۹۳ و ۱۷۹۵ تاریخلی قانون اساسیلرنده انسان واهالینک حقوقی Droits de l'homme et du citoyen دیو ذکر وتصریح قلمشدر .) بوحقایق علیهنده جهلا وغرضکاران چوق اعتراض ایتشدر ايسهده هرکسک کوزی اچلش وبوحقوقک جمله حقنده خیر اولدیغی اکلاشلش اولدیغندن تأثیری اولمامشدر . بونک علیهنده اعتراض ایدنلرک باشلوجهلمری خودسرانه حرکت ایتک استیانلر ايله اشتراکیون وقومونست طاقلمریدر ، خودسرانه حرکت ایتک استیانلر هرشیئی منفعت شخصیلهلرینه فدا ایدر طاقندن اولدقلمرندن بوندن خوشلانمیه جقلمری طبعیدر ، اشتراکیون

وقومونیسٹ طاقتوری دخی کویا فقرای وخصوصاً عملہی محافظہ و صیانت ایتک فکر فاسدینہ دوشدکرندن عمومک منفعتی نظر اعتبارہ المازلر . حالبوکہ بوحقوق عمومک منفعتی ملاحظہ سیلہ وضع واستخراج اولنشددر ؛ بوندن مقصد جمعیتی حرکات خود سرانہدن قورتارمق وانسانک حقوقی متمتع التغیر برتمل واساس اوزرینہ بنا ایتمکدر .

§ ۵۴ — دین مبین اسلام مساوات وحریت کی قواعد حقوق انسانیہی تاسیس ایتدکدن وغندالاسلام ہردرلو حقوق طبعیہ ولایسیا مساوات وعدالت کرکی کی استقرار ایلدکدن یک چوق عصر صکرہ عالم انسانیتہ یوز بیکلر جہ جان بدلی اولہرق ظہورہ کلان فرانسه انقلاب عظیمی وجودہ کتوروبده اوروپادہ مساواتک موقع فعلہ قونمسنہ ونجات واصلت طرفدار لرینک مغلوبیتہ موفق اولنلر دین مبین اسلامک وضع و اعظم اسلامک قبول واتباع بیورمش اولدینی قوانین اجتماعیہی وقواعد مساواتی نظر مطالعہیہ الہرق بونلرک مافوقدہ قانون عدالت اولہمیہ جغنی تیقن ایتدکری آندہ ﴿ اوروپا جہ برنجی دفعہ اوللق اوزرہ نشر اولنان انسانک حقوقی اعلاننامہ سی La déclaration des droits de l'homme نام بیاننامہ حد ذاتندہ دوشونلرکدہ جمعیت بشریہی بولندینی وادیء خودسرانہ ومستبدانہدن چیقارمق وآنی بر طاقم اساس متعذر التغیر اوزرینہ بنا ایتک مقصدینہ مبتیدر . اشته بو اعلاننامہ قعر ابدی طبعیت

بشريه به نوع ما بر لنگر انداخت ايتمك و بو طبيعت
 بشريه دن مستنچ و مستنبط بر طاقم حقوق طبيعه تدوين ايتمك
 ايستر ايدى ، بو حقوقده حقوق طبيعه ايدى . بو حقوق تمام
 بر عصر لى قدر تدقيقات فلسفيه نك ثمره نافع سيدر . هم اويله بر
 ثمره نافع كه عقيم و بى فائده قالميوب بر صورت متزايدده ذهن
 و وجدان ادمه حيات مدنيه قواعد اساسيه سنى ادخال ايتمش و دائماً
 نوقت كه بر قوم بر بيوك انقلاب سياسيدن صكره حائر اولدينى قواى
 روحانيه و جسمانيه سنك سربستى توسعائى تايمين ايتمك ايتمش
 ايسه بو اساسى قانون اساسيسنه ادخال ايتمشدر؛ از آن جمله بلجيقا
 ۱۸۳۰ ده و فرانسه يكيدن لوى فليب زماننده ۱۸۴۸ ده و المانيا
 ۱۸۴۹ ده و اوستريا ۱۸۶۷ ده بو اصول قبول و قانون اساسيله
 درج اولمشدر . ممالك شاهانه كلنجه بو اصول محاسنشمول دين
 مين اسلامك وضع بيورمش اولدينى قواعد جليله دن اولقى مناسبيله
 بتون عثمانلورك شهنشاه عدالتدستگاهى و كافه مسلمينك قبله كاه
 خلافتپناهى و حرمين شريفينك خادم حقايق اكاهى اولان بيوك
 سلطان عبدالحميد خان غازى حضرتلى تحت على بخت عثمانى بى
 بالين والاقبال تشريفلىرى متعاقب هيچ بر فرد طرفدن طلب و حتى
 اخطار و قوعوب و لمقسزين ۷ ذ ۱۲۹۳ تاريخ هجرىسيه تبعه
 صادقسى قوللرينه احسان بيوردقلى قانون اساسيه موضوع
 اولمشدر.

§ ۵۵ — (بو حقوق طبيعه انسانيه ايكي قسمدر: قسم اول

حقوق ذاتیه Le droit de la personnalité درکه انسانک صفات ذاتیه واساسیه سندن یعنی انسانیت صفتندن منبعثدر. ﴿حقوق ذاتیه انسانک صفات ذاتیه سندن متولد و مجرد انسان اولدینی حیثیتله حائر اولدینی حقوق درکه ذاتیدر عرض دکلدر. ﴿مثلا ۱ حیات La personnalité vivante، ۲ حیثیت و اعتبار La dignité، ۳ ناموس L'honneur، ۴ مساوات L'égalité، ۵ حریت La liberté و ۶ مدنی بالطبع اولقلق La sociabilité حقلری کی . وقسم ثانی دخی انسانک سعی و اهتمامیه استحصال ایتک مجبوریتده بولندینی مقاصدندن منبعثدر، حق تملک و تصرف وسائر امثالی حقوق کیکه بونلر عرضدر. ﴾

۵۶ § — لاحقه : حقوق غایت واسعدر ، حقوق عادیه ، حقوق تجاریه ، حقوق جزائییه کی ؛ بونلرک کافه سی براغاجک متعدد اغصانی مثابه سنده اولوب نهایت برقاچ داله منتهی اولورکه بوداللر حقوق انسانیه در ؛ بوداللر دخی بر بدنه واصل اولورکه انساندر ؛ دیمک اولورکه حقوق اغاجنک بدنی انساندر . حکمت حقوق ایشه مواد قانونیه دن هر برینک ایری ایری حکمتی ، سبینی ، علتی بیان ایتمز ؛ بلکه اوماده لرک مبنی علیهی اولان حقوقی یعنی حقوق انسانیه یی و بو حقوق انسانیه نك حکمتی کوسترر و بوندنده متفرعاتک احکام واسباب و حکمی اکلاشیلور .

فصل ثالث

حقوق ذاتیه

﴿ ۵۷ ﴾ حقوق ذاتیه انسانك صفات ذاتیه سینه متعلق
و مخصوص اولان حقوقدرکه بونلر انسانك حقوق طبیعه سندنلر.
انسان ذی عقلدر ، ذی روح اولیانلره و حتی سائر حیواناته مقیس
دکلدر . بوصفات شخصیه نك مبنی علیی عقلدر ؛ بو عقلده نور
الهینك انسانده ظهوره ککش برشعا عیدر ؛ بناء علیه انسانده نقدر
افعال واحوال مذمومه اولسه انسان ینه انسان اولق اوزره
تلقی اولنلی و کندیسنه ینه اولهجه اعتبار ایدلملیدر . ﴿ مثلاً برادم
نه درلو رزائل اخلاقیه ایله متصف اولور ایسه اولسون وحد
ذاتنده نصل الحق و نقدر جاهل بولنور ایسه بولنسون ینه
انسانیتدن چیقمش اوله مز و « بوادم هر بقدر انسان قیافتنده
ایسه ده انسانلقده علاقیمی یوقدر ، حیوان کبی یشار ، چبلاق
کرر ، حل و حرمتی یئیز ، انسان دکلدر » دنیه مز . ﴿ چونکه
مادامکه انساندر او حالردن قور تلق قوتی کندوسنده موجوددر ،
خالق او استعدادی کندوسنه و یرمشدر ، بتون بتون انسانیتدن
چیقمش صایله مز و هیچ بر فرد دیگر فردیه غیر قابل اصلاحدر
دیمك حقنی حائر دکلدر و اکر بر آدم اصلاح اولماش و حیدود
و قاتل اوامش ایسه اصلاحی چاره سینه باقلامش و یا خود تدابیر
مخنده کفایت ایتماش دیمکدر . ﴿

مشهور کلامدر ، « کلدرا اما باشمدر ، کسوب اتم » دیرلر ،
 بوقیلدن اوله رق ﴿ بر فرد دخی تقدرفنا اولسه بنی نوعمزدندر ،
 اصلاحی چاره سنه باقلیز . مثلاً الیوم افریقا داخلنده ، جزائر
 بحر محیطده ، امریقاده و اوستریلایده بولنان چیلاق و وحشی
 ادملر تقدرسی اولنش ایسه ده اصلاح اولنماشدر دیه اعدام
 اولناملیدرلر . ﴿ اوت ! اورالرده بومثللو همان حیوانیت درجه سنه
 یقین وحشی طائفلر واردر ؛ بونلر چیلاق کرلر ، مسکنلری یوقدر ،
 نروده اخشام اولورسه اوراده بر اغاج ویاطاش بوجاغی بولوب
 کرلورلر ، نه اولورسه اولسون اللرینه کچن شیرلری یرلر ،
 ینلرنده روابط زوجیت ونسب یوقدر ، حاصلی عادتاً حیوان
 مثابه سنده درلر ؛ آچینه دخی بویله بر طائفه وارایمش ، انکلیرلر
 بر قاج دانه سنی انکلتریه کتوروب تربیه ایتمشلر ، لکن صکره
 مملکتلرینه کوندر دکلرنده حال اصلیرینه رجوع ایتمشلردر . جمعیت
 یعنی هیئت اجتماعیه خالنده یشایان انسانلر اره سنده اومثللو
 وحشیلره قریب ادملر بولندیغی واردر . بوده اکثریاعقلسنزلقدن
 نشأت ایدر یعنی محنون و یادرجه نهایده ابله و احمق اولنلر بو
 حالده بولنور . بعضا دخی جمعیت ایچندن غائب اولمش و بر
 اورمانده قالمش انسانلر واردر که بنی نوعلریله اختلاط اتمیه اتمیه
 بهیمیت درجه سنه تنزل ایتمشلر و اورمانده برابر بولندقلری
 حیوانلرک اخلاقلریله مخلق ایلمشلردر ، بوکیلردن تصادف
 اولنلرک بعضیلری تربیه قبول ایدیور ایسه ده بعضیلری قبول ایتیمور

از جمله بزقاج دانه سی « هانوره » ده بولندی ، هانوره قرالی برینی کتوره رک تربیه سنه غیرت ایتمش ایسه ده تربیه قبول ایتدی ، حتی بونی قرال کندی سفره سنه اوتوردردر ایدیسه ده فرصت بولدیغی کبی همان باغچه یه قاجه برق اغاجلره چیقار و اغاجلرک بوقلرینی یر وبر طاووق کورنجه بوغازینی قوباره رق قانتی امر ایدی .

﴿ ایشته بومقوله وحشی وصفات یمیت ایله متصف انسانلر بولندقلری درجه یه نظرا ینه انسانلق حقوقی ازاله ایده مزلر . ﴾ یعنی اک یمدن ادملرده بولندیغی اعتراف و تسلیم ایتدیگمز حقوق انلرده ده واردر و بردانه سنی بیله سلبه حقمز یوقدر . خلاصه انسانلر تقدردون درجه ده بولنور ایسه بولنسونلر ینه انسانلقلرینه خلل کلز ، ینه هر حالده کندولرینه انسان نظریله باقیلنور ، چونکه هر حالده اخلاجه اولان دناتلرندن قورتللق اقتدارینی حائر دلر . ینه تکرار ایدرزکه هیچ برفردک دیکر ادمی « اصلاحه غیر قابل » صفتیله توصیف ایتکه حق یوقدر ؛ قابل اصلاح دکلدردیمکدن مقصد کامل ادملر درجه سنه واره مز دیمک ایسه بومعنی صحیح اوله بیلور ، لکن بولندیغی حالدن ایلرویه طوغری بر نقطه ترقی ایده مز دیمک ایسه اصلا جائز دکلدرد ، چونکه حیوانلر بیله اصلاحی قبول ایده یورلر ؛ یوق اگر تربیه سنه سعی اولنوبده کسب صلاح ایتماش ایسه قصور انک ذاتنده اولیوب بلکه اصلاح خصوصنده انحاذ واستعمال اولنان

تدابیرک عدم کفایتند در ، بوحالده بشقه سنده اولان قصور
 اویچاره ادمه اسناد اولنخس اولورکه برقات دها ظمدر ؛ مثلاً
 برطیب برخسته به باقدینی وقت « بوخسته قابل دوا دکدر »
 دیه مز ، بلکه کندوسنک علاجری تأثیر ایتماشدر ؛ بوکی
 احوال عادتاً بعض جاهلرک اوقودقلمی کتابلرده اکلایه مدقلمی
 یرلر حقندہ مؤلفلره عطف قصور ایتلمینه مشاہددر ؛ حتی
 امریکا وحشیلرینک تربیہ لرینہ چوق چالیشلرینی حالده موفق
 اولنه مامسنی منصف مؤلفلر تربیہ وتعلیمہ دائر استعمال اولنان
 وسایطک عدم کفایتہ حمل ایدرلر ، واقعاً دها اعلا بر تدبیر
 ایدلسہ بلکه اصلاحی قابلدر ؛ امریقاده کی اوروپالیرک بوبابده
 بدرجہ یہ قدر صرف ایتدکلمی مساعی عادتاً تجارت نقطہ
 نظرندن باقیلہ رق وقوعہ کلدیکی ایچون اولمیدرکہ نتایج مطلوبہ
 بردرلو حاصل اولہ میور ؛ یعنی اورادہ کی اوروپالیر بوخصوصده
 تمامیلہ انسانیتہ موافق صورتده حرکت ایتمیورلر ، بلکه صرف
 ایتدکلمی شیلری ایلرودہ حاصل اولہ حق تجارت وتمتعہ مقایسہ
 ایلہ ضرر اولیوب کار اولمسنی ملاحظہ ایدیورلر ؛ اشته
 امریقاده اوروپالیر چوغالدقجہ یرلی وحشیلری عادتاً طرد وتبعید
 ایدیورلر ، بونلرده یرلرینی یورتلرینی اوروپا مدنیلرینہ بالترک
 دها خالی یرلرہ چکلمکہ مجبور اولیورلر ؛ بوایسہ لایق دکدر ،
 چونکہ انسانلرہ دائر ہر ایشدہ حقوق انسانیتہ یی طایمق
 واکا رعایت ایتمکن بشقہ شی ملاحظہ اولنہ مز ، چونکہ

مقصود بالذات انساندر ، انسان بشقه بر مقصدك حصوله واسطه والت اتخاذ اولنه مز ؛ حتی جنوبی امریقالیلرک معیشتی زنجیلرک عمللرینه محصر اولدینی حالده شمالی امریقالیلر زنجیلرک حتموقنی محافظهیه چالشمیلرله وزنجیلره انسان نظریله باقمامقده وزنجیلر ایچون « بونلر مملکتلرنده (افریقاده) بوندن (کونشک قارشوسنده چالشمقندن) اعلا بر حالده دکلدر » دیمکده اولان جنوبی امریقالیلردخی مخالفت ایتملریله ایکی فرقه بیننده محاربه ظهور ایتدی و شمال اهالیسی غالب کلهرک زنجیلری خلاص ایتدیلر .

«الحاصل انسان انسان اولدینی جهتله هرشیده مقصود بالذاتدر ؛ اسباب و واسطه دکلدر.» شویله که هیچ بروقت فلان ایشی شویله یوللی و بویله مخدورسز یاهلم دیه انسانی فدا ایتک جائز دکلدر .

۵۸ — « انسانک کرک ذاتی و کرک بونک جائز و حاوی اولدینی صفات و کیفیاتی بزم اراده مزله وجوده کلش شیر اولیوب جناب و اهب حقیقینک احسان واعطا ایتش اولدینی بر طاقم خصائص اولغله بونلره رعایت ایتک و هر بر شیدن مقدس و ممتنع التزع اولدینی طانیق جناب حقک مقصد الهیسیدر . بناء علیه هیچ برکسه کرک مقاوله ایله و کرک بر منفعت مخصوصه مقابلنده کرک کلا و کرک قسماً نه ذاتندن ونه ده ذاتنک محتاج الیهی اولان حریت و مساواتدن وسائر بونلر کی حقوقدن و از کچهیم دیه مز و و از کچه مز ؛ کندی کسب یدمز اولیان بو تقسمزی و حریتیزی و سائر بوکی حقوق طبعیه مزی

بر مقاوله ضننده وکندی حسن ورضامزایله بشقهسنه ترك ایتک
 طریقله ذاتمز مقصود بالذات ایکن بوکا واسطه و آلت معامله سی
 ایتدیرمکه مساغ یوقدر ؛ نتیجه انسان مقصود بالذاتدر ، آلت
 وواسطه دکلدر ، بو حقوق طبعیه بزه باری تعالی طرفندن - ماوضع
 لهلرنده استعمال اولتق ایچون - ویرلشدر. بنابرین متمتع الفراعدر.)
 نته کیم عسکر کندوسنه برای مدافعه وجنک ویریلان اسلحه یی
 بشقهسنه باغشلیه مز ، باغشلسه عصیان واطاعتسزلک ایتش اولور.
 ﴿ اولیله ایسه مادامکه بو حقوق طبعیه یی ویرن حق تعالی بزه
 برده عقل احسان ایتدی بزه بونلری نه قسما ونه کلا ونه بر
 مقاوله ایله ونه بر منفعت مقابلنده کیسه یه ترك ایده میز ، چونکه
 مقصد الهی یه مخالفدر ، عاصی اولورز. اشته واضع قانونلر
 بورالر دقت ورعایت ایتک لازمدر. حتی دین ایچون حبس
 بیله بو اصولک خلافته در. چونکه مطلوب اولان دیندر، بونک
 ایچون برینی حبس ایتک حریتی سلب ایتک دیمک و بو ایسه
 حقوق ذاتیه یی اخلال الشکدر ؛ بر آدم بورجلی ایسه چالیشوب
 بورجی ویره بیلور ، آنی حبس ایتک آنی قزانهمیه حق برحاله
 قویمقدر ، بو ایسه هم کندی منفعتنه وهمده حقوق ذاتیه سنه مخالف
 اولور وبوندن ماعدا بویله بر معامله نک تجو یزیه انسانه
 اشیا معامله سی ایدلش اولور؛ ﴿ حالبوکه برانسان نه درلو فعل
 ارتکاب ایدرسه ایتسون ، نه درلو خطا، قباح وجرم ایشلرسه
 ایشلسون حقنده انسان دکلدر دنیله مز ، حیوان یا شجر ویا

حجر معامله سی اجرا اولنه من . (بوکی معاملات ایسه قوانین
حاضرۀ منوره ایله ترك ایدلمکک باشلامشدر .) اما اسکی وقتلرده
اوکی معاملات پک مرعی ایدی . حتی بعضا بر قوم دیگر بر
قومک یابر آدم دیگر آدمک اسیری و بعضا انسانلر بر مقصدک
اجرا سیحون واسطه و آلت عد اولنور و بعضا بونلردن دها فنا
شیلر بیله وقوعه کلور ایدی ؛ مثلا انسانلری قربان ایدرلر
و پدرلرک بعض احوالده چو حقلرینی اولدرمکه صلاحیتی اولور
ایدی . حتی الیوم انریقاده بر طائفه واردرکه حکمدارلری
اولدکده بر چو حق قربان ایدرلر . اشته بونلرک هپسی حقوق
انسانیه دن غفلت اثریدر ؛ حکمت حقوق ترقی ایتمکه باشلایه لیدن
برو بو مثللو شیلر ترك اولمغه باشلدی .

§ ۵۹ — (انسانلر عالم محسوساتده بر زمان و مکانده
و مناسبات مختلفۀ مدنیۀ تحتندۀ اوله رق ظهوره کلدکلرندن هر یرده
برر دائرۀ حیات و حرکات استمکه حقلری واردر ؛ بودائرۀ حیاتده
کندیسی اوطوروب او دائرۀ ده بولنان هر شیئی کمال سربستی
ایله تصرف ایتک و بو دائرۀ یی کندی اراده و رضاسیله ایستدیکی
اشخاصدن بشقه سنه اچمامق حقنه هر انسان مالکدر . الحاصل
بودائرۀ مغویه حیات اولوب بوکا تجاوز جائز دکدر . کویا بر
متحرک قلعه ایچنده ایمشز کی انده هم یشارز و همده حرکت
ایدرز ؛ اوت ! بودائرۀ حیات ایچنده هم یشارز و همده حرکت
ایدرز ، بودائرۀ مغویه بزم بر مسکن محروس الحوالیز حکمنده

اولمیدر ؛ بورایه نه حکومت ونهده افراد اهالی کیرمالمیدر؛
 یالکر بعضی حالاتده عمومک فائده سیچون کیریلور ؛ اوده اصول
 مخصوصه محتده و قیود معلومه ایله مقیددر . حیات شخصیته نك بو
 حق عمومیی مساکنک تعرضدن مصونیتی و مکاتیبک اچلمدن
 محفوظیتی حاویدر ؛ چونکه ایکی متفارق ادمک مخبره و مرا-
 سه سی ایکی کشینک محرمانه کورشمسی کیدر . حق تصرف یعنی
 « بو بنمدر » دیمک بودائرته نك داخنده کی حقوقدن بریدر؛ کرچه
 بو انسانک جسمندن جزؤ دکل ایسهده مال جانک یونغاسیدر
 فحواسنجه بوده الزمدر ، چونکه مثلاً برینک عباسی اولمسه اوشور
 صحتی زائل اولور و کذا کتابی اولمسه جاهل قالور . کچنمک
 ایچون بر ایش بولمق حق دخی بو حقوقدن در . بناء علیه برینی
 بر ایشدن منع ایتمک حقنده ظلم ایتمک دیمکدر . یو حقلرک ایچنده
 برده وصیت ایتمک حق واردر: انسان مالی حیاتنده نصل
 استعمال ایتمه حق واریسه بعدالوفات دخی بوکا حق واردر ؛
 چونکه انسان انسان اولوب حجر ، شجر دکلدر ، انسانده کی
 روح عالی وعقل ایسه نورالهیته بر شعاعی اولدینی جهتله
 ازلیت ، ابدیت فکرینی ادراک ایدر اولدیفندن بو حق وصیته
 دخی حق وراثت وحق ملکیت قانونلرینک مساعده سی درجهده
 مالک و بونی استعماله مقتدر اولمیدر .)

فصل رابع

حق حیات و عقل و جسمک صحت

و تمامیتنه دأردر

§ ۶۰ — انسان هم روحی و هم جسمی جامع بر مخلوقدر و بزم اراده مزك خارجنده بر اصولك دخی نتیجه سیدر . اشته بوایکی سببه مبنی انسان هر درلو حقوقك اساسیدر ، مقصود بالذاتدر ، هرشی انك ایچوندر . بناء علیه كرك انسان و كرك اكا عائد حقوقك اتلاف و یا اخلاالی ایچون بشقه برحق تصور اولنه مز .

نصل تصور اولنه بیلوركه بونلر جناب حقك بزه عطیه سی اولوب تحصیلنده انسانك اشتراكلری و حتی اراده جزئی لری بیله یوقدر .

﴿ بوجه مؤسسات و قوانین هپ بومقصده مبنیدر . ﴾ یعنی انسانك و حقوقك محافظه سی مقصدیله یابلسدر . مثلاً بر آدمی حبسیدن مقصد یا او آدمی متنبه ایتك و یا بر دها دوشونمیه رك جرم یایمیه حق برحاله قویمق و یافرضا سارق ایسه انك مضرتندن دیگرلرینی محافظه ایتكدر .

كرچه بو حبس جزاسنی چكن دخی انسان ایسه ده بونك اوچنده منفعت عمومیه واردر . ﴿ حیات جسمانی ایچون سوء قصد ممكندر و لكن حقوق عالم مغنیده كندیك مابه التمكنی اولان اساس جسمانی بی محو وازاله ایتكله كندی كندی سلب ایده مز . ﴾ بورالرینی ادراك ایده میان جاهلر

کندیلرینی اضراره تصدی و حتی قتل نفسه بیله جسارت ایدیورلر.
که پک بیوک خطادر، عادتا عصیاندر، چونکه حق مداخله
و تعرض اولیان شیئه تعرض و مداخله در.

۶۱ — ﴿ حیات حق : حیاتک محافظه سنه و تمامیت
حالده بولندیرلمسنه و روحانی و جسمانی نُحْتَه متعلق اولان احوالک
هیئت مجموعه سنه حق حیات دیلور. بو حیات حق برطرفدن
ایسترکه هیچ بر فرد جانبدن کندی حیات مخصوصه سنه برکونه ضرر
و خسار ایدلمسون ! و دیگر طرفدن دم ایسترکه حکومت آنی
سوء نیات و عدم احتیاط و بصیرت و عناصر و قوای برباد ایدن
حرکاته قارشو قوانین لازمه و ضابطه اداره و مانعه و صحیه نک
تأسیس بیله برطاقم تدابیر مانعه و جزالر و ضابطه عدلیه و محاکم
وضع بیله برطاقم تدابیر زجریه اتخاذ ایدرک حمایه ایتسون .
اشته دولت بو باده زهر و صحت مضر سائر شیلرک ضابطه
و جنازه لرک اوزاق و درین پرلره کوملمسنه و علل ساریه نک
خارجدن سرایت و داخلده محدث و حیوانات و حشیه استیلا و قحط
و غلا ظهور ایتماسنه و بوکی شیلر سرایت و محدث و استیلا
و ظهور ایتدکده تدابیر لازمه نک اتخاذینه و طغیان میاه و یلدرم مثللو
ضرر لرندن تحرز ممکن اولان قوای طبیعه دن انسانلرک متضرر
اولماسنه و کرک بو مثللو قوای طبیعه و طولی و قار و یا غمور کی
ممکن التحرز اولیان شیلر شدتله اجرای احکام ایتدکرنده تشبثات
نافعیه تمسک اولنسنه و کرک عادی و تیمور یوللرده و کرک واپور

وکیلرده وسائر معابر ومسالكده داعی مخاطره اولان احوالک
 اوکئی المغه دخی نظارت ایتکه بورجلی در . ﴿ چونکه بوکئی
 تداییر وحرکات حق حیاته رعایت دیمکدر . جمعیت بشریه دن
 مقصد ایسه بوکا رعایت اولنقددر . ﴿ بو حیات حق رحم مادرده
 باشلار . رومالورلر بونی جنین حقده یالکیز میراث خصوصنده
 قبول وتسلیم ایدرلر ومیراثه تعلق ایتیمان احوالده محافظه ایتزلر
 و بناء علیه زوجینک اتفاقیله جنینک اسقاطنده بأس و موجب
 مسئولیت برشی کورمز لر ایمش ؛ شمدی اویله دکدر ، حتی اسقاط
 جنین خصوصی مستلزم جزادر . الحاصل کرک حیاتمزه وتمامیت
 وجودمزه وکرک روحانی وجسمانی صحتمزه نه کندی طرفزدن
 ونه ده حکومت ویا بشقه سی طرفدن خلل کتورلما لیدر . ﴿ بو حق
 انسانک وفاتندن صکره دخی سافط اولیوب اکا تعرض ایدنلر
 متوفایه خلق اولنلر ولزومی درجه ده حکومت طرفدن
 تعقیب اولنورلر .

۶۲ — ﴿ انتحار : یعنی بر آدم کندی نفسنه سوء قصد
 ایتک : بر آدم کندی نفسنه وکندی صحتنه دائر اولان حقوقی
 اخلال ایده مز یعنی کندی کندینه سوء قصد ایده مز ؛ چونکه
 کندی کسب یدی دکدر ؛ اگر ایدرسه بو حقوقی ویرنه قارشو
 عصیان ایتمش اولور ؛ دیمککه بر آدم کندی نفسنه سوء قصد ایتمکه
 اساس حیات اولان برحق صریح وحقیقی بی اخلال وابطال
 و بر بیوک حقسزلنی ارتکاب ایلش اولور . واقعا بر آدم کندی

کندینه سوء قصد ایدہ بیلور، بونی منع کو جدر ومع مافیہ بر آدمده بویله برنیت حس اولنورسه بونک یولسز اولدیغی و مجازات مغنویه سی بولندیغی و جمله ادیان علماسی بو بایده متفق ایدوکنی آکلاته رق انی ممکن مرتبه زجر و منع ایتلیدر، کرچه بو منعک فائده سی آز ایسه ده ممکن اولانی یاملیدر. بو سوء قصد نفس کیفیتی اخلاق قواعدینه مغایر اولدیغی کبی حقوق ذاتیه یی دخی اخلاص ایدر و بنابرین حقوق و حکمتی اساسندن صارصار. حتی حکمای یونانیه دن ارسطونک قولنجہ نفسنه سوء قصد ایدن یالکتر کندی حقوقی اخلاص ایتمکله قالمیوب بلکه هیئت اجتماعیه علیهنده حرکت ایتش اولور) که افاده آتیه (۶۲) دن متضح اولور.

۶۳ — ﴿ بو سوء قصد نفس ایکیدن خالی دکلدر، بونی یاپان یافقیر اولور و یا بر ظلم کوررده - بولندیغی حالدن خشنود اولیه رق و دوچار اولدیغی مصیبتہ تحمل ایدہ میهرک - یاپار؛ بو فلاکتلرده یا بحق اولور و یا بغیر حق اولور؛ ﴾ یعنی کندی سوء صنعندن تولد و ظهور ایدر، مثلاً برجنایت ارتکاب ایدرده وجداناً متأسف و متأثر اوله رق و جانب حکومتدن تعقیب و مجازات ایدیلهرک عذاب و الم روحانی و جسمانی به او غرار و یا خود دیگر بری طرفندن بلا سبب هدف ظلم اتخاذ اولنور؛ و یو ایکی صورته دخی بروجه اتی تعلیل اولنه جنی وجهله تحمل ایتلیدر.

﴿اگر بغیر حق یعنی مستحق اولیہ رق فلا کتدیده اولمش ایسه سائر فلا کتله دوجار اولدینی کی بوکاده تحمل ایتلیدر؛ زیرا فلا کتک اک بیوکی هلا کدر، البته صاغلقدہ باشمزہ کلان فلا کتله بوندن اخفدر، هلاک نفسی ارتکاب فلا کتله اعظمی اختیاردر، بوایسہ غیر معقولدر. کرچه فلا کت مضر ایسه ده بونده جهت استفادہ دخی واردر، اوده تربیہ مغنویہ حاصل اولسیدر؛ چونکہ بر مصیبت بیک نصیحتدن یکدر؛ فلا کت سوزی مؤثر بر ناصح کیدر؛ فلا کت ایله قوای مغنویہ مزہ دخی تقویہ ویریز. بومقوله فحیعه لر کندی نفس مزده ظهوره کلدجہ فائده سی کورلدیکی کی اخرده وقوعه کلنری کورمکدن دخی استفادہ اولنور. الحاصل قوه روحانیہ مزی تقویہ ایدر.﴾

واقعا فلا کتله اوغرایوبده صبر و تحمل ایدنلر دنیانک کرم و سر دینه واقف اولمش کملیندن عد اولنور؛ اما کندی کندینه بیویهرک آلام و اکداری طایمان ادملر اوقدر مکمل اوله مز؛ بوحالهرک کرک افرادک و کرک اقوام و جمعیاتک کامل و واصل سر منزل اولملرنده چوق تأثیری واردر؛ نیجه قوملر بوسایه ده نائل حریت و استقلال اولدیلر؛ هنر تحمل ایتکده در، یوقسه اهلل نفسده دکدر. اوت! بوفلا کتله بزم باشمزہ کلدیکی وقت نصل استفادہ ایدر ایسه ک بشقه لر نیده بار فلا کت التده کوردیکمز زمان دخی اوילה استفادہ ایدرز و همده ایتلیز، بونلرک تماشاسندن فوائد عظیمه حاصل اولور، حتی بومقصدله و خصوصاً اخلاق

عمومیہ خدمت ایتک اوزره بومثللو وتایع وفجایع سالفہ فی تیاترولرده میدان تماشایه وضع ایدرلر .

(اگر دوچار اولدینی فلا کتله بحق یعنی بونلره مستحق ایسه بونلردن) مثلاً کیدوب برجایت ایشاش و صکره بوکاترتب ایده جک مجازات و حجاب و خجالتدن (قور تلمق ایچون نفسنه سوء قصد ایتک عاداتا تضعیف شنایع و تزئید مصائب ایلمکدر) . چونکه اولاً مثلاً بر جنایت ایلمشدی شمدیده نفسنه سوء قصد ایدیور؛ حالبوکه قانی قانله یومازلر ویومقده معقول دکلدرد؛ اکثر خلق بوندن غافلدر . (بر مرکبک بریرینه بر دیکن باتر و مرکب دیکندن قور تلمق طریقتی یلمدیکندن اوتیه بریره کیدر، بنابرین دهابدتر مضطرب اولور، صکره بر عاقل انی قورتارر دیو مشوی شریفده برقصه پر حصه واردر) . برده بر جرمی یاپوبده صکره انک نتایجنه صبر و تحمل ایتامک پک بیوک عیدر . یغیر حق اولان فلا کتله تحمل ایتک لازم اولججه بحق اولنلره تحمل ایتک بطریق الاولی لازم کلور . (الحاصل هر نه صورتله ونه سببله اولورسه اولسون انسان نفسنه سوء قصد ایتک جناب حق انسانک اراده سی خارجنده اوله رق احسان بیوردینی اک بیوک نعمتی رضاء الهییه مخالفتله ایاق التسه الوب ابطال و عاداتا بناء الهی هدم وهتک وبو نعمت عظیمه حیاتک قدرینی یلمدیکنی اعلان ایلمکدر) .

۶۴ — (نفسلرینه سوء قصد ایدنلر حقنده معامله

جزائییه اولنه مز . چونکه بوفعلی ارتکاب ایدن روح ایدی ،

روح ايسه زائل اولدى ، اكا جزا ايدى جك اقتدار من يوقدر .
 واقعا ميدانده بر جسد وار ايسه ده بونى جزا ندرمق ايكي جهته
 باطلدر ؛ اولايلا روح جسد جمادات قينلندن اولوب مجازات
 ومكافاتدن متأثر اولمز ، ثانيا روحك ارتكاب ايتديكي فعل ايچون
 جسدى مجازات ايتك زيدك فعلندن عمروى مسئؤل طوتمق
 كيدر . مع مافيه بعض مملكتلرده خلقى بوندىن قورقوتمق ايچون
 نفسلرينه قصد ايدنلرك نعللرينى مراسم مخصوصه واحتفالات
 لازمه ايله دفن ايتمزلر وبونلره ايروجه مقبره يارلر ، لكن علم
 حقوق اربابى بوده عبثدر ديرلر ، چونكه نفسنه سوء قصدى
 روا كوروب كوزينه كسديرن بويله بر معامله دن چكنمز وهمده ينه
 روحك فعلى ايچون جسده جزا ايدلمش اولور . ﴿ له الحمد
 ممالك شاهانه ده بوسوء قصد پك از وقوعبولور ، اوروپاده
 چوقدر ، اكلاشيلان مدنيت حاضره ترقى ايدن يرلرده جنت
 چوق اولدينى كي بوده چوق اوليور ، بوكاده باشلوجه سبب
 علوم وفنونك انتشاريدر ، معلومدر كه عالم هرشيدن يامنون
 ويا مكدرا اوله رق متأثر اولور ، جاهل ايسه كويندن يا قصبه سندن
 بشقه سنى بيلز ، مثلا بر عالم قطعات خمسۀ عالمك هر طرفنده
 موجب ممنونيت ومحزونيت اوله جق شيلرى بيلور وبونلردن حالنه
 كوره متأثر اولور . ﴿ بوسوء قصدك منع وقوعى چاره سى قبل
 الوقوع هر درلو تدابير تشبثدن عبارتدر ، اولجه حياتك وتامى
 اجزاسنك محافظه سى انسانه واجب اولديغى هر كسه اكلا تمليدر ،

حکومت بر آدمک کندی نفسنه سوء قصد افکارنده بولندیغنی
استشمام ایدر ایتز - واقعا اوکی آدم حقنده جزا ترتیب واجراسی
تجویز ایدیلهمز ایسهده - نصیحت وسائر تدابیر حکیمانه مبادرت
ایدرك ممکن مرتبه تسکینه چالشلی واول آدمک بوفعلده معاون
ویا مشوقلری وار ایسه انلر حقنده جزا وضع وترتیب ایتلیدر ،
برینک کندی نفسنی اتلاف ایتدیرمکه رضاسی قاتل ویا معین قتل
ایچون سبب برأت اولهمز .

تمامیت وجود وجسمانی وروحانی صحت

۶۵ - ﴿ انسانک یشامغه حق اولدیغنی کی تمامیت
وجودینه وجسمانی وروحانی صحتی یرنده بولنسنه دخی حق
واردر . هر فرد تمامیت وجودینی وروحانی وجسمانی صحتی
محافظه ایتلی وجل همتی باشلوجه بوکاسرف ایتلیدر ، حکومترلده
بونلری محافظه ایتلی وبوکا مغایر وقوعبوله جق حالاتی هر درلو
تدابیر ایله منع و اوکی حالاته متجاسر اولنلری تأدیب ایتلیدر .
هیچ بر فرد کندی اعضا وقوای جسمانیه وروحانیه سندن برینه
کرك بالذات وکرك بشقه سندن استعانه ایدرك ضرر ایراث ایدهمز .
بناء علیه هیچ بر کیسه نك بوقوتلرده ایستدیکی کی تصرف
وبونلری ازاله یه حق یوقدر ، هر فرد بر عسکر کیدر که الینه
ویریلان سلاحی بندر دیهرک صاتمغه ویا بشقه درلو اتلاف ایتمکه

قادر اوله من ، چونکه اوسلاح اكا بشقه ملاحظه و مقصد ايله ویرلمشدر یوقسه کیف مایشاء تصرف ایتسون ایچون ویرلماشدر . بوقوتلری سوء استعمال ایدن برقاچ درلوفالق ایتمش اولور ، از جمله کندینه امانه ویریلان شیئی خلاف مأذونیت استعمال ایتمش و برده خارج وظیفه حرکتیله افندیسی ضما تحطئه ایتمش اولور و بویله خلاف مأذونیت و خارج وظیفه حرکتی نتیجه سی ودها طوغریسی جزاسی اوله رق بوقوتلردن محروم اولدقن صکره بونلری ماوضع لهلرنده استعماله لزوم قوی کورندکده صفر الید قالور .

﴿ حتی بعض حکومتلرک قانونلری کندی عضوینی قطع ایدن حقه جزا وضع ایتشدر . مثلاً عسکردن قورتللق ایچون باش یارمق کبی برعضوینی اتلاف ایدن کسه نک عسکردن معاف طو . تلامسی حقه ممالک شاهانه و خصوصاً مصرده و بعض ممالک اجنبیه ده قانون یالیش اولسی هم برنوع جزا وهمده اومقصدله وقوع بوله جق فناقلرک اولسون اوکنی المغه برچاره در .

﴿ الحاصل هر فردک حیاتی و صحتی محافظه حق اولوب بو حق نه کندی نک ونه ده بشقه سنک سلبه حق اولمدیگی کبی بونلرک محافظه سی کنبوسنک وظیفه سی و عادتاً بر بورجیدر . حکومتکده بوکا دقت ایدوب هر درلو تدایر لازمه یی اتخاذ و موقع فعله وضع ایتلیدر ؛ چونکه حکومتک وظیفه اصلیه سی بوندن عبارتدر ، شاید بر حکومت بو بایده ادنی مرتبه مسامحه ایده جک اولسه وظیفه اصلیه سی ایفاده قصور ایتمش اولور . ﴾ بناء علیه هر

حکومت خلقك يكديکړه تجاوزینی منع ایچون امور ضبطیه و عدلیه
 مأموریتلری تأسیس و بونلره متفرع احوالی اصلاح ایدر ؛
 از جمله محکوم علیهلرک اجرای مجازاتسده حد اعتدالی تجاوز
 ایدوبده حیاته خلل طریانه بادی اولمز ؛ بناء علیه او یله دکنک
 وقامچی ایله برینی ذومک و محکوملرک بوغازینه زنجیر طاقق
 و دیگر بر مقصد ایچون مثلاً جرمنی سولیمک ایچون مظنون علیه
 و مهملره اشکنجه ایتک جائز دکدر . ﴿ کذلک لزومندن زیاده
 شدید جزا لرتیب ایتک دخی بوقیلدندر . مقدا فنا جزا لرتیب
 چوق ایدیسده زمانزده مجازات ایکی شیدن یعنی حبس و اعدامدن
 عبارت کیدر حتی بعض دولتلر اعدامیده همان قالدیروب حبسه
 حصر ایتشلردر . اعدامدن مقصد همان محکومک وجودینی ازاله
 و حبسدن مرام محکومک یالکر حریتی سلب ایتکدر . بناء
 علیه اعدامده محکومه برطاقم اذا وجفا ایتک جائز اولمدیغی کی
 محبوسک صحتته خلل کتور یله مز . حقیقه جزا ترتینک جوازی
 هیچ بر فردک حقوقی رخته دار ایتماک شرط یله مشروطدر :
 مثلاً تلف نفسی موجب اوله جق قدر ازغدا و یرمک و یا هواسی
 و خیم یرلرده او طور تمق جائز دکدر . محبوسی سربستی حریتدن
 محروم ایدوب معنا دخی بونک مستلزم اوله جنی تعذیب و مجازات
 ایلک لازمدر . یوقسه اعتدال تجاوز اولنورسه مثلاً ازغدا
 و یریلورسه بو عادتاً سلب حریت اولیوب سلب حیاته منجر اولور .
 اسکی زمانلرده بوقاعده لری بیلدکلرندن پک غدارانه حرکت

ایدرلرایدی . حتی جرمک وقوعی میدان ثبوتہ ایصال ایدہ جک
 دلیلی مظنون علیہدن ارارلرده انی اعتراف جزم ایدنجہیہ قدر
 اشکنجہلرایلہ تعذیب ایدرلرایدی . دها غدارانہ حرکت اولنان
 یرلرده محکوملر واستنطاق التندہ بولنان مظنون علیہلرک اشکنجہ .
 لردن اچیلان یارہلری اطبا واسطہسیلہ تداوی ایتدیریلورده
 التیام حصولندہ ینہ اشکنجہیہ دوام اولنور و بیچارہلرک اشکنجہ
 التندہ ہلاکنہ قدر بویلہجہ تداوی وازیت ایدیلورایدی . ﴿الیوم
 بیلہ قواعد حقوق وعدالت کرکی کبی انتشار ایدہ میان یرلرده
 بوکبی احوال جریان ایتمکدہدر . عاقل حکومتلر وظایف منفیہ
 ومثبتہلرینی اجرادن بردقیقہ خالی قالمیہرق درلو درلو تدبیرلرایلہ
 خلقک صحتی محافظہ ایدرلر . حکومتک بومقولہ شیلردہکی
 اجرای وظائفی اہالینک حقوقک مافوقندہ در . مثلاً رطوبتلی
 اولان یکی بنالردہ اقامت اولنسنی منع ایدر ، بابدہ خانہ صاحبک
 « بنم ملکدر دیلدیکم کبی تصرف ایدرم » دیمسنہ اعتبار اولنہمز
 و انک بوندن طولای اخلال تصرف دعواسنہ حق اولہمز؛ چونکہ
 انک منفعت خصوصیسندن عبارت اولان حقنہ حکومتک حفظصحت
 حقندہکی تدابیر لازمہی اتخاذ واجرا ایتسی وظیفہسی تقدم ایدر؛
 کذلک ہواسی وخیم یرلردہ کوی تأسیس اولنسنہ حکومت موافقت
 کوسترمز ؛ خام میوہنک منع فروختی دخی بوقیلنددر . ہر تقدیر
 ہرکسک ہر درلو نعمتلہ تنعمہ حق وار ایسہدہ بوکبی
 شیلرک نعمت عد ایداسی جہانتدن وعفلندن وبی قیدیدن

نشأت ایدر . دیمکه حکومت عاقله بر پدر مشفق و بوسکیلر
عاقبتناشناس بر چو جق فرض ایدملیدر . اشته بوقاعده ببناء درکه
عمله ایچون مدت سعی و عمل تعیین اولمشدر ، هر آدمه ایستلیدیکی
قدر ایش ایشلیدیه مز و کندی ایستسه بیله ایشلیه مز . عاقل
حکومتار بوبابده قانون وضعیله منع ایدرلر ، کرچه سوء قصدی
منع ایتک خصوصنده کی مشکلات بوندهده وار ایسهده ممکن
اولدینی قدرمنعنه غیرت اولملیدر . یعنی وجود انسانیک تحملندن
زیاده ایش کورمکه سعی ایدنلری حکومتک منع ایتسی هم وظیفه سی
وهم حقیدر ؛ برکیمسه « کونده اون بش ساعت ایشلکه بنم وجودم
مساعدر » دیسه مساعده اولنیوب منع اولنور ؛ چونکه
دائما افراد اهالی چو جق و حکومت ایسه اب مشفق مقامندهدر ،
حکومت انلری بوکی حرکات طفلاندهدن منع ایدر ؛ واقعا هرکس
خانه سنده ایستدیکی قدرایشلیه بیله جکی جهتله منعی قابل اوله میه .
جغندن بوقاعده تمامیه هر محله جاری اوله میوب یالکر فابریقه لر
مثلاو یرلرده سهولتله اجرا ایدیه بیلور . قانونا ایش مدتی ایچون
ساعت تعیین اولمشدر و بوا ایش مدتک تقیدی ابتدا انکتردهده ظهور
وسکره سائر متمدن مملکتلردهده سرایت ایتمشدر . انکتردهده
اون اوچدن اون سکر یاشنه قدر اولنلره یکر می درت ساعتده
اون ساعت مقداری ایش کوره بیلک ایچون مساعده ویرلمش
و اون سکر یاشندن زیادهده مالک اولنلر خیر وشرلرینی بیلور
ادملر فرض اولنه رق غیر محدود برصورتده براغلمشدر .

فرانسه‌ده بشته درلو دوشغشدردر، اوراده‌سنه وقادینلق وارککلکه باقلمیوب بلا استئنا یعنی صورت مطلقه‌ده یکرمی درت ساعتده اون ایکی ساعت مساعده ایدلمشدر . ﴿ احتمالکه بوتدیرلرده هوانکده دخلی واردر . ﴾ بوایش زماننک تحدیدی ایکی مقصده مبتئدر : بری قزائج طمعیه و وجودی تحمل ولزومندن زیاده بذل وافضا ایتدیرمماک وبالعکس لزومی قدر استراحته وقت براقق ودیکیری تربیه عقل وامور دینه و اخلاقیه ایله اشتغال رعلوم نافعہ تحصیلی کبی احتیاجات معنویه و روحانیه ایچون دخی وقت قالمقدر . ﴿ مثلاً فرانسه‌ده عمله ۱۲ ساعت مشغول اولور ، ۷ ساعت اوپور ۲ ساعتده اکلنجه ایله وقت کچورر ایسه عبادت و قرائت ایچون دخی تام ۳ ساعت وقت قالور . بواصول وتدایرک انکلتزه و فرانسه‌ده چوق فائده‌سی کورلدیکی ایستاتستیق جدوللرندن اکلاشلشدر ؛ خصوصاً انکلتزه عمله‌سی بوندن بالاسفاده بینلرنده پاره طویلایوب برصنعت مکتبی یامشدردرکه اورایه هرکس کیدوب کندی صنعتی اوکرنور .

§ ۶۶ — ﴿ هر ادم ایچون مدار تعیشنی استحصال حق

واردر . هر فرد حیات جسمانی‌سنه الزم اولان نفقه و کسوه و مسکن کبی شیلری کندی سعی و عملیه استحصال ایچون لازم اولان اسباب و وسایطه تشبث ایتکه مجبوردر ، بشقه‌سنه بار اولمالیدر ؛ فقط بر آدم ایشلک اقتدارینی حائر اولمز و یاخود بو اقتداردن ساقط اولور و یاخود کندی عملی اراده‌سنک

خارجنده کی اسبابدن طولای کندینی کچدیر مکہ غیر کافی بولنور
ایسه اکا منفردا ویاخود دیکر لر یله معا معاونته مجبور اوله حق
اشخاصی ، عائله‌یی ، ناحیه‌یی ، قضایی ، سنجائی ، ولایتی ویا
حکومت مرکزیه‌یی قانون تعیین ایتلیدر .) یعنی اسباب معیشتی
تدارک ایدمه‌یآنلره اقرباسی و اقرباسی اولدینی ویا غیر مقتدر
بولندینی حالده محله وقریه وناحیه‌سی و بونلرده قادر اولدقلری
تقدیرده قضا و سنجائی و هلم جرامعاونت ایتلیدر لر ، چونکه
بنی ادم اعضای یکدیگرند و کلفت نعمته کوره‌در .) حتی حیلہ‌سز
مفلس اولنلره دخی بر مدت ظرفنده مدار تعیش اوله حق شیرک
ترک و اعطا اولنمسنی بزم کی متمدن حکومتلر قانونلری امر ایدر .)
(بر آدم اسباب معیشتی صورت مشروعه‌ده تدارک ایدمه‌میوبده
کرک کندوسنک و کرک اولاد و عیالنک محافظه حیاتچون محتاج
اولدقلری شیئی تدارک ضمنده غیرک مالته تعرض و تجاوز ایدر
ایسه انک حقنده سائر سارق و آخذلر کی معامله جزائیہ اجرا
اولنوب اولنمماسی مسئله‌سی جای بحث ایسه‌ده بوکی بر آدم حقسز
اولقله برابر مستحق جزا دکلدر دیملیدر ؛ چونکه بوراده ایکی حق
تعارض ایدیور : بری مال وحق تصرفه و دیگر کی جان و حیات متعلق
حقدر ، ارجح اقواله کوره جان ایچون مال حقنک اخلااند
بأس کور یله مز ؛ بناء علیه اول آدمک ضرورتی و ضرورتی
مقدار اولدینی ثابت اولور ایسه اکا مجازات اولنه‌مز ، المانیاده
دخی بویله‌جه مرعیدر . فقط مال مأخوذك اخذندن طولای

غیرک حیاته ده خلل کله جک ایسه اخذ اولنسی غیر جائدر و بو صورتده آخذ مستحق جزا اولور ؛ بو مساعدیه یی سوء استعمال ایتمک شرطدر ، بونی جیره و خرسز لغه قدر واردر ماملیدر.

فصل خامس

ناموس و اعتباره و دوللویه متعلق

حقوق

۶۷ — (انسانک) حیات و تمامیت وجود و صحت حقی اولدینی کی (ناموس و اعتبارینک محافظه ایدلسنه دخی حقی واردر .) انسانک حیاته متعلق حقارینه رعایت اولنورده ناموس و اعتباری اخلاص ایدیلورسه ینه مقصود حاصل اوله مامش عد اولنور ، چونکه انسانک ایکی جهتی واردر ، بری جهت جسمانیه و دیگرکی جهت روحانیه در ، روحانیه متعلق شیلره مداخله اولنور ایسه طبقی جهت جسمانیه سنه مداخله اولنمش کی اولور . خلق لساننده ناموس ، اعتبار ، قدر ، حیثیت و بونلره مماثل برطاقم تعیرات مستعمل ایسه ده علم حکمت انلری بالتحدید ایکی به حصر ایتشدر که بری ناموس La dignité و دیگرکی اعتبار L'honneur در . بو علم اصطلاحجه (ناموس انسانک من حیث الانسانیه حائر اولدینی عقلدن نشأت ایدن بر قدر و قیمت

مطلقه سیدر . انسان انسان اولدینی جهته کندیسنده بر قیمت ،
بر اعتبار وارد در . ﴿ انسان نطق ایله ممتاز در دینور که بوراده کی
نطق کلیاتی ادراک معناسنه اولدیغندن اصل مقصد عقل ایله ممتاز
دیمکدر ، بو عقل بر صفت شریفه در که بوکا هر نه یاقیشور سه بو نکه متصف
اولان انسانده او لایقدر یعنی انسان صفت عقلیه سی اقتضاسیجه
حرمت لایقدر ، اشته ناموس بوندن نشأت ایدر ، ناموس دخی
انسانیه مربوط بر مزیت اولدیغندن هیچ بروقت ضایع اولمز
وجنت وصغر حسیله ضایع اولسهده موقت عد اولنور .
﴿ بناء علیه انسان هر نه حالده بولنور ایسه بولنسون مادامکه
انساندر بونی محافظه ایدر و بوجهته ناموس حتی بونی محل
اوله رق انسان حقنده هیچ بر معامله یی تجویز ایتدیره مز . ﴾
حتی بر شخص تقدر سفیه ورزیل اولور سه اولسون ینه ناموسلی
اولوب حقنده محل ناموس حرکت تجویز اولنه مز .

۶۸ — ﴿ اعتبار انسانک کندی افعال و حرکاته مبیدر .

یعنی کندندن ناشیدر ؛ ناموس ایسه طوغریدن طوغری به طبیعت
انسانیه نک نتیجه سیدر . بنابرین ناموس وهی و اعتبار کسیدر .
ناموس عموم نوع انسانه مخصوص وهی و طبعی و حیاته برابر
هر انسانه ویرلمش بر حقدر ، اعتبار ایسه انسانک کسب یدیدر .
﴿ خلقک نظر و وجدانلرنده مصدق اولمی اقتضایدر . ﴾
دیمککه اعتبار افعال و حرکاتدن نشأت ایدن بر نوع ناموسدر که

وجدانه عکس ایدر و دیگری یعنی اصل ناموس من حیث الانسانیه خلقی اوله رق میدانہ کلور . ﴿ هر بر انسانک جناب حقہ و ابنای جنسنہ و حتی کندی وجدانه قارشو مختلف الدرجه براعتباری اولور . ﴾ یعنی هر انسانک اولاً کندی وجدانه قارشو ، ثانیاً وجدان خلقه قارشو ، ثالثاً جناب حقہ قارشو اعتباری واردر ، چونکہ هر انسان کندی وجداننده کندیته « بن شویله آدم » دیو براعتبار ویرر خلق دخی وجدانلرنده اکا براعتبار تقدیر و تعین ایدرلر ؛ انسان کندی اعتباری حقنده یا کلش فکر استحصال ایدہ ییلور ، خلقده یا کلش افکاره ذاهب اوله ییلور ، اما جناب حقک نزد مغنویسنده اصلاً یا کلش و خطا اوله میه جغندن اک صحیح و اک حقیقی اعتبار جناب حقہ قارشو اولان اعتباردر . مثلاً خلقک نظر و وجداننده مدوح اولان کیسه کندی نظر و وجداننده مقدوح اوله ییلور . کرجه انسان خلق نظرنده کندی اعتبارینی دوزلتمک و محافظه ایتمک هر تقدیر سعی و اقدام ایتسه ینه ممکن اوله من ، زیرا انسان اعتبار قزانق ایچون کندی حرکات و سکناتی یولنده اجرا ایتمک غیرت ایدر ایسه ریا ایتش اولور ؛ الحق انسان جناب حقہ و کندی وجدانه قارشو اعتبار قزانمغه و بونی دوزکون طومتغه سعی و غیرت ایتلیدر ، مثلاً قواعد دین و اخلاق و حقوقی تحصیل و بونلرک احکامنه رعایت ایتلیدر ، اما خلق بونی اکلامز ایسه باس یوقدر یعنی قواعد مذکوریه توفیق حرکت ایدلدیکی حالده ینه

خلقك بونی ادراك ایتامسی ممکن اولدیغندن انلرك نظر نده قدر و اعتبار قزانيله مز ، بوجهله خلقك نظر نده اعتبار قزانيله مامقله هیچ بر ضرر اولیوب بالعکس قواعد سالمهیه توفیق حرکت ایدلمش اوله جغندن هیچ اولمز ایسه کندی وجدانسه قارشو اعتبار قزانیدیغنی انسان درك وفهم ایلر . بوصور نده ﴿ انسان طانیدینی ادملرك اعتبارینی بیلوب اکا رعایت ایتدیکی کبی طانیدینی ادملركه مادامکه اعتبار سزلغنی بیلور انلركه انسانیت صفتسه رعایت ایتلیدر ، چونکه انسانلرده اصل اولان اعتباردر ، مکرکه خلاقی ثابت اوله . ﴾ حتی مشهوردرکه فراقلین بر آدم حقنده یازدینی توصیه نامه ده بو آدمک حال و شاتی کنیدیسی بندن دها ابو بیلور و کندوسندن اوکر نه بیلور سکر و سوی احوالی معلوم اولیان بر کیمسه حقنده همتکزی دریغ ایتمز سکر ظن ایدرم دیمشدر . ﴿ الحاصل ناموس وهی وانسانیتله قائم اولدیغندن دائمیدر ، اعتبار ایسه کسی اولدیغندن انسانک مدت حیاتنده کی حاله کوره تخلف ایدر . ﴾ یعنی سیاق واحد اوزره اولیوب بعضا تراید و بعضا دخی تناقص ایدر .

§ ۶۹ — ﴿ کرک ارکک و کرک قادین اولسون هرکسک

کندوسنه مخصوص بر اعتباری اولوب بوده مثلا بر فاملیایه ، بر خاندانه ، بر قومه ، بر مأموریته ، بر علمه و یا حسن اخلاقه نسبتله قزانيله بیلور . انسانک بوکی برشی ایله قزانیدیغنی اعتباری وفاتندن صکره دخی خلقک وجداننده باقی قالور ؛

چونکه انسانك شخصيت روحانيه سی و فاتیله زئل اولمز ،
 کنديسیله بر حیات اولنلر بینده مناسبات روحانیه و معنویه سی
 باقی قالور ، حتی ممالك متمدنه ده حقوقدن عد اولنور . ﴿ بناء علیه
 متوفانك ناموس و اعتبارینه طوقور حرکنده بولنان کمنه آنك
 حقوقی اخلال ایتمش اولورده متوفانك اقربا و تعلقاتی
 بو حقوقی محافظه و بوندن طولای اول کمنه علیه اقامه دعوی ایده .
 بیلورلر .

§ ۷۰ — بر آدم کندي اعتبارينك تصديق ايجون
 بشقه لری طرفدن معامله مثبتّه طلب ایده بیلورمی ؟ یوقسه
 یالکز منفی اوله رق کندي اعتبارینه خلل کتورلامسینی ایستیّه
 بیلور ؟ تعیر دیگرله ﴿ اعتبار حق مثبتدر منفیدر ؟ ﴾ یعنی بر آدمک
 « مادامکه بنم اعتبارم واردد خلق اکا رعایت ایتسون و مثلاً
 شو درلو حرکنده بولنسون » دیمکه حق وارمیدر ؟ یوقسه
 یالکز « اعتبارمی کمنه اخلال ایتسون » دیه جک قدرمی حق
 واردد ؟ ﴿ بومسئله یی حل ایده بئلك ايجون انسانك ايجنده بولنه
 بيله جکی ایکی نوع مناسباتی تفریق ایتلیدر : بری مناسبات عمومیّه
 و دیگرى مناسبات خصوصیه و یا خود طبعیه و اجتماعیه در ،
 مناسبات عمومیّه عموماً افراد بشرک انسان اولق حسیله
 یکدیگر بيله اولان مناسباتیدر که مجرد علاقه انسانیه واسطه سیله
 اولان مناسباتدن عبارتدر ، مناسبات خصوصیه دن طبعیه اولنلر
 چوجقارک بابالرینه قارشو اولان مناسبتلری کیدرکه بالطبع حاصل

اولور واجتماعیه اولئر حکومت مأموریتلرینک اجراسنده کوچکلرک بیوکلره قارشو اولان مناسبتلری کیدرکه هیئت اجتماعیه تشکل ایتسیله حاصل اولمشدر . یینلرنده یالکزر مناسبات عمومی بولنانلره نظرا حق اعتبارالحق منفیدر ، هر فرد دیگرینه « اعتبارمی اخلاال ائمه » دیه ییلور ، لکن مناسبت خصوصیده بولنورسه حق اعتبار مثبت اولورکه مثلا فروعک اصوله و کوچک مأمورلرک بیوک مأمورلره قارشو ابرازینه مجبور اولدقلری معاملات احترامکارانه بوقیلدندر .

§ ۷۱ — « اعتبار صور وطرق مختلفه ایله مثلا شفاها یعنی شتم ایدرک وتحیرا وقصده مقرون اشارتله وفعلا اخلاال اولنه ییلور ؛ كذلك طوغریدن طوغرییه وبالواسطه مثلا زوجه سنی تحقیر ایله دخی اخلاال اولنه ییلور . »

§ ۷۲ — « ناموس ایله اعتباری اخلاال ایدر صورته وقوعبولان تحقیرلرک یعنی بوبایده اسناد اولنان شیرک واقعه مطابق وصحیح وکرچک اولدیغنی بولنری اسناد ایدهنک اثبات ایتسیله جزادن وارسته اولوب اولیه جغنی بخته کلنجه سفیه وچاپقین ومزور کی برتعیر مطلق ایله تحقیر اولنجه تحقیر ایدن کسنه بونک واقعه مطابق اولدیغنی یعنی قولنک صحتی اثبات ایله جزادن وارسته اوله مز و اما قتل وسرقت وارثا کی قانونا جزایی ورسمای یعنی طوغریدن طوغرییه مدعی عمومی طرفدن تعقیبی مستلزم بر فعل معین اسناد اولنجه اول امرده

بوفعلک واقعہ مطابق اولوب اولمدینی تحقیق اولنور، ثابت اولورسه اسناد ایدن جزادن وارسته اوله جنی کبی اول فعلک فاعلی جزا کورر وثابت اولمدینی تقدیرده صرف افترا اولوب افراده عائد ایسه متضرر اولنلر وحکومتہ عائد ایسه مدعی عمومی طرفندن افترا ایدن علیهنه اقامه دعوی اولنه یلور.

۷۳ — ﴿ اوروپاده ناموس واعتباری اخلال اولنان کیسه تبریه ذمت ایتک ایچون دوللو Le duel اصولی واردر . دوللو لایتنجه ایکی معناسنه اولان دو (duo) لفظندن مشتدرکه ایکی آدم حققرینی کندی کنیدیلرینه احقاق وتفریق ایتک یولیدر؛ بو لکهی بز بزه تمیزلرز دیوب حکومتہ مراجعتہ حیا ایدرلر، برر سلاح ایله مخاصمه ایدرک نتیجه سنده بریسی فوت یا مجروح اولوب دعوی فصل اولنمش عد اولنور . بو حرکت وحشیانه مدافعه مشروعه قیلندن اولیوب کرک حقوق وکرک اخلاق قواعدینه کلیا مغایردر . ﴿ بواصول اسکی زمانلرده یونانیلر ورومالیلر وقتنده یوغیدی، مؤخر اقرون وسطاده اوروپالیلریننده ظهوره کلمکه باشلامش برعاتت جاهلاندر . بونک سبب ظهوری اولوقلر اوروپا حکومتلری منتظم اولمدقلری وکندولره ضعف طاری اولدینی جهتله هرکسک حقوقی کرکی کبی وقایه ایدمه ماملریله هرکس ناموسنی کندی محافظه یه مجبور اولمقدن عبارتدر . الحاله هذه حکومتلر منتظم وقانونلر مکمل اولمش ایسه ده او جاهلیت زماننک بقیه اثار قبیحه سندن اولان بو فکر باطل

هر نصلسه اوروپا خلقنك نظرندن چي قمامشدر ، حالو كه بو حرکت هیئت اجتماعیه تشکیکندن مطلوب اولان فائده و نتیجه کلیا مغایر اولدیغندن اك اول ترك اولنه حق شیردندر . واقعا بعض جهلا « ناموسم اوله برشیدر كه اكا جانمی بيله فدا ایدرم ، ناموسمه متعلق ایشی نه محکمه یه ونده حکومت حواله ایدم » دیمكه ایسه ده بوسوز هم اخلاقه وهم حقوقه مغایردر ، چونكه هر کس ناموس و اعتبارینی محافظه ده نصل حقی ایسه حقی بالذات احقاقه قیام ایتماكه و بالعکس بونك ایچون حکومت مراجعت ایتماكه ده اوله جه مجبوردر ؛ بومغایرتله برابر مطلوب اولان احقاق حق قضیه سی دولو ایله حاصل اوله مز : تحقیر اولنوبده اعتباری اخلاص اولنان کیمسه خصنی دولویه دعوت ایتمکن نه فائده چقار ؟ فرضا بودعوته اجابت اولنوبده دولو ایدلسه یه تحقیر باقی قالوب زائل اولمز ، بشقه درلو چاره سنه باقلیدر ، زیرا ناموس و اعتبارك اخلاصی امور مغویه دندر ، جرح مغوی جرح مادی ایله تعمیر اولنه مز ، خصنی اعدامله کنینه عزو ایدیلاص ناموس سزلق و اعتبار سزلقندن خلق نظرنده قورتلش اوله مز ؛ اصل چاره سی حاکم حضورینه کیدوب کندینك ناموس و اعتبار صاحبی اولدیغنی و دعوا سنده حقی بولندیغنی میدانه چقارمقدر ؛ بوسورتده خلق نظرنده دخی برائت قزانمش اولور . اکر پولتیقه ماده سنندن نشأت ایش مثلا غزته ایله برشی سولانمش ایسه بوادم بنی تحقیر ایتدی دیهرك دولویه دعوت ایتمك

فائده سزدر، ینه اسناد اولنان ماده کندنده قلمش اولور؛ اصولی وجهله غزته ایله جواب ویرملی و مناسب اسنانله تفهیم حقیقت ایتلیدر. برده بوراده شکایت اولنان شی ناموسک اخلاقی ماده سی اولدیغندن و تشبث اولنان دوللو دخی احقاق حق مقصدینه مبتی اوله جغندن حق سز اولان طرف قوتلی اولوبده غالب کلدیکی حالده دها زیاده فنالق ایتش و بالعکس مغلوب اولان جانب بر قاتدها مظلوم اولمش اولور که مقصده بسبتون منافی نتیجه چیتمش اولور. خلاصه بو اصول قواعد حقوق و اخلاقه کلیا مغایر و مقصودک حصولنه غیر کافی بر حرکت جاهلانده در؛ و حتی اوروپا قانونلرنده دوللو ایدنلره قاتل نظریله بقارلر واکا کوره حکم ایدرلر. ممالک اسلامیهده بو اصول هیچ بروقت جاری اولیوب حق سزیره اخره قذف ایدنلر حقنده مجازات شدیدہ تعین اولمشدر.

فصل سادس

حق مساوات بیانده در

۷۴ - ﴿ مساوات هیئت اجتماعی تشکیل ایدن افرادک حقوق و وظائفجه یکدیگره مساوی اولملریدر. انسانلرک افرادی بینده کرک جسمانی و کرک روحانی یک چوق فرقلر واردر. مثلا شکلجه ورنکجه متفاوتدرلر ﴾: کیکی اوزون و کیکی قصه، کیکی بیاض و سیاهدر؛ کذلک علم و تمدن جهتلریله مختلفدرلر: کیکی عالم و کیکی جاهل، کیکی متمدن و کیکی غیر متمدندر

و کذا صغر و کبر ، ذکورت و انوثة جهتلیله دخی فرقلیدرلر :
 بعضیسی بیوک و بعضیسی کوچک ، بعضیسی ارکک و بعضیسی
 قادیندر . ﴿ الحاصل بویله دهها نیجه نیجه اعتبارات ایله فرقلری
 اولقله برابر حد ذاته یعنی من حیث الانسانیه جملهسی مساوی
 اولملری اقتضا ایدر . بو مساواتکده اوچ سببی واردر : برنجیسی
 طبیعی و تعبیر دیگرله جسمانی و ایکنجیسی روحانی و اوچنجیسی
 مافوق الطبیعه در ﴾ که بر وجهاتی تفصیل اولنه جقدر .

۷۵ - ﴿ مساواتک سبب طبیعی و یا جسمانیسی ندر ؟

انسانلر بو قدر فرقلری ایله برابر ینه جملهسی خلقت جهتلیله بر
 نوعدندر و بر طبیعت انسانیه اولوب انکلهده عموم انسانلر
 مختلفددرلر . مادامکه بونلر بر نوعدر و بو نوع انسان کافه
 مخلوقاتک مکملی و جمله نک خلاصه سیدر و سائر حیواناتده متفرقا
 موجود اولان حواس و قوی و کمالات کنیدیلرنده مجتمعا موجود .
 در بو صورتده جمله انسانلرک مساوی اولسی لازم کلور و هیچ
 برینک دیگرله ادعای تفوق ایتسی معقول دکدر . والحاصل
 انسانلر انواع مختلفه دن دکدر بلکه انسال مختلفه ددرلر . واقعا
 انسانلر باشلوجه بش بیوک نسله منسوب و منقسمددرلر که بو
 نسللردن هر برینه جنس دخی دنیلکده در : برنجیسی قفقاسی
 جنسی اولوب انسانلرک شکل و سیماجه اک متناسب اولنلریدر ،
 بونلرده ترکر ، عربلر ، ایرانیلر ، روملر ، ارمنیلر ، بتون
 اوروپالیلر ، چرکسلر ، کرچیلر ، هندیلر و حبشیلردر ؛

ایکنجیسی مغول جنسی اولوب چین و تاتارستان و تیت اهالیسیدرکه
 بویلی قصه و ملحجه و یوزلری دکر می و کوزلری یوقاری
 طوغری و کوسه و اوزون یقیدرلر ؛ او چنجیسی (زنجی) سیاه
 جنسیدرکه رنکری سیاه ، صاحبلی قیویرجق ، قفا مککلرینک
 شکلری بشقه درلو ، برونلری یصی و دوداقلری بیسوکر ؛
 دردنجیسی مالز دنیلان مالتو جنسی اولوب جزایر بحر محیط
 سکنه سیدرلرکه عموما چرکین ، صقالسز ، رنکری زیتونی
 و یشیه میالدر و اولنلرینک صقال و بیقلری هیچ یوق کی ازره ؛
 بشنجیسی اصل امریقایلر اولوب رنکری باقر کی قرمز
 و اینجه و اوزون بویلی و صقال و بیقلری هیچ یوقدر . انسانلر
 اره سنده اشبو اجناس یعنی انسال خمسدهن بشقه دیگر جنسلر
 دهها وار و کرک انسال خمسدهنک و کرک خارجه قلان دیگر
 جنسلرک ترکیلری کرچه سیاق واحد اوزره دکل ایسه ده بینلرنده .
 کی فرقلر دخی کلی و اساسه متعلق دکلدر ؛ علم تشریح و علم منافع
 الاعضا اربابی بونلرک حد ذاتنده بر اولدقلرینی یعنی نوع واحد
 بولندقلرینی اثبات ایتشددر . حیوانلریده انسانلره قیاس ایدر
 ایسهک حیوانات دخی انواع و اجناس مختلفه یه منقسمدر ، بر
 سیاقده اولیوب هر برینه مخصوص بر درجه کمال واردر . حتی
 موایلد ثلثه بیننده طبعیون بر حد فاصل بوله مامشلردر ؛
 چونکه جماداته باقینجه کیت کیده بر درجه یه کلیورکه نباتاتدن فرق
 اولنه میور ، صکره نباتات صره سنه کچور ، و کیت کیده حیواندن

فرق اول نیوب حیوان صرہ سنہ کچور . خلاصہ حیوانات درجہ درجہ ترقی ایدر بر طاقم انواعدن عبارتدر . نوع انسان ایسہ بالعکس شکلا فصل نوع واحد ایسہ روحانیہ دخی اول وجہ اوزرہدر ؛ ہپسندہ عقل و حس و ارادہ و وجدان و نفسنی اصلاح ایتک و ترقی ایتک خاصہ لری وارددر . واقعا بو جنسلردن قافقاس جنسی اوصاف جسمانیہ جہ ممتاز اولدینی کبی اوصاف روحانیہ جہ دخی ممتاز بولنسی محتمل ایسہدہ بو ممتازیتلہ نوعندن چیقمز و بو جنسک امتیازندن طولایی سائر جنسلرہ خلل کلز ؛ نوع انسانک ہر جنسی علوم دینہدہ و صنایعہدہ و علوم سیاہ سیدہ ترقیہ مستعددرلر ، بونلر سعی ایتسلر ہپسی مکمل اولہ ییلورلر چونکہ او استعدادہ مالکدرلر .

۷۶ — ﴿ مساواتک سبب روحانیسی ندر ؟ روحجہ

دخی عموم نوع بشر بینندہ بر مساوات اصلہ وارددر ، انسانلرک خلقت جسمانیہ لرنده اولان اتحاد عقللرنده دخی تمامیلہ موجوددر یعنی انسانلر جسمائیکدی کیرلریلہ متناسب اولدقلری کبی عقلاً دخی متناسبدر . اتحاد عالی (یاخود وحدت عالیہ) خلقت L'unité supérieure de la création اولان وبتون کائناتہدکی فضائل و محامد کندوسندہ مجتمع بوانان انسان کندی عقلی واسطہ سیلہ کائناتک اتحادینی ، نظامنی و تناسبنی ادراک ایتک وانلرہ میل و محبت وانلری تقلید وامور و حرکاتندہ نمونہ و مثال اتخاذ وانلری امور حیاتیہ سندہ استعمال ایتک افکار ودرجاتنہ ترقی

و اعتلا ایدر. ﴿ یعنی کائناتک اجزاسی یننده موجود اولان هم اهنکلی و بونلرک نه نظامه تابع اولدیغنی یعنی مثلاً قیش نصل اولدیغنی و یاز نصل کلدیگی و بونلرک اره سنده مناسبت تامه بولدیغنی و بومناسبتی ادراک ایدر و بونلری تحسین ایدوب سور و حرکات و سکناتنده بواحد و نظام و تناسبی تقلید ایدر. ﴿ اشته بودرجهیه قدر اعتلا ایتکه هر آدم مستعددر، بوحالات ایسه حیوانات سائرهنک ادراکاتنک مافوقندهدر، چونکه انلرده بواستعداد یوقدر. بوادراک و محبت و تقلید صفت انسانیه سی سبیلده دخی انسانلر مساویدر. بومساوات ایسه استعداد و خواص اصلیهجه اولان مساواتدر. ﴿

﴿ بواساس مشترک اوزرینه برعدم مساوات دخی وارد؛ بوایسه انسانلرک مثلاً کیی عالم و کیی جاهل و کیی زنکین و کیی فقیر اولملری کیی افرادجه مساواتسزلق خصوصاتندن عبارتدر. دیمک که انسانلر من حیث الانسانیه مساوی و من حیث الشخصیه غیرمساویدرلر. بوشخصیت جهتیه اولان مساواتسزلقندن خلاص اولق ممتعدر یعنی بو حال غیرقابل اجتنابدر. ﴿ چونکه بونلر بر چوق اسبابه مبنیدر، بو سبیلردن احتراز ایسه ممکن دکلدر، مثلاً افریقانک اورطه سنده تولد ایدن زنجی بی بیاض ایتهنک البته چاره سی بولنه مز.

﴿ اوت بومساواتسزلقلردن قورتلهنک چاره سی یوقدر. چونکه اولاهر فردک توسع و ترقی جسمانی و روحانیسی کندی

سعی و غیرتہ منوطدر وسی ایسہ متفاوتدر ؛ دیگر طرفدن
حیات انسانہ نك مقاصدی مختلفدر ، مثلاً انسانلرك كی تاجر ،
کیمی حداد ، کیمی نساجدر و کیمی حاکم ، کیمی طیب ، کیمی عسکر
و کیمی سائرہ در ؛ دیک کہ بومساواتسزقلر انسانك حائر اولدینی
ارادۀ جزئیہ نك و یا خود حریت شخصیہ نك نتیجه سیدر . دیگر
برنوع مساواتسزلق دها واردر کہ اوده یرادلشزدن ناشیدر ،
بونلرده سن وارککلک وقادینلق و نسلہ اولان مساواتسزقلر
کیدر .) ابون و مربیلرك تربیہ و تعلیمده قصورلرندن ناشی
حاصل اولان ذکاوت و غباوت و معرفت و جهالت کبی مساوا .
تسزقلر متفاوت الدرجه اولان سعی و غیرتہ منوط اولنلر قیلندن
اولدینی کبی ابون و مربیلرك اراده لرندن خارج بعض احوال دن
حاصل اولان و از جمله جنین رحم مادرده ایکن والده سنك دوچار
اولدینی خستہ لق و اکدار و آلام و آلدینی صغوق و صیجاغك تأثیرندن
حصوله کلان جنت و شدت عقل ، سمن و ضعف مثلاً
مساواتسزقلر دخی یرادلشدن ناشی اولان مساواتسزقلر
قیلندندر .

(الحاصل انسانلر من حیث الانسانیه مساوی اولوب
شخصیت جہتیله غیر مساویدرلر . مع مافیه بومختلف مقصدلری
توحید و ہر برینی صورت متساویہ ده تقدیر ایتك لازمدر
وہیسی انسان ایچون مقتضیدر .) افرادده کوریلان بومسا .
واتسزلقی ازالہ ایچون اشتراکیون چوق سعی ایدوب چارہ

ارایورلر، لکن هیئت اجتماعیہ بالاتفاق بونی ازالہ یہ چالیشہ حق اولسہ بیلہ اشتراکیونک ارزو ایتدکری مساوات ینہ حصولہ کلہ مز، بونک حصولی محال عقیدر، بومساواتسزلق ممتبع الاجتبابدر، چونکہ ہر فردک توسع وترقیسی کندی سعیلہ حاصل اولورومقاصد حیات انسانہ مختلف واحتیاجات انسانہ متفاوتدر، انسانلرک ہر بری بشقہ مقصدہ توجہ ایدروینلرنده عدم مساوات حصولہ کلور، بومساواتسزلق حریت شخصیہ نک نتیجہ سیدر، مادامکہ الیزدہ حریت وازادہ جزئیہ واردر ہرکس ایتدیکی طرفہ کیدہ بیلور، جملہ سی برطرفہ سوق ایدلسہ حریت سلب ایدلش اولور. خلقت انسانہ دہ استعدادک درجاتی، انواعی اولقدر واسع اولقدر زنکیندرکہ حسابسز قوملر، قرنلر، نسللر، بواسطہ دادن مستفید اولسلر ینہ بواسطہ استعدادک صوکی ونہایتی بولنمز، جناب حق بزہ اولقدر بیوک بر نعمت خزینہ سی ویرمشدرکہ او خزینہ دن نعم لایحصى چیقارمش اولسہ ق ینہ نہایت بولمز علمادن بری دیمشکہ "بم بیلدیکم شیلر پک عادی وپک جزئیدر، بن دریا کنارندہ اوینایان چوجغہ بکزر، محتملدرکہ دیکرلرندن دہا کوزل طاشلر بولہ بیلدم، محتملدرکہ بجاقلریمی صیغایہ رق برقاج خطوہ دہا ایلروکیدہ بیلدم، لکن بحر محیط الہی پک واسعدرواورادہ چوق شی واردر؛ انسانلرک نائل اولہ جقلری حکمتلر بحد وبمحسابدر، نیجہ سنہلر وقرنلر کچسہ ینہ قعرینہ واصل اولہ مزلر. «

﴿ مقاصد انسانیہ مختلف اولیوبده متحد مثلا علی العموم انسانلر زراعتله مشغول اولسهلر اولوقت تحصیل علوم وصناعت و تجارت وبونلره مماثل شیلرله اشتغال ایتک ایچون کمنه بولنه مز ایدی ، حالبوکه بونلر بربرینه نسبتله متفاوت و بعضیسی دها شریف اولسهده حقیقتده جمله سیده لازم و مهمدر ، زیرا جمله سی مقاصد انسانیہ ایچوندر ، انسانلرک سعادت حالی مقاصد مختلفه نك حصوله متوققدر . ﴾ حتی امریقاده قالیفورنیا Californie ده التون معدنلری کشف اولنجه خلق اورایه طوپلانوبده التون جمعه حصر اشتغال ایتدکلرنده جمله سی آج قالدقلری مشهوردر . ﴾ اشته افراد جمعیت من حیث الثروه والمعارف متساوی اولسهلر اولوقت اصول تعاون هرج ومرج اولور ایدی . الحاصل بومقاصد ومسالكك هپسی انسانلرک سعادت حالی موجب اوله حق مقاصد انسانیهدر . ﴾ یعنی بو مسلکلرک وصنعتلرک هپسی مهمدر ، بونلر یکدیگرینه ترجیح ایدلاملیدر ؛ چونکه هیئت اجتماعیه حالنده یشایان انسانلره مشاغل مختلفه وتعیر دیکرله صنایع متنوعه لازمدر . بناء علیه صنایع مختلفه اربابنك حیثیت متساویه لری ومساعات مدنیه لری کوزه . دملیدر ، یکدیکرندن معتبر عد اولنخاملی و جمله اصناف مساوی طوتلیدر . خلاصه کلام انسانلرک بحسب العوارض عدم مساواتلرنده فوائد کثیره واردر . زیرا انسانلر بتون اشرف صنعتلره سالک اواسه ایدی نامتناهی اولان مقاصد انسانیه

حاصل اولز ایدی ، اختلاف مقاصد ایسه موافق حکمتدر .
 ۷۷ — ﴿مساواتک سبب ودلیل مافوق الطبیعه سی ندر ؟
 یوسبب مساوات انسانیت قاعده کیه سنه مبنیدر یعنی طبیعت
 انسانیه وتعیر دیکرله خواص انسانیه هر انسانده موجوددر
 قاعده سنه مستندر . یوفطرت انسانیده اولان خواص ابدی
 وغیر متناهی اولان جوهر انسانیتدر والی ماشاء الله توسع ایدر .
 جوهر بشریت ابدی ونا متناهی واساسا هر فرد ذی عقل
 وادرا کده موجود اولوب محدودیتدن منزه اولان زمان ایچنده
 اصلا نهایت بولمقسزین اشکال مختلفه تحتده غیر متناهی بر صورتله
 توسع ایدر . ﴿ یعنی اساسا ابدی وغیر متناهی اولان جوهر
 انسانی هر بر ذی عقلمه اقتدار حالیده در یعنی مؤثر ومقتدردر ،
 هیچ بوقت وحالده نفاذ بولماز ، تمز ، دوکنز ، حدودی یوقدر
 والی ماشاء الله کرک زمان وکرک ماهیت جهتله غیر متناهدر ،
 وکالات وترقیات انسانییه نه زمانا ونه ده کما نهایت یوقدر ؛
 اشته مافوق الطبیعه دیدیکمز بودر . اوروپانک ترقی حاضری
 کوریورز: مثلا تلغرافله کره نک بر طرفی اوبر طرفیله طرفه العینه
 مخبره ایدیور ! بونک دها اوتوسی وارمی ؟ البته وارکیت
 کیده ایلویه کیدیه جکدرلا ؛ تیمور یولنک فوقیده وارمی ؟
 اوت ! فطرت انسانیده مرکوز اولان اقتداره نظرا دها فوقه
 واریه جقدر حتی اثری کورلمکه باشلادی ، از جمله الکتریقی
 تیمور یولنده قوللانمغه باشلایلر ، شمعی تنویرده الکتریق قوللانیلورکه

برمنقاری بیک غازه مساویدر، برشهرک برطرفه آی کی
الکتریک قندیل قونیلهرق هرجهتی تنویر ایدیلور، یقینده مداینک
خارجی مثلاً استانبول وادرنه ارهسی برقاچ قندیل ایله تنویر
قنور، طاغلرده اقان صولرک قوتلرینی الکتریک واسطه سیله
شهرلره نقل واستدکری محللره صرف ایتمه باشلیدلر،
اوطون وکمر چوق اولان یرده یاقیلان آتک حرارتی آخر
محللره نقل وخانهلره تقسیم یولنی بولیدلر، دکز طاغهلرندن
حاصل اولان قوتلری صاللره مربوط الکتریک آتی واسطه سیله
فاریقه لره نقل وحرارت شمسى طویلایوب خلک محروقادن
وارسته اولسیچون خانهلره تقسیم وارسال ایتک طریقلری
دردست تجربه در؛ اشته بونلر انسانلرک ثمره مساعیسی اولهرق
حصوله ککش ویا کلمک اوزره بولنش اولان موفقیتلر درکه بونلری
ملیونلرجه موفقیتلر ولی وتعقب ایده جکنده شبهه یوقدر.
﴿اکثریا خلق بوکالی طانیز یعنی انسانلر انسانده بویله برخاصه
بولندیغنی اغراض نفسانییه مبنی طانیوب تسلیم وتصدیق ایتک
ایستزلر؛ مع مافیه مادامک بوکال طعیدرینه مقامنی بولور یعنی
بونى طانیمانلر اول واکثر بوخاصه عالییهی طانیغه مجبور اولورلر،
زیرا الحق یعلو ولایعلی علیه پیورلمشدر؛ برآدمک بونی
طانیامسنک سبی کندوسنک کالسر بولنسی ومؤخرا طانیمنک
سبی دخی کسب کمال ایتدکجه ارباب کمالک کالنی تصدیقه مجبور
اولسیدر، زیرا طبیعت انسانیه ده اولان فضیلت وشفقت

اقتضاسنج هم طبیعت اولئری طایمق طبعیدر . ﴿ برضعینی ، بر
فقیری کوردیکمزده حس ایتدیکمز غلیان شفقت بوکا علامتدر ،
اشته او شفقت برینک محوینی واضمحلالنی موجب اولان شیئی
روا کورمامکدن ایلو وکلور ، زیرا باعث مذلت اولان شیرلی
خوش کورمامک وانلرک ازالهسنه چالشحق مزایای انسانیه دندر .

﴿ ۷۸ — بوانسانلر بیننده کوردیکمز و شخصیت نقطه

نظرندن ایلو وکلدیکنی بیلدیکمز اختلاف هپ بومدعادن یعنی
شخصیتدن نشأت ایدر ، بوايسه طبعیدر ، چونکه هر آدم
کندینی دوشنور ؛ فقط بومدعای شخصیتی انسانلر بیننده اولان
جهت جامعه و وحدتله توفیقه سعی ایتلیدر . یعنی بر آدم کندی
حقوقنی نصل محافظه ایدیورسه عمومک حقوقنی دخی اویله
محافظهیه وانکله توحیده چاشملیدر ؛ اشته انسانلر بومساوات
ذاتیه ایله مساویدر ؛ بو ذاتیدر واصل اولمیدر و دیگری بونی
تعدیل ایتلیدر ؛ حاصلی عنصر شخصی بی تخریب ایتیه جک صورتده
مساوات اصلیه نک حق تقدیمی واردر . ﴿ الحاصل انسانده ایکی
نوع فکر واردر : بری منافع شخصیه اعتباریله اولان فکر
ودیکری انسانلرک مساوی اولملری حیثیتله اولان فکردر ؛
بوایکی مختلف فکرلرک جهت وحدتی بوملی و بوفکرلری توفیقه
غیرت ایتلیدر ؛ اولکی فکر یعنی شخصیت ادعاسی انسانک حرکاتندن
نشأت ایدرکه عرضیدر و اخرک حقوقه تجاوز ایتمک کی فکر
بو شخصیتک مدعاسیدر ؛ ایکنجی فکری یعنی مساوات فکری ذاتیدر ، بونی

محافظه چالشمیدر . بومقدماتدن اکلاشیلورکه انسان مساویدر
 ومساوی اولوق لازم کاور ؛ لکن هرکس بونی ادراک ایدهمدیکندن
 چوق زمانلر وچوق محللرده بومساوات قاعدهسی اکلاشیلور ،
 بونک اکلاشلماسی بعضا جهالتدن وبعضا اغراض شخصیهدن
 نشأت ایدر . انسانده کی مساوات ذاتیه واصلیه ایله اسباب
 عارضه دن نشأت مایدن مساواتسزلخی وبونلردن حاصل اولان
 اختلافی تعدیل ایتلیدر ؛ ذکاتلر ، صدقلر وسائر کونه اعانهلر
 هپ بونلری تعدیل ایتک مقصدینه مبتیدر ؛ سلامت وسعاده
 خلل کلیه جک صورتده مساواتی توسیع ایتلیدر ؛ خلاصه کلام
 مساوات اصلیه نک عنصر شخصی بی اضرار وتخریب ایتیه جک
 یرلرده حق تقدیمی واردر .

بونلر به نیت

صدقه

بود

§ ۷۹ — ﴿ قواعد مسروده به نظرا مساوات مسئله سنده
 اوج باشلوجه نقطه تقریق ایتلیدر: برنجیسی استعدادات وخواص
 انسانیه نک مساوات اصلیه سی ، ایکنجیسی استعدادات وخواص
 انسانیه نک توسع واستعماللرینک عدم مساواتی و اوچنجیسی بر
 هیئت اجتماعیه بی تشکیل ایدن کافه صنوفک مسلک ومشغولیتلرنده کی
 مساوات اعتباریه لیدر ﴾ که بروجیه زیر تعداد و بیان اولنور :
 ﴿ اولا استعدادات وخواصنک مساوات اصلیه سی ماده سنده
 هر بر آدم قوای ذاتیه سنک توسعنه مساوی برحالده بولنسنی
 ادعا وطالب ایده بیلور ﴾ یعنی زیدک بوکا نصل حق واریسه
 عمروک دخی اوپله جه واردر ، یعنی بریوک ادمک ارزو ایتدیکی

شیئی چوبانك دخی ارزو ایتكه حق واردر، یوقسه چوبانه
سن چوبانسن یا فلان جنسدنسن سن فریق یاخواجه اوله مزسن
دینه مز. (تعبیر دیگرله انسانلرك جمله سی قوای روحانیه لرینك
تریه سنه لازم اولان معلوماتی ویشامق ایچون مقتضی بولنان
وسائط ماده و معنویه یی استحصاله حقلیدر. بوندن مقصد
هرکسه استدیکی ویرمك دکلدر بلکه هرکس جناب حقك
ویردیکی حقوقدن استفاده ایدوبده ارزو ایلدیکی شیئك اسبابی
جمع واستعمال ایتكه حر برافقندر، مثلاً کسنه نك جبال
مباحه دن اودون قطعنه و تدارك ایده جکی ترلای زراعتنه مانع اولما مقدر.
(ثانیاً قوای انسانیه نك توسع واستعمالی اتخاذا اولنان مقاصده
کوره تخلف ایدر؛) ارتق هر کسکی سالك اولمش اولدینی
مسلكه کوره اولور؛ (حقده اونستده تخلف ایلر: مثلاً
تحصیل علوم ایله مشغول اولان ادمك بولندینی موقع و حال
صنعت ایله اشتغال ایدنك حال و موقعنه مساوی اوله مز. اشته
بونك ایچون دیمشردرکه «مساوات حقیقه غیر مساوی اولان
اجسام یاخود مخلوقات حقده مساواتسزجه معامله ایتمكدن
عبارتدر.» یعنی هرکسك مسلكنه، سنه وسائر بوکی شیرینه
کوره اوحقده تخلف ایدر. بومساواتسزلق مساوات اصلیه یی
اخلال ایتمز. ثالثاً هیئت اجتماعیه افرادینك هر صنفنك مسلك
ومشغولیتجه مساوات اعتباریه یعنی قدرجه و حیثیتجه مساوات طلب
ایتكه حق واردر؛ بناء علیه بعض صنفاری دیگر صنفاره ترجیح

ساوات
ان ای تیغی

ایتمک و بعضیسنه امتیاز و یرمک موافق حقانیت دکدر . هیئت اجتماعی ترکیب ایدن هرصنفک برمسلك و مشغولیتی واردر ؛ بونلر بربرینه نسبتله مفضل و مفضل علیهدرلر ، فقط قدر جهتیله بونلرک هپسی مساوی عد اولنلیدر ، چونکه جملهسی شریف و معتبردرلر و اوایلله عد اولنلیدرلر ، بو مساوات ایسه حقوق جهتیله مساوات دیمکدر .) یعنی بونلر یکدیگره نسبت اولنورسه بالطبع بردرجدهده بولنجوب بعضیسی محقر و معتبر اولور ایسهده مقاصد انسانیهده جملهسی مشترک اولدقلرندن حقوقه و اعتبارجه مساوی عد اولنلیدر .) واقعا اصنافده افرادکی هپ بردرجدهده دکدر ، برصنفی نفوذلی و دیگری دهها اشاغیدر ، فقط بونلر مأموریتلر کی بربرینه مربوطدر و اوایلله اوللق اقتضا ایدر ؛ بومذکورات برزنجیرک مختلف معادنن معمول خلقه لری کیدر ، هپ اوزنجیری تشکیل ایلدک لری جهتهله جملهسی بر مقصده خادمدر ؛ بنابرین یکدیگره نسبتله هیچ برینی دیگرک مافوقنده و یا ماتحتنده بولندیرمق جائز دکل در ؛ وجود انسانینک اعضاسی و جواریحی بویلهدر ، واقعا مقایسه ایدیله جک اولسه کوز دهها لزوملی کی کورینورسهده اعضامزدن سائر بری اکسک اولسه تمامیتزه خلل کلور ؛ ایشته بواسبابه منی هر فردده اک حقیر ، اک فقیرمقولهدن اولسه بیله قانون نظرنده اک کریده واک شریف بر فرد جائز المساواتدر . و بوحق کیم ایسترایسه اکا ویرملیدر . قانون حضو- رنده مساوات بودر و سبیلریده مارالیان دلائلدن عبارتدر .)

بو حقوقه مساواتك تأسيسی لازم و غایت مهمدر؛ بناء علیه
 مأمورین ایله عسکرلر دخی حقوقه مساویدر، هر برینه مخصوص
 وظیفه لر واردر، مسئولیتلری لزومنده کندی دائره لرنده مؤاخذه
 اولنورلر، فقط حقوق انسانیه جه جمله سی بردر. مملکتک راحت
 و اسایشی، ثروت و قدرتی مساوات قاعده سنه مبتیدر؛ بونک
 اولماسی هیئت اجتماعی مقصدینک حصولنه مانع قویدر؛ بونی
 استیانه ویرملی، استعدادینه مانع اولمالیدر؛ اما وجوده کلمی
 هر کسک کندی النده در یعنی مساوات حقوق مجرد استمکه
 و استحصاله اقتدار حالنده بولنق دیمکدر. التزام ایتدیکمز بو
 مساوات بعض مساواتسزلنی دعوت ایدر: مثلاً صغیرک میراثدن
 حصه سی انه ویرلز، بوده دقتله باقیلورسه استحصال مساواتدن
 بشقه برشی ایچون اولدینی اکلاشیلور. ﴿ خلاصه بومساوات
 حقوق دیدیکمز عینله برحاله بولنان بالجمله افراد حقنده سیاق
 واحد اوزره معامله ایتمکدر: مثلاً فاملیلر حقنده مساوی معامله
 ایدملی و تأهل ایده جک اولنلر حقنده و اصناف و صبیان حقنده
 عینی معامله اجرا قلملیدر. بو مساوات حقوق اقتضاسنجه حق
 حکم و قضانک سیاناً اجراسی لازمه دن اولوب بناء علیه بر آدمک
 مالنه، حیاته، ناموسنه و بوکبی حقوق طبعیه سندن برینه دیکری
 طرفدن تعرض واقع اولدینی حالد متعرض حقنده هرکیم اولور
 ایسه اولسون اجرا ایدیه جک محاکمه بر محکمه ده اولمیدر
 و حتملرنده دخی عینی معامله ایدملیدر؛ واقعا عسکرلره مخصوص

محاکم جزائیہ خصوصیه وار ایسہدہ بونلرک حق قضاسی یالکز
عسکرلکہ متعلق شیلری رؤیت ایتکہ محصور قالملی ویوقسہ
عسکرده عسکرلکہ متعلق اولیوب اسایش عمومیہ عائد اولان
برجرم ارتکاب ایتدکده عینی افراد سائرہ کی محاکم عمومیہدہ
محاکمہ ایدملیدر .

§ ۸۰ — (مساواتک تاریخی : مساوات رومالولر ییتندہ
معروف و معمول بہ ایدی ؛ رومالولرک انقراضدن صکرہ میدانہ
حیقان جرمانیا حقوقدہ مساوات قبول اولندی ، چونکہ
ببونلردہ خلق صوف مختلفہیہ منقسم اولوب کک
اصیلزادکانک وکک صوف سائرہ نک کندولرینہ مخصوص بشقہ
بشقہ حقوق و اعتبارلری وار ایدی . مؤخرأ علوم و معارف
ترقی ایتکہ وبو مثللو حقوقدہ کی مساواتی اکلایان ذوات سرکارہ
کچمکہ باشلیہ لی ممالک متمدنہدہ حق مساوات تسلیم و تصدیق
اولنہرق قانون اساسیلرہ درج وکافئ احکامی موقع فعل واجرایہ
وضع اولندی .) اوکی ممالکدہ برینک مالنہ ، جاننہ ، عرضنہ
تعرض وقوغندہ تصدی ایدن لدی المحاکمہ پنچہ قانون جزایہ
چارپااور .

فصل سابع

حقوق حریت بیانده در

۸۱ — ﴿عالم حسیده ذاتیت ویا جوهریت بشریه نك فعلی
 ائاری و حیثیت انسانیه نك بر شاهد پرتونشاری و هر در لو ترقیاتك
 سائق ذی اقتداری اولان حریت بو عالم تعاون و مدنیتده ظهور
 ایتش و عالم مادی و روحانیک هر بر مقاصدینی جستجو و محری
 ضمنده انسانك استعمال ایده بیلدیکی قوای روحانیه و جسمانیه
 وبالخاصه کندی وجداتی انسان ادراك ایتدکجه توسع و ترقی
 ایده کلشدر. حریت هر فرد امور مشروعه ده کیف یشاء حرکت
 ایتکدر؛ ﴿بوراده امور مشروعه دن مراد نظر عقلمده یا خود عند
 الشرع مقبول اولان حرکتیدر که بونده مختار اولوب کیفما یشاء
 حرکت ایدر؛ ﴿تعبیر دیگرله حقوق مشروعه سنه متصرف اولوق در.
 حقوق حریت بشقه سنك حقوق حریتنه طوقمیه جق قدر ایلرو.
 لیه بیلور یعنی حریتك بشقه حدود و سنوری اولیبوب بونك
 حدودی دیگرك حدود حریتدر؛ ﴿مثلا باغچه سننده دیلیدیکی کبی
 زراعت و دیلیدیکی کبی حرکت ایدر، اما قومشونك حدودینه
 تجاوز و بوکا ایراث ضرر ایده مز؛ ﴿اشته بونکچون حریتی
 «عالم مدنیتنه نافع اولان و هیچ بر کسمیه مضر اولیان حرکتده
 هر کسك سربست اولمسیدر» دیو تعریف ایتملر در. حریت
 عالم شهود و محسوساتده شخصیت عملیه نك علامت خارجیه﴾

ياخود فارقه ﴿سيدر يعنى حریت اولسه اوزمان شخصیت تميز ايتيوب وانسان انسان اوليوب الات مثابه سنده وجمادات قيلندن اولور ؛ انسانك موجوديته حریتله حکم اولور. حریت حیثیت انسانیه نك شاهیدیر ؛ حریت اولسه حیثیت قالمز ؛ حریتی اولیان ادمك حرکاتی کندی حرکاتی دکل در.﴾ مثلاً کوله نك حرکاتی افندیسنك اوامریته عائد وتابعدر. ﴿حریت هر درلو ترقیاتك منبعیدر ، حریت اولسه بوترقیات حاصل اولمز، حر اولیان ادمك ترقی احتمالی یوقدر ؛ چونکه حر اولمی، سعی ایتلی، اسبابنه تشبث ایللی که ترقی اولسون. حریت جمعیت عالنده وجوده کلمشدر.﴾ یعنی هیئت اجتماعیه تشککندن صکره بورالری اکلا- شلمشدر. ﴿انسان کندی وجودینی﴾ یعنی موجود اولدیغنی ﴿حریت واسطه سیله ادراک ایدر ؛﴾ حریت اولسه موجود اولوب اولدیغنی ادراکدن بلکه عاجز قالور ؛ مثلاً دوشنور، کزر اما حریت اولسه نه دوشنه جك ؟ نزهه کیده جك ؟ اوزمان وجودی وعدمی مساوی اولور. ﴿وسعادت و سلامتک طلب واستحصالنده استعمال ایده جکی حواس وقوی حریت سایه سنده بالتدریج توسع وترقی ایدر.﴾

۸۲ — حریتك تاریخی : ﴿اسکی زمانده حریتك حقیقت و ماهیتی و منافع واهمیتی وترقیات انسانیه ده اولان حسن تأثیراتی ککرکی کبی شلزلر ایدی ؛ اولوقتر برحریت شخصیه و برده حریت سیاسیه اولدیغنی معلوم ایدی ؛ اولوقتر

اصل مقصود اولان حکومت اولوب افراد انک لوازمندن عد اولنور، یعنی اشخاص دوات ایچون یزادیشدر ظن ایدیلورایدی؛ رومالورده بواعتقادده بولنورلرایدی یعنی هیئت اجتماعیه دن مقصد افرادک سعادت و سلامتی اولیوب الحق قدرت و شوکت و شان و شرف صاحبی بر حکومتک وجودیدرو بتون خلق بومقصدک ترویجنه الت حکمنده در زعمنده ایدیلر؛ حالبوکه هیئت اجتماعیه دن مقصد افرادک سلامت و سعادت حالی و ترقیات و توسعات مادیه و معنویه سی اولوب حکومت دخی هیئت اجتماعیه نک سلامت و سعادت حالی اسبابنک حصولی یعنی خلقک مصالح همومیه و مصالح خصوصیه دیو ایکیه منقسم اولان مصالحندن اک مهمی اولان مصالح عمومیه سنک تسویه و استحصال و استکمالی ایچون تشکل و تأسس ایتدیکی صکره لری لایقيله اکلاشلغه باشلامشدر؛ حتی شیخ سعدی قیون چوبان ایچون دکلدر، بلکه چوبان قیونک خدمتی ایچوندر مألنده اولان کوسفند برای چوبان نیست* بلکه چوبان برای خدمت اوست بیت مشهوريله بو حقیقتی افاده ایشدر. اشته ازمنه سالفه ده حکومت مقصود بالذات ظن اولنور ایکن ازمنه اخیرده انسان بر صفت عمومیه صاحبی اولدینی یعنی نه الت ونه ده مقصود بالواسطه اولیوب بالعکس مقصود بالذات اولدینی و حکومتک وظیفه سی مصالح عمومیه بی تسویه ایچون برنظاریدن عبارت بولندینی اکلاشلشدر.)

یعنی حریتہ نظر اولنورسہ اوج نوع حریت کوریلور : ﴿
 بریحیسی قرون وسطی حریتیدر یعنی روما ایمپراطور -
 لغنک انقراضندن استانبولک فتحہ قدر زمانده اولان حریت
 افکاریدر ، اووقت حقوق شخصیہ وحریت حقنדה حکومتلر
 طرفندن جبر وقهر وتحکم ایدیلورایدی ؛ اوزمان مقصد حکومت
 وهرکس حکومتک ترویج مقصدینه الت وواسطه ظن اولنمش
 وهمده اولمش ایدی . بواصولک فالغندن بتون حیاتک منبعلری
 قوریمش وحرکات عقلیه وسعادت وسلامت قولری هپ قیامش
 وبتون اوروپا ظلمت جهالت ایچینده قامش ایدی . نهایت استا -
 نبولک فتحی صرہسنده اوروپایه کیدن شرقیلر سایهسنده علوم
 ومعارفک انتشاری ، امریقانک کشفی ، باروتک وفن طباعتک
 ایجادی قرون اخیریه مبدأ اولدی .﴾

﴿ایکنجیسی اوروپاده روما انقراضندن صکره کی جهالتندن
 صکره (۳۸ ۴۸ ده بیان اولندیغی وجهله) حکمت وعلوم
 وصنایعک تکررا ، احیاسی ، La renaissance de la philosophie ،
 des sciences et des arts. زمانده اولان حریت افکاریدرکه
 بوندن یوزسنه اول اولان حریت افکاری دیمکدر ؛ اوزماندن
 اولکی افکار حریتی رومایه مستولی اولان باربارلر محو ایتمشیدی .
 اوزمانده کی حریت دخی نیم حریتندن عبارت ایدی .﴾ یعنی
 اوزمانده حریت هر نقدر سرنما اولمش ایدیسه مکمل
 اوله مامشیدی .

(اوچنچیس ایکنجیسندن صکره یعنی شمذیکی زمانده اولان
 حریتدر. عصر مزده خصوصاً شمذیلرده افراد واقوام و ملل انسانیه
 کرک شخصیت ذاتیه و کرک شخصیت قومیه لرینک حریتی حقنده
 دها واسع معلوماتلر استحصال ایتلمرله هرکس قید اسارتدن
 قورتلوب اسب اختیارینی میدان سعادت و ترقیه کیف مایشاء
 سوق ایتمکده و حریت افکارده اونسبته توسع و ترقی ایتمکده در.
 الحاصل حریت افکار زمانمزده ترقی ایتیش و آن بآن ترقی ایتمکده
 بولنمشدر. انسانک طبیعت و ماهیت و ما خلق لهنه موافق
 و مقاصد انسانیه سنک حصولنه مطابق اولان حریت ایشه بو
 حریت حاضره در. اسکی زمانده خلق ایکی صنف ایدی :
 بری علوم و صنایع و زراعت اربابی اولوب کندی ایشلرله
 مشغول ایدیلر، دیکری عسکری صنفی یعنی حل عقد امور و ضرب
 و قهر عباد و قح و تسخیر بلاد ایدیلرن عبارت ایدی؛ و حکومت بالطبع
 اللرنده بولنان ایکنجی صنف علوم و معارفدن بی بهره اولدقلرندن امر
 حکومتده یا کلش یا کلش فکرلر کو سترمکده و خلقده بوفکرلره اتباعدن
 بشقه چاره بوله مامقده و الحاصل حکومتلر دائماً جبار و قهار
 و نهاب آدملر النده بولنمقده اولدیغدن نعمت عظمای حریت
 طول مدت مستور و مکتوم و خالق بوندن محروم قالمشیدی.
 صکره لری یعنی بوندن یوز سنه مقدملری علوم و صنایعه مناسبتی
 اولنلرک عددی یواش یواش ارتمغه باشلائیجه بونلر حکومتلری
 اللرینه المغه و علوم و صنایعه و فنونه توفیقاً تنظیه باشلایلر و بو

سایه ده اوروپانك قانون اساسیلری و سائر قانونلری وجوده
كلدی و سیئات ماضیه بر طرف اولدی و حریت دخی كرکی کبی
توسع ایتدی و ایتمکده در . مع هذا حریتك درجه کماله واصل
اولدیغنه هیچ بر وقت حکم اولنه مز .) الحاصل یوقاریده انسانك
طبیعت و ماهیتدن و ماخلق لهندن و مقصدلرندن بحث اولنمشیدی؛
اشته موضوع بحث اولان حریت حقوق هپ بونلر ایچوندر ؛
زیرا انسان حر اولمیدر که طبیعتیه حرکت ایتسون و ماخلق
لهنه و مقاصدینه خدمت ایده بیلسون ؛ اگر حر اولیه حق
اولورسه اشبو مقاصد اصلا حصوله گلز .

§ ۸۴ -) طبیعتیه و مکملتیجه ایکی نوع انسان تصور
اولنور : برینه انسان خیالی *L'homme idéal* و دیگرینه انسان
حسی و تعبیر دیگرله انسان حقیقی *L'homme physique ou*
l'homme réel دنیلور . انسان حسی یا حقیقی انسانك شخصیت
اعتباریه بولندینی حال اوزره بولان آدمدر یعنی خارجه کوردیکمز
زید و عمر و کبی انسانلر در که فضائله درجات اوزره متفاوتدر ،
مثلا کیمی عالم و کیمی جاهل ، کیمی زنکین و کیمی فقیردر . انسان
خیالی انسانك استعدادات طبیعیه سنك مساعد اولدینی مرتبه
هردرلو علوم و فضائل و کمالات ایله متحلی اولمقدن عبارتدر ؛
و بویله انسان خارجه بولنه مز ، فقط بولنسی ممکندر . فضائل
انسانیه غیر متاهیدر ؛ انسان کندنده مرکوز اولان فضائلی بیلوب
اکا کوره حرکت ایتلیدر ؛ انسانك قواسی غیر متاهی بر صورتده

توسع ایدہ بیلور و باخصوص قوۂ روحانیہ سی دہا زیادہ توسعہ
 قابلدر، مثلاً قوۂ حافظہ سی اقتضاسنہ کورہ بر چوق شیلر از برلر
 و بویله جہ توسع ایدر؛ اما قوای جسمانیہ سی محدود اولوب بردر۔
 جہیہ قدر توسع ایدر، مثلاً بر آدم نہایت ایکوز قیہ یوک قالدیرہ۔
 بیلور، زیادہیہ تحمل ایدہ مز و بر درجہیہ قدر یول یورر، اندن
 صکرہ یوریلور قالور؛ لکن قوای روحانیہ اولیہ دکلدر، اوتوسع
 و ترقی ایتدیکجہ توسع و ترقی ایدر انک ایچون بر حد و پایان
 یوقدر، مثلاً انسان کوچکدن باشلیہرق پک چوق علوم و فنون
 و صنایع تحصیل ایدر۔ اشته بزہ حریت ویرلسی بونک توسع
 و ترقی ایتسنہ سعی اولمق ایچوندر۔ بنابرین حریت بو بولندیغمز
 عالم حسیدن عالم خیالی بہ کیمک و اقصابی کمالاتہ واصل اولمق
 ایچوندر یعنی انسان حقیقی اولدقدن صکرہ انسان خیالی اولمق
 ایچوندر؛ بر یردن دیکریرہ کیمک ایچون حریت لازم اولدینی کی
 اشته بوندهدہ حریت لازمدر؛ انسان حراولملی و قوای روحانیہ و جسمانیہ
 نیہ سنی توسیع ایتملیدر؛ اشته حریتک اہمیتی بوندن نشأت ایدر یوقسنہ
 بعض جہلانک ظن ایتدیکی کی حریت بر کیسہ نک ایتدیکی صورتہ
 حظوظات و اغراض نفسانیہ سنی اجرا و انسانیتہ مناسب اولیان امانی
 استیفا ایتمکہ دیمزلر۔ ﴿الحاصل مبدأ حرکتز انسان حسی و سمع
 عزیمتز انسان خیالیدر، اشته ہر عقل صاحبک مقصدی بو
 اولمیدر، بزہ حریت الحق بو مقصدہ کوزلجہ واصل اولمق ایچون

۲۰۹ از مدرسه حقوق و از ۲۰۹

ویرلمشدر، اکر یولده برمانعه تصادف اولنه جق اولورسه اولوقت مقصده وصول ممکن اولمز.

۸۵ — (المانیالی حکیم مشهور قانت kant (۱۷۲۴) —

(۱۸۰۰) جنابلری حریتی «عالم خیالی ایله عالم حسینک نقطه اتحادیدر» دیو تعریف ایتمشدر، یعنی حریت بولندیمنز عالم حقیقی ایله عالم خیالینک ارتباطکاهیدر دیمشدر که بو ایکی عالمک بینی اشبو نقطه حریت ایله برلشوب یکدیکر واصل اولوردیمکدر. واقعا شمدیکی زمانده عالم خیالی یه طوغری خلیجه مسافه قطع ایدلمشدر؛ بوکوردیکمز ترقیات بونک ائاریدر. (مثلا الکتریقلر، تلغرافلر، بخار ماکنهلری و بونلره مماثل خلیجه شیر کشف و اختراع و ایجاد ایدلمشدر. (فقط بو ترقیات حاضره دخی انسانلرک طبیعتده اولان استعدادده نسبتله لاشی مشابه سندهدر، عادتا بونلر ترقیات ابتدائیه حکمنده و عالم خیالی یه نسبتله خطوه اولی دیمکدر، چونکه استعدادات انسانیه غیرمتناهی اولدیغندن دهاپک چوق استفاده اولنه جق شیر واردر، و رای حجاب غیر منکشفده اولان شیر اولقدر چوقدرکه مقدار کثرتی بیله بیلمه من).

۸۶ — (حریت ایکی مقصد اوزرینه اوله بیلور: بری

منافع ذاتیه حریتی و دیکری منافع انسانیه حریتیدر. منافع ذاتیه حریتندن مقصد هرفردک کندی ذاتیدر، بشقه مقصد یوقدر، یعنی هرفرده مخصوص اولان فوائد، تلذذات، حظوظات،

سعادت حال و الحاصل هر در لو مقاصد شخصیه در؛ یالکز بو حریتی
 نظر اعتباره الان آدم یالکز ذاتنک منفعتی دوشنور، کندینه
 عائد مضریدن قچار، ابنای جنسنی و حتی اولاد و عیالی کورمز،
 کندینی هیئت اجتماعیه نك بر آلت مخصوصه سی عد ایتوب بتون
 مساعینک مرکزی و بونلردن مقصد کندینک ذاتیدر ظن ایدر؛
 بو اعتقاده بولنان ادم کندیسيله هیئت اجتماعیه بیننده اولان منا.
 سبات قویه و روابط متینه یی انکار ایتش اولور؛ ﴿ مثلا کندیسی
 زنکین اولورسه هیئت اجتماعیه ده زنکین اوله جغنی یلنز و ﴿ بو
 رابطه که هیئتک بقا و سعادتنه سبیدر، بونی کندی حریتنه القا
 اولنش بر مانعه عد ایدر. اشته او یله آدمک نظرنده حکومتک
 هر بر شعبه سی کندیسی ایچون بر مصیتدر: مثلا عسکر اولق،
 محکمه یه اطاعت ایتک، ویرکو ویرمک و تکلیفات سائره یی قبول
 ایلک استغز، بونلری کندی حقنده مضر عد ایدر؛ حکومتک
 اوامرینی استخفاف ایتک استر و یلنز که عادل بر حکومت هیئتک
 سعادت و سلامتی ایچون تشکیل اولنمشدر. بو مقوله آدملر حریت
 حقیقه یی اکلاما مشلردر. بونلر دیرلر که « بو حکومتک اوامردن
 قور تلیق ممکن دکلدر! فقط ممکن مرتبه بو اوامری حیل و خدعه
 ایله تخفیف ایتلیدر! » نه فنا افکار!! چونکه حکومت عاقله نك
 موضوعاتی حقمزده محض خیردر؛ انسان کندینی هیئت اجتماعیه نك
 برالتی فرض ایتلیدر، عادتا ساعتک برالتی کبی اولملیدر؛ ﴿ بوراده
 مقصد ساعتک ایشلسیدز، اگر یالکز کندی منفعتی دوشونه جک

اولورسه هم هیئت مجموعه بوزیلور و همد کندی مضرت کورر؛
انکچون بو رابطه یی کنسینک سبب بقا و سلامتی بیلیدر .

۸۷ - هر فرد حریتدن کندی درجه تریه و ادراکی

نسبتده استفاده ایده بیلور. مثلاً صبی و معتوه کی آدم لره کمال حریت

و یریله جک اولور ایسه تریه و ادراک لری مفقود و یا خود ناقص

اولدینی ایچون کندولرینه و یریلان حریتی سوء استعمال ایدر لر؛

جاهل ادم لر دخی بویله در. بناء علیه حریت تریه و ادراک توسع

ایتدجکه توسیع قلملی و اول امرده تریه یه متعلق علوم و معارفی

خلقه تعلیم و تعمیم ایتلیدر. حکومتلر پدر مشفق مقامنده اولوب

هیئت اجتماعیه افرادی چو جق مثابه سنده در؛ انکچون حکومتلر

مکتبلر کشادیه خالق تعلیم و تریه یه سعی و غیرت ایتلیدر، تریه دیده

اولنلری اعزاز و اکرام ایدوب مخالفت ایدنلری تأدیب ایتلیدر.

الحاصل حکومت بر پدر مشفق مثابه سنده اولمی و بو حریتک

اقسامنی هر کسه اکلاتلی و عمومک منفعتی بونده اولدینی

کوسترملی و صکره بوکا مغایر حرکت ایدنلری تأدیب ایتلی یعنی

بر عاقل پدر حریتی بیلان ولدینه قارشو نصل حرکت ایدر

ایسه حکومتده اهالی یه قارشو اولوجهله معامله ده بولمیلیدر. بوده

حکومتک اهالیدن زیاده معلوماتلی اولدینی صورتده در. حالبوکه

دائماً حکومتلر تریه جه اهالینک فوقنده دکلدر. بعض یرلرده

حکومتله اهالی بر درجه ده در ، پروسیاده اولدینی کبی و بعض

یرلرده حکومت دهاعالیدر ، روسیه ده اولدینی کبی و بعض یرلرده

دخی جهالتجه ایکیسی دخی بردر، ایرانده اولدینی کبی. حکومت اهلیدن زیاده معلوماتلی ایسنه اولوقت ترقی ایدیله بیلور؛ فقط بونلر یعنی حکومتله اهالی دائماً اللرندن کلدیکی قدر برلشمکه یعنی یکدیگرینه بکزه مکّه یعنی ایکیسی بر نقطهیه اجتماع ایشمکه غیرت ایدوب چالیشورلر، چونکه بونلرک یکدیگرینه تأثیری اولدیغندن یا حکومت غلبه ایدرک اهالی بی کندینه بکزه در و یا خود اهالی غلبه ایدرک حکومتی کندینه بکزه در. (یعنی بونلر یکدیگرینه متصل اولوبده اورته لرنده اچیلور قپو اولان اوطه لر کیدرکه قپوی اچجه صیحاقلق و صغو قلقجه مساوی اولورلر.) حریت هر درلو ترقیاتک منبعیدر دنیلشیدی. بناء علیه ترقیات مادیه و مغنویه یی استحصاله سعی ایتلیدر؛ بو حریتدن کرکی کبی استفاده ایچون انسانلر کندی تربیه عمومی لرینه اعتنا ایتلیدرلر، زیرا تربیه سز اولان بر فرد و یا جمعیتک حرکتی مضر اوله بیلور. انسانلر هم عاقل و هم کامل و همده حرا و ملیدر، انسانلر حقنده خیرلو اولان بودر. (مثلا تربیه سز و معلوماتسز اولان بر شخص بر مأموریه تعین و کندوسنه امور مأموره سنک اجرایی ایچون حریت اعطا اولنسه اول شخصک حرکاتی نظام و انتظامسز و حقسنز اولور و بوندن عموم متضرر اوله رق بو خصوصاً جمله حقنده شر اولور، فقط مکتب و تربیه کورمش و علم اوکرنمش بر ذات بر مأموریه تعین اولنسه حرکات و معاملاتنی احکام قانونیه و حکمت حقوقه تطبیق و قواعد عدل و حقانیه توفیق ایدرک امور

مأموره سنی حسن صورت له ایفا ایدہ جکندن دولت و افراد جہ فائدہ سی کوریلور و بو خصوص عموم حقندہ خیر اولور.

۸۸ — ﴿حریت حد ذاتندہ بر﴾ یعنی بر منبعدن ظهور ایدر ایسہدہ انسانک مقاصد مختلفہ سنہ کورہ تعدد و تنوع ایدہ بیلور کہ باشلوجہ لری حریت مذہبیہ، حریت ادبیہ و یا حریت اخلاق، حریت عقلیہ و یا حریت علمیہ، حریت صنایع، حریت تجاریہ، حریت شخصیہ و حریت سیاسیہ در.

۸۹ — ﴿حریت مذہبیہ La liberté religieuse﴾ وجدان انسانیک جناب حق ایلہ مناسبتی محافظہ ایدر؛ یعنی ہر بر فردک کندی علم و تربیہ سنہ کورہ جناب واجب الوجود حقندہ پیدا ایش اولدینی فکر مخصوصنہ مداخلہ اولنما لیدر، مداخلہ اولنورسہ حریت مذہبیہ اخلاص ایدلش اولور. ﴿مداخلہ اولدینی وقت مداخلہ ایدنہ اولا «بونک سکا تعلق ولزومی یوقدر» و ثانیاً «بوفکری بنم وجدانمہ بن قومدم، اوکندولکندن اورادہ پیدا اولدی» دیو جواب ویریلور. ﴿راہب مشہور لوتر Luther (۱۴۸۳—۱۵۴۶)﴾ «وجدانہ جناب حق منفرداً حکم ایتک ایستر» دیر ایدی، یعنی وجدانک حاکمیتی جناب حقہ منحصر اولوب اورایہ بشقہ سی قاریشہ مز. ﴿حتی وجدانک صاحبی اولان شخص راضی اولسہ بیلہ مداخلہ ایدیلہ مز. ﴿بوحریت مذہبیہ تجویز اولنمیویدہ سلب ایدیلہ جک اولسہ ملل مختلفہ دن ہر بری دیگر لرینہ خالق تعالیٰ حقندہ کی فکر لرینک خطا

اولدیغی اخطار ایتک و انلری اقناعه چالشیق لازمکله جکندن
 بونک نتیجه سی اوله رق بین الملل منازعات ابدیه و منافرت عظیمه
 محدث و تکنون و دنیاده بیوک بیوک فتنه لر ظهور ایدر ایدی .
 بونک ایوسی هر کسی کندی وجدانه بر اقمقدر . (هیچ
 بر حکومت انسانیه وجدانده حکومت ایتک واوراده کندی نه
 اطاعت ایتدیرمک ایتک قیام ایتاملیدر ؛ دنیاده کوریلان
 حکومتلر حکومت جسمانیه اولوب قواعد عدالته توفیقاً جسمه
 حکومت ایدرلر . حکومت روحانیه بشقه در ، بوالله عائددر .
 اما خرسیتانلرده اولان حکومت روحانیه حکومت دینی دیمک
 اولدیغدن امور مذهبییه رؤیت ایدرلر .) کرك حکومت
 جسمانیه و کرك حکومت روحانیه یعنی دینی جناب حقه عائد
 و منحصر اولان حکومت روحانییه مداخله ایدمزلر . (بو
 حریت مذهبییه طلب ایدن بر فرد و یا هیئت بونک تبرع
 و مساعده اوله رق و یا مسامحه و اغماض عین طریقیله ویرلمسی
 طلب ایتیوب بونی حق اوله رق و برحقه استناد ایدرک طلب
 ایدر . استناد اولنان حقه مساوات حقیدر .) بر کره مساوات
 حتی تسلیم ایدلیکی کی انک نتیجه طبعیه سی اوله رق حریت
 مذهبییه میدان چیقار : مثلاً بر محوسی بر یهودیه « سن
 یهودی کی اعتقاد ایته محوسی کی اعتقاد ایت » دیدکده یهودی
 « بوبنم المده دیکدر ، فقط بن سنک مذهبکه تجاوز ایتدیکم کی سنده
 بنم مذهبه تجاوز ایتاملیسین ، زیرا ییغزده مساوات واردیر »

دیو جواب ویره بیلورکه بونک تیجه سی اوله رق حریت مذهیه
 دخی ظهوره کلور . ﴿ حریت مذهیه ده بودیدیکمز شیلرک
 خارجه اثری کورنما مکه مشروطدر ، مثلاً حکما عندندہ مسلم
 اولان قواعدی اخلاص ایدر صورتده بر مذهب باطل احداثه
 چالیشان اولور ایسه منع ایدیلور . ﴾ یعنی حریت مذهیه
 اصلاً مداخله اولنه مز ، هرکس دیلدیکی کبی اجرای آیین ایدر ،
 مکرکه مغایر اداب عمومیه اولور و یا بین الحکما مرعی و مسلم
 اولان قواعدی اخلاص ایدر و یا خود خارجه جبر و شدت کبی اثری
 کوریلور ایسه اولوقت تصدی ایدنلر زجر و منع اولنق لازمدر .
 ﴿ فقط طاتمش هیئتله یعنی ادیان و مذاهب قدیمیه برشی دینه مز . ﴾
 حریت مذهیه اصولی الیوم ممالک متمدنه نک کافه سنده طاتمش
 وقواعدینه رعایت اولنقه در . مع هذا علمای حقوق بونک
 بر قاندها تأکدی ایچون بین الدول بر معاهده عمومیه ربط
 اولنسنی ارزو ایدیورلر .

§ ۹۰ - ﴿ حریت اخلاق La liberté morale اخلاقه

متعلق حرکاتده هرکسک حر اولسیدر . ﴾ بوده طبق حریت
 مذهیه کیدر ، چونکه اخلاق انسانک داخلی افعاله متعلقدر .
 واقعا بونک وجودی واردر ، لکن خارجه کورنمز . ﴿ اخلاقه
 متعلق حرکات دخی طبق حریت مذهیه کبی خارجه سوء
 اثری کورلدکجه محفوظ و مداخله دن مصون اولمیدر . اما
 برینک سوء خلقنک خارجه اثری کوریلورسه منع اولنور . ﴾

یعنی اخلاقہ متعلق حرکات خارجہ سوء تأثری کورلمدکجہ
 کمسنہ یہ ضرر کمدکجہ ہر درلو مداخلہ واعتراضدن مصون ومحفوظ
 اولمیدر : مثلاً بد اخلاق اولان برادمک اخلاقہ مداخلہ
 اولنہ مز ، مکرکہ سوء خلقنک خارجہ بر اثری کوریلہ . کذلک
 فرضاً جسارت یا سخاوت حقنہ برادمک بر فکری اولسہ
 بوندن طولای « سن نیچون بوفکرده بولنیورسین » دیومؤاخذہ
 اولنہ ماز . الحاصل حریت اخلاق همان حریت مذہبیہ یقین
 برشیدر . انسان حریت مذہبیہ جہ عندالله مقبول ویا مسئول
 اولہ جنی کی حریت اخلاقہ دخی کندوسیله ابنای جنسی نظرندہ
 مقبول ویا مسئول اولور . بونک حکمی وجدانده قالمیدر ؛
 یعنی اثری خارجہ چیتمالمیدر ، چیقارسہ قواعد حقوقہ داخل
 اولور . بنی نوعنہ ایولک ایدن ابنای جنسی وجدانده محاکمہ
 وحسن ایلہ معاملہ اولنور : برآدمک حسن اخلاقی اولورسہ
 قلوبده محتلی اولور ، خلقانی سوروبالعکس سوء اخلاق ایلہ متصف
 اولورسہ خلق نظرندہ مقدوح ومذموم اولور . اشته انک حقنہ
 بومکافات کافی وبوقدر مجازات وافیدر . خلاصہ کلام انسان
 مذہبیہ نصل حر اولمق لازم ایسہ اخلاقہ دخی اولیلہ جہ حر
 اولمیدر .

§ ۹۱ — (حریت عقلیہ علوم وصنایع La liberté

intellectuelle dans les sciences, les arts et l'instruction

یعنی علوم وصنایعده کی حریت عقلیہ ہر درلو علوم ومعارف

و صنايعك توسع و انتشارينك منع و تضيقدن محفوظ قالمسيدر .
 اشبو حریت عقله منسوبیتی جهته حریت عقلیه نامنی الدینی کی
 متعلق اولدینی مواد باشلوجه علوم و معارف اولدینی ایچون
 « حریت علیه » ایله دخی توسیم اولنه ییلور . (علوم و صناعی
 غیر مشروع برطاقم قیود ایله تقید بوحریتی سالدیر .) مثلاً
 برینك محو یا منطق تعلم و یا تعلیم ایتسنی و یا خود برصنعت
 مشروعه ایشلسنی بوراده تعلم و یا تعلیم ایت و یا ایشله و یا خود
 شوقدر رسم و یرده بونکله مشغول اولدیمك کی برصورتله تضیق
 و یا خود بسبتون منع ایتك بوحریتی سلب ایلکدر . (علوم
 و صناع سعادت و سلامت انسانیه نك منبعیدر .) خلقك بو
 حریتی سلب ایتماك سعادت و سلامت نك نبعان ایتدیکی برمنع
 جلیلی خلقك استفاده سینه قارشو آچیق براققدر ، بالعکس
 « بوحریت عقلیه یی منع و تضیق ایتك اومبعی قاتمق دیمکدر . »
 اکر بومنع سد و تضیق اولنه جق اولورسه سلامت و سعادت
 انسانیه اوکنه برسد چکلمش اولورکه تقدیر حقسنزلقدر .
 « شوقدر وارکه بودیدیکمز علوم و صناع » عند الحکما « معقول
 و مشروع اولان علوم و صناعیدر . » یوقسه عقل و شرعه
 و آداب و اسایشه مغایر و منافی اوله رق برعلم و یا صنعت نشر
 واجرا اولنه جق اولورسه درحال منع وزجر اولنور . (موسیو
 کیزو M. Guizot (۱۷۸۷-۱۸۷۵)) که عصر مزده فرانسه ده
 مشهور دولت ادمی homme d'État و مورخ اولوب وقت

بولدقجه مثلاً وکلا لقدن انفصال ایتدکجه سوربون Sorbon نام
 مکتب عالیده تدریس علوم عالیہ ایدرک انکلتزه کی ممالک متجاورہ
 اجنبیہ فضلاسندن برچوغنه وارنجیه قدر درس لرینی استماع
 ایتدیرر ایدی ، لواج Mémoires نام اثرینک جلد ثانیسنک ۶۵ نجی
 صحیفه سنده ﴿ فکر علوم فکر صنایع کی حر ووقور برقوتدرکه
 کندینک ناموسنه وحریتنه رعایت اولندیغنی کوردیکی وقت
 خزانانی صداقت وفدا کارلقله نشر ایدر ﴾ دیمشدر ﴿ وبالعکس
 بونلره رعایت اولنمز ایسه علوم وصنایع فکرلری کندیلرنده
 اولان لایتناهی سعادت ونعمت خزینهلرینک قولرینی رعایت
 ایتیانلره قارشو قبالی طوتهجنی آشکاردر . ﴿ علوم وصنایع
 حریتنه خلل کتورمک حقیقته خلل کتورمک ونور حقیقت ایله انسانلر
 بیننده برسد چکمکدر ﴾ وانسانلری هر درلور نعم دنیویه و اخرویہ دن محروم
 قیلقدیمکدر . ﴿ انسان دائماً حقیقتی کشف وادراک ایتمک املنده بولنق
 خاصه سنه مالک اولدیغنه و بوکشف ادراک ایسه احتیاجات روحا .
 نیه مزى دفع وتسکین ایلدیکنه نظراً حریت عقلیه یی سلب ایتمک ﴾
 وبوحریت حقبنده خلقه مساعده ایتماک ﴿ بو احتیاجاتی ﴾ یعنی
 انسانک بالطبع محتاج اولدیغنی شیلری ﴿ نزع ایتمک و خلاف
 طبیعت انسانیه بر حال میدانه کتورمکدر . اشبو حریت عقلیه
 تقدر منع وتضییق و تحدید اولنور ایسه اولنسون مادامکه
 مقتضای طبیعت انسانیه در و مادامکه برحقدر ﴿ الحق یعلو ولا یعلی
 علیه فحوا سنجه ﴾ برکون اولور ظهور ایدر ﴾ وانسانلر انی ار

کچ ارايوب بولمغه و تروپچ ايدوب ميدانه چيقارمغه چاليشورلر
 و همده موفق اولورلر (شو قدرکه برمدت تاخير اولمش)
 و خلق اومتد ظرفنده ازعاج و اندن محروم ايدلش (اولور .
 واقعا بو حریت عقلیه بعضاً سوء استعمال اولنق محتملدر ؛ لکن
 بوسوء استعمالک منعی ینه حریت ایله اولور ، بشقه چاره سی
 یوقدر ،) زیرا سوء استعمال حقیقت حریتی اکلایا مقیدن نشأت
 ایتش دیمکدر ، (حقیقت حالی اکلایانلره ینه حریت معارف
 واسطه سیله اکلایانجه خطا ایتدکلرینی بیلورلر و سوء استعمالدن
 صرف نظر ایدرلر : مثلاً بعض آدملر کیمیا جلیق (التون و کموش
 یا بمق فکر باطلی) و سحر لوق و حرکت دائمه و علوم نجومیه
 (خواص و تأثیرات مغویه نجومیه) کبی واهی و باطل شیلره
 قیام و سعی ایدرلر ، بونلری علی حالهم براقیلیدر) یعنی منع
 و تضییق جائز دکلدرد ، چونکه حریت عقلیه بویله ایجاب ایدر ،
 (اما ینه بو حریت عقلیه دن استفاده ایدنلر جرح ایدرلر و انلرک
 دعوالرینک بطلانی) غزته و کتابلر و سائر وسائط علمیه ایله
 (میدان قورلر و اول آدملرده حقیقت حالی اکلایا قیلری کبی او
 باطل فکر و ذهانی ترک ایدرلر .) شاید حریت اولیوبده کیمیا .
 جیلر و بیوجیلر علیهنده برشی یازیله من ایسه حکومت تقدر منع
 و تضییق ایتسه و بو بابده تقدر شدت کو سترسه فائده سی اولیوب
 بو عاتلرله معلول اولنلر کوشه ده بو جاقده اوغراشتمقدن خالی
 قالمزلر .

۹۲ —) حریت صنایع La liberté industrielle

زمان نزده بالجملة ممالك متمدنه مقبول و مسلم اولق درجه سنه
كلشدر .) واقعا رخصت و اذنسز طبابت ايدلسون كې بعض
قيود و شروط وار ايسهده هر كس صنعتی اجراده حردر ،
شايد ياديني شی فنا ايسه بكنيانلر المسون دينور ، حریت مذهبيهده
خالقه براغلدينی كې بوندهده مشتزيرك تقدیرینه براغلشدر .
) حریت تجارت La liberté commerciale دخی بوقيلندردر ،
ليكن صنایع قدر سربست اوله مامشدر .) از جمله نرخ قويمق اصولی
تجارته مداخله ايتك و حریت تجارت طوقنقدر .

۹۳ —) علی العموم صنایع بعضا اوچ قيسه تقسيم اولنور:
برنجیسی فلاحه ، ايكنجیسی صناعه ، اوچنجیسی تجارتدر . فلاحه
اشیای طبیعی خالنده اله كچورمك ، صناعه انلری ايشمزده) ده
زياده) يرايه حق حاله قويمق ، تجارت كرك خام و كرك معمول
اشیای برای تمتع الوب صاتمق در ؛ صنعت دينلجه بونك اوچيده
داخلدر .) یعنی فلاحه خام اشیا وجوده كتورمكدردر ؛ حیوانات
میدانه كتورمك ، اغاج و میوه يتشديرمك و بالق طومتق كې كه
خالقك يرايدینی اشیای مهمما امكن استفاده ايديله جك بر حاله
قويمقدن عبارتدر ؛ صناعه خام اشیانك شكلی دكشديرمك
یعنی محصول فلاحی ايشمزده دهها زياده يرايه حق حاله و هیئته
قويمقدر ، مثلا قومی جام و پمونی ايلك و بز هیئته ارجاع كې ؛
تجارت كرك خام و كرك مصنوع اشیای تمتع قصديه اوجوز زمان

یا مکانده الوب بهالی زمان یا مکانده صاتمقدر ، خام اشیا وجوده
کتورمک صناعت صایلز ایسه ده خام اشیا نك شکنی تبدیل ایتک
یعنی صناعت بعضا تجارتدن معدود اولور ، فابریقه جیلر
وسرمایه لری امکله رینه منحصر اولیان بیوک درزیرک تجارتلری
کبی ؛ موضوع بحث اولان حریت صنایع لفظی حریت فلاح
و حریت صناعت و حریت تجارتی شاملدر . ﴿ حریت صنایع
ایسه بو اوچنی کمال سربستی ایله یا مقدر . اصل صنایع (یعنی
فلاح و صناعت) نافع ومع مافیه تجارت دخی بونلرک محصوللرینک
تداولنه سبب اولمقله بوده اندن ﴿ یعنی اصل صنایعدن ﴿ اشاغی
قالز . ﴿ یعنی فلاح خام اشیا یی وجوده کتوردیکنه و صناعت
اول اشیا یی دها زیاده استفاده اولنه حق هیته قوید یغنه نظراً
تجارت بونلر قدر مهم دکدر ظن اولور ؛ حالوکه تجارتده
همان بلا فرق انلر قدر مهمدر ، چونکه هوا و قوه انباتیه
و سائر نك مخالفتی حسیله بر مملکتده چقان اشیا دیکر مملکتده
چیمدیغندن و حسب التمدن بولندیغنی مملکتده چیقسون و چیمسون
انسان هر نوع اشیا یه محتاج بولندیغندن تجارت اولیوبده
بر مملکتده حاصل اولان اشیا خارجه چیقارلیه حق یعنی حاصل
اولیان مملکتده کتورلیه جک اولسه اشیا نك حاصل اولدیغنی مملکت اهالیسی
محصوللرینی صاهر ق مستفید اوله میه جنی کبی اول اشیا نك
حاصل اولدیغنی مملکت خلقی دخی انلری تدارک ایدهمیه رک
ضرورت وسفالتده قالور : مثلاً بزده حاصل اولان پموق

وبویا کی شیلر ممالک اجنبیہ کتسه واورالردہ چیقان شکر وغاز
 کی اشیا ممالک عثمانیہ کلسه ایکی طرف اہالیسیدہ محصوللرینی
 صاتمق وحوایج مدنیہلرینی تدارک ایدہمامک ایکی باشلی
 ضرورت و احتیاج ایچندہ قالورلر. ﴿ بنابرین حریت تجارت
 دخی الزمدر. ﴾ یعنی تاجار حروبعض احوالده ممتاز اولمیدرلر؛
 اگر حریت تجارت اولمز و تاجار حر بولنمز ایسه برتفصیل بالا
 اهل فلاح و اهل صناعت مغدور و متضرر اولور ، برطاقم
 نقلیات کیرو قاله جفندن پک چوق شیلردن محروم اولورز ،
 تجارت سایه سنده بتون دنیانک هرجهتده وجوده کلان
 و مصنوع اولان شیلره نائل اولورز ، تجارت مبادلہ محصولاتک
 واسطہ مستقله و منفردہ سی کیدر ، بومبادلہ اولیه حق و یاخود
 منع اولنه حق اولسه هرکس کندی محصولیه تعیش ایتک لازم
 کلورکه اصلا قابل اوله مز ، برملکت انسانک هردرلو حوایج
 ولوازمی وجوده کتوره مز ، بونلرک بعضیلری بریرده
 و بعضیلری دخی دیگر محله حصوله کلور ، تاجار بونلری نقل
 و ایصال ایتیه جک اولسه هرکس متضرر اولور. ﴿ الحاصل حریت تجارتک
 ایکی درلو فائده سی واردر: برنجیسی مبادلہ نک کثرتی و ایکنجیسی زیاده
 محصول چیقارمق خصوصلریدر. ﴾ برنجی فائده یعنی کثرت مبادلہ
 نصل اوله جنی تفصیلات مسروده دن مستفاد اولور؛ ایکنجیسی دخی شو
 وجهله درکه حریت تجارت اولیه حق یعنی مبادلہ عادتاً منع ایدیله جک
 اولسه هرکس کندی حوایجندن زیاده محصول چیقارمیه جنی

و صنعتی کنندینه لزومندن زیاده ایشلیه جکی و بین الافراد تعاون و تناصر قالمیه جنی و بنابرین ترقیات مطلوبه حاصل اولمیه جنی و حتی جمعیت بیله باقی قالمیه جنی کی هر درلو محصولات فلاحه و صناعت تقدیر حریتله مبادله اولنور و حتی ممالک سائریه تقدیر زیاده نقل ایدیلور ایسه اولقدر محصولاتک زیاده چیقاریلوب حصوله کلسنه سبب اولور . ﴿ عوام مستهلکین اخراجاتک قدرینی تقدیر ایده مز. ﴾ یعنی عوامدن مستهلکیر یعنی بر مملکتده چیقان محصولاتکی اوراده صرف واستهلاك ایدنلرک عوام طاقی بونک قدر و مزیتکی اکلامازلر و بنابرین تجارتدن و خصوصا بونلرک اخراجاتندن خشنود اولزلر ؛ از جمله مصرلی محمد علی پاشا قواله لی اولمق مناسبتیه آخر عمرنده بالذات اورایه کیدرک همشهریلرینه اکرام ایتدیکی مثلورده لیان یایمق ایستینجه بلده نك ایلرو کلنلری یعنی خیر و شری فارق اولیان عوام مستهلکین لیان اولور ایسه تجارت کلور ، محصولزی آلور کیدر ، بهالیق اولور کی باطل سوز و فکرلر سرد و بیانیله بوندن صرف نظر ایتمسنی عادتاً رجا واسترحام ایتملریله مرحوم مشارالیه دخی لیانک وجوهله و خصوصا اخراجاتک تکثرینه بادی اولمسی جهتیه فوائد عظیمه سی اوله جغنی بیلدیکی حالده اهلینک عدم خشنودیسندن احترازاً یونیت خیردن صرف نظر ایتمشدر ؛ عوامک بوکی شیلردن خوشنایمسی پک یا کلش و پک مضر بر فکردر . ﴿ حالبوکه بو حریت تجارته رعایت ایتمامکده محذور واردر . ﴾ چونکه حریت

فلاحت و حریت صناعت و حریت تجارت علی السویه مهم و شایان حرمتدر .

§ ۹۴ — (حریت خصوصیه La liberté civile هیئت اجتماعیه افرادندن هر فردك بشقه سنه مضر اولیان حرکاتده حر اولسیدر .) یعنی هر فرد غیره مضر اولیان حرکاتی یاپوب یامقامده مختار اولمیدر . (بو حریتك حدودی بشقه سنك حریتك حدودیدر .) بر فرد حرکاتده غیرك حریتته تجاوز ایدہ جك اولورسه تجاوزی مقداری حرکاتندن منع وزجر اولنور .) نته کیم بر آدم ترلاسنده کیف مایشاء تصرف ایدہ ییلور ، لکن قومشوسنك ترلاسنك حدودینی تجاوز ایدہ مز . (بوحریت حریت شخصیہ اولوب برده حقوق حریت سیاسیه واردرکه) بزوجه آتی بیان اولنور:

§ ۹۵ — (حریت سیاسیه La liberté politique بر مملکتك انتخابات و مطبوعات واسطه سیله وقوعبولان سربست مباحثات و اداره نواحی و ولایات و هیئت اجتماعیه و کالت خصوصاته متعلق امور و مصالحك اجراسنه اشتراکده سربست و حر اولمقدردر . بوحریتته حریت خصوصیه و شخصیہ کی هر فرد مالک و متصرف اولیوب الحق هر مملکتده حقوق سیاسیه یعنی حکومته متعلق او مثللو شیلره دائر اولان حقوق اهلایه مالک و متصرف اولنر مالک و متصرفدر لکه مثلا مجلس مبعوثانه اعضا انتخاب ایتك و ایتمك و اعضا اولمق و اولماق و دولت مأموریتده

بولنق و بولنما مقده حر درلر . عسکرلک حقوق سیاسیه دن اولقله برابر برنوع وظیفه یعنی بورج اولدیغدن بونده افراد جمعیت کمال درجه ده حر اوله مز . ﴿ واقعا عسکر اولغه شایان اولان هر فرد کوکلو اوله رق اولسون عسکر اوله بیلور ایسه ده . عسکر اولسی لازم کلان برآم بوندن استنکاف و امتناع ایده مز . ﴾ الحاصل عسکرلکدن ماعدا خصوصاً تده جبر ایتک حریتی اخلال الیکدر ﴿ که جائز اولمز .

۹۶ — ﴿ حریتک اشبو تعداد اولنان اقسامندن بشقه خصوصی برطاقم قسملری دها واردر که انلر بعض صورتلرده اخلال اولنمشلردر ، فقط علماء حقوق نظرنده انلر دخی سربست براغملیدر . بونلردن بری مثلاً برآدم بر محلدن دیگر محله کیده جکی وقت پساپورط و مرور تذکره سی المغه مجبور ایدلسیدر . بواصول حقیقه ایو برشی دکدر ، فائده سی تسلیم اولنمز ، حتی انکلتزه دولتی فائده سی اولدیغنی اکلایه رق لغو ایتمشدر . بونک مضرتی واردر ، از جمله برآدم برایش ضمننده دیگر محله کیده جکی وقت مرور تذکره سی المغه اوغراشور ایسه ایشندن و حتی یولندن کیرو قالورکه بوده برنوع حریتسزک تحتنده بولنق دیمکدر . بواصولک اساساً ایجاد و قبولی مجرمینک فرارلرینه محل بر اقامق ایچوندز ؛ حالبوکه تذکره و پساپورطک جرمک شیوعندن و حتی وقوعندن بیه اولجه تدارکی ممکندر ، تذکره و پساپورط جانی بی نه جرمدن ونده فراردن منعه

کفایت ایتز، کفیل النہرق تذکرہ وپساپورط ویریلیور دنیلورسہ
 کفیلک نہفائدہ سی اولور دنیلہ بیلور، چونکہ مثلاً قاتلک یرینہ
 کفیلی قتل اولنہ من وحتی مواجہۃ کفیلدہ جرم بیلہ اثبات
 وموجبیلہ حکم اولنہ من واجبیہ کفیل النہجق اولسہ بونک
 مقدارینی تعیین یعنی مکفول عنک یامیش اولسی فرض اولنہجق
 ضررلری تخمین ایتک مشکل اولدینی کی بوجہت خلقلک حریتی
 برقاٹدہا تحدید وتضییق ایدر دیو بحق جواب ویریلور. خلاصہ
 بویلہ پساپورط و مرور تذکرہ سی کی شیر عشر؛ بونلرک
 بر درجہ یہ قدر فائدہ سی اولق محتمل اولسہ بیلہ مضر تلری فائدہ
 مأمولہ دن بیک قات زیادہ در. بویلہ اخلال اولنان حریتلردن
 بریدہ اصناف اصولنک اخلال ایتدیکی حریتدر: مثلاً دولکر
 اولان کیسہ تیمورچی اولق استسہ قولایلقلاہ بوصنفہ کچہ من،
 » سن دولکر ایدک شمدی تیمورچی اولق استیورسن ہلہ بقالم
 اصناف کتخداسی راضی اولدیمی، علم و خبر ویردیمی؟ کی
 ازعاجاتہ بولنورلر، حالبوکہ ایکسی دہ صنعتدر، ایکسینیدہ
 یامقدہ کیسہ یہ ضرر یوقدر، بکنیان اول کیسہ بی ایشندہ
 قوللانماق ممکندر. بوکی شیر خلقہ یہودہ یرہ زحمت ویرمکدر.

۹۷ — شمدی یہ قدر انواع و نتائج حسنہ سی بیان

اولنان حریت بر منبعدن صدور ایدر، و بونلر براعاجک داللری
 مثابہ سندہ در وزنجیر کی یکدیگریہ مربوطدر، جملہ سی بر بندہ
 نشو و نما بولور و بویلہ بینلرنده رابطہ قویہ اولدیغندن برینک

قوت بولسی دیکر لر نیده تقویه و برینک ضعف بولسی دیکر لر نیده
 اخلاص ایدر. ﴿ بونلری ترویج ایتک حیات مقصد اصلیسینک
 استحصال و محافظه سی ایچوندر؛ زیرا حریت جناب حق انسانلوه
 احسان ایتدیکی قوای روحانیه و جسمانیه یی ما وضع لهنده استعمال
 ایتمکدر؛ بوکا رعایت اولنر ایسه مقصود اخلاص اولنمش اولور :
 مثلاً بر عسکره تنک، قلیچ، طبانجه ویرلدیکی صورتده بونلری
 ترتیب و اعطا ایدنک مقصدی اوعسکر بونلری ما وضع لهنده
 استعمال ایتمکدر، خلافنده استعمال ایده جک اولورسه اوعسکر
 البته مسئول اولور. ﴿ معلومدرکه انسانک مقصدی حیات و صکره
 وجودینک تمامی ودها صکره جسمانی و روحانی صحی ایدی؛
 ایشته بونلرک هپسی انواع حریتدن استفاده ده متفقددر یعنی
 انواع حریتک جمله سی بو مقاصد انسانیه نک حصولنه مدار اولور؛
 مع مافیه ﴿ یعنی حریتک کافه انواعی حد ذاتنده بر مقصد ایچون
 ایسه ده بونلر یکدیگرینه نسبتله درجه درجه اولوب ﴿ بونلرک
 اک باشلوجه سی واک مهمی حریت عقلیه و تعیر دیکرله حریت
 علیه La liberté intellectuelle در؛ چونکه حریت عقلیه
 اولورسه انسان بونک واسطه سیله نیک و بدی، خیر و شری،
 حق و ناحق، نفع و ضرری بیلوب تفریق ایدر؛ اساس حریت
 عقلیه در، حریت مذهبی و اخلاقی و تجاریه و صناعیه و خصوصیه
 و سیاسیه و سائر بوندن صکره در؛ اگر حریت عقلیه اولمسه ایدی
 انسان دیکر حریتلرک حدود و قواعدینی و حق و باطل و خیر

و شری و سائرہی بیلوب ادراک ایدہ مز ایدی؛ حریت عقلیہ
 ممنوع و مسلوب اولدینی کی انسان کندی مقاصدینہ مالک اولہ مز.
 دہا طوغریسی حریت جناب حق بزہ احسان ایتدیکی قوای
 جسمانیہ و روحانیہی موضوع لہندہ یعنی مقاصد انسانینہک
 استحصالی خصوصندہ استعمال ایتکدر؛ مثلاً برعسکرہ تفنک
 ویرلسندن مقصد انی حین حاجتده استعمال ایتک اولوب بونی
 استعمال ایتہ دیمک معقول برسوز اولیہ جنی کی جناب حق دخی
 انسانی خلق ایتدیکی زمان بقاسنی تأمین ایچون حواس خمسہ کی
 بعض حواس وقوی ویرمشدرکہ بونلری موضوع لہندہ استعمالدن
 منع ایتک ہم انسانک حریتی منع ایتک و ہم یشامہ و یا فنا یشا
 دیمک و بناء علیہ ہم مقاصد انسانینہی اخلال و ہمدہ ارادۃ الہیہ
 مخالف حرکت ایتکدر. کذلک انسان بو حریتی نہ کنیدیسی
 اخلال ونہدہ آخرہ ترک ایدہ بیلور؛ چونکہ بوکا انسان کندی
 کسب یدیہ مالک اولیوب بالعکس جناب حقک برامانت الہیہ سی
 اولہرق متصرف اولدیغندن بونی اخلال و یا آخرہ ترک ایدن
 شخص امانت الہیہ خیانت وخالقنہ عصیان ایتمش اولور. ﴿شو
 اسبابہ مبنی انسان بو حریتلری حسن صورتلہ استعمالہ سعی
 ایتلیدر. بالتدریج استحصال اولنان بو حریتلر انسانک ہم کندی
 و ہمدہ جملہ نظرندہ وقع و قدر و اعتبارنی تزیید و ترفیع ایدر
 و علو قدر و منزلت بونلرہ مالک اولمق نسبتدہ حاصل اولوب
 ترقی ایلر.﴾ حالوکہ انسان حر اولیوبدہ کندی کی دیگر بر

آدمك كولهسی و انك امرینه اطاعت و انقیاده مجبور اولسه و بنابرین حرکات و سکناتنده سرپرست اولسه انك نه کندی نظرند و نه ده خالق غنندده حرکی قدر و اعتباری اواز. ﴿بوحریتلر تدریجا حاصل اولور، اول امرده حریت عقلیه دن باشلار و یواش یواش جمله سی تمامیه میدانه چیقوب اتحاد ایدر و ایلروده بر زمان اولور که هپسی برلکده حرکت ایدر لر و حقیقتلری اکلاشیله رق بونلره کمال کرمی ایله رعایت اولنور و اولوقت مقاصد انسانیه ده اسهولتله استحصال اولنور.﴾

۹۸ — ﴿حریتك تاریخنه و مدار انتشارینه کلنجه :

بوحریتك ماهیت و حقیقتی و اهمیتنی و غایتی بیلک سائر حقیقتلر مثللو تدریجی اوله رق ظهور ایتشد. ﴿اگر حریتی مادیاتدن برشیئه تشبیه ایتک لازم کلسه ضایه تشبیه اولنه بیلور؛ وجه شبه ایسه کونش طوغنجه اك یوکسك محالری و وقت زوالده دخی اك الحق یرلری تنویر ایتدیکی کبی حریتده اولاه خواصه و صکره عوامه سرايته باشلر اولسی خصوصیدر. ﴿هپ بوحق حریت و مساوات دول متمدنده مرعی و حتی قوانین اساسیه ده مندرجدر. موضوع بحثمز اولان بوحق حریت حریتك حصولی، توسعی، انتشاری، محافظه سی و اجرایی فصل اولور بونی کوسترر، حق حریت بودر. بونك محصل و توسع و انتشاری اسبابك و بونی سوء استعمالدن محافظه ایچون قوانین ایله وضع اولنه جق حدودك ندن عبارت اولدیغی اکلاشلیلدر. اشته شمدی بورالرینی تحقیق ایدم:

بوحریتک تحصیل و توسعک و انتشارینک اسبابی ندر؟ و بو حریتی
 سوء استعمالدن محافظه ایچون قوانین ایله وضع اولنه حق حدود
 ندر؟ عوام ناس لفظه الدانورلر، حقیقتی بیلزلر، اشته بوجهلاک
 مضراتبخشاسی اوله رق حریت دیو هر نه کیوستریلور ایسه
 انی تلقیه مسارعت ایدرلر. ﴿ برشیئی تحصیل و محافظه
 و مقتضاسنی اجرا ایتک اولا انک ندن عبارت اولدینی و فضل
 و مزیتی و درجه لزوم و اهمیتی بیلکه متوقفدر، بورالری بیلگیه جک
 اولورسه نظر اهمیته اصلا النحر؛ بر آدم برشیئی ذاتا ووصفا
 بیلز ایسه کندنده اوشیئه محبت و مناسبت حاصل اولزکه انی قبول
 و استحصاله و حقوقه رعایت مجبور اولسون! بناء علیه اول امرده
 بوحریتک حقیقتی بیلسانلره اوکرتمک و بیلسنی ایستیوبده
 و سائطی مفقود اولنلره معاونت ایتک لازمدر. ﴿ بوحریتک
 توسع و انتشاری تربیه عمومییه متوقفدر. ﴿ یعنی حریتک
 حقیقتی درک وانی طلب و اجرا ایتک تربیه عمومییه ایله حاصل
 اولور. ﴿ چونکه بر آدم برشیه الفت وانی التزام ایتک ایچون
 اوشیئی طانیق لازمدر، بوا یسه تربیه عمومییه نك مجبوری،
 طو تلسیله حصوله کلور. ﴿ تربیه عمومییه استحصالنک اسبابی
 تسهیل ایدنلش اولمق ایچون بونی مجبوری و مجانا یا بمشلردر. ﴿
 اشته بو تربیه عمومییه بعض مملکتلرده هم مجبوری و همد مجانادر،
 چونکه تربیه اغیا حقنده مجبوری اولدینی کی فقرا حقنده
 دخی مجبوری طو تلق ایچون مجانا اولمق لازم کلور. ﴿ بزم قانوننده

وار ایسه ده هنوز تمامیه مرعی دکادر . بو مجبوریتده مکاتب ابتدائیه حقنده در .) واقعا مکاتب ابتدائیه حقنده مجبوری اولیدر که هر کس ابتدا حریتک ندن عبارت اولدیفنی انکلاسون و صکره کندی کندینه ترقی و توسیعه چالشسون ؛ بو حریتی بیلیانلر افکار باطله یه ذاهب اولورلر ؛ بعضیلری حقیقی بیلدکلر ندن و بعضیلریده بیلوبده سوء اخلاقه مظهر اولدکلر ندن بیلیانلری اغفال ایدرلر ؛ اشته تربیه عمومیله بوکی احوالک اوکی النور . حقیقه معارف ابتدائیه نك بر درجه یه قدر سالب حریت اولدیفنی کورینور ایسه ده بوسلب حریت کیفیتی موقت اولوب مؤخرًا حریتک کرکی کبی تعمم واستعمالنه واسطه منفرده اولدیفندن پک ایو شیر .) الحاصل دیمککه حریتک منبی عالیی تربیه عمومیله در .)

§ ۹۹ -) بو حریتک حدودینه عطف نظر اولنجه بوبابده بر قاج درلو حدود وضع اولنه بیلور . بر کره شویله دنیله بیلور : حریت بر شخصک حیاتنک وصحتک و ناموسنک منافع عمومیله سیله محدوددر ؛ هر بر حرکتکه بونک ضمنده بومذکور اتانک محافظه سی اوله انسان انده حر در) یعنی انسان حیات وصحت و ناموسنک تحتده اولان شیرک محافظه سیچون حرکات و سکناتنده حر در) چونکه بونلر بر صلاحیت منبی اخلال اولنه مز) یعنی هیچ بروقنده و هیچ بر صورتله اخلال اولنه مز .) اشته حریت بومهم مقصدلرک حصولی ایچون الزمدر .) بر آدم حیات وصحت و شخصیتک منافی ایچون حر در ، جناب حقک انسانی خلق

ایتمسبه برابر اولبابده وضع ایتمدیکی قواعدہ نظرا انسانک حیات و تمامیت و صحتی مطلوب الہی اولدینی اکلاشلدیغندن بونلردن برینی محوایدن ویا اخلالہ تصدی ایلان شخص یالکز انسانہ ضرر ایتمکله وحریتہ طوقتمکله قالمیوب اللہہ قارشوده عصیان ایتمش اولور . اشته انسان بوحریتی بومقاصدک محافظہ سیچون استر و برشیکه بونلره مضراوله مذموم اولور. ﴿حریتک لوازمندن بریده حق مساواتدر ، حکومت بوکارایت ایتملیدر ؛ حکومت افراددن برینه امتیاز اعطا و مساعده ایدوبده دیکرینه ایتمزایسه بونک حریتی سلب و قواعد حریتہ منافی حرکت ایتمش اولور . بعض شیرل واردرکه انلرده اساس حریت محافظہ ایدمک ایچون بعض افرادک حریتی سلب ایدیلور ؛ بوچال صورتا سلب حریت ایسهده حقیقتده ﴾ سلب حریت اولمیوب عادتا ﴿حریتدر : مثلاً چوجق سن رشده وصولته و مجنون افاقتنه قدر مال و ملکلرینی تصرفدن و طیب جاهل اجرای طبابتدن منع اولنسی کبی ، بوکبی قیود و قواعد استثنائیه ب منافع عمومیه ملاحظه سیله ﴾ وحریتی محفظه ایچون ﴿موضوعدر . بوحریت دینلان شی تلفظندن حسن تأثیر﴾ واستماعندن تلذذ ﴿حاصل اولسون ایچون عقلانک ایجادی اولمیوب بقای شخصی ونوعیمز ایچون جناب حقک وضع ایتمدیکی قواعددن استنباط اولنمشدر .﴾

فصل ثامن

حقوق معاونت بیاننده در

§ ۱۰۰ — (انسانك حائر اولديني حقوقدن بريده حق معاونت) و تعبير ديكرله حق تعاون (Le droit de l'assistance در.) حتی و تعاونوا على البر والتقوى نظم جليلی بونی مؤید در .
 (حق معاونت هیئت اجتماعیه افرادی بیننده تعاون اولمق و بونلر یکدیگره معاونت ایتک حتمیدر.) مجله نك تابرنجی ماده سنه درج قلنان بو حق کمال وضوحنه بناء بزم قانون اساسیده صراحة ذکر اولغامش ایسه ده مجله ده عطف تفسیر صورتنده تعاون اشتراك و معاونت مشارکت ایله ایضاح قلندینی مثللو قانون اساسیده دخی بو حق حقوق شرکت جمله سندن عد اولتمش و ۱۳نجی ماده سنده «تبعه عثمانیه نظام و قانون دائره سنده تجارت و صنعت و فلاحه ایچون هر نوع شرکتلر تشکیله مأذوندر» دینلشدر . (انسانك دنیایه کلیشی پك ضعیف بر حالده در ،) از جمله چبلاق و عقل و طبیعتجه غایت ضعیف و هر درلو قوتدن عاری اولدینی حالده هیچ بر شیئه مالک اولیه رق تولد ایدر؛ (واقعا فطرت و طبیعتده مرکوز و غیر متباهی اولان قوه عقلیه سی معرفتیه غیر متباهی بر درجه ده کسب کاله مستعد و مقتدر ایسه ده کندینی اداره ایده . جك بر حاله کلنجیه قدر یشقه لرینك اعانه سنه محتاجدر .) یعنی هر فرد بر جمعیت ایچنده یشامدجه فطرتنده مرکوز اولان هر

در لو کالاتک استحصانه موفق اوله مز و بو کالاتک وجوده کلسی
 وتوسع وترقی ایلسی مطلقا هیئت اجتماعیه ایچنده یشامغه و بونک
 افراندن معاونت کورمکه محتاج ومتوقفدر، برچوجق حین
 تولدنده پدر و مادرینک و یا دیکر لرینک معاونتنه نائل اولیه جق
 اولورسه او چوجغک انسان اولسی یعنی میدان چیقوب بقا
 بولسی ممکن اوله مز. (دیمک که هر فردک) کورمش اولدیغی
 بو قدر معاونته مقابل (ایچنده بولندیغی هیئت اجتماعیه قارشو
 چوق بورجلری واردر؛ مادامکه بویله در، کندیده اوجمیتیه بو
 بورجلری ادا ایتلی) یعنی محتاج معاونت اولنلره او یولده معامله
 ایتلی (در؛ اشته معاونتک اساسی بودر. واقعا بعض شیلری
 سوق طبیعی ایله یاپارز: مثلا اولادمزی سورز،) جالب مرحمت
 کوتورم و فقیر آدمکر کورلدکده ترحم ایدرز، (بونلر هپ بررحکم
 الهیدر؛) یعنی بوکی شیلرک سبب و حکمتی هپ بومعاونت فکریدر؛
 (دیمک که معاونت مطلوب الهیدر.) اشبو معاونت اصولی اشتراک
 اصولیه قارشیدر ماملیدر، واقعا بونلر یکدیگرینه پک یقین ایسه ده
 حقیقتده بشقه شیلردر؛ زیرا عقد شرکت برقاچ شخصک برلکده
 اوله رق بر مقصد معلوم استحصانه چالشمسندن عبارتدر، معاونت
 ایسه بشقه برکیمسه نک حصول مقصدیچون لازم کلان وسائطی
 احضار واکمال و اتمام ایتمکدرکه عارضی و اتفاقی برشیدر. دائمی
 صورتده برکیمسه غیرک معاونتیه یشایه مز؛ هرکس کندی احتیا.
 جاتنک دفعیله مکلفدر: مثلا بر آدم کندی ولدینی انجق بیودوب

میدانه کتورنجهیه قدر اتفاق واعاشهیه مجبور اولوب اندن صکره
بودخی کندی ثمره سعیله کجملیدر؛ کذلک برزنکین مصیبت زده
اولانه اول مصیبتک دفعنه قدر معاونت ایدر ، اندن صکره معا-
ونته مجبور اولمز ؛

§ ۱۰۱ - (معاونت ایکی نوعدر: بری عمومیدرکه
حکومتلرجه یاییله حق معاونتلر اولوب بدرجهیه قدر مجبوریدر ،
خسته خانلر ، بیمار خانلر ، فقر خانلر و مسکین خانلر کبی) عموم
ایچون تأسیس اولنان (مؤسسات بوقیلنددر ؛ بونلرک یانلسنده
حکومت حقیقت حالده بر واسطه در ، چونکه حکومت بونلری
استحصال اعانات ایله ییار ، بنا برین بونلرده افرادک افراده معاونتی
دیمکدر ؛) بوقیل معاونت حکومتک وساطتی قارشیدینی ایچون
دائمی و مجبوریدر ؛ (دیکری دخی مجرد اختیاری اوله رق افرادک
یکدیگرینه اولان معاونتی) و اهل احسانک خیراتی (در) که
فوق العاده و غیر متاهیدر . (افرادک معاونتی) اختیاری اولدینی
ایچون (موقت اولدینی کبی فعلیاتده جزئیات قیلنددر .)
مثلا برزنکین بری آج قالورسه قارتنی طویورر ، اچیقده قالورسه اکا
مسکن تدارک ایدیورر که حسن اراده سنه معلق برکیفیتدر ؛ حتی هر کس
دیورنه معاونتی اغتنام عدایدر ایکن مومی الیه بیله بعضا آج قالوبده
استعانه و تعمیر دیکرله دیلنمکه محتاج اولورمش ! فقط عادی
دیلنجیلر کبی هر راست کلدیکنه مراجعت ایتیموب غندنده معتبر
اولنلره عرض احتیاج ایدرمش ، برکون برینه ارباب احتیاجه

معاونت ایدرمیسین؟ دیو سؤال ایتش و حریفه جواب ویرمکه وقت بر اقمسزین «ایدرا ايسن، اشته بنده او ارباب استحقاقدم، یوق ایتمز ايسهك، ايو شیدر ایت وابتدا بندن باشلا» دیهرك اعانهك منافعی سولشدر. ﴿حکومتك معاونتی دایمدر. حکومتك یایدینی شیلری افراد یاپهمیهجغه و افرادك الله کچن نقود سریع الصرف والابتدال بولندیغنه بناء بویله مؤسسات عمومیهیی افراد یاپهمیوب دولت بویابده یعنی افرادك وقتيله وكافی درجده اجرا ایدهمیهجکی معاوناتی اجرا ایدر.﴾ یعنی حکومت واسطه اولدینی یرلرده کلیت اوزره وكافی صورتده اجرا ایلر. افرادك معاتی ايسه کافی اوله مز ؛ حکومتك واسطه اولدینی معاونتله اهالییه ترك اولنهجق اولسه هیچ معاونت ایدهمزله ویاخود وقتيله یاپهمزله ویاپسهلرده یوليله ایفا ایدهمزله ؛ افراد اهالی کندی ایشلریله مشغول اولدیغندن مستحقینی تحری و تفتیش ایدهمز ؛ لکن ﴿حکومت نه ديمك اولدینی معلومدر یعنی مصالح عمومیه مزى اجرايه مأموردر﴾ یعنی کافه خصوصاته اهالییه نظارت ایتك و مصالح عامیه متعلق هر درلو تداییری اتخاذ و اجرا ايتك حکومتك جمله وظائفندرز ؛ ﴿الحاصل حکومت افرادك من حیث الافراد یاپهمیهجفی شیلری یایمق ایچون اجتماع ایتش اولان هیئتدر ؛ مجبوری و محبانا اولان تربیه عمومیه L'éducation publique دخی بو شیلر قیلندندر؛ بناء علیه حکومت افرادك ویرهجکی اعانهلری طویلار وانلرك

وقتیله ایفا ایدمه‌جه کی وظیفه‌نی وقت وزمانیله صورت منتظمه‌ده ایفا ایدر وافراده پاهمه‌جی شیئی صورت دائمه و مطرده‌ده بر قاعده تحتنده اجرا ایلر ؛ معارف عمومیه‌نک بر درجه‌یه قدر سالب حریت اولدیقی کورینور ایسه‌ده ماسبقده تفصیل قلندینی مثللو بو حال موقت اولوب مؤخر احریتی کرکی کی استعمال ایتمک اعداد مقدمه ایلک ایچوندر .

۱۰۲ — کرک عمومی و کرک اختیاری اولسون ﴿بو معا. و تی مقتضی اولان﴾ یعنی معاوتی ایجاب ایدن ﴿مصابب ایکی درلودر: بری مصائب سماویه یا سمائی و یا طبیعیه‌درکه انسانک مدخلی اولمیان مصائبدر، حریق و صوباصق و زلزله و قحط و غلا و سائر امثالی کی؛ و دیگر مصائب اجتماعیه درکه انسانک مدخلی اولان مصائبدر، اختلالات داخلیه و محاربات خارجیه و انشای محاربه‌ده طوب و تفنک ایله احراق ایدیلان بلده لرك یانسی و امثالی کی. مصائب کرک طبیعی و کرک اجتماعی اولسون بونلرک مستلزم اوله‌جی ضررلره عمومک قوتیله مقابله اولمکی در: بو کی شیلرده عمومک معاوتی لزومی بدیهی وافراده معاوت جزئیه‌سی غیر کافیدر. بو معاوت یالکز افرادک بر برینه ایتدیکی معاوت دکلدر، حقیقته هیئت اجتماعیه تحتنده یشایان هر فرد هر لحظه معاوت کورمکده در ؛ مثلاً بر کتبخانه‌دن استفاده ایتمک صاحب خیراتک معاوتیدر ، یوله یوریمک و اغاج التده

او طور مقرب بونلر ديكرك معاونتيدر ؛ بتون افراد بر معا-
 ونت دائما ايچنده يشارلر ، بونك عكسي محالدر ؛ كرك بعض
 افرادك وكرك هيئتك معاونت دائمه سي ايچنده بولنورز ، بوني
 بيلهرك بزده الدن كلديكي قدر ابناي جنسترك خيرينه ومنفعته
 ومعاونته سعي ايتلير وانلرك حقني ايفا ايتلير.) اوت بتون ملتئر
 ودولتئر بر معاونت دائمه ومستقره ايچنده يشارلر : اشته
 اسلافرك ياپديني جامعلر ، مدرسهلر ، مكتبلر ، كتبخانهلر ، مكتبلر
 موزمخانهلر ، چشمهلر ويوللر وسائر بوكي عمومه متعلق اولوبده
 آن بآن استفاده ايتكمده بولنديغمز شيلر هپ بو قيلدندر ؛ بونلر
 هر كسه معاونت ايچون ياتلشدر ؛ كذلك حكومتك ياپديني شيلرده
 بويله در ؛ غازلر ايقادى ، صولرك اجراسى ، شمدوفرلر
 انشاسى وسائر بوكي از اجرت واز بدل ايله عمومك استفاد-
 كانه عرض اولنان شيلر دخى معاصرلر يئرك اثار معاونتيدر .
 اشته انسان كرك اسلافك وكرك معاصرلرينك بوقدر معاونتلىنى
 كورسيور ايسه ده انسان دائما بويله بتون بتون غيرك اعانه سيلاه
 يشامق مروت انسانيه موافقدر ظن اولنسون ! غيرك معاونت
 دائمه سنه انتظار ايتك عادتاً دناتلدر ! چونكه كندندن معاونت
 بى كلىلان كيسه ده نه وار ايسه بكيانده ده او واردر ،
 جناب حق اكا نه ويرمش ايسه بوكاده انى ويرمشدر ،
 بوده چالشوب هم كندى مستفيد اولملى وهمده ديكر محتاجينه
 معاونت ايتلير .) جمعيت حائده نائل اولديغمز بو خيرلر ، بو

چالشقدر . تمدن شخصیتک برصفت متمایزه سیدر ؛ بونک ایچوندرکه انسان مدنی بالطبعر دیرلر ؛ مادامکه انسانک طبیعت و خلقتده مدنیت و خلقت حالی مرکوز و موضوعدر بو آنک حق طبعی سیدر ، بو حق سلب ایتمک جائز اوله مز ،) یعنی انسانک بو حقی سلب طبیعت انسانیه مغایر اولور و بنابرین حق مدنی سلب ایتمکه هیچ برکیمسه نك صلاحیتی یوقدر . (انسانلر) ظاهرده ثروت و علم و صنعت و اخلاق کبی بعض خصوصاته متعلق (جهننلره متفاوت ایسه لرده مادامکه حقیقتده نوع واحددرلر و مادامکه) کرک جسمانی و کرک روحانی (حواس و قوی) و علی الخصوص عقل و روح و استعداد و مزاج و طبعیجه (مساوی یرادلش لدر) و مادامکه ینلرنده وجوه عدیده ایله جهت وحدت و جامعه و رابطه واردر (مقصد جهده بر اولمیدرلر ؛ مادامکه مقصد لرینک استحصالی انفراد حالنده) و هر فردک کندی سعیله ممکن (اولیوب اجتماع حالنده یشامغه متوقفدر تمدن و اشتراك طبیعت و خلقت انسانیه اقتضاسندندر ، دیمکه افراد انسانیه نك بر حال اجتماعده یشامغه حق لری واردر ؛ جناب حق بو حق احسان ایتمشکن انسانلری بونلردن منع و محروم ایتمک هم انلره ظلم و همده جناب حقه عصیان ایلمکدر .) واقعا قرنبه و لیلک کبی حیوانلر سوری سوری کزرلر و جمعیتله یشارلر و بعض شیلرده اشتراك ایدرلر و هله قاستورلر عاداتا طویلانوب قریه تشکیل ایلرلر ایسه ده (علی العموم حیوانات سائرده

بوحق یوقدر، سوری ایله کیدنلرینه ده مدنی بالطبع دینه مز،
 بونلرده مدیتی بیلزلر و طبیعتلری منفردا یشامغه مائلدر،
 چونکه حیوانلر ناقصدر و بوبابده کی مقصدی استحصال ایچون
 لازم اولان ادراکدن محرومدرلر. و نه کندیلری ونه ده همجنسلی
 ایچون مقاصد تصویرینه مقتدر دکدرلر. ادراک نوع بشره
 مخصوص برخاصه شریفه درکه جمعیتله یشامغی و بوندن استفاده
 ایتکی بیلدیرر؛ «انسانده هم کندی مقصدلرینی و همده اسبابی
 اکالیوب استحصال ایتک قوت و استعدادی واردر» که هپ
 ادراک قوه عالیسی سایه سنده حصوله کلشدر؛ اعمال فیکره
 و مقدماتدن نتیجه استحصالنه مقتدر اولان انجق انساندر،
 حیوانلرده بو استعداد و اقتدار مقوددر؛ انسان عقلیه، حسیاتیه،
 اراده سیله دنیاده موجود اولان هر درلو اشیانک علل و اسبابی
 و یکدیگریله مناسباتی. ادراک و احاطه یه مقتدردر و بو ادراک
 ایتدیکی شیلره میل و محبت ایدر، نته کیم حق و حقانیتی بیلنلرک
 انلره میل و محبتی بیلانلردن ده ا زیاده اولور، البته برشیئی
 بیلان کیمسه نك اکا محبتی اوله مز. «از جمله تمدنك» طبیعت
 انسانییه اقتضاسندن و بنابرین «مطلوب الهی اولدیغندن دلائل
 و «اثارندن بریسی» انسانده کی «نطق خاصه سیدر.»
 چونکه نطق مرام اکلامق و اکلامق ایچون برواسطه مخصوصه در،
 «اگر انسانك حال اجتماعی و مدنیتده یشامسی مطلوب الهی
 اواسه و مقتضای خلقتی بولنسه ایدی نطقك انسانه ویرلمسی

عبث عد اولئور ایدی . ﴿ اشته نطق طبیعة انسانك حال
مدنیتده یشامسنه بر دلیل واضح اولوب دیگر دلیله حاجت
براقمز . قواعد مذکورهیه نظرا ﴾ انسانلر مساویدر . بوحالده
فلان قوم مدنیدر وفلان مملکت اهالیسی غیر مدنیدر دیملک
یکدیگرینه قیاساً او قومك مرقات مدنیتده دهها زیاده متری
اولدیغنی وبو اهالینك او قومه نسبتله مدنیتجه دهها دون درجهده
بولندیغنی افاده ایتمك ارلوب یوقسه بر قومك مدنی و دیگر قومك
حیوانات کبی مدنیتدن بتون بتون عاری وبری بولندیغنی بیان
ایلك دکلدردر ، چونکه مدنیتسز انسان اولمز ، انسان یرادلدیغندبری
متمدندر . خلاصه تمدن انسانك خلقتنده مرکوز بر خاصه درکه
انسان بوکا اك زیاده محتاجدر وبوهرشیدن زیاده مقبولدر ،
بونك سلیله برابر بر انساندن هر درلو وسائل سعادت منسلب
اولور ﴾ یعنی مدنیت انساندن سلب ایدیلهك اولسه مثلاً
فلان ادم جمعیتله یشامسون منفردا یشامسون دینسه اولوقت
انسان اك مهم برحقندن محروم ایدلمش اولورکه بوحالده بنی ادم
همان حیوانات منزله سنده قالور ؛ بر دیلم اتمك و بر فحجان قهوه
کبی نظر مزده پك اوافق کورینان شیر هپ مدنیت محصولی
اولوب بیکلرجه انسانلرک تمدن واشتراکنك نتیجه سیدر ؛ بر دیلم
اتمکی وجوده کتورمك ایچون ترلایه ، تیموره ، صبانه ، اوکوزه ،
اوراغه ، خرمنه ، دکرمنه ، فرونه ، طوزه ودها بویله نیجه
نیجه شیرله وبونلری تحصیل ایچون دخی بیکلرجه اشیایه

محتاجزكه بشقه بشقه يرلرده آیری آیری ادملرك باشلی باشلرینه ویا بالاتفاق سعی وصنعتلریله حصوله کیشدر ، بونلر اولسه بر آدمی بردفعه جک طوییره بیله جک او بردیلم اتمک وجوده کاهمز ، دیمککه حال تمدن و اجتماع اولسه بردیلم اتمک تدارک ایدوب یمک بیله ممکن اوله مز . ﴿الحاصل جمعیت حائنده یشامقلغک چوق فائده سی واردر ، انسانلرك اجتماعلری نقدر قوی اولور ایسه رفاهلری دخی اودرجه ده در ، تمدن عادتاً برغدا کییدر . مدنیته سلب اتمک غذای انسانیته سلب ایله انسانی اولدرمک دیمکدر ، حال اجتماعده یشامق انسانک احتیاجات ضروریه سندن اولدیغندن انسانک بوندن مجبورا ایرلمسی کندوسنه غایت ثقیل کلور ؛ اشته بونک ایچون بعض مجرملری بوحق طبعیدن محروم اتمک ایچون امریقاده احداث اولتوبنده الیوم بعض ممالک اوروپاده جریان ایدن منفردا حبس اصولی مجازاتک اک شپیدی عد اولنه بیلور . ﴿بواصولده اولان حبسخانه لرده هر محکوم ایری اوطه ده حبس اولنور و اوطه سنک قپوسی اوزرینه بدایت ومدت حبسی یازیلور و اوطه سنده بوش طور مامق و کندوسنه نوعاً ما کلنجه اولق اوزره صنعتک تحصیل واجراسنه لازم اولان آلات ویرلدیکی کی چیقدیغی وقت ثمره سعی مع فائض یدینه ویریلور و بو حبسخانه لرك ینه ایری ایری اوطه لره منقسم در سخانه . لرنی اولوب اوراده محبوسین تدریس اولنور و فقط نه در سخانه ده

ونده اورايه کيدوب کلور ايکن محبوسلر يکديکرلريني کوره مزلر .
 ﴿ بو اصولک ائار وخيمه سندن بريده محبوسينک اکثريسنه جنت
 عارض اولمسيدرکه بوحق طيعيدن محروميت انسان ايجون
 پک بيوک فلاکت ومصيت اولديغنه دلالت ايدر . ﴾

§ ۱۰۵ - ﴿ تاريخجه معلومدرکه اشبوتمدن ابتدا جبلي
 وطيعي اولان حس مدنيتک حکم واثري و غلبه سي ايله انسانده
 ظهور ايدر ' ثانيا تفکر وملاحظه ايله ترقى وتوسع ايلر . ﴾
 بناء عليه مدنيت هم جبلي وفطريدن وهمده فکر وملاحظه نك
 نتيجه سيدر . ﴿ مدنيت وتمدن ابتدا عائله دن باشلار يعنى برعائله يني
 تشکيل ايدن افراد يکديکره ميل ومحبت ايدرک بينلرنده تمدن
 حصوله کلور ؛ مثلاً رجال ايله نسوان بيننده اولان انجذاب و
 ميل طيعي اقتضاسيجه برارکک برقادين ايله تزوج وثمره ازدواج
 اوله رق اولاد ظهوره کلور ومعلوم اولان محبت ايله ابويني بونلره
 معاونت ايدر و جمله سي برعائله تشکيل ايلرلر وبعدده بوعائله
 کندوسي کي تشکيل ايتمش ديکر برعائله ايله محضا احتياجلرينک
 سهولته تدارک وتسويه سيچون اجتماع وبراز صکره برطاقم عائله لر
 ده بونلره التحاق ايدوب جمله سي برجماعت ودها صکره
 بالتکثر برطاقه تشکيل ايدرلر وبوييله بوييله اقوام وملل ودول
 متمدنه تشکيل ايدر ؛ چونکه افراد انسانيه اجتماعلرندن مستفيد
 اولدجه تکثير افراده غيرت ايدرلر ، زيرا مدنيت حالي وبوني
 تشکيل ايدن افرادک کثرتي خلقت انسانيه ده مرکوز اولان

مقاصد مختلفه بي دها زياده حسن صورته حصوله كتورر .)
يعني بر جمعيتك افرادى نقد ر چوق اولور ايسه يادقلىرى ايش
اونسبتده بيوك وفائدهلى اولور ، بزم شمديكى حالزك يوزده
طقسان طقوزى تمدن سايه سنده حاصل اولمشدر ؛ اك عادى
بر شيئه باقيلورسه بيكلر جه ادمك ثمرات مساعيسى اوله رق حصوله
كلديكى اكلا شيلور ؛ اكر انسان يالكز اولسه ايدى بونلر ك هيج بريسنى
اله كچوره مز ايدى . شمديكى حالده نائل اولديغمز درجه تمدن دها زياده
نيجه در جانه واصل اولق ممكندر ؛ چونكه انسان هم حسى
و هم خيالى اولديغى كى تمدن دخى هم حسى و هم خيالىدر ،
جمعيت بشريه عالم خيالى به طوغرى ايلر و لمكده در .

§ ۱۰۶ —) حق اشتراكده حق تمدن كى انسانك
حق طبعيسيدر .) اشتراك بر ادمك سعى وقوتيله حاصل اولميه حق
بر فائده بي برقاج كشينك سعى وقوتيله حصوله كتورمك ايچون
بونلر ك الحاديدر .) چونكه چوق شيلر واردركه بر فرد) حتى
بعضيلرى كاملا بر طائفه بيله) يابه مز ؛ بيوك شيلرى وجوده
كتورمك مطلقا شركته متوقفدر .) مثلا سويش قنالى كى
امور مهمه بر و حتى يوز آدمك سعى ايله حاصل اوله ميوب
يك چوق آدملردن متشكل بر شركت سايه سنده وجوده كله بيلور .
) شركتك قدر و اهميتى ممالك شرفيه ده اولقدر اكلا شيله مامش
ايسه ده ممالك غريبه ده كركى كى اكلا شمشدر ، حتى بر طاقم انكليزلرك
حكومتلرينك معاوتى اولقسز ين يادقلىرى بر شركت يوزلرجه

ملیون نفوسی بولنان او قوجه هندستانی انکلتزه دولته مال
ایتمشدر . الحاصل شرکت دخی مقاصد مهمه انسانییه حصوله
کتورمک ایچون اک مهم ونازک بر واسطه در، چوق ایشه یرار،
مدنیه نسبتله عادتاً) اغر بر طاشی یرندن قالدیرمق ایچون
قوللانیلان (کوسکی مثابه سنده در .) شرکتک ماهیتی تدقیق
اولنورایسه انده شایان دقت چوق شیلر کوریلور و بر طاقم
حقیقتلر نمایان اولور ، شرکت حقنده اکسیر اعظم دنیه بیلور،
اصل کییا بودر ؛ بونی نظر اعتنایه الانلر پک چوق استفاده
ایدرلر . بر مقصد ضمنده عقد اولنان شرکتلر صورتا نقد وسائر
مالدن عبارت سرماییه شرکتی ایسه لرده حقیقتده انسان یعنی عقل
شرکتیدر ، پاره و مال ارتباطی انک بر جهتی در ، بر طرفدن
سرماییه و آلات وادوات و دیگر طرفدن عقل و بحر به یرلشوب
مقاصد مهمه و نافعیه حصوله کتورر .) خلاصه مادامکه مدنیت
کافی اولیوب شرکته لازمدر ، مادامکه مقاصد انسانییه
وجوده کتورمکه بوده خادمدر اشتراک حق دخی موجود و طبیعیدر
و حتی بتون دولترلر قانون اساسیلرینه درج ایدیلهرک تصدیق
ایدلمشدر . واقعا شرکتک اهمیتتی و حقایق و دقایقنی بیلیانلر
حقوق اشتراک موضوع بحث ایدلدیکنه وهله بونک قانون اساسییه
داخل اولدیغنه تعجب ایدرلر ایسه ده نوع انسانه فوائد کثیره سی
اولان حقوق سائر مثللو بونک ده منفعتی اکلایشیلنجه قانون
اساسییه درج اولنغه مستحق اولان حقوقدن اولدینی تسلیم

اولنور، بناء عليه حق اشتراك ماهيتى تدقيق ايتك لازمدر:
اکثر شرکتلر بر قاي کشينك سرمايه نقدى والات وادواتنك بريده
کتورلمسندن عبارت اولديغندن صورتا اچه و مال شرکتى ديمك
ايسه ده حقيقتده اصل سرمايه انسانلرک عقل و فطائى اولديغندن
انسان شرکتى ديمکدر؛ عقل و فطانت دها بيوک سرمايه در، ۱۱
زيرا بي عقل اولنلر نقدر سرمايه کتورسه لر بي اساس اولور،
سرمايه مادی عقل و تدبيرک درجه سنه کوره ترايد
ايدر .)

۱۰۷ —) هر شرکتده و تعبير ديکوله هر جمعيتده
اوج مختلف شى وارددر : برنجيسى شرکتک مقصدى) يعنى
زراعت يا تجارت يا شندوفر و يا واپور شرکتى اولمق کي مقصد
تأسیس) و ايکنجيسى استعمال ايده جکی وسائط والات و ادوات
که ماديده ايسه سرمايه نامنى الورلر) و او چنجيسى شرکتک مقصدينه
و وسائطنه کوره آنى ترکیب ایدن اشخاصک حائر اولدقلرى
مقامات مختلفه در .) اوت بومقامات مختلفدر ، هرکسک کندينه
مخصوص بر عمل معينى وارددر : مثلاً شرکت تجاريه ايسه بيع
و شرايه و سائر معاملات مأمور اولان اشخاصک و شرکت صناعيه
ايسه ضائع و عامل و سائر لرینک و شرکت سياسيه ايسه) چونکه
حکومتده بر نوع شرکتدر) حکمدار و وکلا و حکامک کيملر
و نصل ذواتدن مرکب و هر برينک مقام و خدمتى نندن عبارت
اوله جغنک تعينى لازمدر .) شرکتلرک مقصدلرى مختلف اوله بيلور :

مثلا حیات انسانیہ یا بر مذہبک محافظہ سی و یا خود بر علم و یا صنعت و یا تجارتک حصول وجودی کی بر یا بر قاج مقصد ایچون بر شرکت عقدی جائزدر ، مع مافیہ مقصد شرکت مشروع اولق شرطدر ، یوقسہ قطع طریق کی مقصد باطل عقد شرکت اصلا تجویز اولنہ مز . مقاصد مشروعہ نک ہپی نوع بنی ادم ایچون لازم ایدو کندن و شرکت عقدہ بونلرک حصولہ دہا زیادہ مدار اولدیغندن بوشرکتلر دخی قانون اساسیلرہ درج اولنہ رق مقاصد انسانیہ نک حصول و ترقیسی بر قانداہا تأمین اولنشددر . بوشرکتلر ملکک قوای عقلیہ و مالیہ و تجارتیہ سنک تراید و توسعہ سبب اولور . حتی شرکت اصولی جاری اولان بر ملک ایلہ جاری اولیان بر ملک بینندہ ترقیالچہ پک چوق فرق کوریلور ؛ چونکہ اتحاد و شرکت اصولی حد ذاتندہ بر قوۂ معظمۂ جذبہ وجودہ کلسنہ و افرادک منفردا یاپہمدقلری شیلری یامق ایچون بر اقتدار عظیمک حصولہ باعث اولور .) نته کیم قوای مادیہ ایلہ قوای مغنویہ منفردا یاپہمدقلری شیلری برلشدکلرنندہ میدانہ کتورمک اقتدارینی حائر اولور لرکہ عقل باعقل دیگر دوتا شود * نور افزون کشت راہ پیدا شود متو سیسیلہ دخی مؤیددر .) واقعا شرکت سرمایہ نک مقدارینی ارتدیرمز ایسہدہ قوتی تریید ایدر و بونلرک آیری آیری اولدینی حالہ یامسی محال اولان شیلری میدانہ کتورر .) حافظ شیرازی حسنت باتفاق ملاحظت جهان گرفت * آری باتفاق جهان می توان گرفت یتیلہ

بونكته به اشارت ايتشدركه سنك حسنك ملاحه ايله اتفاق
سبيله جهاني طودى ، اوت ! اتفاق ايله جهاني ضبط ايتك
ممكندر ديمكدر . بلچيقا دولتك مقسمى بو مآلده اوله رق
L'union fait la force عبارسى اولوب آرمه لرنده يازيليدر كه
اتحاد قوت حصوله كتورر ديمكدر . حقيقه اتحادك — مثلا بر
اغرى طاش قالدرمىق كى — فصل ماديآده فآنده سى و ارايسه مغنويآده ده
اويله فآنده سى واردر .

§ ۱۰۸ — ﴿ ايشته حكومتلر ، دولتلرده برر شركت
مغنويه و سياسيه در ، هر فردك اقتدارى بونده مجموعك قوته مسا-
ويدر . ﴾ يعنى بر دولتى تشكيل ايدن بالجملة افرادك تركيب ايتديكى
قوت هر قدر ايسه هر فردك قوتى دخی اكا مساوى و معادلدر .
﴿ شركت سياسيه ده ده شركت صنايعيه ده اولديغى كى هر فرد
علاقه دار اولديغندن دولتك سعادتندن ممنون و ذلتندن مكدر
اولمليدر . ﴾ يعنى شركت صنايعيه ده هر فرد شركتك زنكن
و معتبر اولمىنى ارزو ايتديكى و انك حسن حالندن مستفيد اوله .
جغنى بيلديكى كى شركت سياسيه ده دخی اويله اولمى و هر فرد
حكومتك ترقيسىنى ارزو ايتملى و هيئتك عزت و ذلتنده و منفعت
و مضرتنده كند و سنكده بر حصه سى اولديغنى بيليدر . ﴾ حتى ملت
مجلسلرى بو مقصد اوزرينه مينيدر ؛ جمعيت بر ضرر كلنجه هان
خبر و يرمليدر ؛ هر فردك مملكتك فآنده سنى كوزتمه ده چوق فآنده
كورلشدر ؛ اشته مطبوعاتك حرىتى بو حكمتلره مبتنيدر . ﴾

مطبوعات قانون دائره سنده سربست اولديغندن بو واسطه ايله هرکس بعض شيلر اخطار و حکومتک نظر دقتی جلب ایده بیلور؛ مثلاً مال میریدن سرقت و قوعی کورلیدیکی آنده مرجعه خبر ویرمه و بوکی شیلرک منع و قوعی چاره سنی بولمه انسانلر غیرت ایتلیر؛ چونکه چالنان مال الک مالی دکلدر، کندی ماللیردر و همده محافظه وطن و تأمین اسایش و توزیع عدالت کی مصلحت عمومیه و جسیه لری ایچون تفریق اولنان ماللیردر؛ بوکی شیلری باشلو. جه خبر ویرنلر غزته لر اولوب غزته حیلاره نیچون خبر ویریور و اخطار ایدیورسکر دینه من؛ متمدن مملکتلرده بویله خبر و اخطارلرک چوق فائده سی کوریلور؛ فقط بو خبر و اخطارلرده یولیله و مناسب صورتده اولمی و هرکس نه وظیفه سنی و نه ده حقنی تجاوز ایتمالیر. شرکت صناعیه و تجاریه ده افراددن هر برینک کندینه مخصوص بر مقام و خدمتی اولدیغی کی (شرکت سیاسیه ده هر فردک) کندینه مخصوص عسکرلک، کاتبک، چفچیلک کی (برمقامی اولوب او مقامه عائد خدمتی ایفا ایدر و هیچ بری وظیفه سنی براغوبده خارجه حقیقه من؛ مع مافیله دیگر مقاملره نافع خصوصاتی دخی اخطار ایدر، فقط بونده ده حدنی تجاوز ایتمالیر. (ایش باشنده اولنلر یعنی حکومت مأمورلریده. وظیفه لرینی تمایله ایفا ایتلی و شرکتک مقصد اصلیسینی بیلوب ترویج ایتلی و افرادک قوای اقلیه سنی توسیع ایتکه و هر درلو تشبثلرنده عمومک منفعتلرینی کوزه دوب عمومک و ثوق

و اعتمادی جلب ایلکه چالشیدر ﴿ و فضله اوله رق هر درلو
تشیئرلنده حسن اتفاق اولوب جمله سی قواعد حقانیت، صداقت،
صفوت و اهتمام اوزره چالشملی و امنیت ایله حرکت ایتلی وختی
بعضا فوائد خصوصیه یی منافع عمومیه یه فدا ایلیدرلر . اشته
شرکتک مقصد اصلینک حسن حصولی بونلره متوقفدر ؛
بونلری هرکسه تفهیم ایتلیدر . ﴿ بر شرکتک حسن صورتله
اداره اولنوب اولندیغی ﴾ و ایشلرینک یولنده کیدوب کتدیکی
﴿ سنه باشنده حصه دارانه توزیع و اعطا قلنان تمتع مقدارندن ﴾
و شرکتک اعتبارندن حصوله کتوردیکی امتعه نك نفاستندن
﴿ معلوم اوله جنی کی شرکت سیاسیه نك دخی حسن صورتله
اداره اولنمی اكا قیاس اوله رق بیلنور . الحاصل شرکت سیاسیه
غایت فائده لی بر شرکتندر . اگر افرادک بوصورته شرکت سیا-
سیه دن استفاده ایتلریله برابر کندیلرینه برده بانقهلر و امانت
صندوقلری کی برحق شرکت ویریلور ایسه برقاندها استفاده
ایدرلر و اواز جمله بانقهلر و امانت صندوقلری کی مؤسسات برطرفدن
استفاده عاجله یی موجب ودیکر طرفدن سرمایه تشکله مدار
اولورلر . اشته شرکت تشکیلنک سربست اولمنک فوائد عظیمه سی
اولدیغندن حق شرکت سائر حقوق طبعیه کی غایت مهم بر
حقدر و بونک مبنی علیهی امنیت و عدالت بتمامها یرنده اولوب
اجرا اولملیدر . ﴾

فصل عاشر

قوای انسانیہ نك استعمالی حقنه دائر در

۱۰۹ - (قوای انسانیہ نك استعمالی حق یعنی ایش

ایشلك حق Le droit concernant l'exercice des facultés humaines ou le droit de travail
تأمین ایدلماش ایسهده حریت شخصیهده داخلدر.) ایش ایشلك
قوای انسانیہ بی استعمال ایتکله اولوب بو عریجه عمل وفرانسزجه
تراوای دنیلور. (ایش بر فائده حقیقیه و تعیر دیگرله خیریه
وصحیحه استحصالی ایچون انسانك صرف ایلدیکی هر درلو سعی در.)
ایشته بو تعریف معرفك افرادینی جامع اولدینی کی اغیارینی
مانعدر؛ چونکه تعریفده کی (فائده صحیحه قیدله بیهوده وفائده سز
ایشلر خارج قالور؛) (اصلا سبی یوق ایکن یوریمك، النی قولی
صالامق کی حرکتلره ایش دیشلز؛) كذلك غیرك مالنی غصب
وسرقت ایتك وقومار اوینامق کی فائده صوریه سی اولوبده
فائده حقیقیه وخیریه سی اولیان فعللرده خارج قالور؛ بوکی فعللره
حکمت اصطلاحجه ایش اطلاق جائز اوله مز.) الحاصل كرك
نفسزده وكرك بشقه سنه مضرت ایقاعی ویا برشی ضمنده فائده
حقیقیه اولیه رق تخریب ایچون وقوعبولان سیعلر بوراده موضوع
بحث اولان سعی وعملدن خارجدر. (انسانك باشند باشه عمری
جسمانی وروحانی واخلاقی هر درلو فائده لرك استحصانه مصروف

اولمیدر؛ فائده لرك انواعی متعدد و پك چوقدر: مثلاً پاره قزاق و ترلا زرع ایتك جسمانی و بر مسئله اوكرنك و عبادت ایتك روحانی و برینه ایلك ایتك اخلاقی فائده لردر. دنیا ده هیچ بر فرد ایش ایشلماكدن مستثنا و معاف اوله مز؛ فقط ایش ایشلماكلك انواع مختلفه سی واردر؛ هر بر فرد بو ایشلرك انواع مختلفه سندن برینه متعلق اولمیدر؛ بونلر ده صنفله تقسیم اولمشدر: کیمی اکینجی کیمی دلكر، کیمی تاجر، کیمی كاتب، کیمی حاکم، کیمی عسکر والی اخره در. بو انواع مختلفه دن برینه متعلق و هیچ برایشله مشغول اولمیان ادملر بشقه لرینك تحصیل ایتدیکی فوائد ایله متمتع اولوب یشامق ایستلر و بویله کندیلری ایش ایشلیه لرك بشقه لرك ایش ایشله سندن استفاده ایتك ایستیان ادملر هیئت اجتماعیه مضر دیمكدرلر.) چونكه مدار تعیشنی تحصیل ضمنده سعی ایتیان ادملر آخر لرینه بار اولور. ﴿كرك قوانین و كرك علم اخلاق بو مقوله ادملرك وجودنی تقیج ایدر، بونلر خلقك محصولاتنی خراب ایدن ﴿چكر كه مثابه سنده در. بوراده تحصیل و قزاق یعنی سعی و عملدن مقصد یالكر زراعت و تجارت كبی مادی شیلره منحصر دكلدر، حاكمك و آووقاتلق و معلمك كبی مغنوی سعی و قزاقلر دخی معتبر اولوب بو طریقله سالك اولنلرده ولو كه مغنوی اولسون بر طاقم فائده لر استحصالیله مشغول اولورلر: مثلاً حكام احقاق حق ایدرلر، بوندن مملكته فائده حاصل اولور و كندولرینده بو فائده مغنویه مقابلنده ماده دخی استفاده ایدر. الحاصل كرك

جسمانی وکړک روحانی وکړک اخلاقی بر فائده وجوده کتور میان
 شخصک وجودی جمعیه مضر در ؛ بتون اصلاحات اجتماعیه
 درلو درلو تدبیرلر ايله معارفی نشر ایدرک و اخلاقی تهذیب
 ایلیرک بومقوله اشخاصک ممکن مرتبه ازالمسنه مصروف اولمیدر .
 نتیجه حق اولان بودرکه هر انسان کندي سعينک ثمره سیله
 کچمیلیدر ، محصولات مادیه وجوده کتورنلر محصوللر ايله ویا
 مبادلله طریقله و محصولات مغویه استحصال ایدنلر منحصرا مبادلله
 ايله تعیش اتملی و الحاصل بر انسان عاقل احتیاجی کندي سعييله
 دفع اتمیلیدر ؛ بوکا رعایت ایتیمان غیره بار اولور ، انک ثمره سعینی
 الندن المغه چالشور ؛ غیره بار اولق درلو درلو اولور : از جمله
 طولاندر یحلیق ، سرقت ، قطع طریق و علی الخصوص اصلی
 اولمدیغی حالده فقیرم دیهرک خلقت مرحمتی جلبه چالشق غیره
 بار اولمقلغک باشلوجه لرندندر ؛ بو طریقلرک هیچ بری نه عقلا
 ونه ده شرعا مقبول اوله مز ؛ متمدن مملکتلرده پولیسک بروظیفه .
 سیده ایشسر و صنعتسزلره نظر ودقت ایتمکدر ، اوزاقدن بونلرک
 حالی تقیتیش ایدر ، اگر بلا موجب ایشسرلک ارتکاب ویا خود
 یاکلش و فنا بریوله سلوک اولنیور ایسه محله اخبار ایدر ؛ کندي
 احوالک اصلاحی ارزو ایدن برهیئت اجتماعیه نشر معارف
 و تهذیب اخلاق طریقله و افکار عمومی واسطه و قوتیله بومقوله
 ادملرک ازاله سنه و ممکن مرتبه ازالمسنه سعی ایدر ؛ بشقه لرینک
 ثمره سعييله کچمک استیانلر باغچه لرده کی مضر اولتره بکررکه

فائدہ سی اولمقدن بشقہ مضرتیدہ واردر ، بالطبع سائر محصولاتک
 قوتلرینی ازالدر و حسن حصوللرینہ مانع اولور ، اگر باغچہ
 صاحبی درایتلو ایسہ ہر حالده انلری برربرر اصلاح ایتکہ ویا
 چیقاروب دفع ایلکہ چالشور ؛ کذلک بر بابانک بش اوغلی
 اولوبده ہپی بردن چالشمز ایسہ چالیشیمانلر چالیشانلرینہ بار
 اولہ جغندن و بوندن چالیشانلرک غیرتلرینہ خلل کلہ جکندن
 اول بابا حقیقہ بابا اولمغہ لایق بر ذات ایسہ چالیشیمان اوغللرینی
 وسائط ممکنہ ایلہ تربیہ و اصلاحہ الندن کلدیکی قدر سعی ایدر
 و بوراسندن قطع امید ایدنچہ رشتہ ابوقی دخی قطع ایلر . اسکی
 زمانلرده و زمانمزدہ امریقا و سائر یرلرده اسرا سایہ سنده تعیش
 ایتش اولنلر والان ایدنلرده بوقیلدنلر دینہ بیلور ، فقط
 بتون بتون بوکا مثال اولہ مز .

§ ۱۱۰ — ایش ایشلہ ہر درلو سعادتک و ہر درلو
 رفاہک منبعی و اساسی اولوب کرک افراد و کرک جمعیتک کسب
 کمال و رفاہ ایتسنہ برواسطہ قویہ در . ہیئت اجتماعیہ بوندن کلی
 استفادہ ایدر ؛ موجوداتک بتون قانونلری و خاصہ لری وانلردن
 استحصال اولنان ثروتلرک مجموعی بتون ایشلہ واسطہ سیلہ
 حصولہ کلوز . ﴿ از جملہ الکتریک و بخار خاصہ لرینک و سائر
 آلات و ادواتک بیلنوب حصولہ کلسی ایش سایہ سنده در . ﴿ بو
 سعی بر نور ، بر دلیل ، بر پساپورط مثابہ سنده اولوب عقول
 بشریہ بونک واسطہ سیلہ حقایق اشیا و سعادت حال اقلیلرینہ

کرمکه مآذون اولور . ﴿ امر بالعکس اولنجه انسان بو اقلیمله کیرمکدن محجوب اولور وسی و عمل اولنجه حقایق کشف اولنه مز ، اهالیسی مجد و غیور اولان مملکتلرک اهالیسیله سعی ایتدکلری جهته بو حقایقندن محروم اولان افریقا زنجیرینک احوالی مقایسه اولنورسه حقیقت میدان چقار ، حالبوکه سعی ایدن و ﴿ ایش ایشلیان ادملر هر دبرلو حقیقتدن ، خیردن و حسن اخلاقندن مستفید اولورلر . خلاصه حقیقی سعادت حال ایستیان آدم ﴾ حال ووقتی مساعد اولدینی مرتبه ﴿ سعی و عمل ایتلیدر ؛ انسان ایچون سعیدن بشقه برشی یوقدر . ﴾ حتی لیس للانسان الا ماسعی نظم جلیلی وارد اولمشدر . اصل سعادت حقیقیه مجرد سعیزله وجوده کلان خیری حس و ادراک ایتمکدن عبارتدر ، بشقه سنک سایه سنده اولان خیرلر انک امتانی التنده اولمغله سعادت حال عد اولنه مز ، باخصوص امنیتی و دائمی دکلدر . هر شیئک بدایتی دخی کوج و عسرتلی اولدیغندن چالشمغه و ﴿ ایشه الشیمانلره برایش کوسترلیدیکی وقته کوج کلور ؛ ﴾ چونکه اوکر نمکه و الشمغه متوقفدر ، یالکر اراده ایدیور مکه ایش حصوله کلز ؛ ﴿ بنابرین ابوینمز ﴾ کوجک یاشزدن اعتبارا ﴿ دائماً بزى بوش اوتور تمیوب ایش ایله مشغول ایتمکه الیشد . یرملیدر ؛ ایش ایشلک انسانک هر وجهله ترقیسنه و درجه سنک ارتقاغه و کرک امور مادیه و کرک امور مغویهده اقتدارینک تزیادینه سبب اولور . ﴾ انسان دائماً باشلاملی و دائماً بتورملیدر

کلامی امریقالیلرک مقبجی اولدیغندن بونلر چوق ترقی ایدیور .
 ﴿ وکوریورزکه انسانلر مدنیتده ایلرولدیجکه سعی و عمل کاه
 سبب وکاه مسبب اولور ، چونکه سعی واسطه سیله انسان مدنیتده
 ایلرولر وانسانک مدنیتده ایلرولسی سعیک تزايدینه بادی
 اولور ﴾ یعنی سعی ایلرولدیجکه مدنیت ترقی ایدرده سعی ترقی
 مدنیت سبب اولور ومدنیت ترقی ایتدیجکه سعی قولایلشوب
 ایلر وکیدرده مسبب اولور . ﴿ کرچه ایش کوچ ایسه ده بونده
 فوائد کثیره واردر ، انسان مطلقا ایش ایله احتیاجنی دفع
 وتسکین ایدر وصنایعه متعلق ایسه ترقیسنه و او نسبتده
 اجر تنک تزايدینه وعلومه متعلق ایسه ذهنتک توسعنه سبب
 اولور وبرفائده سی دخی واردر که اوده ایشک ختام بولمسیله
 انسانک حاصل ایتدیکی نشئه ومحظوظیتدر . انسانک حیاتی
 وتمامیت وجودی ایله قوای جسمانیه وروحانیه سنک صحت حالده
 بولمسی مطلوب الهی اولدیغندن وبونلرک استحصالی بو مقاصد
 ایچون ویریلان اعضانک استعمالنه متوقف بولندیغندن بواعضایی
 او مقاصد ایچون استعمال ایتک جناب حقک مطلوبیدر ؛ ﴿
 عسکره ویریلان سلاح موقع وزمان حاجتده قولالانلق ایچون
 ویرلیدیکی کبی ؛ ﴿ دیمککه ایش ایشلک یالکر بوفائده لرمز ایچون
 دکدر ، بلکه اللهک دخی امرینه اطاعت ایچوندر ، او یله ایسه
 قاعده سعی و عمل ﴾ یعنی ایش ایشلک حتی حقوق طبعیه دن
 اولمغله ﴿ بزم ایچون بر قانون مقدسدر . ﴾

۱۱۱ - ﴿انسان بر جسم ایلہ بر روحدن مرکب اولدیغندن ایشلرمنز دخی بعضکره حامللق کبی جسمانی و بعضکره مسائل علمیہ حل ایتک کبی روحانی و بعضکره دخی مرانقوزلق کبی هم جسمانی و هم روحانی اولور و اشبو شق اخیرده بعضکره انسان﴾ مثلاً مرانقوز ماصهیی یا مقده ایکن اصول هندسیه سنی دخی تفکر ایتسی کبی ﴿هم قوای جسمانیه سنی و همده قوای روحانیه سنی آن واحده استعمال ایدر. بونک ایچون بر آدمک صرف امور مغویه ایلہ مشغول اولسی جائز اولیوب بعضکره امور مادیہ ایلہ دخی اشتغال ایتلیدر﴾ یعنی هرکس ممکن مرتبه هم امور مادیہ و همده امور مغویه ایلہ توغل ایتلیدر؛ ﴿حتی﴾ طبابت و حاکمک و هیئت و هندسه مثلاً امور مغویه ایلہ اشتغال ایدنلر ارده لقصده مادیات ایلہ ده مشغول اولزلر ایسه قوای روحانیه لرینی طاقندن زیاده یورمش و بنابرین حقسزلق ایتمش اوله جقلرندن بونک ضررینی کوره جکاری کبی ﴿عمله طاقی دخی امور مغویه دن کلیا مستغنی اولیوب حکومت بونلرکده حالدرینه کوره امور مغویه ایلہ مشغولیتلرنی توصیه ایتلیدر، اگر بوکروه امور مغویه ایلہ اصلاً اشتغال ایتزایسه حیوانیت و بهیمیت درجه. سنده قالور.﴾ اشته دولته بونلرک پدرلری کبی تربیه لرینه سعی ایتلیدر، بونک ایچون تربیه عمومیه مجبوری و مجانا اولمشدر، ممالک متمدنه ده عمله نک یالکز مشاغل جسمانیه ایلہ اشتغال ایتلری

تجویز اولنمدینی و مشاغل روحانیہ ایچون دخی انلره بر مقدار وقت براغلدینی بیان اولنمشیدی .

§ ۱۱۲ — سعی وعمل خصوصنده شایان دقت بر جهت واردر، شویله که مشاغل جسمانیہ احتیاجات مادیہ مزی دفع ایدہ جک شیرلی حصوله کتوره جکی واسحابی دخی طوغریدن طوغری یه محصوللریله مستفید اوله جنی جهتله «احتیاجات مادیہ بی دفع ایدہ جک شیرلک استحصالیله مشغول اولنلر دائما کچنه جک محصول بولورلر؛ فقط» مشاغل معنویہ بویله اولمدیغندن «امور معنویہ ایله مشغول اولوبده بو سایه ده تعیش ایدنلر دائما محصول معنویلرینی محصول مادی ایله مبادلہ ایدہ مز» وکچنه جکلرینی صورت دائمه ده تدارک ایدہ مز؛ «بنابرین حکومت امور معنویہ ایله اشتغال ایدنلرک سعی و عملندن عمومه فائده ملحوظ ایسه و یا خودایلر وده فائده کله جک ایسه بونلرک قدر و مزیتلرینی بالتقدیر درجه لرینه کوره کندولرینه صورت دائمه و یا موقته ده معاونت ایتلیدر؛ چونکه کوردیکمز ترقیات بوکی ادملرک کوشه انزوایه چکیلوب چالشمسندن ایلر وکلشدر» مثلاً بر محله چکیلوب او قویه او قویه جراثقال فننده مهارت کسب ایتمش و بوندن بر حقیقت میدانہ کتور مکہ موفق اولمش ادملره البته ممکن اولدینی قدر معاونت ایتلیدر، «اوت ! ممالکی متمدنه کوردیکمز ترقیات علمانک بوسعی سایه سنده در، بونلرک بالکمز مکانیق فننده کی بهرلری سایه سنده اوله رق برالت بیک ادمک کوره جکی ایشی کوریور، انسانلر ارتق بویله التک بر ناظری مثابه سنده در، اولاری بوالات مقامنه

اسير قوللانيرلر ايمش ! شمدى الات اسرا يرينه قائم اولدى !
زمانمزد علم سايه سنده هر فرد اغا وافدى اولدى، الات وادوات
اسير يرينه قائم اولدى؛ ايشته بوجالار، حكومتك معاونتنه محتاجدر
ديدكمنز ادملك همتريله وقوعه كمشدر. واقعا ايش ايشلك
زمانمزد بتون بتون بشقه شكله كيرمشدر، بوده علوم طبعيه
ومنجقيه نك ترقياى سايه سندهدر؛ اسكى زمانمزد انسانلر اللريله
ايش كوررلر وبعضا ساده صورتده صو وهوايى دخى قوللانيرلر
ايدى؛ لکن ماكنلر چيقهلى وعلوم وقون ترقى ايدملى چوق
شيلر حاصل اولدى؛ الات وادوات استعمال اولغايان محللرده كى
ثمرات ومحصولات انسانلر قوتلريله متناسبدر، لکن الات قوللان-
نيلان يرلرده ثمراتك حصوله كلى انلر الات وادواته متعلق
علوم وقوننده كى مهارتلى نسبتندهدر؛ مثلا برمملكته قاچ كشى
بولنور ايسه الت استعمال اولنقسنزين اوقدر كشيلىك ايش كوره
بيلورلر، لکن ماكنه قوللانيلورسه ماكنه نك درجه قوتنه كوره
ايش ميدانه كلور؛ شمدى زمانده انسانلر علم واسطه سيلاه
قواى طبعيه نك آمر ومديرى مئابه سندهدر؛ غير متمدن ادملر
قواى طبعيه نك تحت حكمنده بولنور وحيوانات وحشيه نك،
صولرك، هوا وروزكارك مغلوبى اولور، فقط متمدن آدملر
او كى شيلره غلبه ايدر؛ اوللرى انسانلر ياپدقلى اك اغر
شيلرى شمدى ماكنه ياپديريورلر، انسانلر عاداتا بخاره، صويه،
الكترقه وسائر قواى طبعيه شويلاه ياپ ديو امر ايديورلر؛

انسانلر بربرلرینه معاونت ایتک لازم کلور ایکن ، مقدملری
 بر اغا و بردره بکی برطاقم بیچاره لره ظلم و قهر ایدرک یرلرینی
 ضبط ایدر وانلری کندی ایشنده چالشدیرر ایدی : زمانزده
 نوع شریف انسانک قدری اکلاشلدی ، بوقنالغک اوکی الندی ؛
 علوم و معارفک ترقیاتی سایه سنده یکدیگرینی قوللانمق یرینه
 اتفاق ایدوب موجودات سائرہ یی اسیر مقامنده استعمال
 ایدیورلر ؛ اسکی زمانلرده حاکملر و برطاقم جبارہ مادونلرنده
 بولنان آدملری ایشلرنده قوللانورلر و کندی موقع و درجه لرینی
 ایش ایلہ مشغول اولمقدن اعلا کورلر و اوتوروب یالکز امور
 سیاسیہ و علوم ایلہ اشتغال ایدرلر ایمش ، اشته بوزمانده ظن
 اولنورکہ عموم خلق اسکی وقته کی افندیلرک حائر اولدیغی
 مرتبه یه واصل اوله جقدر ؛ و اولوقت بتون امور مادیہ یی قوای طبیعیہ یه
 کوردیره جکلر و کندیلری دخی علوم عقلیه و معارف ایلہ اشتغال
 ایلہ جکلردر ، مدنیت جدیدہ نك ارزو اولنان محصولی بوندن
 عبارتدر . فقط بو حالده دخی بر محذور قوی وارد ریغی ﴿ بوالات
 وادواتک بوقدر فائده سیلہ برابر برده مضرتی وارد ﴾ که انک دفعی
 چاره سنہ باقلیدر ؛ ﴿ چونکہ بو یکی اصول و بوترقیات برالات
 استعمالنک و برده تقسیم اعمال و مساعینک تیجه سیدر ؛ ﴾ اگر
 تقسیم اعمال قاعده سی اولسه محصولات بهالی اولور ؛ ﴿ مع مافیه
 تقسیم اعمالک بر مضرتی اولوب بوده برکشینک یالکز برایشه
 اختصاصیدرکہ مدت عمری بونکله کچور ، ﴾ مثلاً کبریت

فابریقه سندم عملہ نک بری تختہ یوتمق، دیگرى فوسفور و آخرى
 کبریتہ باترمق و سائر لریده بویله برجہت ایله مشغول اولور،
 و كذلك بر ایکنہ یامق ایچون یکر می اوتوز عملہ استخدام اولنوب
 بونلرک ہر بری برایش ایله اشتغال ایدوب کیمی تل کسر و کیمی جلا
 ویرر، والحاصل ہر فابریقہ دہ عملہ دن ہر برینک کندیہ
 مخصوص و معین برایشی وارد رکہ انحق انکلہ مشغول اولوب
 بشقہ برایش ایله مشغول اولہ مز، ﴿ و بویله دائماً بر شیلہ مشغول
 اولان آدمک قوای عقلیہ سی ترقی ایدہ میور و ﴾ بلکہ قوای
 عقلیہ سی بالانحطاط ﴿ کندیسی عاداتا الت مثابہ سنہ تنزل ایدیور ﴾
 و انسائلر آلات حکمنده قالیور ﴿ ؛ بو حال ﴾ ایسہ انلری نعم
 دنیویہ دن محروم ایتک اولوب ﴿ عاداتا جبارہ قدامتک ضعف
 و اسرایہ ایتدیکی ظلم کبی اولیور ؛ انک ایچون عملہ قسمتی بویله
 بر جزئی شیلہ مشغول ایتما ملیدر ؛ ﴾ حتی عملہ بوکا موافقت
 و بویله برر ایشلہ مشغول اولغی ارزو ایتسہ بیلہ ہر کسک پدر
 مشفق اولان حکومت راضی اولما ملی و ہر برینی موقت مدتار
 ظرفندہ بشقہ بشقہ ایشلرلہ مشغول ایتمکہ و علم و ادب تحصیل
 و قوای روحانیہ لرینک توسیعی ایچون عملہ یہ مناسب بروقت تعین
 ایتلکہ ہمت بیور ملیدر. الحاصل بو محظور عظیمک دفعی چارہ سنہ
 باقلیدر، بو حالک چارہ سی بولنمز و بویله جہ دوام ایدرسہ انسانلرک
 قسم اعظمی الات مثابہ سنہ تنزل ایدر و عاداتا اسکی زمانلردہ کی
 جبارہ وقتی کبی اولور .

۱۱۳ — (زمانزده مادی اولان ایشار علوم طبیعیہ و منجیقہ نك ترقیاتی سایه سنده بتون بتون بشقه شکل ورنکه کیردی ؛) اوت ! ترقیات حاضرہ صنایع علوم مذکورہ سایه سنده میدانہ کیشدر ؛ (واقعا بزده علم اربابی بشقه درکه بونلر یالکز علوم دینیه و عملیه نك نظاریاتیه مشغول اولوب عملیاتدن بی بهره در ؛) فلاحت و صنعت و تجارت کی (عملیات دخی علوم و فنوندن بی بهره کیمسه لرك النده قالمشدر) که ترقی ایدہ مز ؛ (اوروپاده ایسه ارباب صنعت دخی اولدجه او قویوب کسب معلومات ایتشلر در وارباب علوم دخی) درلو درلو واسطه لار ایله (کشفیات فنییه موفق اولدجه میدانہ قور وارباب صنعتده بوندن استفاده ایدر ؛ دیمکه علوم دخی صنعتله برلشمشدر.) و همدہ برلشمسی و هله علمانك ارباب صنعتہ رهنمالق ایتسی مقتضیدر . (انسانلر اشته بو علوم واسطه سیله قوای طبیعیہ نك آمری) حکمنده (در) یعنی بتون قوای طبیعیہ یی کندیلرینه مطیع بر خدمتکار کی استخدام ایدیورلر . بوجهتله (فضائل و مزیات انسانیہ یی حائر اولنلر بو علوم و فنوندن بهره دار اولنلر در ، بوندن بی بهره اولنلر ایسه بو آمرلك صفتی حائر اولدقدن) یعنی قوای طبیعیہ یی خدمتکار کی استخدام و استعمال ایدہ مدکدن (ماعدا بلکه کندیلری بونلرک یعنی قوای طبیعیہ نك اسیری اولور . اسکی زمانده انسانلرک بالذات زحمتله کوردکلری ایشلری شمدیکی انسانلر قوای طبیعیہ یعنی قوۃ الکتریقیه والات وادواته کوردیریور ؛) مثلا مکتوبلر مقدماتا تارایله کوندریلور

ایکن شمعی الکتریک واسطه سیله کوندریلیور. ﴿بو کیدیشه دها زیاده ایلر ولیه جکدر. خلاصه انسانک ذاتنده اولان استعدادات فوق العاده نك رهبر لکیله کنندینه لایق اولان مقام عالی یه واصل اوله جقدر. اسکی زمانده انسانلر بو علومدن بی بهره اولدقلری جهته قوای طبیعی بی مأمور ایدمه دکلی کبی قواعد حقوقدن دخی بی بهره اولدقلرندن بر لرینی استخدام وبری دیکرینی اسیر حکمنه وضع ایدر﴾ و بو صورتله انسانه مخالف طبیعت اوله رق ظلم و حقارت اولنور ﴿ایدی یعنی خلق ایکی فرقه و طرف اولوب بر طاقی افندی و بر طاقی اسیر ایدی؛ اسیر لک طبیعت انسانیه ده مرکوز اولان ترقیاتی وجوده کتورمک ایچون و قتلری یوق ایدی. زمانزده هر کس سربست اولوب﴾ صورت مشروعه ده استدکلی شیلر ﴿و علوم و صنایع ایله مشغلدلر و قوای طبیعی دن آمرانه بر صورتله استفاده ایدلمکده در. فقط بونک محذوری دخی تقسیم اعمال قاعده سنک نتیجه سی اوله رق هر فرد بر عمل ایله مشغول و برالته مربوط اولمغله الت انک اسیری اوله حق یرده او، التک اسیری اولمقده در؛ بونک چاره سی عمله قسمی﴾ دائماً قوای ماده لری ایله مشغول اولیوب بونلر ﴿دخی قوای روحانیه لرینی توسیع ایچون کندیلرینه میدان و یرمک و بو باده کی وسائط لازمه استحضار ایدلمک و الحاصل عمله نك دخی دوشمنکه و اوقومغه وقتی اولمقدر.﴾

§ ۱۱۴ — ﴿اسکی زمانلرده مادی ایشلر پک محقر عد اولنور﴾ و یوکلردن هیچ بری اکا تنزل ایتمز و هیچ بر عالم

زراعت، صنعت و تجارت میل و رغبت انلز و بونلری کندینه ذل و حقارت عد ایدر ﴿ ایدی. از جمله هندستانده عموم اہالی درت صنفہ تقسیم اولمشیدی: بر صنفی حکومت مأمور لریدیکہ صنف شریف ایدی، ایکنجی صنف علما، اوچنجی صنف اهل فلاح و زراعت و دردنجی صنف دخی ارباب حرف و صنایع ایدی؛ بوارباب حرف و صنایعك قیتی انلرك نظرندہ پك دون و محقر ایدی، حتی بونلرك براہا تسمیہ اولنان بر معبودلری اولوب اعتقاد لر نجہ ہر صنف او معبودك بر جہتندن چیقمش فرض او۔ لندیخی کبی ارباب حرف و صنایع دخی اول معبودك جہت سفلا۔ سندن چیقمش فرض ایدیلور ایدی؛ ﴿ خلقك بویلہ درت قسم اولسنہ قاست Caste اصولی تعبیر اولنوب بوقاعدہ ایجابنجہ ﴿ بر صنفدن دیگر صنفہ کچمك جائز دکل و بونك مقتضاسی اولہرق ایش ایشلمك بیوک ادملرہ لایق کورلمز ایدی.﴾ الحاصل اوائلدہ اهل زراعت و فلاح و ارباب حرف و صنایع پك محقر طوتیلور و حر اولان ادمہ کورہ انلر ایلہ اشتغال ایتك لایق کورلیوب یالکز اسرایہ تخصیص ایدیلور ایدی؛ حتی بزده بیلہ اولوقتلردہ العز فی نواصی الخیل * والذل فی اذناں البقر یعنی عزت آتلك ناصیہ لرندہ و ذلت اوکوزلرك قویروقلرندہ اولوب آتہ راکب اولان عسکری طاقتی وامثالی عزیز و محترم و اوکوز پشندہ طولاشان ارباب زراعت ذلیل و محقر اولور دیو شہرت

بولمشیدی که الیوم بیله بتون بدوی عربلر عندنده بر قاعدهء سالمه کبی جاری و مرعیدر .

۱۱۵ — ﴿ ایشلمکه حق اولمق ایله ایشلمه حق آیری آیری حقلر اولدیغندن بونلری یکدیگرینه قارشیدر ماملیدر : ایشلمکه حق اولمق ایشدن کیمسه نی منع ایده مامکدر ﴾ یعنی هیچ بر فردک دیکرینی ایش ایشلمکدن منعه حق اولما مقدر ﴿ ؛ ایشلمه حق ایشک وجودی و تنظیی ایچون لازم اولان احوالک هیئت مجموعه سیدر . ایشلمکه حق اولمقلغک تفصیلاتنه کلنجه بوحقه ایکی جهتدن نظر اولنور : بری افراد و دیکری هیئت اجتماعیه نقطه نظرندن باققدردر . افراد نقطه نظرندن باقلدقده هر فردک الندن کلان مشروع ایشی ایشلمکه حق واردر ؛ ﴿ بونی کیمسه منع ایده مز ؛ ﴿ چونکه طبیعت انسانیه نک توسع ایتسی وانسانک کسب کمال ایتسی و حتی یشامسی بوکا متوققدردر ؛ ﴿ بونکله هم سرمایه حیاتمزی کسب ایدرز و همده قوامزی توسیع ایلرز و بزم بر طاقم احتیاجمز اولمسی وانلری دفع ایتک ایچون الله بر طاقم الات وادوات یعنی اعضا و جوارح ویرمسی بوحقه دلالت ایدر ؛ بنابرین بر آدمی ایشدن منع ایتک یا خوداکا ﴿ ایش ایشلمه دیمک «سن یشامه ، اول» دیمک ﴿ اولدینی کبی اراده الهیه مخالف ﴿ در. ﴿ ایشلمه حق ایکی قسمدر : برنجیسی افرادک ایشلمده حر و سربست اولغفه حق اولمسیدر ؛ ایکنجیسی افرادک ﴿ ایش ایشلمده مختار اولمقلغی کافی اولوب ﴿ ایشلری ﴿ صنعتلری ﴿ ایوجه یامق ﴿ و تحویل

ایتمک و ترقی ایتدیرمک ﴿ ایچون لازم اولان وسائط واسبابک
تهیه ایدلمسنى طلب ایتمکه حق اولمقدّر. دیمک که تربیه عمومیه دن
بشقه هرفردک قابلیت مخصوصه سی توسع ایتمک و ظهوره کلوب
ترقی ایتلک ایچون برطاقم مکاتب صنایعک دخی تأسیسی لازمدر. ﴿
اما تربیه عمومیه مطلقا انسان اولدینی ایچون برحقیدر؛ تربیه
عمومیه دن صکره دخی هرفرد کندى صنعتک موضوعنى وایش
ایشلمک و سائطنی بولمغه و اوکرندیكى صنعتى اجرايه حقلیدر .
﴿ هر برهیئت اجتماعیه ده ایش اکسک اولمز؛ ﴾ وهرکس کندى
صنعتک موضوعنى سهولتله بوله ییلور؛ چونکه علوم و صنایع
وزراعتک حرکت و ترقی میدانی غیرمتناهیذر؛ ﴿ اکر برمملکتده
ایش اکسیلور و یاخود ایش بولنمز ایسه بو حال طبعی بر حال
اولیوب اول مملکت خلقی مدنیجه حد لایقه واصل اولمامش
دیمک اولور، چونکه ایش اولماسى جمعیتک مدنیجه ناقص
اولمسندن نشأت ایدر . بوایشسنزلک اکثریا اختلالدن، بحراندن
ایلروکلور، بوده بصیرتسنزلکدن و انتباهسنزلقدن تولد ایدر؛
بویله بر حال وقوعنده عاقل حکومتلر ایکی مقصده مبنی بونک
چاره سنه باقرلر؛ بومقصدلردن برى خصوصى و دیکرى عمومیدر:
مقصد خصوصى ایشسنز و کوچسنز قیلانلری آج و بیعالاج ﴿
یعنى معرض تلفده ﴿ براقق لایق اولدیغندن و مقصد عمومى
دخی بواجلق سائقه سیله جبرایمک وقوعنى منع ﴿ یعنى عموم هیئت
اجتماعیه نك منافعی بر قاندها محافظه امر مهمنه اعتنا ﴿ ایتمکدن

عبارتدر؛ فقط صدقه طریقہ اولیٰ ایچون دولت انلری کندی
منفعتہ اولہرق اعمالات نافعہدہ استخدام ایدر.

بویانات شخص یعنی افراد نقطۂ نظرندن ایدی، (اگر
ایشہ جمعیت نقطۂ نظرندن باقیلورسہ ایش ایشلہ حق اولا
ایش ایلہ ایش ایشلیانلر ارہسندہ موافق حقانیت برنسبت بولمق،
ثانیا محصولات و معمولاتک ممکن مرتبہ کوزل یاہلسنہ دقت ایتک،
ثالثا بوتدیرلر ایلہ بربحران صناعی وقوعنی منع ایتک ایچون
حکومتک اتخاذ ایدہجکی تدابیرک ہیئت مجموعہسیدر. حکومت
بوتدیرلری اتخاذ ایتمش اولمق ایچون عملہ و چوجقلرک ایش
ایشلہلرینہ دائر اوقات معینہ تعیین و تخصیص ایدملیدر؛ چونکہ
بعض تبیل ادملرکوندہ اون ساعت چالشمغہمقتدرایکن ازچالشدقلری
کبی بعض طمعکارلردخی وجودلری مساعد اولیہجق صورتدہچوق
ایشلرلر وچوجقلرہ حدلرندن زیادہ ایش کوردیرلر، بونلرہدقت
ایدوب بوقاعدہ محتہالملیدر؛ محاکم عادیدن بشقہ (اهل زراعت و صنایع
و تجارتہ مخصوص محاکم و محافل لازمہ تأسیس اولنہرق بونلرک
حقوق و منافع خصوصیلری محافظہ ووقایہ اولنمایدر؛) چونکہ ہر
شیئک ایولکنی و فنانغنی اربابی بیلہ جکنیدن بونلرہ متعلق خصوصیات
ارباب زراعت و فلاح و صنایع و تجارتدن اولیانلرہ حوالہ
ایدیلہجک اولسہ برکونہ فائدہ حاصل اولمدقندن ماعدادلو درلو
مضرترلر ظہورایدر، اشته تجارت محکمہلری، یرودم مجلسلری،
تجارت و زراعت اوطہلری کبی شیلربومقصد اوزرینہ تشکیل

اولنور؛ «فابریقه لرك قواعد صحتہ موافق اولمسنہ» یعنی موقع و كرك
 هواجه صحت عملیه مضمر اولما مسنہ «نظارت اولنمیدر؛»
 چونكه حكومت افرادك هر درلو حقوقی محافظیه مأمور
 و مجبوردر، صحت و حیاتہ متعلق حق لرایسہ حقوقك اییوكلریدر؛
 «محصولات و معمولاته فساد و حیلہ و خدعه قارشیدر لمامسنہ
 دقت» و بو خصوصك اسبابی تهیه «ایتمیدر، فقط
 بونلری پك زیاده تضییق التہ قوماملیدر» و ممكن مرتبه بونلره
 متوسط بر حالده معامله اولنمیدر، چونكه بوبایدہ کی تضییق
 و شدتك محذورلری واردر، از جمله باشه چقیله من و حكومتجه
 چوق مشغولیتی جالب اولور كه علم ثروتنده طول و دراز بحث اولنمشدر
 «و هر صنفده تقدیر عمله واردر و تقدیر معمولات و جوده كلیور بونلری
 ایوجه دقتله تحقیق ایتملی و هر سنه نهایتنده بر ایستاتستیقنی نشر ایتمیدر.»
 ایستاتستیقك فائده سی شودر كه محصولات و معمولاتك نه مقداری خارجه
 چققدینی و نه مقداری داخلده صرف و استهلاك اولندینی و هر
 صنفده بولنان عمله ایله او صنفدن چقان و چیقمنی مطلوب
 اولان محصولات و معمولاتك مقداری میدانه چقارسه عمله دن
 هربری كندینه مناسب صنفه دخوله مباشرت و اكاكوره حرکتی
 تعدیله غیرت ایده جگی كبی كرك بونلری استخدام ایدن فابریقه جیار
 و امثالی و كرك حوایج و لوازماتی تداركه مجبور اولان سائر افراد جمعیت
 دخی اخذ و اعطا و تجارت و سائر بونلره مماثل حرکاتی تعدیل و اصلاح
 ایدر. اشته حكومتك ایش ایشلك حقنده کی وظائفی بومقوله احوال دن

عبارتدر. افراد اهلینک حکومتدن ایش استمکه حققری یوقدر،
 زیرا اهالی ایچون ایش بولق حکومتک هم وظیفه سنک و همده
 اقتدارینک خارجنده در. ایش ایشلک وایش بولق افرادک
 منافع خصوصیه سندندر؛ حالبوکه حکومت افرادک یالکز منافع
 عمومیه لرینی درعهده ایتشددر؛ بو سبدن وظیفه سندن خارجدر.
 اقتدارینک خارجنده اولسی دخی شو جهتهلدرکه حکومت بر
 شخصه «کل فلان کیسه یه اودون لازمدر کتور» دیسه اول
 شخص کتورمز، جبر ایدر ایسه حقوقه تجاوز ایله ظلم ایتمش
 اولور؛ اگر کار و ضرری عمومیه عائد اولق اوزره فابریقه لر
 کشادینه قالقسه اولوقت اشتراکیون مسلکینه کیدلمش اولور. اشته
 بوکجه حرکاته قالقشتمق افرادک حقوقه تجاوز دیمک اولوب هر
 کسک تلقاء نفسندن کلهجک سعیلری ابطال ایدر و نتیجه سی
 ترقیاته مانع اولور.

۱۱۶ — (ایشک ضدی اویونددرکه) عربجه لهو
 ولعب تعیر اولنور و (ایکی درلودر: برنوعی ممنوع و حرامدر؛
 دیگر نوعی مباح) یعنی جائز و مشروعیت صفتی حائر (اوله.
 بیلورکه خیر استحصالیچون قوامزی ایوجه استعمال ایتدکدن
 صکره انلری وباخصوص قوای عقلیه مزی کندی حالنه براقق)
 وراحت ایتدیرمک (نیتله اولنلردر.) اباحنی فتی السطریج وهو
 الشافی فحواسنجه امام شافعینک سطرینج اویوتتی مباح کورمسی
 بو حکمته مبنی اولمیدر؛ زیرا شریعت اسلامیه لعب ولهوی تجویز

بیورمز . جائز اولیان او یونلره کلنجہ (اکر) او یون ایش
مقامنہ قونور یعنی (قوای روحانیہ و جسمانیہ مزی برایش
ضمنندہ استعمال ایتک ممکن ایکن بونی ترک ایدوبده انلری او یونلہ
اشغال ایدر ایسک جائز دکلدر وبو خصوص حقمزده هم نظری
وهم عملی اوله رق مضر اولور و بعض فاسد تیجہلری انتاج ایدر؛
چونکہ عاقل آدمک بتون حرکتلری معلل بالاغراض) الحسنہ
یعنی فائده و حکمت تحتدہ (اولمیدر ، هر بر آدمک حرکتیکہ
بر مقصدہ مبنی اولیہ بیهودہ) اضاعه وقتدن عبارت (در)
و کندوسنہ عاقل و کامل دنیلہ مزی. (بو او یونلر پاره او یونی یعنی
قمار اولمز ایسہ بویله جہدر ؛ اما قمار) یعنی یکدیگرندن برشی
قزائمق نیلیلہ (اولور ایسہ دها زیادہ مضر وفنادر ؛ چونکہ)
یالکر اضاعه وقتی موجب اولیوب (ضمنندہ غائب ایتدیکی
حالدہ مالا دخی ضرر دیدہ اولمق و قزان دینی تقدیرده غیری
اضرار ایتمکدر) کہ عاقل اولان نہ وقت و مال اضاعہ سی جہتی
ونہدہ منفعتی دیگرک مضر تندہ ارامق دنائتی قبول ایدہ مزی .
(قمارک ممنوعیت وعدم جوازینہ بوسیلمک یالکر بری کافیدر .
قمار حد ذاتندہ بویله مذموم اولدقدن بشقہ ایکنجی مرتبہدہ
بعض فنالقلری دخی موجب اولور : مثلاً سفاهتی ، بطالتی
جلب ایدر ، حیلہ کارلغہ سوق ایدر .) سفاهتی جلب ایدر ،
چونکہ قزانان بادھوا و سهولتله قزائمش اولمغلہ اولیلہ جہ بیهودہ
محللرہ بولبول خرج ایدر وانک عندندہ پاره پول کی اولوب

غير معتبر برنسنه حکمنه کيرر وبوجهتله سفاهته سبب اولور؛ بطالتي جلب ايدر، چونکه قمار مشغوليتي ايشه مانع اوله جفتدن وهمده برقاچ غروش قزانق ايچون ايشلمکه ارتق تترل ايتمه جکندن ﴿عطالته آليشور؛ حيله کارلغه سوق ايدر، چونکه زار کندوسنه مساعد اولدقجه رفيقني الداتمله تعديله قالقيشه رق حيله کارلغه اليشور.﴾ اشته بواسبابه بناء قمار اويوني کافه شرايع وقوانينده مذموم ومنوعدر. و﴿هيچ برحکومت بوکا رخت وپرمرز؛ بونکله برابر اوکي الله ميور؛ بونک منعي ايچون برچاره دوشونلشد، شويله که﴾ قماردن تحدث ايدن دعاوي هيچ برمحکمه ده استماع اولنمز. ﴿مثلا غائب ايدن فلان بنم شو قدر اچمه مي الدي ديو دعوي ايتسه محکمه رد ايدر، واقعا بوراسي حقسنر کي کورينور ايسه ده مجازات ايچون محاکم بومقوله دعوالري استماعدن منع اولنلشد.﴾ زمانمزده پياقتو اصولي واردرکه همان بوقيلدنلر؛ بوني بعض حکومتلر قبول ايدرلر ايسه ده عاقل حکومتلر بوني قبول ايتزلر و خزينه دولت ايچون بويله برمنع واردات ايتزلر﴾ که معقولدر؛ واقعا پياقتودن خزينه فائده حاصل اولور ايسه ده بوفائديه باقامليدر، چونکه دولت منع ايتمش اولديغي شيئي يعني قماري کندی يامش اولورکه وجوهله جائز دکلدر، برده هرکسي بوضورتله قزاندرمغه الشدير ميوب ثمره سعييله کچنمک طريقه سوق ايتليدر. ﴿بوايش ايشلمک حق افراده عائد اولديغي کي هيئتلره دخی عائددر؛

نته کیم اویون مثلاً قمار و بیانقوا افرادہ جائز اولدینی کی ہیئتله دخی جائز دکدر، كذلك افراد دائماً ایش ایشلمک وظیفه سیله مکلف اولدینی کی حکومتلرده بونکله مشغول اولمیدرلر .

فصل حادی عشر

حق مدافعه مشروع بیاننده در

۱۱۷ — ﴿ مدافعه La défense بر طرفدن وقوعبولان

تعرضدن کنیدی محافظه ایتمکدر . بومدافعه یا مشروع ویا غیر مشروع اولور . ﴿ بحق وقوعبولان بر معامله یه قارشو مدافعه هر وقت غیر مشروع اولور؛ مدافعه مشروع (La légitime défense) یه کلنجه تعریف اولنه جنی وجهله بوندن مقصد قانونه موافق اولان مدافعه در . ﴿ قاعده کلیه اوله رق هیئت اجتماعیه افرادینک یکدیگری علیه ویا حکومت مأمورلرینک افراد علیه بغیر حق وقوعه کله بیله جک تجاوزلرینک اوکی المق وواقع اولمش ایسه بونک مضرتی ممکن مرتبه دفع ایتک و متجاسر لرینی در دست ایله اجرای مجازات و تربیه ایتک حکومتک باشلوجه وظیفه سیدر . ﴿ متیقظانه طاورانه رق مغایر قانون جزا احوال و حرکات وقوعنه محل بر اقامق خصوصی ضابطه اداره و مانعه یه حواله اولنسی وضابطه اداره و مانعه نک وجود یله برابر اوکی افعال و حرکاته مجاسرت وقوعنده متجاسر لرینک در دست و برای محاکمه و مجازات

محاکمه تسلیم خصوصاً لرینک ضابطه عدلیه حواله قلمسی و بتخصیص محاکمک تشکیل و تأسیس ایدلسی و بوجه قوانین و نظامات یانلسی هپ اووظیفه حکومتک تسهیل اجرایی مقصد منفردینه مبتیدر . ﴿ انک ایچون هیئت اجتماعیه تحتده یشایانلر، علمهارنده وقوعبولان تجاوزاتی کندیلری دفع ایتمه یعنی کندی حقلرینی کندیلری احقاقه مقتدر دکدرلر . فقط بعض حالات واردرکه بر انسان کندی حیاتی، یا صحتی، یا عرضی، یا مالی و یا ناموسنی تهله و مخاطره ایچنده کورر و حکومتک معاونتی انتظاره وقت اولمز، بوصورته چاره و تدبیر بجاتی کندی بولمق لازم کلور ﴾ یعنی بونلر کندینه عائد اولور . مثلاً بری بغته اوزرینه هجوم ایدیورر، اولوقت حیاتی یا ناموسنی وقایه ایتمک کندی همته قالور، الندن کلدیکی قدر هجومک دفعنه چالیشور . ﴿ اشته مدافعه مشروعه دیدیکمز بوکبی حاللره مخصوصدر . و بوبابده حل اولنه حق مسائل بومدافعه مشروعه نک حق طبعی ﴾ یعنی ذاتی و خلقت انسانیهده موجود بر حق ﴿ اولوب اولمدینی و بوحق محدود ﴾ و برقیدله مقید ﴿ و یا غیر محدود ﴾ و مطلق ﴿ اولوب اولمدینی و بویله حیاتمز تهلهکده اولنجه متجاوزک عمداً قتلنه قدر کیدمک و بوکا مدافعه مشروعه دینلک جائز اولوب اولمه جنی مسئلهلری اولدیغدن بونلری بیلک ایچون مدافعه مشروعه حقنی خلاصه تعریف ایدلم : حق مدافعه Le droit de defence انسان کندی حیاتی، صحتی، عرضی،

مالی و ناموسنی محافظه ایتک ایچون قوانینه و تعیر دیگرله حکومته مراجعته وقت اولمדיنی حالده کندی قوای جسمانیه سنی استعماله حق اولمقدر، شوراسی بیلتلیدرکه ناموس افعال جسمانیه ایله تهدید ایدلمش اولماید، یوقسه قول ایله اولورسه اولوقت مدافعه جائر دکلدر، بوراده مشروعتک موقوف علیهی بودر. ﴿بو وجهله تجاوز و قوعنده﴾ (بو حق مدافعه مشروع Le droit de légitime défense بی استعمال هرکس ایچون مسلد، حتی بو مدافعه مشروع حقی کندی نفسنه منحصر دکلدر، بوکی احوالده معاونت قصدیه اقباسنه وسائر افراده دخی شامل اوله ییلور. ﴿یعنی اقربا و یا سائر دهن برینه بویله تجاوز و قوعنده معاونت جائردر؛ واقعا بو معاونت بروظیفه اولمديغندن عدم اجرا سندن طولانی کمسنه مسئول اولمز، بلکه برحق اولدینی ایچون استعمال ایتدیکی وقت اندن طولانی عتاب ایدمز، احوالده کنیدی عاداتا ضبطیه لك و حاکمک ایتش اولور.

۱۱۸ — ﴿مدافعه مشروع اولمق﴾ و حق مدافعه بی استعمال تجویز اولنق ﴿ایچون اوچ شرط واردر: برنجی شرط تجاوز﴾ کندی تعیرندن اکلاشلدینی اوزره ﴿ناحق اولمیدر. نه حبس و یا توقیفی امر ایدن براعلام یا مذکره ایله بیان اولنماش ونده برحکومت مأموری طرفدن قانونه توفیقاً اجرا ایدلماش اولان تجاوز ناحقدر. بویله بیان واجرا اولنانلردن بشقه هر درلو تجاوز قوه جسمانیه ایله دفع اولنه ییلور. ﴿

اما مثلاً بر محکمه‌دن اخذ و توقیفه دائر صادر اولان اعلامی
اجرایه مأمور اولان ضابطان و نفراته قارشو مدافعه و مقابله‌ده بولنق
جائز دکدر . (ایکنجی شرط : انسانک حیاته، صحتیه
بر مخاطره کلکسزین تجاوزدن قورتلہ ممکن اولاملیدر .) یعنی
وقوعبولان تجاوزدن بلا مخاطره اجتناب ممکن اولماملی و مدافعه
مشروع‌دهن بشقه چاره بولناملیدر . (اکر انسانه توجه‌ایدن
دیگر طریقله قورتلق ممکن اولور ایسه ارتق اکا مدافعه
و مقابله بالمثل ایتمک جائز اولمز .) مثلاً قاحق ممکن ایکن
قاحیوبده مقابله ایتمک جائز دکدر ، و کذا تجاوز طبعیله مندفع
اولورسه یعنی متجاوز غضب حالده بر قاج ضربه اجرا ایتدکن
صکره تجاوزدن فارغ اولورسه ارتق مدافعه‌یه محل قالمز ، چونکه
مدافعه چاره‌سزلکن تجویز اولغشیدی ، بوضورتله تجاوز منقطع
اولدقن صکره مدافعه‌یه حاجت قالمیوب احقاق حق ایتدیرمک
ایچون وقت مساعد اولغله حکومته مراجعت اولنه‌بیلور ؛
متجاوزک تجاوز و ضربی ایله ناموسه خلل کلدی دیهرک مقابله‌یه
بر حق قزانيله‌مدقن ماعدا حقیقته بونکله ناموسه خلل کلز ،
چونکه ضرب ایدن ادبسزلک ایتمش اولور ، بالعکس متجاوزعلیه
متجاوز ایله اوغراشور ایسه بوراسی محل ناموس اولور ؛ الحاصل
بوکی یرلرده مدافعه‌نک مشروع اولسی ایچون تجاوزک غیر
منقطع و متوالی اولسی لازم در . (اوچنجی شرط : مدافعه‌نک
تجاوز ایله متناسب اولملسیدر یعنی تجاوزک دفعی ایچون لزومندن

لزومندن زیاده تداییر و وسائط قویه استعمال اولناملیدر. (اگر یوحد تجاوز اولنورسه مدافعهده ایلو و کیدلش اولور. (مع مافیه تجاوزه قارشو اتخاذ ایدیله جک تداییرک مقدارینی اولچوب بیچمک ولزومی درجه سنی تقدیر و تفریق ایتک اکثریا پک کوچدر.)

مثلا متجاوز علیه «واقعا متجاوز اوزریمه ایله هجوم ایتدی، لکن قوتلی اولدیغنه بناء بنی اولدیره جکنه وجدانا حکم ایتدمده قور. قدن سلاح ایله مدافعهیه مجبور اولدم» دیمک ممکن اولدینی کبی بو مثللو سوزلرک واقعه مطابق اولسیده محتملدر. اشته بونک ایچون ایش محکمهیه دوشنبه حقیقتی ظاهره اخراج وایوجه اثبات ایتک غایت مشکل اولور؛ حاکمدرده اکثریا مدافعهنک یولنده و بنا برین مشروع اولوب اولمادیغنی و متجاوز علیه مدافعه مشروع حدینی تجاوز ایدوب ایتدیکی تعییندن عاجز قالورلر.

بونک ایچون واضع قانونلر بویله مجاوزات متوالیهدن تحفظ ایچون اقتضا ایدن تداییرک اجراسنده ولایم کلان وسائطک استعمالنده متجاوز علیه برواسع میدان براقغه مجبور اولمشلردر یعنی متجاوز علیه بیکنه ودها زیاده شایان صحابت کوردکلرندن بونی التزامه مجبور اولمشلرده اومیدانی واسع و محافظه حدودینک تعیینی متجاوز علیهک انصافه براقشیلر و درجه مشروعیتک تعیینی ده حکامک وجدانه ترک ایتشلر یعنی قانونا صقی برحد تعیین ایده مامشلردر. بناء علیه وسائط مدافعهنک وسعتی و بونک صورت استعمالی حقوقه تعلق ایتکدن زیاده اخلاقه متعلقدر،

اوليه ايسه مدافعه نك دخی حد مشروغنی تجاوز ایدوب ایتدیکنی
تقدیر ایتك حكامك وجدانه وانصافه حواله اولنور، اول
استعمال تدایرك درجه سی متجاوز عایهك محاکمه ده بونك تقدیری
حكامك انصافه حواله اولنشدرد. بوراسی هر تقدیر انصاف
و وجدانه ترك ایدلمش ايسه ده مطلق و غیر محدود دكلدر، بوكی
احوالده حكامك اصل نظر اعتنایه اله جقلمی شی متجاوزك تلفی
عمداً و یا من غیر تعمد اولوب اولمادیغنی بیلکدر، چونكه چوق
كره قتل من غیر تعمد واقع اولور یعنی متجاوز علیه متجاوزك
كندوسنی اعدام ایده جكنه وانی كندیسی اعدام ایتكسزین الندن
قورتیله میه جغه قناعت حاصل ایدرك متجاوزی عمدا قتل ایتسی
ممکن اولدیغنی كبی متجاوز علیه انشای مجادله ده سلاحنی
قتل قصدی اولمقسزین قوللانور ایكن متجاوزی من غیر تعمد
قتل ایتسی چوق كره واقعدرد، اكر حاكمك باقوبده قتلك
من غیر تعمد وقوعنه قانع اولورلر ايسه بوحالده فاعلی ذاتا
معذوردر و برده مدافعه ده بولندیغنی جهتله برقاتدها معذور اولد
یغندن بوراسی اسباب مخففه دن اولور. اكر قتل عمدا واقع
اولمش ايسه اصل حل اولنه جق بیوك مسئله ظهور ایدركه
حیاتمز تهلكه ده ایكن تجاوزندن قورتمق ایچون بشقه چاره
اولمادیغنی جهتله متجاوزی قتل درجه سینه قدر كتمك جائز میدرد؟
مسئله سیدرد. قاعده كلیه دركه كرك حقوقه و كرك اخلاقه عمدا
هتك بناء الله یعنی قتل نفس جائز دكلدر. علم اخلاق هیچ برحالده

انسانك بنى نوعندن برينى قتله حق اولمى قبول ايتمز، هر نه حالده اولورسه اولسون هدم بناء الله جائز دكلدر دير، چونكه اخلاق دائما ايولك ايتكى امر ايدر و كوتولكدن منع ايلر، حتى كوتولك ايدنه كوتولك ايله مقابله ايتماكى و بالعكس ايولك ايله مقابله ايتكى توصيه ايدر؛ چونكه علم اخلاق سراپا بر قاعده كليہ ديمكدركه كافه حرکات و سکناتده منفعت ذاتيه نقطه نظرندن باقليوب دائما اصول اخلاق قواعدينه رعايت ايدلمىنى كوسترر يعنى اصول اخلاق تعيين ايتدىكى وظائفى اجرا ايتكى امر ايدر، انك نظرنده مدافعه مشروع بيله يوقدر. فقط علم حقوقه اويله دكلدر، بر كيمسه حياتى مخاطرهده كوررسه مدافعه حق واردر. والحاصل متجاوز عليه بشقه چاره بوله ميوبده متجاوزى قتل ايدرسه علم اخلاق نقطه نظرندن غير معافدر، هم متجاوز وهم متجاوز عليه مسؤلد، فقط مسئوليترينك درجه سى متفا. وتدر؛ علم حقوق نقطه نظرندن باقيلنجيه بوشرائط ثلثه اجتماع ايتمش ايسه متجاوز عليه معافدر، بوندن طولايى مسؤل اولمز وحقنده بر كونه جزا ترتب ايتمز؛ يالكز قانون نفسنك مخاطرهده اولديغنى، قتلدن بشقه چاره اولمديغنى، مجاوزاتك متوليه ايدوكنى يعنى مدافعهك مشروعيتنى تدقيق ايله امر ايدر، حاكمركده بويابده اصل دقت ايدجكى شيلر بونلدر، بوشرطلر موجود ايسه متجاوز عليه متجاوزى قتل ايتسه بيله اصلا جزايه مستحق اولمز.

فصل ثانی عشر

حق تملك و تصرف بیاننده در

§ ۱۱۹ - (حق تملك و) تعیر دیگرله (حق تصرف

Le droit de propriété انسانلرك) من حیث الانسانیه حائر اولدقلری طبعی (حقوqlرینك اك مهمملرندن) و بناء علیه دولتلرك قانون اساسیلر ایله تحت تأمینہ المش اولدقلری حقوقدن (بریدر . بوراده علی العموم مال و ملك ایله طریق استحصالندن Des biens en général et du mode de leur appropriation

بحث اولنه جقدر: ذیروح اولان مخلوقاتك جمله سی طبیعتك سوقیله و یاخود فكر و ملاحظه ایله كندی خلقتلرینه موافق مقصدلرك استحصاله چالیشور ؛) حیات و صحتلری و تمامیت وجودلری نیه متوقف ایسه انی اله کچورمكه غیرت ایدرلر ، مثلا (كرك انسان و كرك حیوان اچیقنجه يمك یر ، صوصاینجه صو ایچر ، اوشورسه صیحاقر یر ارار ؛ بومقوله شیلری سائقه طبیعتله و بعض کرده ملاحظه اوزرینه یاپار ؛) مخلوقات ذوی الارواحدن نوع شریف انسان بومقوله احوالده یالكر سائقه طبیعتی رهنمای حرکت و دستور العمل طوتمزده اكثریا فكر و ملا حظله اوزرینه حرکت ایدر ، وهرنه یی ارزو ایدر ایسه آتی اجرایه و نیه محتاج ایسه آتی استحصاله بذل مقدرت ایلر ، حیوا . نات سائره ایسه بویله فكر و ملاحظه ایده میوب بوکی احتیاجاتی

سوق طبیعتله و نادراً ملاحظه اوزرینه اجرا ایدر. جمله مخلوقاتک هر نو عنده کوریلان استعداد انک بر مقصد اوزرینه یرادلدیغنی کوستر؛ نوع شریف ﴿ انسانکه جمله نك ممتازیدر و بونده مخلو. قانده متفرقا و اجزاء موجود اولان ﴾ قوی و حواس و کالات روحانیه و جسمانیه بر صورت منتظمهده ﴿ مجتمعا و بعضا کلیا مو. جود اولور ﴾ قوای روحانیه کلیا موجوددر و فقط قوای جسمانیه بویله دکدر، چونکه انسان ارسلان و فیل قدر قوتلی دکدر، لکن بونلره قوای روحانیه سیله غلبه ایدر، انسانده کائناتک انتظامنده بر تناسب و بر اتحاد و بر هم اهنلکک مقصدینی ایفا ایدر یعنی موجوداتی بر زنجیر فرض ایتسهک انسانده انک بر خلقه سی و بر ساعت فرض ایتسهک انسانده انک بر چرخه مثابه سندهدر، بالجمله ذیروح مخلوقاتک حیاتلری بونده کی متفاوت خلقه لر و چرخلر کیدر، انسانک اهمیتی بونلرجه دها زیادهدر، انسان بونلرک دها مکملیدر و کائناتک اک مهم بر التیدر و حتی بعضا انسان حیواناتک واسطه العقیدی اولور، چونکه انسان قوای عقلیه سنک ممتاز اولسی جهتیله جمله سنه حکومت و غلبه ایدر؛ اشته کړک انسانلر و کړک عموم حیوانات و موجود. دات سائر مادامکه موجوددر مطلوب الهیدر، بونلرک هپسی بردن کائنات دنیلان شیئی تشکیل ایدرلر، هر تقدیر بقالری محدود ایسهده ینه بقالری مطلوب الهیدر و مادامکه بوراسی تسایم او. لنیور بقالری اسبابی تملك ایتلری دخی مطلوب الهی اولدیغنی ﴿ الشئی اذا ثبت یثبت بجميع لوازمه یعنی برشی ثابت اولنجه جمیع

لوازميله ثابت اولور) قاعده کليه سنه بناء (تسليم اولمليدير .)
 § ۱۲۰ -) انسانك حيوانات سائر نككيلردن ممتاز

اولان حواس وقواسنه نظرا مقصدي دخي جمله نكندن واسع
 اولمق مقتضيدر ؛ بناء عليه تملك حق دخي انسانده سائر لرندن
 دهها زياده واسعدر .) يعني مثلا حيوانات سائر نك حق تملك
 براييه انسانكي بش اولمليدير .) فقط بوندن « انسانك
 حصول مقاصد چون سائر ذير و حرك مقاصدينك فداسي واحاسي
 لازمدر » نتيجه سني چقار مامليدير . الحاصل انسانك بقاسي
 مطلوبدر ، انسانده كائنات زنجيرندن برخلقه در ، كندى بقاسي
 اسبابي استمكه حق اولديني كي ديكر خلقه لر كده بويله حق
 واردر ، شوقدر كه انسانكي واسعدر ؛ فقط كندينك كني استحصال
 ايچون غير ككني فدا ايتما مليدير ، هر زرده كه كندينك مقصديله
 مادوننده كي مخلوقاتك مقصدلري بيننده اتحاد كورينور ايسه اكا
 رعايت ايتملي واختلاف كورينور سنه اندن اجتناب ايتليدير .)
 واقعا انسانده سائر اجزاي كائنات ايله تناسب وهم اهنكلك
 مقصديده اولديغندن بومقصدده رعايت ايتملي ويالكر كندى
 منفعتي دوشميبوب سائر حيوانات و نباتاتي وحتى جماداتي دخي
 نظر اعتباره المي وانلرك خلقترنده كي مقصدي اخلاص ايتما مليدير ؛
 كندى مقصدينك استحصال چون سائر حيوانات و نباتاتي بر درجه يه
 قدر اخلاصه مثلا حيواناتي نقيات وزراعت و صنايعده استخدام
 وبونلرك سود ويوك وتوي كي زواندنن وحتى جلود و لحومندن

بردرجهیه قدر حق و ارایسه ده مقاصد انسانیه ایچون غیرک مقصدینی کلیا احایه قالماملیدر؛ نته کیم بر خانه ده کی پدر خانه خلقک منافعی بردرجهیه قدر کندی منافعه فدا ایده بیلور ایسه ده هیچ بروقت کندی منفعتیون بونلرک منافعی احایه ایده مز، احایه ایتدیکی و یا خود یالکر کندی دوشندیکی تقدیرده او خانه ده انتظام قلمزده کندوسیده راحتسز اولور؛ بو سیدن انسان لزوم قوی اولدقجه حیوانات و نباتات و سائر مخلوقاتک منافع و مقاصدینه تجاوز ایتاملیدر، چونکه بالاده کی فرضمه کوره ساعتک وجودندن مقصد یالکر بر چرخ دکلدر، بو چرخک وجودی دخی هیئت مجموعه نک وجودینه متوقفدر؛ کذلک انسان آج قالدینی وقت بر حیوان تلف ایدوب اکل ایده بیلور ایسه ده بر حیوانی آج دکل ایکن تلف و یا سائر صورتله لزوم قویسی یوغیکن اضرار ایتاملیدر، از جمله لزومی اولدینی حالده آوه کتماملی و بیهوده یزه و یا صرف کندی کیفیون حیوانلری تلف اتماملی و یالکر کندی لزومی قدرینی صید اتملی و بوندن زیاده سنی تلف ایتدکدن بشقه الندن کلورسه انلرک مقصدلرینی ترویجه دخی چالشلیدر.

§ ۱۲۱ - «حتی بوقاعده کلیه» و مطالعاته «بناء»

بعض حکما «حیوانلرک اتلرینی یمک ایچون بونلرک ذبح و تلفنه انسانلرک حق اولدیغنه ذاهب اولدیلر؛ حکما دیرکه «بو حق اثبات ایتک براز مشکلدیر، انسانلر بویله شیلره عقللری

ایر مزدن اول باشلامش لر وبویله جه بینلرنده عادت اولش قالمشدر؛
 واقعا اوللری انسانلر وحشت حالنده حق وباطلی فرق ایتمز لر و دفع
 حوایح ضروریه ایچون کندیلرندن ضعیف بر مخلوق بولدقلری کی بوغاز-
 لیوب یرلر ایدی؛ اوزاغه کتیمه لم، الیوم بیله حبش اهلایسی اکثر یا لحوم
 حیواناتی چیک اولدینی حالده یرلر، پشور مزلر، اوروپا حکمدارلر ندنبری
 ایکی وحشی طوتدیروب تربیه ایچون جلب ایتشیدی، بو وحشیلر
 حیواناتی چیک چیک یرلر ایش، صکره تربیه لنوب اوکرمشلردر؛
 الحاصل مادامکه کافه مخلوقات الله یراتمشد و اره لرند تناسب
 وارد و هر یرینک مقصدلری وارد و بونلرک دائره سی بشقه-
 سنک حقنه تجاوز ایتماک ایله محدوددر حیوانلری کتنامایدر.»
 شو قدرکه صکره بعض حکما حیوانلری کسمکی رای ایتشلردر،
 لکن اثباتی مشکلدرد: بونلردن بعضیلر دیدی که «بوده مطلوب
 الهیدر، بو حرکت انسانک ترکیبی و خلقتی لوازمندرد؛ چونکه
 مجموع حیواناتک دیشلری ایکی درلودر، ایکی درلو حیوانات
 واردرد، برینه آکل اللحم یاخود کوشخوار و او برینده آکل
 الحشایش یاخود کیهخوار دینور؛ ات ییانلرک دیشلرینک شکلی
 بشقه در، اوت ییانلرک دیشلرینک کیده بشقه در» الله هر برینه
 کندینه مخصوص برنوع دیش ویرمشدر، «انسانلرده ایسه
 ایکی درلو دیشدنده یعنی هم اوت یمکه و همده درت کوشه لی
 اوله رق ات یمکه مخصوص دیشلر واردرد؛ مادامکه انسانده بو
 ایکی درلو دیشلر واردرد مطلقا آتده یمک ایچون یرادلشدر»

یعنی بو آلاته نظرا الله بزه هم اوت و همده ات یمکی جائز کور-
مشدر. « فقط بعضیلر بونیده جرح ایدرلر، حتی
» بر قانون طبعی واردر، وقتيله بئلهرك ات یمکه باشلا دیغمزدن
دیشلر من ات ییه جك شكه کیرمشر » دیمشدر. «
انسانك حیوانلری اكل اتمکه حق اولدیغنی اثبات
ایچون بعض حکما » بو عالمه نظر اولدیغنی وقت کوریلور.
که هر فرد بشقه سنك بقاسنی دوشمنیوب کندی منفعتی
دوشنور، دیگرلرینك حقوقنه اصلا باقز؛ مثلا دکرده کی
بالقلره باقلدقده کوریلور که بیوکلری کوچکلرینی اكل و بلع
ایدرلر، قرهده بولنان حیوانلرده بویله در، ضعیف و کوچك
حیوانلره تصادف ایدرلر ایسه تلف ایلرلر، حتی اغاجلرده بیله
بو قاعده جاریدر، بیوک اغاج اطرافنده بولنان کوچك اغاجلرك
بیومسنه ونشو ونماسنه مانع اولور؛ حاصلی دائماً قویلر ضعیفلری
کندی منفعتلرینه فدا ایتمکه درلر؛ اشته بو قاعده انسانده دخی
جاریدر » دیمشلر ایسهده بوکاده جواب ویره یورلرده « جبر هیچ
بر وقت بر حق تولید ایتمز » دییورلر. الحاصل بومسئلهده چوق
اختلافلر واردر. حکامدن قطع نظر « اشته بو حکمته منی بعض
مذهبلرده حیوان ذبح واکلی کلیا حرامدر، از جمله هندده بویله
مذهب اربابی الی یومنه هذا موجوددر. بعض طائفه لرده مخل
صحتدر دیهرك ات اكلنی تجویز ایتزلر و بعض اقوام دخی مخل
صحت دکلدردیو اکلنده بئس کورما مشلردر. » بو کی فکرلرده

اقلیمک وهوانک تأثیر کلیسی واردر، شویله که حیوان اتی یمک
استیمان طاقه‌لر صیحاچ مملکتلرده اولنلردر، بوده بولندقلری
مملکتلرک مزاجی اقتضاسندندر، اوپله یرلرده انسانلر ازیرلر
وانلرک طبیعتی اغدیة نباتیه اغدیة حیوانیه دن زیاده میل ایدر؛
اگر انلر صغوق مملکتلرده اولسه لر ایدی بوزهابده بولنلرلر ایدی،
دیمک اولورکه اوکی ادملر حقیقت نقطه سندن عموم نوع بشرک
منافعی ملاحظه ایتیوب یالکز کندی حاللرینی مقایسه ایدرک بویله
برفکرده بولنلشلردر. ﴿بوهندیلر مثللولرک خلافتنه کیدن طاقه‌لره
کوره﴾ وعلی الخصوص صغوق مملکتلر اهالیسنجه
﴿اتی یمک بر ضرورت حالنه﴾ و عاداتا بر طبیعت ثانیه حکمنه ﴿کیر-
مش اولدیغندن بونی ترک ایتک مشکل و بلکه ناقابلدر.﴾

§ ۱۲۲ — اشته انسانلرک منافعی ایله حیوانلرک منافعی
بینی تألیف اولنه بیلور ایسه دائماً اکا رعایت ایتلیدر؛
﴿انسانلرک وجودلریله حیوانلرک وجودلرینک بینی تألیف ایدمک
استیلور ایسه حیوانلرک خلقتلرینه مناسب معامله ایتک بلا شبهه
لازمدر؛﴾ حیواناته سوء معامله یی روا کورمیوب بونلرده
حسن معامله ایتلیدر؛ چونکه ﴿بونلرده حساسدر، بونلرده
لذائذی، شدائذی تمیزه مالکدر.﴾ حیوانلردن بشقه نباتات دخی
حسن معامله ده بولنلیدر، چونکه کافه مخلوقات یکدیگرنندن
ایرلیوب برسلسله اوزره کیدر؛ معدنیات ایله نباتات و نباتات ایله
حیوانات بیننده قطعی برحد فاصل یوقدر؛ اوت! موالیدثلث

يکديکرنندن ايرلزلر، اولاجادادن باشلار، کيدرك تباتاته واريلور، صکره حيواناته واريلور، ارهلرنده تميز ايدلمان شيلر واردر. الحاصل حس صاحبي اولنلره کنديلرينه مناسب صورتده معاملهده بولنمليدر. ﴿اشته بوملاحظات حکمييه مبنی متمدن طائفه بويله حيواناته ضننده بر فائده اوليه رقي تعذيب ايتديرمز، غندلرنده قوچ دوکوشی ممنوعدر، بر حيوانه تحمیلندن زياده يوك يوکتمک جائز دکلدر.﴾ حتی بعض ممالکده حيواناته مجاوز ايدنلره قانونا مجازات ايدرلر؛ مثلا بری استعمال ايتديکی حیوانی لزومندن زياده يورار ويا اکا حدندن زياده يوك تحمیل ايدر وياخود انی چوق يوريدر ويا ضرب وجرح ايدر سه محاکمه اولنه رق حقنده جزا ترتيب اولنور. بعض اشخاص مجردا کلنجه اولق اوزره حيوانلری بر بويله دوکوشديروب سیر ايديه يورلر، بو حرکت عادتاً غدارلق وقواعد اخلاق و حقوقه مغايردر، بونده اصلاً برکونه فائده ملحوظ اوليوب يالکز مغاسر تقاخردن عبارت قالور، حالبوکه انسانک وظيفه سی حیوانلر طبعاً منازعه و معارضه ايديجک اولسه بيله انلری بو حالدن منع ايتمکدر؛ انسانلر کنديلرينی حیوانلرک بيوکي وعقللوسی و حتی نوع شریفی عد ايدرلر ايکن بويله بر حرکتده بولنملری نصل تجویز اولنه ييلور؟ برپدر ايکی چوجغک مضاربه ايتملييه راضی اوليه جنی کي انسانلرده حیوانلرک بو حالته راضی اولماليدر؛ بو عادت اسپانیاده حالا موجوددر، اوراده طانهلری دوکوشديرلر، قارشولرينه

کچرلرده عادتاً تیاتروکی سیر ایدرلر ! اسکی رومالیلرده دخی کوله لرینی ویاخود قتله مستحق اولان جانیلری یرنجی حیوانلر ایله دوکوشدیرلرر وکندیلری سیر ایدوب اکئیرلر ایدی . اشته بوکی احواله نفرت ایله نظر اولنور ، بونلر کرک اخلاقجه وکرک حقوقجه غایت مذمومدر .

§ ۱۲۳ — بالاده عرض اولسان تفصیلاته نظرا انسانک مقصدی سائر مخلوقاتک مقصدندن بیوک اولدینی اکلالمشدر . بناء علیه ﴿ کره ارض اوزرنده انسانک ایشه یرایه بیله جک هر درلو اشیا وقوانک کافه سی هیئت مجموعه سی اعتباریله نوع انسان ایچون بر ملک مشترکدر . خلقت انسانیه نک درجه طبعیه سنه نظرا بوحق اعتباری برشی دکلدر ﴾ وبالعکس حقیقی وطبیعیدر . مادامکه خالق بزم ایچون بر طاقم مقاصد تعیین ایتش ویزی بر چوق شیلره محتاج ایتش ومادامکه کره ارض اوزرنده بولندیغمز حالده محتاج اولدیغمز شیلر اوراده موجوددر انلره مالک اولمقلغمز طبیعت اقتضاسنددر ؛ نته کیم آج وصوسز بر کیسه براوطهده قبالو قالور واوراده اتمک وصو بولنور ایسه بونلری بیوب ایچمکه اول کیسه نک حق اولور . ﴿ بو ملک مشترک اوزرنده ﴾ خلقت انسانیه نک درجه طبعیه سنه کوره مختلف صورتده و ﴿ مختلف درجهده تملک واقع اولور ، یعنی هر انسان حالزینه کوره بو ملک مشترکدن حصه دار اولور . ﴾ مثلاً بری اراضی یی قابل زراعت بر حاله

کتورر، دیگریده بر طاقم اغاجلری کسر و یا طاشلری طویلرده بر کلبه جک پیار، و آخر بریده اقرباسندن برینک وفاتیه حسب الوراثه اکا خلف اوله رق مالی آلور و یا خود بشقه بر شخص کندوسنه برشی هبه ایدر؛ الحاصل بونلر اول اراضیه، آغاجلره، کلبه یه، ماله و اشیایه بو صورتلره مالک اولورلر؛ اشته مختلف صورتلر (مختلف صورتده) دیدکمز بوا سباب تملکدن عبارتدر. كذلك (هر فردک کندینه مخصوص حق تملکی اولدینی کبی بر فامیلیانک، بر قبیله نیک، بر هیئت اجتماعیه نیک، بر نسلک و الحاصل عموم نوع بشرک حق اوله بیلور؛ اشته مختلف درجه) ده (بونلردن عبارتدر) مملکتلره، (اراضیه و میاهه متصرف اولوق جمعیت انسانیه نیک بو مختلف درجه لرینه وسطع کره نیک شکلنه کوره واقع اولور: مثلاً جزیره ده اولان انسانلر بشقه درلو و قرده ساکن اولنلر بشقه درلو تصرف ایدرلر.) کره ارضک سطحی جغرافیون عندنده بشه تقسیم اولنشدرکه اوروپا، آسیا، افریقا، آمریکا و اوسترالیا قطعه لریدر؛ لکن (علمای حقوق سطح کره یی عمومیتی اعتبارله اوچ بیوک قسمة تقسیم ایدرلر: برنجیسی اسکی دنیا Le vieux continent دوکه اوروپا و آسیا و افریقایی شاملدر، ایکنجیسی یکی دنیا Le nouveau contient دنیلان امریقادر و اوچنجیسی اوسترالیا L'Australie و تعیر آخرله فلنک جدید و یا خود جزایر بحر محیط دنیلاندر. بو اوچ قسمدن هر برنده ساکن اولنلر دیگر قسملره تجاوز ایتما لیدر.

عموما دکرلر و بونلره منصب اولان بیوک نهرلر (دنیانک اشبو قطعات و اقسام جسیعه سنی یکدیگره ربط و ایصال ایله عموم ایچون واسطه اختلاط اولدیغندن عموم نوع بشرک ملک مشترکیدر.) بوصولته عموم انسانلرک دکرلرده حق اولمغله دکرلر هیچ بروقت برهیئت اجتماعیه نك ملک اوله مز. قره لرده حدود طبعیه اراناق لازم کلسه اوراده حدود طبعیه نهرلر و ایرمقلر دکلدر بلکه بونلرک منبعلری اولان طاعلر اک زیاده غیر متبدل اولان حدوددر.

§ ۱۲۴ — (ملک تقسیمی La division des biens :

ملک اعتبارات مختلفه یه کوره برقاچ درلو تقسیم اولنه بیلور :

تقسیم اوله کوره ملک ایکی قسم اولوب بری ملک معنوی Les biens spirituels و دیکری ملک مادی Les biens matériels در؛ ملک معنوی خارجه وجودی اولیوب امور معنویه. دن اولان شیلدر، مثلا حق تألیف و حق اختراع کبی؛ ملک مادی محسوس اولان شیلدر، عقار و حیوان و متاع و نقد کبی؛ ملک مادی مرور زمانله اسکیر، محو اولور؛ ملک معنوی تقدیر زمان کچرسه کچسون مستهلک اولمز، بالعکس دها زیاده قیمتلنور.

تقسیم ثانی یه کوره ملک ینه ایکی قسم اولوب بری منقول Les biens meubles و دیکری غیر منقول Les biens immeubles در؛ منقول بر محلدن محل اخره نقلی قابل اولان شیدرکه نقود و عروضه و حیوانات و مکيلات و موزونات شامل اولور؛

غير منقول محل آخره نقلی قابل اولياندر، خانه و اراضی کبی؛
 بوقاعده نك مستثنای اوله رق بعض شیر منقول ایکن غیر منقوله
 مربوطیتی جهتیله غیر منقول عد اوانور، بر چفتلکده بولنان تیمور
 باش حیوانات کبی؛ ﴿ کذلک بعضا منقول شیرده اهمیتته بناء
 غیر منقول معامله سی اجرا اولنور، مراکب بحریه کبی. ﴾ تقسیم
 ثالثه کوره ملك کذلک ایکی یه منقسم اولوب برینه عین Les biens
 non fongibles و دیگرینه دین Les biens fongibles دینور
 (یا خود دینه بیلور)؛ عین معین و مشخص اولان شیر، بر خانه،
 بر آت و بر کتاب کبی؛ دین غیرک ذمتدم بولنان شیر، کرک
 اچه اولسون و کرک سائر اولسون. ﴿

§ ۱۲۵ — ﴿ ملکک ماهیتی: ملك مادی یه متعلق اولان
 حق « بر شخص طبیعی و یا معنوی نك ملك مادی یی تحصیل و محاف
 فظه و استعمال و آخره ترك و تلف ایده بیلکه اولان اقتدارینك
 هیئت مجموعه سیدر » دیو تعریف اولنه بیلور. بوملك دیدیکمز
 شی امور مادیده شخصیت انسانیه نك ظلی و یا عکسی و یا لوا
 زمندندر. یعنی انساندن غیر منفکدر، اگر انساندن آریله حق
 اولسه شخصیت انسانیه ده قالمز؛ کراتله سبق ایتدیکی وجهله
 انسان حیاتی، صحتی، و تمامیت وجودینی محافظه یه حقل و مجبور
 در، بوحق و بوج الحق ملك ایله استیفا و ایفا اولنه بیلور،
 او یله ایسه بوحق ملکیت دخی انسانك بر لازمه ممتنع الانفکاء.
 کیدر. انسان بر شخص فرد، قائم بالذاتدر و بر نفس ناطقه صاحبدر.

مادامکه انسان بر شخص فرددر، قائم بالذاتدر کندی شخصیه
 بعض اشیای ماده بیننده برمناسبت تأسیسنه حق واردر. اومنا.
 سبت دخی «بوشی بنمدر» دیمکدر یعنی بن اکا مربوطم، او بکا
 مربوطدر یعنی بتغزده مناسبت واردر دیهیلور. انسان بر شخص
 فرددر دیک، بو شخصیت فردیهسی بر ملک شخصیهسی اولسنی
 وتغیر دیکرله ملک خصوصی صاحبی اولسنی انتاج ایدر. دیمک
 که ملکه سبب وجودی شخصیتدر. شخصیت تسلیم اولنجه
 ملکه تسلیم اولنمیدر؛ بوراسی متفق علیهدر. بعض غریب
 مذهببر بونک خلافتی التزام ایتشردر و بعض طائفهله بوجهته
 اومذهبله تابع اولمشاردر؛ اومذهبله طبعیون و وحدت
 وجود ه قائل اولنلرک (مذهببر ایدر. بونلر «انسانده شخصیت
 خصوصیه وفردیه یوقدر ونفس ناطقه ترکیب طبعینک بر نتیجه.
 سیدر یعنی انسانک خلقتک بر نتیجهسیدر وروح عالمک بر جزئی
 و بر ظهور وطلوع سریع الزوالیدر؛ شخصیت یوقدر که ملکیت
 اولسون، چونکه برادمده نفس ناطقه متشخص اولنجه اولادمک
 ملکه تصرفی لازم کلز؛ مادامکه انسانلرک روحلری برکک
 جزئیدر ماللریده برکک جزئی اولمیدر یعنی روح جمله افراد
 بیننده مشترک اولدینی کبی مالد مشترک اولسون» دیرلر ده
 ملک اصولی قبول ایتزلر و انسانلرک عمومی شرکت اوزره
 یشاملرینی ترویج ایدرلر. بومذهبلرک خطاسی ظاهردر:
 اگر انسان یوم جدید ورزق جدید دیهرک احتیاجات

حاضرہ سنک دفعہ چالشوب مستقبلی دوشمنز ویا لکڑ زمان
 حالہ باقوب اختیار لغی اصلاً تفکر ایتمز وکندندن بشقہ کیمسہ لک
 نظر اعتبارہ المز بر حیوان اولیدی وحرکاتندہ دخی فاعل مختار
 اولیوب بر قوہ عمومیه نك النده بر آلت عمیا کی بولیدی اولوقت
 ملك دخی لازم اولمیدیغی تسلیم ایدر ایدك، لكن مادامكه اولیه
 دكلدر یغی آتینسی دوشنور وفاعل مختاردر ۲۰مه حال ملك صاحبی
 اولسی لازم کلور. تاریخنده اکلایشیلورکه بر قومده معرفت نفس
 وحرکاتندہ فاعل مختارلق نه درجه توسع ایتمش ایسه او قوم بیننده
 بوحق تملك دخی اودرجه توسع ایشدر. انسان حق تملكه
 نائل اولقله برابر نوعیتندن ایرلمش وانسانیتندن چیقمش اولمز،
 ینه انساندر وعموم انسانلرک منفعتی ایچون چالیشور. بلکه
 انسانک بوتملك حق تسلیم ایدیلورسه نوعیتک سبب قوام وبقاسی
 اولور، چونکه بوحق تملك افرادک وعائلهلرک وقیلهلرک وبلکه
 عموم هیئت اجتماعیهلرک اصلاح حالنه دائر اوله حق قواعد
 واصوله تابعدر، بوحق انلرک صلاح حالنه موافق اوله حق
 اصول دائره سنده ویرلمشدر. اما (بو) مذهبیر حکمنجه
 حرکت اولنه جغی (صورتده انسانلر بر آلت عمیا کی حرکت
 ایدر بر حیوان اولمق لازم کلور وبونک رفاه حاله سوء تأثیری
 اولور.)

اشیای مادیہی قبضہ تصرفہ المسی عملیدر . بو عمل بعضکرہ سادہ
 وسطی اولہیلور و بعضکرہ زحمت و تکلف ایلہ اولہیلور ؛ بو
 عمل بعضکرہ مشترکا اولہیلور و بعضکرہ منفردا اولہیلور .
 بو صاید یغمز شیرکہ مالک مختلف منشألیدر ، بونلری حق
 تملک اسبابی ایلہ قارشیدر ماملیدر ؛ یعنی ملک بشقہ و حق تملک
 یعنی بوندر دیمک حق بشقہ در ؛ حق تملک دیمک «شو شی بندر»
 دیمہ نک حکمتی ، سندی ، مبنی علیہدر . واقعا انسان - انہ کچدیکی
 کی - ملکہ متصرف اولغہ حق واردر ، بو حق طبیعتی اقتضا -
 سندندر ، اگر بو حق سلب ایدہ جک اولسہق کندینک وجودی
 قالمز . مادامکہ موجودات سائرہ قارشو کنندہ بر شخصیت
 واردر و بر استقلال واردر ملکہ متصرف اولغہ حق دخی وار -
 در ، کندینک طبیعتی و شخصیتی کندینہ بو حق ویرر ، بوراسی
 مسلدر : نقط حق و احتیاجی واردر دیو هر کوردیکی شیئ
 الہمز ، بونک شرائطی واردر) اول شرطہ رعایت ایتک
 لازم کلور . (اساسا حق وار ایسہدہ بو حق هراحتیاجی اولدینی
 شیئ تصرفی مستلزم اولمز . بو حق تملک ہیئت اجتماعیه طرفدن تصدیق
 اولمیلدیر یعنی آنک تصدیقہ محتاجدر . اشته بوسیہ مبنی بر انسان مجرد
 کندی مزاجنہ ، طبیعتہ ، احتیاج شخصیسنہ استنادا ملک معروف
 ادعاسنہ قالقیشہمز ؛ بو ملک بندر دیمک ایچون بعض شرائطی
 یرینہ کتورملیدر . برده دنیادہ هر حق بر وظیفہ اوزرینہ
 مبیدر ، بو بر قاعدہ کلیہدر ؛ بو حق دخی بر وظیفہ اوزرینہ

مبیدر، یعنی بو تصرف املاك حقندہ دخی بر وظیفہ سی
 واردر، صاحبی بو وظیفہ یی ایفا ایدوب ایتمدیکنہ باقلیدر، بو
 حق و وظیفہ لازم و ملزوم قیلندندر) که یکدیگرندن اصلا
 منفك اولمز. بو قاعدیه مبیدر که فقیر اولان ادمك ایچنده
 یاشادینی هیئت اجتماعیہ دن نفقه استمکه حق واردر؛ فقط بوکا
 مقابل هیئتکده کندنندن اسباب معیشت استحصالنہ چالشمی
 استمکه حق واردر، بوده اول ادمك وظیفیدر؛ مکرکه اختیار.
 لق و خستہ لق مثللو اراده سنك خارجنده بعض موانعدن ناشی
 اسباب معیشتی تحصیلہ مقتدر اولیه، بو حالده او موانع زائل
 اولنجیه قدر هیئتن معاونت طلب ایدہ یلور و هیئتده بویله بر
 طلبی اسعافہ مجبور اولور.

§ ۱۲۸ —) تحصیل ملك طریقہ لری (یعنی

اسباب تملك) Les formes ou modes d'acquisitions de la propriété
 حق تملك هیئت اجتماعیہ نك تصدیقہ محتاجدر
 دیمش و بونك بعض شرائطی اولدیغنی افاده ایتمش ایدك (§ ۱۲۷). بو
 شرطلرندر؟ تحصیل ملك طریقہ لری و حق تملك شرائطی متعدد و پك
 مختلفدر. هر قوم (اهالی Peuple) ك حال عقلی و اخلاقی
 و سیاسیسنه کوره بالطبع تخلف ایدر. اسکی زمانده تحصیل
 ملك بعض طریقہ لری وار ایدی که انلر بزم زمانزده ملغاردر.
 از جمله بریسی تیمار و زعامت اصولی Le régime féodal ایدی) که
 اوروپانك بعض حکمداران عتیقه سی طرفندن فتح اولنان ممالك

واراضیدن بر مقدارینک حق تصرف و حکومتی محارباتده
بولان طوائف عسکریه رؤسانه اعطا قلنهرق حاصل اولمشیدی.
بوتیمار وزعامتار عادتاً دره بکسلکری شکنده برنوع ایالات والویه
ممتازہ و کوچک حکومتار ایدی . ایوم اوروپا اصلیلزادکانی
دنیلانلردن سلسلہ نسباری حکمدارانہ واصل اولیانلر یا اوکی
تیمار وزعامت اصحابنک ویاخود حد ذاتندہ بولردن اولمدینی
حالدہ امر اعتباری اولہرق بولرک پایہ ورتبہلرینہ چقاریلنلرک
اولاد و اعقابیدر . ﴿ تحصیل ملکک حالا مستعمل و مرعی اولان
طریقارینک باشلوجهلری بشدر : برنجیسی استیلا L'occupation
درکہ مالکی اولیان بر مباح شئی الہ کچورمکدر (مجلہ ، ۱۲۴۸) .
صاحبسز بر ملک بولوب واکا وضع ید ایدوبدہ بونمدر دیو
تصرف ایتک حقنہ استیلا دیرلر ، بوکا حق تقدم دخی دینہ بیلور .
ایکنجیسی سعی و عمل Le travail et la spécification درکہ
ایشلیوب قزائمق طریقیدر . اوچنجیسی مقاولہ Le contrat درکہ
نہ استیلا ونده سعی و عمل سبق ایتیمہزک یالکر مالک سابقک
بیع و ہبہ کی بر صورتلہ ملکی آخرہ نقل و ترک ایتسی طریقیدر .
دردنجیسی قانون La loi elle-même درکہ ارث کی برکسنہنک
دیگرہ قانونا خلف اولسی طریقیدر . بو صایدیغمز شیلر ایکیہ
تقسیم اولنہ بیلور ، شویلہ کہ استیلا و تقدم ایلہ سعی و عمل طرق
شخصیہ دندر ، مقاولہ ایلہ قانون طرق اجتماعیہ دندر . استیلا و تقدم
ایکی درلودر ، بری فردک و دیگرکی ہیئتک وضع ید ایتسیلہ اولور ؛

اگر بوندن بر نسل یا قومك هجرتله كلوب مسكون اولیان بر محل
ضبط و صكره بینلرنده تقسیم ایتسی صورتی اكلاشیلورسه بو طریق
طرق قدیمه نك اك اسكیسیدر و بونده هر فردك حق ملكیتك منبعی
استیلا اولیوب بلکه بر حكومت عمومیه Une autorité commune
طرفدن یا بلش توزیع و تخصیص La distribution ou l'assignation
در؛ انسانلر ابتداء حاللرنده تحصیل ملك طریقلرندن
استیلا و تقدیمه رغبت ایتشلردر. سعی و عمل ایکنجی درجه ده
استیلادن صكره تحصیل ملك ایچون طریق اتخاذ اولمشدر؛
سعی و عمل طریق انسان ایله اشیا بیننده دها قوی رابطه در
یعنی انسانك بو طریق ایله قزاندیغی شیئه بندر دیكه دها زیاده
حقى وارد در. ﴿مقاله و قانون طریقلرینه كنجه بونلرده اوتە دنبرو
معلوم و متداولدر؛ نقط هیئات مدنیه نك ترقیاتی حسیله تحصیل
املاك طریقلرینك اك مهمی اولمشدر؛ بویکی طریقك اهمیت
اهمیت اجتماعیه ایله متناسبدر؛ انسانلر بیننده رضای طرفین
ایله عقد اولنان مقالاتك ملكك تحصیلنده و صكره بونك كيف
مایشاء ترتیبنده تأثیر کلیسی وارد در.﴾

§ ۱۲۹ — ﴿حق استیلایه دائر بعض مطالعات :
صاحبسز اولان ملكك استیلاسی اوتە دنبرو تصرف حقى ویرر
برسند اتخاذ اولمشدر. روما ارباب حقوقیده بونی قبول
و بونی تمامیه عقل و حکمته موافق در ظن ایتشلر و بونلردن صكره
كلان ارباب حقوق دخی بورأیده بولمشلر ایدی. لکن صكره لری

رای دکشدی . متأخرین وباخصوص اوج عصردن بروکلان
 علما بورایک مجروح اولدیغنی وبوطریقک معقول برطریق
 اولدیغنی بیان واثبات ایتدیلر : بونلره کوره استیلا طریقی
 یعنی اشخاصک بویولده حرکات خصوصیهلری برحق تشکیل
 ایده من، بوبرحق تملک و صحیح دیکلدر؛ واقعا انسانلر بدایت حاللرنده
 شمدیکی کوجهلرکی «املاکجه اشتراک اوزره یشادقلری وقتده»
 طولاشدقلری یرلرده «هر فردک» ملک مخصوصی اوله میوب «هر
 شی اوزرنده سائرلریله متساویا حقوقی وار ایدی وبنابرین حق
 استیلا تسلیم اولنه بیلور ایدی ؛ لکن هیئت اجتماعیه تشکیل
 ایتدکلی وقت حال تبدیل ایتدی ، توطن ایتدکدن صکردهده
 هر شیده مشترک یشامق مناسب اولدیغنی اکلا دیلر و «هر
 فاملیا اراضیدن کندینه بر مقدار یر ویرملک شرطیله کوجهلرکدن
 فارغ اولدی وبو وجهله «بینلرتده تقسیم ایتدکلی اراضیده
 هر فردک کندینه مخصوص حق تملک صاحبی اولسی بو حق
 اشتراکی اسقاط ایتدی .» استیلا اصولنک حق ومشروع
 اولدیغنی ادعا ایدن «قدمای ارباب حقوق اکلاشیلان» وقوع
 حال ایله حق قارشیدر مشلر و «حق تملک ایله ملکک اصلی
 بربرندن تفریق ایتملردر ؛» حالبوکه وقوع حال بشقه وحق
 بشقه در ، بر شی واقع اولق ایله حق اولق لازم کلز ؛ «واقعا
 بوراسی معلومدرکه بدایت حالده اراضیه متعلق تصرف املاک
 هپ اراضینک استیلا سندن نشأت ایدوب دیگر طریقلردن نشأت

ایتمامشدر ، فقط بوخصوص افرادك استیلاسندن اولیوب بلکه هجرت ایدن انسال واقوامك استیلاسندن ایلرو ككشدر . دیدیکمز کی بو تملك خصوصتك منشئ افرادك منسوب اولدقلری قومك استیلاسنه منی اولوب صکره قومدن افراده انتقال ایتمشدر ، بو صورتده قانون ویا مقاوله طریقه داخل اولور ، چونکه قوم کندینه ویرمشدر و تقسیم ایشدر معناسی چقیور. الحاصل بر فردك برقطه ارضی استیلا ایتسیله اوزاسی انك ملك مشروعی اوله مز. تاریخه دخی نظر ایتسهك هیچ بروقده بو حقه رعایت اولندیگی کوريله مز، مکرکه بعضی قانونلرده اولدینیگی اخیای اراضی ءموات ایله اكا مالك اولمقلق مجوزایدلمش اوله، بوده مجرد بر طریق قانونیدر . مثلا بری کلوب بر خالی یری ضبط ایتدکدن صکره دیگرى کلور وقوتلی چیقار ایسه اندن زور ایله الوب ضبط ایدر و کندی اولکنك ضبطنه رعایته مجبور یلمز. بویله استیلا طریقیله اولان حق تملك جبر اوزرینه منی اوله ییلور ؛ فقط ارباب حقوق نظرنده بوکا برحق مشروع نظریله باقیله مز ؛ معلومدرکه جبر هیچ بروقده میدانه حق کتوره مز . الحاصل بر فردك کلوب بویله برشیئ ضبط ایتسی دیگر لرینی اكا رعایت ایتمه مجبور ایتمز . بدایت حالده ضمنی بر مقاوله یا بکشددر فرض اولنسه مثلا مادامکه الله بزى دنیایه کتیردی و بو قدر احتیاج ویردی و بونلری دفع ایده جك بر طاقم اشیا حاضرلدى هر بریمز نه بولورسه وهانکی شیئ اك اول ضبط ایدرسه انك اولسون

دیو انسانلر بیننده بر مقاوله ضمیمه یاپلدیغنی فرض ایتسهك بيله بونكلهده بوحق استیلا ثابت اولمز، چونكه نه فعلا ونهده ضمنا بویه بر مقاوله یوقدر واوله مز واولسه بيله یالکزر عقد ایدنلره شامل اولور.) خلاصه الومسئلهیه حقیقت نقطه نظرندن باقيلورسه متأخرینك قولى حق اولدیغنی اکلاشیلور، چونكه) متقدمینك استیلا حقندهكى فرضیاتی) تاریخه موافق اولدیغنی کبی) حق دکلدر؛ چونكه هر حقك بر حدی اولمق لازمدر،) حدسز حق اوله مز،) حالبوكه حق استیلایی بویه مطلق عد و قبول ایدرایسهك هیچ بر حدی اولماش اولور یعنی او حق غیر محدود اولور، مثلا حریفك بری بر طرفه کیدر اراضی واسعه ضبط ایدر وحق تقدم حبسیله بئدر دیر و دیگر جانبه کیدر بشقه اراضی حبسیه ضبط و بوراسی ایچونده اويله سویلر وهلم جرا حرکت ایدر و بو صورتله بونك حقوقك^۱ حدی اولماش اولور، بویه غیر محدود حق ویرن شی معتبر اوله مز. الحاصل بو اصولی تسلیم ایدهك اولسهق بر فرد بر چوق اراضی حقنده حق تملك قزانور، بشقهلری اچیقده قالور؛ بو بر دعوادر كه عقل سلیم بونی هیچ بر وقته قبول ایده مز. اشته بواسبابه مبنی زمانزده استیلا حق مرعی اوله مز. برده زمانزده و خصوصیه ممالك متمنده تملك اولنماش اراضی یوق کبی از اولدیغندن، بالفرض بویه استیلایی بر حق تملك عد ایتسهك بيله بونی اجرایه محل یوقدر، نظریاتده قالور. ممالك متمنده نك اكثریسنده بویه

صاحبسز اراضی عمومك مالی اولوب بونی افراد تملك ایده مز .
هرنصلسه استیلا ایله ضبط اولتان اراضی اوزرنده حق تملك
احراز ایتك ایچون اكا سعی و عمل صرف ایتلیدر ،
چونكه اراضینك ماضع لهی ضبط اولتق دكلدر بلکه زراعت
اولنهرق عموم نوع بشرک اسباب استراحتی استحصال ایله
استفاده ایتکدر ، خالقك مقصدی بویله در اکلاشیلیور ،
اویله ایسه اراضی زراعت ایدنلرك حقیدر ؛ بناء علیه طوائف
وحشیه که زراع دکلدرلر ، بولره ایدئی استیلا لرنده بولنان
اراضی حقنده مجرد اللرنده بولتقلق جهتیله حق تملك و تصرف
ویریه مز ، اقوام متمدنه نك اویله اراضی بی حسن استعماله ده
زیاده حقیری اولدیغنده شبهه ایدیله مز ؛ مع مافیه وحشی دیدیکمز
طائفه لرده مادامکه اوراده بولنیورلر ، بزدها یو استعمال ایدرز
دیه انلری بسبتون محروم براتق مقتضای انسانیتیه منافی اولمغله
بولر جبرا وقهرا دفع ایدلمالی و ممکن مرتبه حسن معامله ایله
وبر مقدارینی دخی انلره ترك ایتمکه ایتلیدر ، خلاصه قاعده
کلیه جه اراضی زراعتیه مقتدر اولنلرك حقیدر ، اشته عقلك
واراده الهیه نك مقتضای دخی بودر ؛ دیمکه استیلا ی مجرد
مذهبی حقیقته باطلدر و فعلیاتده چوق ایشه یرامز) یعنی
بونك هم جهت نظریه سی باطل و همده جهت عملیه سنی تمامیه
اجرا نا قابلدر .

اهل حقوق عندندہ بر شخص واحدك حرکت منفردہ سی یعنی
 كرك استیلا و كرك سعی و عمل یعنی تبدیل شكل ایله حاصل
 ایتدیكى حق ، سائرلرینی بوكا رعایتہ مجبور ایتك ایچون کافی
 دكلدر : مثلاً بن بوترا لایہ متصرفم چونكه بن اول استیلا ایتدم ،
 بن بوخانہ مالكم چونكه بن بنا ایتدم كی سوزلر و بوسوزلرہ مستند
 حقار واجب الرعايه دكلدر . بومؤلفلر ملكك اساسی یعنی
 اسباب تملك بشقه لرینك بوكا رعایتی موجب اوله حق حرکاتدر
 دیرلر یعنی ملكك اساسی او كی حرکاتدر ارارلر و او حرکات
 ایسه مقاوله و قانوندر .) بومؤلفلرہ كوره استیلا ایله سعی و عملك
 حكمی اولیوب حق مقاوله و قانوندن نشأت ایدر .

§ ۱۳۱ —) قانونه دائر بعض مطالعات : هر زده كه
 قانون اراده عمومیه دن منبعدر اوراده مقاوله ایله قانون شیء
 واحددر . وینه اول یرده هر قانون جمله بیننده عقد اولنمش
 بر مقاوله صحیحهدر . یعنی هپسنه مقاوله دینه بیلور ، بینلرنده
 جهت جامعه واردر .) یعنی اصول مشروطه اوزره اداره اولنان
 ملكتدرده قانونی اهالی وضع ایتدیكندن اورالرده مقاوله ایله
 قانون شیء واحددر ؛ اما) هر ملكتكه اصول مشروطه اوزره
 اداره اولنمز اوراده قانون بشقه و مقاوله بشقه شیدر ؛ بویله
 یرلرده قانون بوكا مأمور اولنلرك اجتہادینه تابع برشیدر ،
 مقاوله افراد خصوصیه بیننده عقد ایدیلان سندر .) اصول
 مشروطه ایله اداره اولنان یرلرده برفردك دیگر برفرد ایله عقد

ایتدییکی سند و معاملہ یہ مقالہ دنیلیدی کی بر فردک عموم یعنی کندیك ماعداسیله عقد ایتدییکی سند و معاملہ ده مقالہ در ؛ دیمککه اویله یرلرده مقالہ لفظی بو ایکیسی بینده مشترکدر . بوصورتده اصول مشروطه ایله اداره اولنان مملکتلرده ملكك طریق تحصیلی اوچه منحصر اولورکه استیلا ، سعی و عمل ، قانون و مقالہ در .

﴿ شمدی ملك مطلقا قانوندن منبعث اولمیدر دینلره نقل کلام ایدلم : بولردن فرانسه لی روح القوانین (اسپری ده لویا) L'Esprit des loits صاحبی مؤلف مشهور مونتسکیو Montesquieu (۱۶۸۹ - ۱۷۵۵) جمله املاک مشترك بولندیغی بر حال اول طبعینك وجودنی فنكلی حقوق حرب و صلح صاحبی محرر مشهور غروتیئوس Grotius (۱۵۸۳ - ۱۶۴۶) و المانیالی حقوق طبعیه وناس صاحبی محرر مشهور پوفندورف Pufendorfe (۱۶۳۲ - ۱۶۹۴) ایله قبول ایدر و (روح القوانینك ۲۶ نجی کتابنك ۱۵ نجی فصلنده) « انسانلر قوانین سیاسیه تحتده یشامق ایچون استقلال طبعیلرینی رد ایتدکلیری مثللو قوانین مدنیه (عادیه یعنی شخصیه) تحتده یشامق ایچون اشتراك طبعی یی ترك ایتدیلر . قوانین سیاسیه انلره حریتی و قوانین عادیه ملكی قزانویردی (یعنی تأمین ایتدی) . » دیر) یعنی انسانلرك بدایت حالنده بر حال وارایدی که اوده املاک جمله سی بینده مشترك اولمیدی ؛ یعنی مدنیته کیرمزدن اول انسانلر

املاکی اشتراك اوزره تصرف ایدرلر ایدی وهرتقدر منقولات بر درجهیه قدر ایری ایری مستقلا ماللری ایدیسهده اموال غیر منقوله صاحبسز ایدی ، ایچلرندن هربری بر مغاره بولورسه ایچنه کیرر و بر اغاج کوررسه التده اوطورر و اوزرنده میوم وارایسه اندن یر ایدی ؛ والحاصل انسانلر یکدیگره تابع اولیوب جملهسی مستقل ایدی ؛ صکره بر هیئت اجتماعیة تشکیل ایتدکلری وقت بو هیئت اجتماعیة و بر قانون سیاسی تحتده یشامق فوائدینه نائل اولمق و هیئت اجتماعیة منافع کلیه سندن استفاده ایتمک ایچون کندی استقلال طبعیلرینی و املاکده کی اشتراك حقنی ترک ایتدیلر و هیئت اجتماعیة نك قانونه و محکمه سینه تابع و قیود و شروطی تحتده داخل اولدیلر و بوکا مقابل امنیت مال و جان قزاندیلر . والحاصل بر کیسه نك ملکه متصرف اولسی الحق قانون ایله اولور . ﴿ بولردن بری و فرانسه انقلاب عظیمك اك عالی و بلند مرتبه خطیبی اولان قونت دی میرابو Comte de Mirabeau (۱۷۴۹ - ۱۷۹۱) » ملك قانون حکمنجه قزانلش بر نعمتدر . ملکی یالکز قانون وجوده کتورر ، چونکه برملکدن تمتع ایتمک حقنی یالکز بر شخصه حصر ایتمکه الحق اراده عامه (یعنی قانون) مقتدر اولور « مألده اوله رق افاده مرام ایتمشدر . فرانسه لی مشهور آووقات روبسپیر Robespierre (۱۷۵۹ - ۱۷۹۴) » ملك قانونك تأمین ایتدیکی حصه نعمتدن تمتع اولمق اوزره هر فردك حائر اولدینی بر حقددر . بو حق تملك دنخی حقوق

سائرہ کی بشقہ لرینک حقوقہ رعایت ایتمکہ مشروطدر .
 برده بوحق بشقہ لرینک نہ امن و آسایشہ ونہ حریتہ ونہ دہ
 املاکنہ مضر اولمالیدر . دیمککہ ہرحقکہ بشقہ سنک امنیتہ
 وحریتہ واملاکنہ مضردر اولیلہ شی بنم ملکمدر دینہ من . «
 مآئندہ اولہرق بیان مرام ایشدر . انکترہ محررین وارباب
 حقوقدن بنتام Bentham (۱۷۴۸ - ۱۸۳۲) ملک حقندہ
 بررأی خصوصی بیان ایتیوب یالکز دیمشکہ ملک ایچون برزمان
 سیاسی لازمدر . بوشی بنمدر دیمک ایچون انی تأمین ایدہ جک
 سیاسی برشی بولنق لازمدر یعنی حکومت اجتماعیه تحتدہ
 یشاملیدر) یعنی ملکہ متصرف اولق مطلقا قانون ایلہ اولور ،
 برہئت اجتماعیه تحتدہ یشایوب ہرکسک ملکی طاتملیدر .
 » بنتام بومرامنی ایوجہ اکلاتق مقصدیلہ « قانونک فوائدی
 ایوجہ اکلامق ایچون ملکک ماہیتی ملاحظہ ایدہم . (بوقول
 جمهور علما دکلدر) دنیادہ ہیچ بر ملک طبیعی یوقدر . اگر
 قانون اولسہ شوشی بنمدر دیمکہ محل یوقدر (یعنی قانون
 اولسہ ہیچ برشی انسانک ملکی اولمز) . بوملکی مجرد قانون وجودہ
 کتورر . بوشی بنمدر دیہرک برمالی کندینہ اسناد واندن تمتع ایتک
 مجرد قانونک وعد و تأمین اوزرینہ مبنیدر . ملک وقانون برابر
 طوغمشلردر و برابر اولہ جکلردر . قوانیدن مقدم ہیچ ملک
 یوغیدی ؛ قوانینی قالدیریکز ، ہیچ ملک قالمز « مآئندہ ایضاح
 کلام ایشدر . »

§ ۱۳۲ - (اشته بو بئتم و همرايلرينه كوره ملكك
منبى قانون مدنى (قوانين عاديه) در . بونلك قانوندن مقصد .
لريده قانون وضعى صلاحيتى كنديلرينه ويرلمش اولان بر قوه
سياسيه نك قراريدر . بو قوه سياسيده مبعوثان واعيان و حكمدار
وياخود يالكز حكمدار اولمق جائز اولدينى كى واضع قانون
مقامنه قائم اولان برويا برقاج عالمده اوله بيلور . اكر بو مؤلفلك
مذهبنى قبول ايده جك اولسه حق تملك مجرد واضع قانونك
اراده سنه منوط اولور) ده واضع قانون بو ملك سنكدر دير
ايسه سنك اولمق و سنك دكلدر دير ايسه سنك اولماق لازم
كلور . (بو مدعايه شو وجهله اعتراض اولنه بيلور : اكر ملك
طبيعت انسانيه نك نتيجه سى دكلدر ، يالكز قانون مدنك بر اثرى
در دنيلورسه بوسوز بزي ياكلش يوللره كتور) ده انسانلر
بعضاً كيف مالتق ويريلا ن قرارلره تابع اولمق لازم كلور
(وبوندن غريب نتيجهلر چيقار . نتيجه سيده بر ملك قانون ايله
وجوده كلور ايسه اول صورتده قانون ايله محو ايديله بلسيدر)
يعنى بر قانونك وجوده كتوردىكنى صكره بر قانون كلوب محو
ايديله بلسيدر يعنى قانون وضع ايدرك حق و ير ن هيئت بر كون
حقى سلبه قيامه مقتدر اولميسيدر . بو مؤلفلك قولنى قبول ايدمجه
(بو كاده قائل اولمق لازمدر . حالبوكه ملك طبيعت انسانيه
اقتضاسننددر ،) قانوندن وهيئت اجتماعيه نك مداخله سندن
مجرددر ، (قانون حقيقت حالى دكشديره مامليدر . مادامكه

انسان بر حیاتدر و حقوق طبیعیہ سی واردر ، ملکہ او طبیعتک مقتضیاتنددر . مقبول اولان قولده بو در . دیمککه بو اعتراض بحق واردر .

§ ۱۳۳ — ﴿ جمهور علمایہ کوره قانون حقوقی وجودہ کتورمز ، یالکزانی تعیین وتصدیق وتأمین واندن تمتعی قاعده تحتہ وضع ایدر . ﴾ مثلاً زیدک بر خانہسی اولور ، قانونده کلور او خانہ زیدک اولدیغنی تصدیق وزیدک او خانہیہ استقلال تاملہ متصرف اولمسنی تأمین ایدر ونهایت زیدک اندن تمتع واستفاده ایتسنی ده قاعده تحتہ قور . ﴿ الحاصل انسانک حیات حق وبو حقکہ لوازمی واردر ، بو لوازمندن بریده ملکہدر ، اولہ ایسہ ملکہ احتیاج طبعیدر . ﴾ مثلاً بری طاغ باشنده وهیئت اجتماعیہدن مجرد اولهرق تعیش ایتسہ انک یشامق وصحت وتمامیت وجود حقلمی اولدیغندن بونلرک لوازمندن اولهرق البتہ بر مسکن تدارکنہ محتاج وحقیقدر ، چونکہ مسکنسز یشایہمز . ﴿ بتنام ورفقاسنک خطاسی شوراده در : بر حق وجودہ کتورمک بشقه شیدر ، واول حق تأمین ایتک دخی بشقه شیدر ؛ مثلاً بری طرق معلومه دن بریلہ بر حق الہ کچورر وبرقانونده غیرک اوحقه تسلطی منع ایدرایسہ البتہ اوحق وبو منع بشقه بشقه شیلدر ؛ بتنام وانک رأینده اولنلر بو ایکی شیئی شیء واحد ظن ایتشلدر ؛ اشته خطالری بو ظنده در . الحاصل ملک قانون ایله وجودہ کلز ، ذاتاً وجودہ کلشدر ،

قانون بحق قزائش اولان و حدود محقه‌سنده محدود بولان
حق تصدیق و تأمین ایدر .

§ ۱۳۴ — (مقاله نظریاتی La théorie de la con-

vention : مقاله نظریاتی اساس مختلفه اوزرینه تأسیس اولمشدر)
یعنی مقاله حقنده علم حقوق اربابنک رأیلری مختلفدر .
(غروتیئوس Grotius (§ ۱۳۱) و سائرلری کی اسکی مؤلفار
مقاله‌یی وقایع معاملات استیلایه حق و یروب انلری تأیید ایدر
بر طریق معاون عد ایشلردر) یعنی بونلره کوره حد ذاتنده
بر شی دکدر ، یالکر مقاله ایله بر شی یعنی ملک و حق ملکیت
قزائله‌مز ، مقاله استیلا ایله قزائش حق تصدیق و تأمین
ایدر ، (و دیگر بر طاقم مؤلفارده مقاله‌یی کندوسنه توفیقا
ملکک تنظیم اولنوب قاعده تحتیه وضع اولنسی لازم کلان
اساس عد ایشلردر) یعنی مقاله ملکک اساس و مبنی علیهدر
دیشلردر . (اشو فکر و رأى اخیر باشلوجه) تنقید عقل
صافی ، تنقید عقل عملی ، تنقید محاکمه نامرلیله موسوم اولوب
پک زیاده معتبر و مرغوب اولان اوچ کتابک صاحبی المانیالی
فیلسوف مشهور (قانت Kant (۱۷۲۴ - ۱۸۰۰) و المانیالی
فیلسوف فیهت Fichte (۱۷۶۲ - ۱۸۱۴) طرفلرندن بیان
و تدریس و تعلیم اولمشدر .) و فقط قانت ایله فیهت بیننده دخی
جزئی اختلاف واقع اولمشدر . (بو مذهبده بتام مذهبیه
یقیندر، بوده حق ملکیتله حق ملکیتی تأمین ایدن شیئی قارشدر.

مشدر: قانت « انسانك كرك استيلا طريقه و كرك سعي و عمل طريقه
اولان معاملات منفرد سعي حق تملكى وجوده كتوره مز، چونكه ملك
بالجمله هيئت اجتماعيه اعضاسنه بر تعهد منفى ترتب ايتديرر يعنى بر ادم
بو مالى بنمدر دنجنه ديكر لرى بزم دكلدر ديملدر يعنى بر ينك
ملكى تسليم بو بنم دكلدر ديمكدر ، تعبير ديكرله او ادمك
ملكه خلل كتور مامك تعهد مثبتيدر ، حالوكه استيلا وسعي
و عملده بو قوت يو قدر ، اشته بو تعهدات شخصيه ايسه مقاوله
تعبير اولنان تراضى طرفينك نتيجه سيدر . » مائنده افاده مرام
ايتمشدر . مع مافيه قانت دنخى « ملك مقاوله ايله اولور »
دييور . فرق شودر كه قانت « استيلا ويا عمل ملك ايچون بر
معامله اعداديدهر ، بو صورته استحصال اولنش اولان ملكك
تصديق و ضمان ايله اكالى هيئت اجتماعيه جه تراضى به متوقفدر .
تعبير ديكرله استيلا ملكى اعداد ايدر ، مقاوله بونى اكال ايدر ،
يوقسه ساده جه استيلا ايله الله ايديلان ملكه ملك ناتمام
دينور ، ملك تمام ايسه جمله نك موافقتى ايله اولان ملكدر
يعنى جمله نك موافقتيله قانونك دنخى تصديق ايتديكى شيدر »
مائنده اداره كلام ايدييور . بنتم ايله قانتك ييننده كى فرق
اكلاشلايدى .) قانتك بوذهابى مذهب بنتم ايله مذهب جمهور
ييننده بر راي متوسطدر .

§ ۱۳۵ — « قانتك حق طبيعى يه و ملكه دائر اولان مذهبنى

فيهت شرح و ايضاح ايتمشدر ، فيهت قانت مذهبك مروجى

ومداومندر . دیمکه قهت مذهبی دها مگمدر .) قهت ملک
ایکی اساس (واقعا جمدر) اصلینی اوجه بربرله ترکیب
ایتمش و بونکه برابر مقاوله دیکر لرندن زیاده اهمیت و یرمشد .
(قهت مذهبنک) ملکه متعلق اولان جهتنک (خلاصه سی
شودر : « حق دیمک بردارء مشترکده جمله نک حریتی برلکده
بولنه یملک ایچون یعنی جمله سی دخی حریتدن استفاده ایده یملک
ایچون هر فرد حریتنک محدودیت خصوصیه سیدر . دیمکه حق
دنیلان شی اول دائرء خصوصیه بی که هر فرد انک داخلنده
سربستانه متمتع اولمی لازم کلور آنی تعیین وتأمین ایدر ؛ بو
حقده تعیر دیکرله بودارء خصوصیه هیئت اجتماعیه نک بالجمله
اعضاسنه شامل اولمق اقتضا ایدر ؛ اوله ایسه بوده قانون
اولور .) یعنی هیئت اجتماعیه داخلنده هر فرد مشترکدر ،
لکن بواشترک ایلر برابر هر فردک برحق واردر ، انک حدودینی
تعیین ایتمک لازمدر ، اگر تعیین ایدلر ایسه حقوق یکدیگریله
قاریشور ؛ بونک ایچون هر فردک کندینه مخصوص بردارء خصوصیه سی
واردر که بودارء داخلنده سربستانه حرکت ایتیمی و متمتع اولمی لازم
کلور ؛ اشته بودارء خصوصیه بی حق تعیین و تحدید وتأمین ایدر ؛
تعیر دیکرله حق بردارء مغنویه در ، ملک ایسه هر فردک داخلنده
سربستانه حرکت ایده جکی بردارء خصوصیه اولمغله حقندن اخص
واندن جزؤدر ؛ بو حق بر هیئت اجتماعیه نک بالجمله اعضاسنه
شامل اولدیغندن قانون بودر .) هر فرد حرکاتنده جمله نک

حقوقه رعایت ایتدیکجه کندیك دخی دائره خصوصیه سی امین قلماق لازم کلور ، بو صورتده بو قانونك وجودی ممکن اوله من ؛ تغییر دیکرله مادامکه هر کسك دائره خصوصیه سی واردر بشقه سنکده واردر ، بشقه سنك دائره سنه رعایت ایتمز ایسه کندیكکنده رعایت ایدمز .) یعنی افراد بینده یکدیكر ك حقوقه تجاوز ایتامك اوزره بر مقاوله یا بلشدرکه ملك بو مقاوله دن نشأت ایتشدر وهر فرد دیکر لریك حقوقه رعایت ایتمی مقتضای قانوندر . (خلقك بو اراده مشترکه سی بیان ایدن) یعنی بیان مأمور اولان (هیئت اجتماعیه اعضاسی حکومتدر .) حکومتك اوامر ونواهیسی بو اراده مشترکه نك نتیجه سی وکندی مأموریتك وظیفه سیدر . (بونی) یعنی بو اراده مشترکه یی (عمومه اعلان ایدن فعلده مقاوله در . دیمککه حق بشقه در ؛) یعنی مقاوله دن صرف نظر اولسه بیله ینه هر کسك حق موجود وحقیدر ؛ (فقط صکره مقاوله کلوب حق مشروع صورتده تصدیق ایدر . انسانك موجودات خارجیه جه اولان حق شخصیسنك اك مهمی کدینك بقاسی اسابنك استحصالچون بر دائره حرکته مالک اولمیدر . دیمك اولور که) ملکه متعلق اولان مقاوله ده بوداره هر فرد ایچون تأمین اولنلیدر . بوداره ویرلر ایسه حق ویرلماش اولور . فقط بوداره هر فردك عمل خصوصیه سی ایله اصلاح وتوسیع اولنلیدر . هر بر فردده بو حق

وارد و بوجہ بقای ایچون تولد ای دیور؛ فقط بونی صکره سعی و قدرته کوره توسیع ایدر. بر طرفدن بوجقک تأمینی چالشق ایله مشروط اولور، بناء علیه هر فرد چالشق فرض اولور؛ دیگر طرفدن دخی هر فرد ثمره سعیله تعیش ایتک لازمدر. (هر فرد چالشق وکندی ثمره سعیله یشامق فرض و لازم اولدینی کبی هر فردک ثمره سعی کنینه عائد اولمیدر، اکر ثمره سعی کنینه عائد اولمز ایسه حقندن محروم ایدلمش و افراد هیئت بیننده کی مقاوله احکامی اجرا اولغامش اولور و بوتقدیرده کندی دخی بشقهلرینک حق ملکیتی طایفه مجبور اولمز. (دیمککه بالجمله هیئت اجتماعیه اعضاسی تعیشلرینه کافی عمل و سائلطی مقاوله واسطه سیله یکدیگرینه تأمین ایدرلر. اکر بو واسطه لر) کرک قصور عقل، کرک عدم مساعدت جوارح و کرک سائر برکونه قضا و حال حیلولتیه (کفایت ایتمز ایسه او تقدیرده بربرلرینه معاونت ایتملری لازم کلور. ینه بوتعهد اقتضاسندن اولق اوزره) محتاج معاونت کورینانلرک قول مجر دلریله عمل اولنیوب (هر فرد کندی دائره سنده کندی قواسنک مساعدت سی درجه ده چالیشوب چالشمدیغنی تفتیشه هیئت اجتماعیه نک صلاحیتی واردر. بوتفتیش حتی بالجمله مصالح عمومیه نک تسویه سیچون تشکیل اولنش بر هیئت سیاسیه محولدر. (بوهیئت سیاسیه ده حکومتدر. (هر فرد) ثمره (سعی ایله تعیش ایتک ایچون کندی دائره سنده ممکن اولانی یابدیغنی وینه اسباب معیشتی

استحصال ایدہ مدیکنی اثبات ایتدجکھ) منسوب اولدینی
 (ہیئتدن معاونت طلبنه حق اولہ مز . اشته بو حکمتہ مبنی اقتضا
 ایتدجکھ ہیئت اجتماعیه کندی اعضاسنه معاونتہ مجبور اولدیغندن
 هر فردك ملكنى نصل قوالاندیغنه نظارت ایتسی صلاحیتی
 حکومتہ کلور . اولہ بر حکومت دخی کندی اداره سی
 التندہ نہ اهل احتیاج ونہ دہ بوش کرر ادم قبول ایتما لیدر .
 (بوسیدندر کہ بعض حکومتلر دہ اهلینک کافہ احوالہ
 نظارت ایتک اوزرہ لزومی اولان محللر دہ برر ضبطیہ نفری
 ویا پولیس بولندیر لر .) والحاصل ملک دائر اولان مقاولہ
 شرائط اتیه بی شامل اولمیدر : اولاً معیشت جهتیله کفالت عامیہ
 نائل اولق ایچون هر فرد لاجل التعیش نہ ایله اشتغال ایدہ جکنی
 جملہ بیان ایتلیدر ؛ یعنی تحصیل معیشتہ دائر ومناسب بر مشغولیت
 ارانہ ایدہ میان شخص جمعیتک اعضاسندن اولہ مز ، چونکہ ہیئت
 اجتماعیه عادتا بر شرکت کیدر ، سرمایہ سی اولیان شرکتہ داخل
 وشریک اولہ مز (ای تہی دست رفته در بازار * ترسمت کہ پرنیاری
 دستار) . ثانیاً حکومت هر فردہ بر درجہ یہ قدر کندی نہ منحصر
 اولق اوزرہ بر مشغولیت تخصیص ایتلیدر . یعنی اولہ صورت
 مطلقہ دہ اولہ رق ہیئتہ کیرمک استیانی قبول ایتما لیدر ؛ هر فردی
 کندی میل واستعداد وحال و تحملنہ کورہ بر صنفہ ادخال
 ایتلیدر . ثالثاً قانون و ہیئتی وجودہ کتورن برنجی مقاولہ یعنی
 قانون اساسی محتاجینہ معاونت و حمایت حقندہ بر قاعدہ و اصول

وضع وتعيين ايتمليدز ؛ هر فرزده مصالح عامه مصارفی) و از جمله حکومتك ادارهسی (ایچون بر مقدار حصه اعطاسنی یعنی ویرکو ورسومات کبی شیرلی ویرمکی تعهد ایتمليدز .)

۱۳۶ -) ملك بر حق شخصیدر ؛ فقط حق انسانی دکلدر ، چونکه حق اساسی انساندن منفك اولمز ، حالبوکه ملكسز انسان اوله بیلور . ملك انسانك وجود مادیسنی محافظه په مدار اولان شیرلدر . بوندن بشقه انسانك بر طاقم دهها مقاصدی وارددر . اگر كافه مساعیسی مجرد ملك مادی استحصانه مصروف اولسه انسانیه لایق صورتده یشایه مز ، چونکه بونكه انسانك یالئکز جهت جسمانیهسی معمور اولور ، اما جهت روحانیهسی معمور اولمز .) یعنی انسانك بر طاقم مقاصد مغویهسی دهها وارددرکه اصلا اهمال اولنمليدز ؛ انسان ملك وسطهسیله اوله بر دائره حرکته مالك اولمليددرکه بونك اعانهسیله کندی احتیاجات مادیهسی دفعه مقتدر اولدقدن صکره بر مقدار سعیده قوای مغویهسنك توسعنه مصروف اولمليدز ؛ زیرا انسانك حریتدن مقصد دفع احتیاجدر و بونك اك عزیزلی دفع احتیاجات روحانیه اولغله حریتك قسم کلیسنی حوایج مغویهسنك استحصانه صرف ایتمليدز ؛ بو حریته نائل اولماش اولان ادم حقوق انسانیهنك اك مهمتدن حصه دار اوله مز ؛ مقاصد روحانیهسنك استحصالندن محروم ایدیلان ادم اك عزیز بر شیدن محروم ایدلمش اولغله بشقه لرینك حقوقه رعایته جبر ایدله مامليدز .) فیهتك قولنجه

حکومتلرک برنجی مقصدی هیئت اجتماعیہ افرادینک قوای روحانیہلرینک توسیعی ایچون مقدار کافی وقت تعیین ایتمکدر . ﴿ اول امرده بونی نظر اعتنایہ الملیدر ، انک ایچون ممالک متمدنہده بو کی شیلرک کافہسی قانون تحتہ وضع اولنمشدر . ﴾ بو عمل ایله قوای روحانیہمز ایچون ترک اولنان خالی وقتک نسبتی ممالک مختلفہده تفاوت ایدمیالور ، ثروت قومیهنک درجات مختلفہسنک تعیینی بو نسبت ایله اولور . تجربہ ایله ثابت اولمشدر کہ تحصیل علم ایچون خالی وقت نقدر چوق براغیلور ایسه ثروت عمومیهده اولقدر زیادہ اولور ، قوای مغنویہسنی زیادہ توسیعهچالشانلر اودرجهغنی و حیات مادیہ حوایجنه زیادہ سعی ایدنلر اولقدر فقیر اولور . ﴿ دیمک اولورکہ حکومت احتیاجات مادیہمزک دفعی ایچون از وقت صرف ایتمک وسائطنی نقدر توسیع و تکثیر ایدر ایسه ثروت عامہ اولقدر توسع و تکثر ایتش اولور ، مثلاً شمعی اون ساعت چالشیق ایله حاصل اولان برایش بر واسطہ ایله سکر ساعت چالشیق ایله حاصل اولمق چارہسی بولنورسه ثروت عامہ اونسبتده آرتار . فقط بویله عاقلانہ سعی و عمل یعنی از چالشوب چوق ثمرہ حصولہ کتورمک علی العمیا براغلیوب افراد هیئت ییننیده مناسب صورتده تقسیم اولنملیدر . واقعا ہر فرد کندی ایشنہ الویرہجک بر صنعت اتخاذ ایدر ، مع مافیہ بر صنعتی اجرا ایدن اصنافک عددی جمعیتک او صنعتہ احتیاجی ایله متناسب اولسنہ حکومت نظارت ایتملیدر .

بوسیدن هیئت اجتماعیہ اعضای صنایع مختلفہ فی بینارندہ تقسیم
ایملری اقتضا ایدر. فقط حکومتک بر کیسه یی کندی (یعنی
حکومت) استدیکی صنعتہ قویمغه و دیلدیکندن چقارمغه حق اوله مز،
انجق تداییر مقتضیه ایله بومقصدہ سعی ایدر. بوقوله بعضیلر
اعتراض ایدرک بونده مبالغه واردر دیمشاردر ، چونکہ حکومت
بویله ایشلره کیریشه جک اولورسه اوکنی اله مز وهرکسک
حریتی سلب ایتمش اولور؛ لکن بوندن مقصد حکومتک صنایع
و تجارتی بر طاقم قیود و شروط تحتہ قویمسی اوله جقدر .

§ ۲۳۷ — (بو مذاهب مختلفه نك تاريخی یعنی بومذهبلر
نصل ظهور ایتمش ونصل تبدل ایش ویرلرینه نه کی مذهب
کمش اولدینی ملاحظه اولنور ایسه عقل انسانی بالتدریج حقیقتی
کشف ایتمش اولدینغه حکم اولنور . تحصیل ملک حقنه
اک اسکی طریق استیلا طریق اولوب یونک بطلانی میدانه
چیقمشدر . اندن صکره سعی و عمل ایله تحصیل ملک طریق
کمشدر؛ بواصول استیلا اصولنه نسبتله دهها محقق و معقول کورینور،
مع مافیه بوده کافی دکادر . اک صکره حق تملکی یا قانونده
یا مقاولهده ارامق نظریاتی کمشدر؛ معلومدرکه بومقاوله هیئت
اجتماعیه اعضای یکدیگرینک ملکی تصدیقه و بوکا رعایت
مجبور ایتدیره جک بر مقاوله عمومیه دیمکدر؛) یعنی عموم بیننده
مرعی الاجرادر ، کآن هر فرد دیگرلرینه سز بنم حق تملکمی
تصدیق ایتک مقابله سنده بن سز کیلری تصدیق ایتدم دیو

ايجاب و بونلرده اولوجهله قبول ايدرك برمقاوله عقد اولنمش
 كيدير، بنابرین تحصیل ملكك اك قوی طریق بودر؛ (استیلا
 ایسه بر شخصك معامله منفرده سیدر؛) مثلاً بن اول کلدমেده
 ضبط ایتدم دیرایسه شخص دیکرده «واقعا سن بندن اول
 کلمش ضبط ایتش ایسه کده بکاده لزومی اولدیغندن بنده شمدي
 کلهرك ضبط ایتدم و همدید ضبطمده در، المدين چیقارنم» ديمك
 ممکندر؛ (سعی و عمل استیلايه نسبتله ده قوی ایسه ده بوده
 بر شخصك معامله منفرده سندن عبارت اولدینی ایچون بونده ده
 بشقه لری طایفه مجبور دکلز دیه ییلورلر. فیهتك خلاصه مذهبی
 ملكك ضمان و تأمین ایچون برمقاوله سیاسیه طلبندن عبارتدر یعنی فیهت
 ملك حقی شخصیتده ارامشدر. قول جمهوره کلنجه خلاصه سی انلر
 طرق شخصیه یی ده طرق سیاسیه یی ده قبول ایدرلر فقط بوايکی نوع
 طریقاری بر بندن ایرمیوب ایکی نوعدن مرکب برقاعده چیقارلر.)
 § ۱۳۸ — (ملك تقسیمی بحثده) (۱۲۴) ملك
 تقسیم اوله کوره ایکی قسم اولوب بری مادی و دیگرى مغوى
 ایدوکی بیان اولنمش اولدینی کی ملك مادی وسائط و طرق
 معلومه ایله از جمله حق استیلا و سعی و عمل و مقاوله و قانون ایله
 تصرف اولنوب خارجه و جودی اولان برشی ديمك اولدینی
 بوفصلده شمدي به قدر وقوع بولان افاداتدن مستفاد اولمشدر
 و (شمدي به قدر ملك مادیدن بحث اولدینی مثلاً بوندن صکره
 ملك مغویدن بحث اولنه جقدر.)

ملک معنوی

§ ۱۳۹ - (ملک معنوی Les biens spirituels متعدد

اولوب باشلوجهلری محصولات عقلیه و علمیه La culture intellectuelle در. مثلاً صرف ذهن ایدیلهرک تألیف ایدیلان بر کتاب و یا ایجاد و اختراع اولنان برشی کبی. ملک مادی طرق معلومه واسطه سیله حصوله کلدیکی کبی او کتاب و اوشیده اعمال ذهن و فکر ایله حصوله کلور.)

§ ۱۴۰ - (حق تألیف و) حق (ایجاد و اختراع

یاخود حق ملک عقلی (یعنی صرف عقل واسطه سیله حصوله کلان ملکه دائر حق) Le droit d'auteur ou de la propriété dite intellectuelle : ملک عقلینک یعنی محصولات عقلیه نك ملک مادی کبی اولسی و انك حکمنده و درجه رعایتنده بولنسی و معاملاتنك محدود اولسی و وارثه انتقال ایتسی مسئلهلری مسائل عظیمه دندر. ملک مادیده نصل تصرف اولیور ایسه محصولات عقلیه دهده اوله جه تصرفه حق اولق کبی کورینور؛) چونکه بر آدم چالیشوب ملک مادی حصوله کتوردیکی کبی بعض کره ینه ثمره سعی اوله رق ملک عقلی یعنی محصولات عقلیه حصوله کتورر؛) لکن محصولات عقلیه یه ملک مادی کبی معامله ایدیلوب ایدلما مسنده کی ارا پك مختلفدر. شمدی یه قدر

حکما بومحصولات عقلیه به متعلق اولان حق مسئله سنی روما اصول تصرفیه سنه تطیقا حل ایتک ایستشاردر ؛ و بنابرین بو مسئله کرکی کبی حل اولنه مامشدر ؛ چونکه رومالولرک ملک حقنده کی اصولری بومسئله نک حلنه کافی دکلدر . دیمک که کافی اولیان برقاعده ایله حل ایتک ایستشار و بناء علیه حل ایده ما . مشر و بوضورتله بینلرنده اختلاف ظهور ایتشدر . چونکه ﴿ رومالولر صلح وسلم ایله یشایان برقوم اولیوب دائما تغلب واستیلا طریقیه کچینورلر ایدی ؛ ﴾ روماقومنک افکاری سعی وعمله مصروف اولیوب بلکه فتح و تغلبه مصروف ایدی ، تصرف خصوصنده کی قاعده لری فتح و تغلب خصوصنه مبنی ایدی ، بوفکر ایسه سعی وعمله اهمیت ویرمز . واقعا رومالولر دخی سعی وعملی برطرف ایتیوب بوکا دائر دخی قاعده لری وارایدیسه ده زما . نمزده کی کبی محصول وجوده کتورمک و ایش ایشلک قاعده لری کافی درجه ده دکل ایدی ؛ ﴿ اولیه عسکر برقوم محصول مادی به متعلق اوله رق وضع ایتدکاری قانونلرنده محصول عقلی بی نظر مطالعیه الیه جقلری طبعیدر ؛ ﴾ بنابرین بونلر محصول عقلی به دائر حقوق وضعنه قادر اوله مزلر ، بو طبعیدر . شمدیکی زمانمز رومالولرک زمانلرینه اصلا مقیس دکلدر ، اوزمان مثلا صنعت طباعت ظهوره کبامش والات و ادوات استعمالی توسع ایتامش ایدی ؛ اولیه ایسه اوزمانده بوملک عقلی ماده سنه سعی وعمل ماده سنه دائر رومالولرک وضع ایتدکاری قواعد البته زمانمزده

کفایت ایتمز . ﴿ بناء عليه شمدى ملك عقلى ي رومالورك ملك
ماديسنه تطبيق ايتك وقانونلرينى مرعى عد ايتك هيچ جائز دكلدر
والحاصل ملك عقلى مسئلهسى روما قانونيله حل اولنه مز .
﴿ شوراسى مسلدر كه ملك مغوى انسانك هر درلو مقاصد
مشروعهنك حصولنى تسهيل ايتك وارزوى مشروعى تسكين
ايتك خصوصلى نظر دفته النور ايسه بو ملك مغوينك تصر -
فك دخى محصولات ماديه ده اولدينى كى برقاعده تحتة النسي
لازمدر . ﴿ مثلاً برى بر قلم ايجاد وامور خلقى تسهيل ايدىور ،
ديكریده بر تاريخ كتابى يازوب خلقه معلومات اعطا و بوصورتله
انلرك ارزوسنى تسكين ايلور ؛ بونلر بر طاقم محصولات عقليه در .
كه كندولرينه متعلق حقوقك دخى محصول مادى يه متعلق حقوق
كى قاعده تحتة اولسى اقتضا ايدر . ﴿ رومالورك وضع ايتدىكى
قواعد حقوقده ملك مغوى يه دائر برشى اولدينى فرض اولنسه
بيله مادامكه ملك معنويده ملك مادى كى ايشه يرايور قياس
طريقيله اولسون ملك مغوى حقنده دخى قاعده وضع اولنمق
لازم كلور . ﴿

؟ ۱۴۱ - ﴿ اشته بو ملاحظاته مبنى هر كس مؤلفلرك
ومخترعلرك حقنى محافظه يه ميل واستعداد كوستر مشدر . ﴿ لكن
بو كا دائر مسائل لازمه حقوق كتابلرنده كورلمديكندن هيئت
اجتماعيه بونك ايچون حقانيت فطريه لرينه و وجدانلرينه مراجعت
ايتديلر وبونك حمايه شايان اولديغنى اكلاديلر ، انك ايچون حق

تأليف و اختراعك محافظه سى طلب اولمغه باشلدى و ﴿بر مؤلفك حقيده بر كمى يابانك حق كې محافظه اولمليدر دنيلدى و بوحقك حمايه سى دخی بدايت حالده مثلاً بر كتاب مؤلفنه طبع امتيازى و یرمك كې وسائط ايله تأمين ايدلدى. بونیده کافی كورمییوب قرن اخیر اواسطنده حق تألیف دخی ملك مادى حكمنده طو. تلمسى و مؤلفك وفاتنده وارثه انتقال ایتمسی و بنابرین مؤلفك رضاسى اولیهرق باصیلان کتابلره مال مسروق نظریله باقلمسى استدیله و بعض مملكتلرده بویله جه قانونلر وضع اولندی. فقط بونكله برابر ملك معنویده بوقدر ایلرو كتمكه بعض مؤلفلر اعتراض ایدرك بونك ملك مادى یه قیاس اولنمسی قیاس مع الفارقدر و بنابرین بوحق واقع دكلدر دیدیلر. حتی بومؤلفیندن بعضیسی حق تألیف و حق اختراع كې ملك معنویك ملكیتى کلیا انكار ایدرك «تألیفده ملكیت حق یوقدر، بوجهته بلا رضا باصیلان كتابه مال مسروق و یا غیر مشروعدر دینه مز» دیدی. بعضیلریده بوايكي مذهب ییننده برحد وسط ارایوب مؤلفلرده برحق ویر. لمسی طرفنى ترجیح ایتدیله و «بوملك معنوی نه ملك مادى كې بتون بتون تعرضدن مصون اولمليدر ونده هر درلو مداخله و تقلیده مشروع نظریله باقلمليدر» دیدیلر. اشته بویله باشلوجه ايكي مذهب حاصل اولهرق بین العلماء اختلاف اولنقله برابر زمانزده عموماً برشى اوزرینه اتفاق اولنمشدر؛ شویله كه بر اثرى مؤلفنك حیاتنده رضاسى اولیهرق كمسنه طبع ایده مز، ایدرسه

باصیلان کتابلر لندن النهرق بلامصرف مؤلفه ویریلور. مع هذا اکثریسی علم حقوق اربابندن اولیان بعض علما ومؤلفین بوکا بسبتون ملک مادی کی معامله اولنمسنده و حتی وارثه و وارثندن وارثه الی مالانهایه انتقال ایتسنده حالا مصرفدرلر.)

§ ۱۴۲ — (شمدی نومذهبلری تدقیق ایدلم: بقالم هانکیسی دها معقولدر: قول جمهوره کوره بوحق تألیف ایله ملک مادی بیننده کلی فرق وادر؛ حق تألیف طبقی برشی قیلندن عد اولنه مز؛ هله بونک ارثا انتقال ایتسی حقسزدر، اولسه اولسه یالکزمؤلفه منحصر قالمیلدر (یعنی یالکزمؤلفه طوغریدن طو- غرییه وارث اولنلره انتقال ایده ییلیدر)، حتی انسانلر بیننده معارفک نشری قضیه معقولهسی بونی ایجاب ایدر. واقعا جمهورک بوقولنه قارشو «نشر معارف جهتسه خدمت وسییت فائده و منفعت اولدیغنده شبهه یوقدر، الحق بز حق بحشده یز، بونده حق واریسه مانع اولورده او منفعتسه ترجیح ایدلمک لازم کلور دیو اعتراض وارد اوله بیلور ایسه ده عموم انسانلرک منفعتی نقطه نظرندن بوکا برجهته قدر جواز ویریه بیلور. قیاس مع الفارقدر دیانلر «بوحق تألیف حد ذاتنده بر ملک دکلدر، بلکه سعی عقلی ایله ملک تحصیلنه برواسطه مشروعدر» دیرلر. بو عمل عقلینک عمل عادیدن فرقی شو درکه بو عمل عقلی اندن مطلوب اولان مالکی درحال حصوله کتوره مز،) نوقت صاتیلور واقچه قزانیلور ایسه اولوقت ملک اولور، (دیگری) یعنی ملک مادی

«ايسه» بويله دكلدر اندن منتظر اولان فائده يي ﴿ درحال حصوله كتورر. بواملاك ماديه نك نه مقصده موجود اولديغي ملاحظه ايديلور ايسه بومدعانك حقيقتي تسليم اولنور. ﴾

﴿ بوحق تأليف ملك حكمنده طو تلق ايچون — بوا دعه بولنان مؤلفر — بوني بر محصول مخصوصي كي كوسترديلر : بومؤلفر ديمشركه : « علوم و فنونه متعلق افكار بالقوه عمومأ انسانلرده موجوددر ؛ برمؤلفده اشتغال ايتمش، بر اثر علمي ميدانه چيقارمش، صكره برشكل مخصوصه قويمش واولوقت انك ملك مغويي اولمشدر؛ بويله بر عمل ماده ابراز اولندقدده ملك اولور ﴾

ملك مادي ايله ملك مغوى استحصالى بيننده بيوك برفرق يوقدر، مثلاً اينجو دكرلرده موجود ايدى، انى انسان وجوده كتورمدى، لكن صكره برى صوينه رق دكر ك قعرينه ايندى بر طاقم زحمتلر اختيار ايتدى و مخاطره لرى كوزينه آلدى و نهايت ميدانه چيقار. مغه موفق اولوب اكا مالك اولدى ؛ اشته مسائل علميه ده بويله در، بالقوه انسانلرده موجود ايدى، برمؤلف انلرى اوتهدن بريدن طويلادى و ياخود انلردن استنتاج طريقيله ديكر برفائده ميدانه چيقاردى و بر طاقم محن و مشاقى تحمل ايدرك انى وجوده كتوروب كنينده نسبت ايلدى، بوسيدن طبق ملك مادي كي انك اولملى وورثيه انتقال ايتليدر. هر تقدّر تأليف و اختراع مغوى بر امر ايسه ده مؤلف انى ماده برشكله افراغ ايتدى، هم معناً وهم ماده انك ملكى اولدى، مادامكه مسائل علميه خلقك نظرنده

مجهول و متفرق و یا مبهم آیدی بالفطره انسانلرده موجود اولسه بيله اتی یازوب وجوده کتورمکه ملک مادی حکمنی الدی، بناءعليه ملک مادی نصل تعرض و خللدن مصون ايسه بوده اوليه مصون اولمليدر.

§ ۱۴۳) الحاصل بوراده ملک مغويدين مقصود بالذات عد ايلديکمز حق تأليف و حق ایجاد مختلف فيهدر و حل اولنه مامشدر؛ واقعا بعض يرلرده قبول اولنش و بونک حقنده قانونلر وضع اولنش و اليوم مرعي بولنشدر؛ مع مافيه بونک خلافتده اولنلرده حالا واردر؛ بعضيلر بو حق تأليفك سائر مال کي ورثيه انتقالی تجویز ايتشلردر؛ بعضيلر هيچ بويله عد ايتزلر، و بعضيلری ايکيسي اورطه سی کيدر. لهنده اولنلر « بوعلوم و فنونه متعلق اولان افکار جمله نك ذهنتده در، بری بونکله بالاشتغال صرف ذهن ايدرك بر اثر علمی ميدانه قور و ثرة سعي اوله رق برشی بالاخترع بر شکل مخصوصه وضع ايدر؛ اشته بوشی انك مادی ملکی اولديعی کي او اثرده معنوی ملکی اولمليدر و هر ايکيسنده بر معامله اولمليدر » ديرلر. خلافتده اولنلر یعنی جمهور علما بونی جرح ايدرلر و ديرلرکه: « واقعا عمل عقليده شخصيتك اك حقيقي بر اثيريدر، بوعمل عقلي برشیده ظهور ايدرسه انك دخی بر قیمت جديده سی اولمليدر. بوراسی مسلدر؛ فقط بوايکی عمل) یعنی عمل عقلي ايله ملک مادی بي حصوله کتورن عمل جسمانی) ينسنده کلی فرق واردر، بنابرین عمل

عقلى يى عمل جسمانى يه قياس قياس مع الفارقدر؛ اولاً عمل علمى ايله مشغول اولان آدمك بوعمل واسطه سيله سرمايه عقلى وقوه محصله سى ارتبار، اشته بويله برفائده حاصل اولور، ﴿ديك كه انك باشلوجه قزاجى و كارى بودر؛ ثانياً ملك مادينك خلافتنه اوله رق نشر واعطا ايله كندينك اثرينه نقصان كلز و تقدر صرف اولنسه بزكونه خلل طارى اولمز، كتابنك نسخه سنى ويررسه اصل كتاب انده بولنور، ﴿اكر طبع و نشر اولنسه قيمتسز و اعتبارسز قالور، ﴿طبع و نشر ايديلورسه اولوقت انك اعتبارى ارتر و قيتى ترايد ايدر؛ اشته مؤلفك اك بيوك استفاده سى بودر. حالبوكه عمل جسمانى ايله حصوله كلان ملك مادى بويله دكلدر. صرف ايدملكه تناقص ايدر و بشقه سنى ويرلسه بيله اعتبارى و قيتى باقى اولور، مثلاً بردرزى برقات البسه ديكمش اولسه بونى صاتمسه بيله قيتى يرنده در، هيچ اولمزسه كندى كيوب مستفيد اولور. ﴿اشته بوجه تله محصول معنوى محصول مادى يه مقيس دكلدر. بناء عليه بويله برحق بزكونه اساس معقوله يه مستند اوله مز. اكر بر مؤلفك ملكى محصولات ماديه كى قالميدر ديرايسه مكصدينه منافى اولور؛ چونكه بوندن مقصد نوع نى ادمه خدمت ايدى وعمومه شمولى ايدى، ﴿اوت! بونك بتمز و توكنمز فائده سنى عمومه نشر ايتك ايچون ايدى؛ ﴿بويله بزخير معنوى شخص واحدك يد اقتدارينه حصر اولنه مز؛ بوجه تله بر كيسه نك مال مخصوصى اوله مز. ﴿يعنى ملك معنوى

جمله‌یه شامل اولسی لازم کلان بر نعمت مغنویه‌نک واسطه نشریدره
انی بن بولدم ویا بن سولدم دیهرک کندینه حصر ایتک وورثه‌سنه
انتقال ایتدیرمک جائز دکلدر، عمل عقلی حد ذاتنده عذیم‌النقاد
اولان علوم و معارفی و بتمک و توکمک بیلان خیراتی عالمه نشر
و تعمیم ایتمه واسطه‌در، بویله بر واسطه‌نی شخص واحده حصر
ایتک جائز اوله‌مز.

§ ۱۴۴ - «محصول عقلینک محصول مادی کی اوله مامسنک
دیگر سیلری ده‌ا وارددر. شویله که بو محصول عقلینک کمیت
و کیفیتی و قدر و اعتبار و حیثیتی و رأس المالی ملک مادیده اولدینی
کی تعیین و تحدید اوله‌مز: مثلاً بر ترلا صاتون اله جنی وقت
کیمکدر و کیمدن و تقدیره المش ونه وجهله اصلاح ونه علاوه ایتشددر
بورالری بیلنور واکا کوره بهاسی تقدیر اولنور؛ حالبوکه محصول
عقلیده بونلرک هیچ بری یوقدر؛ بر کتابه نظر دقتله باقلسه چوق
یرلری اسلافک حصوله کتیردیکی سرمایه‌دن عبارتدر، احتمال که
مؤلفیده بعض شیلر علاوه ایتشددر، لکن اصل طوغریسی کنیدیسی یالکز
تنسیق اشکال ایتمش و کتاب یا ایتشددر؛ اشته اصل بوکا تبدیل‌الشکل
لاجل الاکل دیرلر! هر شیکه ایتدیریکی دکلدر و هر شیکه یکیدرای دکلدر!
اشته بو حالده بر مؤلفک اختراع کرده‌سی و محصول عقلی اولان مقدارله
معارف عمومیه» ء اسلاف و معاصرین «دن الدینی» و بعض
یکی مؤلفلر کی عجمیه چال‌دینی «مقداری تعیین ایتک قابل دکلدر.

صنایعده اولان مخترعات دخی بوقیلدندر؛ اکثریا مخترع دنیلان آدم سائرلرینه نسبتله براز ده ا کمال ایدندر. ﴿ زیرا بر اثره چوق کیمسه لر چالیشور وهرکس الندن کلدیکی مرتبه برشی علاوه ایدر، صکره بری اکا موفق اولور، اکر بوکا حق ویرر ايسهك اوقدر کیمسه لرك چالشدیغنی بر آدمه حصر ایتمش اولورز. ﴿ بوکاده مؤلف ویا مخترع شویله جواب ویره بیلور: « بوتألیف یا اختراع بندر دیمیورم، بن یالکز تلفیق ایتدم، بوشکله قویدم، بونده اولوبده بشقه یرلرده اولنر الله بیلور، فقط بنمکنه طوقناملیدر، چونکه پاره قزائمق ایچون یایدم، مرزوة عمومه ترك ایدم. « اشته جمهورك قولى بومرکرده (یعنی بش سطره کلنجیه قدر افاده اولنان صورتده) اولوب بونلر وراثة انتقالی تجویز ایتزلرو » تجویز ایتک امور مادیه ایله امور مغنویه نی فرق و تمیز ایتماک اولور و بویله برحق قبول ایتک اصلاحات و ترقیات مدنییه مانع اولمقدرد و انسانک انسانیتله اولان مناسباتی قطع ایتمکدر و فردك جمعیه قارشو اولان وظائفی ابطال ایلکدر دیرلر. ﴿

§ ۱۴۵ — ﴿ هانکی مذهب و قول مرجح طو تلیدر؟ بنم رأی مجبه (یعنی معلم الفخم و کمال مجسم حضر تترینک رأی عالی فاضلانله لرجه) ملك مغنوی بر درجه یه قدر ملك مادی کبی عد اولمیلیدر و الیوم متمدن مملکتلرده دخی بو اصول جاریدر، یعنی معترضلرك اعتراضاتی مقبول دکلدرد؛ بری قوای جسمانیه سی

صرفله وجوده کتوردیکی شیئه مالک اولوبده قوای روحانیه سنک
صرفیله وجوده کتوردیکی شیئی نیچون تملک ایتسون؟!
او صورتده هرکس احتیاجنک تسویه و دفعی محصول مادی
وجوده کتورمکده ارار، محصولات مغنویه وجوده کتورمکه
اتعاب ذهن و فکر ایتمز، بوندن کرک کندیجه و کرک عمومجه نتایج
وخیه تولد ایدر؛ بنابرین حق تألیفده ملک مادی کی عد
اولنمیدر.

§ ۱۴۶ - ﴿اکثریا کتاب تألیفی ایچون دولترجه و بعضاده
اغنیا طرفندن مکافات وعد اولنور؛ صکره استیانلر جالیشور،
اوله برر کتاب یاپرلر، اربابی تدقیق ایدر، هانکیسی مطلوبه
موافق کوریلورسه انک صاحبه مکافات ویررلر، بعضکره
برقاچی مکافاته نائل اولور﴾ ده برنجی درجهده اولانه برنجی
وایکنجی درجهده بولنانلره ایکنجی درجهده مکافات اولنور.
بونلر بتون محصولات فکریه یی تکثیر و اربابی تشویق مقصدیله
یاسیلان شیردر.

مؤلفینک اغلبی بوکی معاونت حکومته اشد احتیاج ایله
محتاجدرلر. حتی برلینده بردفعه برقاچ کتاب موقع رقابت
و مکافاته وضع اولنوبده توزیع مکافات ضمیمه اجتماع ایدن مجلس
عظیمده اسامی مؤلفین دفعا للغرض مکتوم طوثلوق مناسبتیله
مثلا تاریخه اثر مکافاتی شوکتابک صاحبی قزانندی دیواعلان
اولنجه ضعیف البنیه برآدم قیام و صاحب اثر کندوسی ایدوکی

ن ایدرك عرض تشكر ایتش وعقبنده فلان علمه دائر مكافاتیده
 ن كتابك صاحبی قزاندی دیو اعلان قلنجیه ینه اوضعیف آدم
 م وتشكر ایلش والحاصل مكافات اعلانلری ختام بولنجیه
 ر او آدم قیام وعرض تشكرده دوام ایتش ایسه ده اك صوك
 شكری ایفا ایدرایكن بالمشدر. بونی خلق اول امرده تأثره حمل
 یتش ایسه ده اجلقدن نشأت ایتدیكى اكلاشمشدر !!

لاحقه

تزوج بحثه دائردر

۱۴۶ — علم حقوق احكامیده تزوجه
 نعلق ایلدیكندن تزوجك ماهیت وطیعتی وسبب و حکمتی وبوندن
 مقصد نه ایدوکی بئلك لازمدر. خاندان وعائله وفاملیا دنیلان شی
 تزوج اوزرینه مبتیدر؛ تزوج اولسه نه ابوت وبنوت ونه ده
 سائر قرابت اولور؛ بونلرك هپسی تزوج اوزرینه مبتیدر.
 الحاصل تزوج اولسه یاخود اورته دن قالقسه ارتق بونم اوغلدر
 یا فلانمدر کی سوزلری سوللكه محل قالمز. واقعا هر فرد انسانی
 نوع بشرك بر واحد قیاسیسی حکمنده در؛ لکن اندن ده ا مکمل
 بر واحد قیاسیسی واردر که زوجیندر؛ بوده بر ارکک برقادیندن
 مرکبدر؛ بر ارککله برقادین نوع بشرك واحد قیاسیسیدر.
 زوجیندن هر بری بر نصف اعتبار اولور؛ کرک ارکک وکرک
 قادینک ترکیبلری یکدیگره بکزه مز؛ بعض جهتلرجه ینلارنده

جهت جامعه وار ایسه ده هربری بشقه در؛ لکن برلشنجه ایکه
بر واحد قیاسی اولور. دیمک اولورکه هر فرد انسانی دهازی
مکمل اولمق وبقای نسله خدمت ایتک ایچون تزوج ایتلیدر
اولوقت زوجیندن بر شخص تام حاصل اولور. اشته هرارکک
وهر قادین بو نقصانی حس ایله اکیاله چالیشیور؛ بونلرک
یکدیگره میللری وعشق دیدیکمز شی هر برینک کندنده اولان
نقصانی درک ایدوبده انی جبر واکمال ایتمکه سعیدر.

۱۴۷۸ - (تزوج بر اتحاد تامدرکه طبیعت انسانیتهک

جمیع جهاتی انده یعنی او تاهل اتحادنده جهت وحدت حاصل
ایدر. وجود انسانی بر روح ایله بر جسمک اتحادندن عبارتدر؛
بوروح ایله جسم یکدیگره اوایله قارشمشدر و اوایله امتزاج
ایتشدرکه شوراسی روح و بوراسی جسمدر دیو تفریق ممکن
اولماز. عشق دخی ایری ایری ایکی شخصک اتحادیدر. عشق
یالکز جسمه تعلق ایتمز، بلکه روحهده تعلق ایدر یعنی جسم
تزوجله نصل مکمل اولیورسه روحده اوایله مکمل اولیور. فقط
صرف جسمانی اولان تزوج اتحاد حقیقی دکلدر، (تعبیر
دیگرله مجرد احتیاجات مادیه و جسمانیه مقصدیله اولان اجتماع
تزوج حقیقی صائلز، (اگر اوایله اولسه انسان بهیمیت درجه سنه
نزل ایتمک لازم کور؛ احوال حیوانلره مخصوصدر. تزوج -
انسان یالکز جسمانی اوله مدینی کی - مجرد روحانیده اوله مز،
اوایله روحانی رابطه دن عبارت اولسه بوکا تزوج دنیله مز؛ عشق

روحانی که — عشق فلاطونی L'amour platonique تعبیر اولنور —

ارککله قادین بیننده بر رابطه محبتدن عبارتدر ، تزوج صائلز .

§ ۱۴۸ — ﴿ تزوج دیدیکمزشی هم جسمانی و همده

روحانی اتحاد اولهدر . اشته بوصفاتی جامع اولان تزوج حیاتک

بر اتحاد قویسیدر ، یعنی ارککله قادین بیننده بر اتحاد قویدر .

بو عشق زوجی بر شخصی دیکرینه ربطایدن محبت اساسیه و متناسبه در؛

بو عشق زوجینک خارجنده اولان هر درلو محبتلر محبت کلیه نک

شعاعی مثابه سنده در؛ محبت کلیه ایسه جسمانی و روحانی زوجیتدن

عبارتدر . بر شخص بو محبت کلیه ایچنده بولندیغی حالده کافه

صفاتی توسع ایدر ودها مکمل اولور و حال حیاتده حصولی

ممکن اولان هر درلو ترقیاتدن مستفید اولور . تزوج حالنده

بولنه رق یکدیگره محبت ایدن شخصین شخصیت جه کسب کمال

ایتدجه ایکسی بیننده تماس نقطه لری یعنی مناسبتلری تراید ایدر

و ایکسی بیننده کی رابطه دها دواملی اولور .)

§ ۱۴۹ — ﴿ بر قادین ایله بر ارکک بیننده رابطه شخصیه

حصولی و بو رابطه دن طرفینک متمتع و مستفید اولسی تأهلک

مقصد کلیسیدر . تأهله نسبت اولئان سائر هر درلو مقاصد

تأهلک مقصد خصوصیسیدر .)

§ ۱۵۰ — ﴿ تزوجک جهت الهیه سینه نظر اولنور ایسه

تزوج شول بر اتحاد درکه اکا جناب حق بر قوه مکونه ویرمشدر ،

بو قوتده تناسل مقام مقدسی (خاصه مقدسه سی) در یعنی تناسل

انسانی وجودہ کلمہ سچون برمنع فیض وبرکندر . طبیعت
جهتیه مطالعہ ونظر اولور ایسہ تزوج عالم مادیدہ ارکک ایلا
قادرین بینده ایکیلک یعنی تعددک وحدتہ منقلب یاخود بیکانہ لک
یکانہ لک منقلب ومتحول اولمسی وزوجینک هم زنک وهم آهنگ
اولمریچون ترتیب اولنمش بر مقصد الہی اولدینی اکلشیلور .
﴿ ۱۵۱ - تزوجک روحہ اولان تاثیراتی بحثہ یعنی

تأثیرات روحانیہ سنہ کلنجہ : تزوج کرک ارککدہ وکرک قادیندہ ال
ضعیف اولہرق موجود اولان قویای روحانیہ بی توسیع واکمال
ایدر یعنی اخلاق و فطانت وقوۃ میزہ ومفکرہ جهت لرجہ چوۃ
ترقیات حاصل اولور میردہ زوجین یکدیگری نی اکمال واصلہ
ایدر یعنی ہر برندہ کی صفات دیگر دہ کیلرک تعدیلنہ سبب اولور
مثلا ارککردہ قوۃ میزۃ عقلیہ وقادیندر دہ مرحمت کبی تأثران
قلیہ زیادہ اولور دہ زوجین بر لشنجہ ارکک قادیندن تأثرات قلیہ
آلور وقادیندہ ارککک قوۃ میزہ سندن حصہ دار اولور وبہ
صور تده ایکسیدہ وجوہلہ استفادہ ایدر . ﴿

﴿ ارکک قبل التاہل کندندن ماعدا کمسنہ بی دوشمنز وزیادہ
چالیشمنز ؛ لکن تاہل ایدنجہ ہم کندینی و ہمدہ زوجہ سنی وبرار
صکرہ اولادینی ملاحظہ ایدرک دہا زیادہ رفاه حالہ یشایہ
دیو زیادہ چالیشور . قادین دخی عقل ودرایتجہ کندینہ فائق
بر کمسنہ نک رفاقتیلہ متمتع ومستفید اولور . اشته بووجہلہ ایکسید
الحادلرندہ ہم آہنگ بر معیشت مرضیہ یعنی رفاه حالہ نائل اولور لر

~~Handwritten text, possibly a list or notes, with multiple lines crossed out.~~

{ ١٢ ١٣ }

